



$$\frac{20}{24}$$

Page 12







R. 11. 148
COMMENTAIRES

DE MESSIRE

BLAISE DE MONTLVC,

Mareschal de France.

Où sont décrits tous les Combats, Rencontres, Escarmouches, Batailles, Sièges, Assauts, Escalades, Prises ou Surprises de Villes & Places fortes : Deffenses des assaillies & assiégées ; Auecque plusieurs autres faits de guerre signalez & remarquables, esquels ce grand & renommé Guerrier s'est trouué durant cinquante ou soixante ans, qu'il a porté les Armes.

Ensemble diuerfes instructions, qui ne doiuent estre ignorées de ceux qui veulent paruenir par les Armes à quelque honneur, & sagement conduire tous exploits de Guerre.

TOME PREMIER.



A PARIS;

Chez GANEAU, ruë S. Jacques, vis-à-vis S. Yves,
à Saint Louis.

M. DCC. XLVI.

Avec Approbation & Permission.

COMPTON
OFFICE

TO THE HONORABLE

THE SECRETARY

OF THE

NAVY

WASHINGTON

DEAR SIR

I have the honor to acknowledge the receipt of your letter of the 10th inst.


and in reply to inform you that the same has been forwarded to the proper authorities for their consideration.

I am, Sir, very respectfully,
Your obedient servant,

J. M. Smith

Chief Clerk

U. S. Navy



A L A
NOBLESSE
DE GASCONGNE.



ESSIEURS, comme
il se void de certaines con-
trées, qui produisent au-
cuns fruits en abondance,
lesquels viennent rarement ailleurs,
il semble aussi que vostre Gascongne
porte ordinairement un nombre in-
finy de grands & valeureux Capi-
taines, comme vn fruit, qui luy
est propre & naturel : & que les
autres Provinces, en comparaison
d'elle, en demeurent comme steriles.
C'est celle-là qui a fait naistre avec
tant de reputation, ces redoutables

A LA NOBLESSE

& illustres Princes de la maison de Foix, d'Albret, d'Armagnac, de Cominge, de Candalle, & Captaux de Buch. C'est elle qui a esleué Pothon, & la Hire, deux fatales & bien-heureuses colonnes, & singuliers ornemens des armes de la France. C'est elle qui en nos iours a fait cognoistre à toutes les nations estrangeres, le nom des Seigneurs de Termes, de Bellegarde, de la Vallette, d'Ossun, de Gondrin, Terride, Romegas, Cossains, Gohas, Tilladet, Sarlabous, & autres gentils-hommes du pur & vray terroïer de la Gascongne, sans mettre en compte ceux qui viuent auïourd'huy, lesquels ardemment incitez des trophées & beaux gestes de leurs predecesseurs, s'esuertuent, comme ils suruiuent à leur belle memoire, d'en rapporter aussi une gloire pareille. C'est vostre Gascongne, Messieurs, qui est un magazin de soldats, la pepiniere des armées, la fleur & le choix de la plus belliqueuse noblesse de la terre, &

DE GASCONNE.

l'effain de tant de braues guerriers, qui peuuent contester l'honneur de la vaillance, avec les plus fameux Capitaines Grecs, & Romains, qui furent iamais.

Mais entre tous ceux, qui extraicts de vostre noblesse, ont iamais portée espée, nul n'a deuancé la proïesse, l'experience & la resolution de cest inuincible cheualier BLAISE DE MONTLVC, Mareschal de France. Ceste prerogatiue d'honneur ne luy peut estre disputée, non plus que celle que le ciel luy auoit donné d'une prompte & merueilleuse viuacité d'entendement, d'une souple & neantmoins tres-retenuë prudence, qu'il descouuroit sur le champ au maniement des affaires: d'une memoire admirable & si riche, qu'il ne s'en void presque point de semblable: d'une parole aisée, forte & courageuse, & pleine d'esguillons d'honneur parmi l'ardeur des combats: & aux affaires d'Estat, d'un langage rassis, rehaussé de poinctes, de

A LA NOBLESSE

raisons & d'argumens : le tout accompagné d'un iugement si clair, & si vif, qu'ores qu'il fut destitué de la faueur des Lettres, si est-ce que la lumiere de son esprit offusquoit la clairté de ceux qui auoient ioinct à vne longue experience vne parfaite & recherchée cognoissance d'icelles.

La plus part de vous, qui l'auiez cognu, & qui auiez combattu sous son enseigne, n'en desirez point de tesmoignage : mais la ieunesse qui n'a point veu ce grand homme, outre ce qu'elle en peut auoir appris, l'entendra au vray par ses siens Commentaires, qu'il vous auoit de son viuant voüez, & qu'il dicta estant malade, & languissant de ceste grande arquebuzade, qui luy froissa le visage au siege de Rabastens, où pour sa derniere main il seruit son Roy, de pionnier, de soldat, de Capitaine, & de General tout ensemble, ne pouuant ceste ame genereuse, entre le liét & le cercueil, encor trouver repos. C'estoit, disoit-il, son ennemy

capital, aussi tirant à la mort, il
commanda qu'on mit sur son tom-
beau ces vers,

Cy dessous reposent les os
De MONTLUC, qui n'eust onc repos.

Il estoit raisonnable, puis que
soutenu de l'effort de vos courages,
il auoit si hautement paracheué tant
de glorieux faicts d'armes, que l'a-
dresse vous en fut faicte, & que
vous eussiez le fruit & le plaisir de
la ramanteuoir dans ses escrits, & y
voir tirer du crayon d'honneur le nom
de vos ayeuls & de vos peres. Et si
ie ne me trompe, il ne se trouuera
point histoire plus diuerse, plus agrea-
ble & plus riche d'enseignements,
pour la conduite & direction de la
paix, & de la guerre, que celle-cy.
On y remarquera comme ie croy, la
difference qu'il y a d'une histoire qui
est composée par vn homme oysieux,
nourry mollement, & delicatement,
dans la poussiere des liures & des
estudes, à celle qui est escrite par vn
vieux capitaine & soldat, esleué dans

A LA NOBLESSE

la poussiere des armées & des batailles.

Je ne sçay quelles histoires anciennes apportèrent ce profit à aucuns , qui en firent soigneusement la lecture , de les rendre en peu de temps tres-sages & tres auisez conducteurs d'armées. S'il est ainsi , celle-cy sur toutes autres , pourra aisément obtenir cest aduantage , & vous instruire (ô genereuse noblesse) de tous les bons & mauuais euenemens, qui suivent l'heur & le mal heur , la valeur ou lascheté, prudence ou inconsideration , de celui qui est chef ou general d'une guerre , ou qui est Prince & maistre d'un grand Estat. Vous avez icy de quoi contenter vostre esprit , assagir vostre valeur , aguerrir vostre prudence , & former le vray honneur d'une escole militaire. Les Commentaires de cest autre Cesar vous en apprendront la maistrise , ils vous y serviront de modele , de miroir & d'exemple. Ils n'ont point de polisseure qui soit fardée , d'artifice qui

soit exquis , d'ornement qui soit estrange , de beauté qui soit empruntée. C'est la simple verité , qui vous y est nuement représentée.

*Ce sont icy les conceptions d'un fort , sain , & pur estomac , qui ressentent leur origine , & leur terroür; conceptions hardies & vigoureuses , retenant encores l'haleine , la vigueur , & la fierté de l'Auteur. C'est luy le premier , qui estant parvenu au faiste de tous les degrez & dignitez de la guerre , a grandement exalié vostre patrie , & par ses armes & par ses escrits , qui feront que le nom des **MONTLVCS** viura glorieux , dans la memoire longue & bienheureuse de la posterité , tesmoignant sans enuie aux siecles à venir que vostre Capitaine & Historien n'a sceu moins sagement entreprendre , hardiment executer , que veritablement & iudicieusement escrire.*

L'IMPRIMEUR

au Lecteur.

ENcore que ces Commentaires, amy Lecteur, ayent esté retiens & corrigez par feu Monsieur le Marechal de Montluc, peu auant sa mort, ayant chargé Monsieur le Commandeur son fils de retirer quelques copies imparfaites qui auoient esté données par vn de ses Secretaires, si est-ce qu'il est venu à nous fort mal correct, par l'incuriosité de ceux qui en auoient pris la charge. Ce qui me fait supplier ceux, qui auront l'honneur de leur pais & de la maison des Montlucs en quelque recommandation, de vouloir remarquer les fautes, qui peuvent estre suruenues sur les noms de

plusieurs gentils - hommes & soldats, desquels les Historiens ne font point mention, & qui nous sont par ce moyen incogneus, ensemble de plusieurs petits lieux de peu d'importance : afin qu'à la seconde edition qui s'en fera, ie les puisse faire voir à la France sans aucune ride. Ce grand Capitaine auoit aussi fait vn Dialogue de la Fortune & de luy, lequel m'a esté donné si mutilé & tronqué que ie ne l'ay voulu mettre au iour sans l'auoir en meilleur estat. Au reste (Lecteur) quelque parti que vous teniez parmi nos miserables diuisions, considerez l'humeur de ce guerrier, & le subiet qu'il traicte : & ne vous fâchez, s'il va son train, & s'il se présente à la posterité tout tel qu'il a esté, non pas peut estre, selon vostre humeur. Adieu.

1. The first part of the document is a list of names and dates, arranged in a columnar fashion. The names are written in a cursive script, and the dates are in a more formal, printed style. The list appears to be a record of some kind, possibly a list of births or deaths.

2. The second part of the document is a series of paragraphs, each beginning with a date. The text is written in a cursive script, and the dates are in a more formal, printed style. The paragraphs appear to be a record of some kind, possibly a list of events or a narrative.

3. The third part of the document is a series of paragraphs, each beginning with a date. The text is written in a cursive script, and the dates are in a more formal, printed style. The paragraphs appear to be a record of some kind, possibly a list of events or a narrative.

4. The fourth part of the document is a series of paragraphs, each beginning with a date. The text is written in a cursive script, and the dates are in a more formal, printed style. The paragraphs appear to be a record of some kind, possibly a list of events or a narrative.

5. The fifth part of the document is a series of paragraphs, each beginning with a date. The text is written in a cursive script, and the dates are in a more formal, printed style. The paragraphs appear to be a record of some kind, possibly a list of events or a narrative.

6. The sixth part of the document is a series of paragraphs, each beginning with a date. The text is written in a cursive script, and the dates are in a more formal, printed style. The paragraphs appear to be a record of some kind, possibly a list of events or a narrative.

7. The seventh part of the document is a series of paragraphs, each beginning with a date. The text is written in a cursive script, and the dates are in a more formal, printed style. The paragraphs appear to be a record of some kind, possibly a list of events or a narrative.

8. The eighth part of the document is a series of paragraphs, each beginning with a date. The text is written in a cursive script, and the dates are in a more formal, printed style. The paragraphs appear to be a record of some kind, possibly a list of events or a narrative.

9. The ninth part of the document is a series of paragraphs, each beginning with a date. The text is written in a cursive script, and the dates are in a more formal, printed style. The paragraphs appear to be a record of some kind, possibly a list of events or a narrative.

10. The tenth part of the document is a series of paragraphs, each beginning with a date. The text is written in a cursive script, and the dates are in a more formal, printed style. The paragraphs appear to be a record of some kind, possibly a list of events or a narrative.

A P P R O B A T I O N.

J'AI lû par ordre de Monseigneur le Chancelier, *les Commentaires de M. de Montluc*, &c. & n'y ai rien trouvé qui en doive empêcher la réimpression. Fait à Paris ce 20 Juillet 1745. FONTENELLE.

P E R M I S S I O N.

L O U I S, par la grace de Dieu, Roi de France & de Navarre, à nos amés & feaux Conseillers, les Gens tenans nos Cours de Parlement, Maîtres des Requêtes ordinaires de notre Hôtel, Grand-Conseil, Prevôt de Paris, Baillifs, Sénéchaux, leurs Lieutenans Civils, & autres nos Justiciers qu'il appartiendra, SALUT, Notre bien amé JEAN LUC NYON fils, Libraire à Paris, Nous a fait exposer qu'il desireroit faire réimprimer & donner au public des Livres qui ont pour titre, *Commentaires de Blaise de Montluc, Maréchal de France; Mémoires de Montecuculi*, s'il nous plaisoit de lui accorder nos Lettres de Permission pour ce nécessaires. A CES CAUSES, voulant favorablement traiter l'Exposant, Nous lui avons permis & permettons par ces Présentes de faire réimprimer lesdits livres, en un ou plusieurs volumes, & autant de fois que bon lui semblera, & de les vendre, faire vendre & débiter par tout notre Royaume pendant le tems de *trois* années consécutives, à compter du jour de la datte des Présentes. Faisons défenses à tous Imprimeurs, Libraires & autres personnes de quelque qualité & condition qu'elles soient, d'en introduire d'impression étrangere dans aucun lieu de notre obeissance; à la charge que ces Présentes seront enregistrées tout au long sur le Registre de la Communauté des Libraires & Imprimeurs de Paris dans trois mois de la datte d'icelles; que la réimpression desdits Livres sera faite dans notre Royaume, & non ail-

leurs , en bon papier & beaux caracteres , conformément à la feuille imprimée , attachée pour modèle sous le contre-scel des Présentes ; que l'Impétrant se conformera en tout aux Réglemens de la Librairie , & notamment à celui du 10 Avril 1725 ; qu'avant de les exposer en vente , les Imprimés qui auront servi de copie à la réimpression desdits Livres seront remis dans le même état où l'Approbation y aura été donnée es mains de notre très cher & feal Chevalier le Sr DAGUESSEAU , Chancelier de France , Commandeur de nos Ordres , & qu'il en sera ensuite remis deux Exemplaires de chacun dans notre Bibliothèque publique , un dans celle de notre Château du Louvre , & un dans celle de notre dit très-cher & feal Chevalier le Sr DAGUESSEAU , Chancelier de France ; le tout à peine de nullité des Présentes , du contenu desquelles vous mandons & enjoignons de faire jouir ledit Exposant ou ses ayans causes pleinement & paisiblement , sans souffrir qu'il leur soit fait aucun trouble ou empêchement ; voulons qu'à la copie desdites Présentes qui sera imprimée tout au long au commencement ou à la fin desdits Livres , foi soit ajoutée comme à l'original. Commandons au premier notre Huissier ou Sergent sur ce requis , de faire pour l'exécution d'icelles tous actes requis & nécessaires , sans demander autre permission , & nonobstant clameur de Haro , Chartre Normande , & Lettres à ce contraire. CAR tel est notre plaisir. Donné à Paris le fixième jour du mois d'Août , l'an de grace mil sept cent quarante-cinq , & de notre Regne le trentième. Par le Roi , en son Conseil.

SAINSON.

Registré sur le Registre XI. de la Chambre Royale & Syndicale des Libraires & Imprimeurs de Paris , N. 489. fol. 425. conformément aux anciens Réglemens , confirmés par celui du 28 Février 1723. A Paris le 14. Septembre 1745.

VINCENT , Syndic.



COMMENTAIRES
DE MESSIRE
BLAISE DE MONTLUC,
Mareschal de France.

LIVRE PREMIER.



'ESTANT retiré chez moy ,
en l'aage de soixante &
quinze ans , pour trouver
quelque repos, apres tant &
tant de peines par moy souffertes pen-
dant le temps de cinquante-cinq ans ,
que i'ay porté les armes pour le serui-
ce des Rois mes maistres , ayant pas-
sé par degrez , & par tous les ordres
de Soldat , Enseigne, Lieutenant , Ca-
pitaine en chef , Maistre de Camp ,
Gouverneur des Places , Lieutenant
de Roy és Provinces de Toscane &
de la Guyenne , & Mareschal de
France : me voyant stropiat presque

Tome I.

* A

*L'occa-
sion qui a
esmeu le
sieur de
Montluc
d'écrire.*
 de tous mes membres , d'arquebuza-
 des , coups de pique & d'espée , &
 à demi inutile , sans force & sans es-
 perance de recouurer guerison de cet-
 te grande arquebuzade que i'ay au
 uisage : apres auoir remis la charge
 du Gouuernement de Guyenne entre
 les mains de Sa Maiesté, i'ay voulu
 employer le temps qui me reste , à
 descrire les combats ausquels ie me
 suis trouué pendant cinquante &
 deux ans que i'ay commandé : m'as-
 seurant que les Capitaines qui liront
 ma vie , y verront des choses desquel-
 les ils se pourront ayder se trouuans
 en semblables occasions , & desquel-
 les ils pourront aussi faire profit , &
 acquerir honneur & réputation. Et
 encore que i'aye eu beaucoup d'heur ,
 & de bonne fortune aux combats que
 i'ay entrepris , quelquefois (comme
 il sembloit) sans grande raison , si ne
 veux-je pas que l'on pense , que i'en
 attribué la bonne issue , & que i'en
 donne la louange à autre qu'à Dieu.
 Car quand on verra les combats où
 ie me suis trouué , on iugera que c'est
 de ses œuvres. Aussi l'ay-ie tousiours
 inuocé en toutes mes actions avec
 grande confiance de sa grace. En quoy

il m'a tellement assisté, que ie n'ay iamais esté deffait, ny surpris en quelque fait de guerre où i'aye commandé : ains tousiours rapporté victoire & honneur. Il faut que nous tous, qui portons les armes, ayons deuant les yeux, que ce n'est rien de nous sans la bonté diuine, laquelle nous donne le cœur & le courage pour entreprendre & executer les grandes & hazardeuses entreprises qui se presentent à nous.

Et pource que ceux qui liront ces Commentaires, lesquels déplairont aux uns & seront agreables aux autres, trouueront peut-estre estrange, & diront que c'est mal fait à moy d'écrire mes faits, & que ie deuois laisser prendre cette charge à vn autre, ie leur diray pour toute réponse, qu'en écriuant la verité, & en rendant l'honneur à Dieu, ce n'est pas mal fait. Le témoignage de plusieurs qui sont encore en vie, fera foy de ce que i'ay écrit. Nul aussi ne pouoit mieux représenter les desseins, entreprises & executions, ou les faits suruenus en icelles, que moy-mesme, qui ne dérobe rien de l'honneur d'autrui. Le plus grand Capitaine qui

Cesar. ait iamaïs esté, est Cesar, qui m'en a monstté le chemin, ayant luy-mesme écrit ses Commentaires, écriuant la nuit ce qu'il exécutoit le iour. L'ay donc voulu dresser les miens mal polis, comme sortans de la main d'un Soldat, & encore d'un Gascon qui s'est tousiours plus soucié de bien faire que de bien dire : lesquels contiennent tous les faits de guerre ausquels ie me suis trouué, ou qui se sont exécutez à mon occasion, commençant dés mes premiers ans, que ie sortis de page, pour monstter à ceux que ie laisse apres moi, qui suis aujourd'huy le plus vieux Capitaine de France, que ie n'ay iamaïs eu repos, pour acquérir de l'honneur en faisant seruice aux Roys mes maistres, qui estoit mon seul but, fuyant tous les plaisirs & voluptez qui destournent de la vertu & grandeur, les ieunes hommes que Dieu a doüez de quelques parties recommandables, & qui sont sur le point de leur auancement. Ce n'est pas vn liure pour les gens de sçavoir, ils ont assez d'Historiens, mais bien pour un Soldat, Capitaine, & peutestre qu'un Lieutenant de Roy y pourra trouuer dequoy apprendre. Pour

le moins puis-je dire que i'ay écrit la verité, ayant aussi bonne memoire à present que i'eus iamais, me resouvenant & des lieux, & des noms, combien que ie n'eusse iamais rien écrit. le ne pensois pas en cét aage me mesler d'un tel mestier : si c'est bien ou mal, ie m'en remets à ceux qui me feront cét honneur de lire ce liure, qui est proprement le discours de ma vie.

*Grande
memoire
du Sieur
de Mont-
luc.*

C'est à vous, Capitaines mes compagnons, à qui principalement il s'adresse : vous en pourez peut-estre tirer du profit. Vous devez estre certains, que puis qu'il y a si long-temps que ie suis esté en votre degré, & ay si longuement exercé la charge de Capitaine de gens de pied, de Maistre de Camp par trois fois, & de Colonel, il faut que vous croyez, que i'ay retenu quelque chose de cét estat-là, & que par longue experience i'ay veu aduenir aux Capitaines beaucoup de bien, & à d'autres beaucoup de mal. De mon temps, il en a esté degradé des armes & de Noblesse, d'autres ont perdu la vie sur vn échaffaut, d'autres deshonnorez & retirez en leurs maisons, sans que iamais les

Roys ny autres en ayent voulu faire plus compte. Et au contraire i'en ay veu d'autres paruenir, qui ont porté la picque à six francs de paye, faire des actes si belliqueux, & se sont trouuez si capables, qu'il y en a eu prou, qui estoient fils de pauvres laboureurs, qui se sont auancez plus auant que beaucoup de Nobles, pour leur hardiesse & vertu. Et pource que toutes ces choses sont passées pardeuant moy, i'en puis parler sans mentir. Encore que ie sois Gentilhomme, si suis-je neantmoins paruenu degré par degré, comme le plus pauvre Soldat, qui aye esté de long-tems en ce Royaume: car ie suis venu au monde fils d'un Gentil-homme, de qui le pere auoit vendu tout le bien qu'il possedoit, horsmis huiet cens ou mil liures de rente ou reuenu. Et comme i'ai esté le premier de six freres, que nous auons esté, il a fallu que ie fisse connoistre le nom de Montluc, qu'est nostre maison, avec autant de perils & hazards de ma vie, que Soldat, ny Capitaine aye iamais fait, sans auoir eu en ma vie aucun reproche de ceux qui me commandoient, ains autant fauorisé & esti-

*Le Sieur
de Mont-
luc par-
venu par
degréz.*

mé que Capitaine qui fust és armées, où ie me suis trouué. Que s'il y auoit quelque entreprinse de grande importance, & hazardeuse à executer, les Lieutenans de Roy, & les Colonels, me la bailloient aussi tost, ou plustost qu'à Capitaine de l'armée. L'escriture de ce liure vous en rendra témoignage.

Or à l'heure que ie commençay à porter enseigne, ie voulus aussi sçavoir ce que doit faire vn qui commande, & me faire sage par l'exemple de ceux qui faisoient des fautes. Premièrement i'apprins à me chastier du ieu, du vin, & de l'auarice, connoissant bien que tous Capitaines, qui seroient de cette complexion, n'estoient pas pour paruenir à estre grands hommes, mais plustost pour tomber aux malheurs que i'ai écrits. Qui fut cause que ie chassé de moy toutes ces trois choses, que la ieu- nesse engendre aisément, lesquelles apportent grand dommage, & bles- sent la renommée & reputation d'un chef. Le ieu est de telle nature, qu'il assujettit l'homme à ne faire iamais autre chose, ny auoir autre pense- ment, soit en gain ou en perte : car

*Maux
qui pro-
uiennenz
du ieu.*

8 *Comm. de M. B. de Montluc,*
si vous gaignez , vous estes tousiours
en peine , pour trouuer gens , à qui
vous puissiez iotier , ayant opinion
que vous gaignerez tousiours davan-
tage , & ne ferez autre chose iamais,
iusques à ce que vous aurez tout per-
du. Et comme vous ferez reduit à ce
point , vous voila au desespoir : &
ne ferez que chercher iour & nuit
où vous pourrez trouuer de l'argent
pour rejoier , & tenter si vous pour-
rez regagner ce que vous aurez per-
du. Or comment voulez-vous donc-
ques penser , que vous vous puissiez
acquitter de la charge que le Roy
vous a baillée , veu que vous appli-
quez vostre tems en vne autre chose ?
Et au lieu de songer à piper vostre
ennemy , vous pensez à piper les
cartes ou les dez. Cela vous divertit
du tout de vostre charge. Vous de-
vez estre ordinairement parmy vos
Soldats , afin de les connoistre nom
par nom , s'il vous est possi-
ble : d'autre part , pour empescher
qu'ils ne fassent chose indigne , pour
crainte qu'il ne vous en puisse venir
reproche du Lieutenant de Roy ny
de vostre Colonel : dauantage , pour
garder qu'entr'eux n'y ait aucune mu-

tinerie : car il n'y a rien plus pern-
cieux en vne compagnie que les mu-
tins. Comment voulez - vous donc
auoir le cœur à tout ce qui est besoin
que vous faciez en la charge que vous
tenez , si vostre esprit est tousiours oc-
cupé au ieu , qui vous baille cent &
cent escarmouches le iour , & vous
met hors de vous-mesmes ? Fuyez ce-
la , mes compagnons , fuyez ie vous
prie ce meschant vice , lequel i'ay
veu causer la ruine de plusieurs , non
seulement en leur bien , mais en leur
honneur & reputation.

Pour le regard du vin , si vous y
estes sujets , vous ne pouuez euit<sup>Les de-
fauts qui
uiennent
du vin.</sup>er
que vous ne tombiez en aussi grand
malheur , que celuy qui ioïe. Car il
n'y a rien au monde qui assoupisse
tant l'esprit de l'homme , & qui l'in-
uite tant à dormir que le vin. Si vous
ne beuvez guere , par consequent vous
ne mangerez pas trop , car le vin ap-
pelle le manger , pour plus longue-
ment prendre le plaisir de boire. Et
à la fin auant que sortir de vostre re-
pas estant plein de vin & de viandes,
il faut que vous vous mettiez à dor-
mir , & peut-estre au temps que vous
deuez estre parmy les soldats & com-

pagnons , & pres vostre Colonel & Maistre de Camp , pour entendre tousiours quelque chose de ce qu'ils auront sçeu du Lieutenant de Roy , afin de regarder si quelque occasion se peut presenter , où vous puissiez employer vostre hardiesse & sagesse. Encore amene le vin autre peril , c'est que comme le Capitaine est yure , il ne se sçait commander , & moins laisser commander les autres , & se mettra à frapper ses Soldats sans aucune raison. Et encore qu'il y eust raison, il deuroit chastier son soldat , premierement avec remonstrances & menaces vn peu aigres , luy remonstrant que s'il y retourne plus , il ne luy faut esperer autre chose que le chastiment. Et ne trouuez-vous pas meilleur le chastiment de vostre soldat avec paroles & menaces qu'à coups d'espée , le tuant , & mutilant de ses membres ; ce que le vin vous contraindra faire. Et ne pensez pas estre craint dauantage , ains haï mortellement de tous vos soldats. Et quelle faction pouuez - vous esperer de faire avec soldats qui vous haïront ? Le vous prie me croire , car i'en ay veu autant d'experience qu'autre de mon aagé.

*Chastiment
des sol-
dats.*

J'ay veu mourir quatre Capitaines par la main de leurs soldats, les assassinant par derriere, pour le mauuais traitement qu'ils auoyent receu d'eux. Ils sont hommes comme nous, & non pas bestes : si nous sommes Gentils-hommes, ils sont soldats : ils ont les armes en main, lesquelles mettent le cœur au ventre à celuy qui les porte. Le vin vous fait souuent à la premiere faute acharner contr'eux sans discretion, car vous n'estes pas à vous. D'ailleurs iamais le Lieutenant de Roy, ou vostre Colonel, & Maistre de Camp, ne vous bailleront entreprinse honorable à executer, qui pourroit, peut-estre, causer du tout vostre auancement : & diront, voulez-vous bailler vne telle execution entre les mains d'un tel, qui sera yure à l'heure qu'il faudroit qu'il fut en bon sens, pour auoir la discretion de connoistre ce que faut qu'il fasse? Il ne fera rien que perdre les hommes, & avec sa faute causera vostre perte. O la mauuaise renommée que ce vin vous donra, puis qu'il faut qu'on n'espere de vous aucune chose qui vaille. Fuyez donc, mes compagnons, fuyez ce vice aussi meschant,

12 *Comm. de M. B. de Montluc,*
& plus vilain & sale , que le premier.

*Les Capitaines
doivent
fuyr l'a-
uarice.*

Le Capitaine aussi ne doit estre auare en façon du monde. Car encore que le vin , & le ieu se peuent appeller compagnons , l'auarice leur tient bonne compagnie. C'est elle , qui cause vn million de maux. En premier lieu , l'auarice apporte à vn Capitaine d'aussi grands ou plus grands malheurs , que vice qui soit. Car si vous vous laissez dominer à l'auarice, vous n'aurez iamais aupres de vous soldat qui vaille : car tous les bons hommes vous fuyront , disans que vous aymez plus vn escu , qu'un vaillant homme. De sorte que vous n'aurez que gens de peu de valeur aupres de vous : & au premier lieu qui se presentera , là où il vous faudra paroistre , vous serez abandonnez : & faudra que vous perdiez la vie , ou que vous fuyez. Et ne vous faut esperer qu'en la mort , ny en la vie vous puissiez recouurer vostre reputation. Car si vous mourez , encore que vous ayez fait vostre deuoir , on dira que la grande auarice qui estoit en vous, vous a amené à la mort , pour n'auoir eu de gens de bien en vostre

compagnie. Et si vous vous sauvez en fuyant , assurez vous , que vous mettez un tel signal en vostre front , qu'il vous sera bien difficile de iamaïs l'oster , à tout le moins qu'il ne faille que vous hazardiez à tous perils vostre vie , pour effacer la mauuaise reputation que vous aurez acquise. Il sera bien difficile que vous n'y perdiez ou la vie , ou quelque membre. C'est la paye ordinaire des hazardeux , & pour toute recompense on dira , que le desespoir , où vous serez tombé de la faute qu'avez faite , vous a conduit à faire ce que vous avez fait , & non yn bon cœur , ou yne belle resolution. O que tant d'autres malheurs pourrois-je bien mettre par écrit , qui sont aduenus & aduiennent aux Capitaines auares.

Le sçay bien que vous me direz , & que ferons nous si nous n'esparignons de l'argent , & gagnons sur la paye des soldats ? Quand la guerre finira nous irons à l'hospital , car le Roy ny personne ne fera compte de nous : & nous sommes pauvres de nous mesmes. Mais voulez-vous croire que le Capitaine vaillant & sage , grand entrepreneur & executeur aille

14 *Comm. de M. B. de Montluc,*
mourir de faim à vn hospital, comme
s'il y en avoit en vn Camp à centai-
nes ? Ce seroit vne bonne chose pour
le Roy & pour toute l'armée, s'il y
en auoit seulement vne douzaine.
Doncques efforcez - vous de mettre
vne iambe dans cette douzaine, &
efforcez - vous d'y entrer par vostre
hardiesse, sagesse & vertu. Car ces
douze ne peuuent pas tousiours vi-
ure, l'vn mort, si vous n'y pouuez
mettre encore tout le corps, vous y
en mettrez pour le moins la moitié :
& au premier qui mourra apres, vous
estes dedans. Et voulez-vous donc-
ques croire que le Roy, ny les Prin-
ces, qui auront eu connoissance de
vostre valeur, vous laissent aller à
l'hospital ? Cette crainte ne doit estre
mise en auant par les sages & vail-
lans Capitaines : mais par les yuron-
gues, par les ioueurs, & par les aua-
res, & par les gens qui ne valent
rien. Car s'ils occupent leur exercice
aux choses grandes, esloignans tous
ces vices avec leur diligence & vigi-
lance, rien ne leur peut manquer. J'ay
dit que ce seroit beaucoup, s'il y en
auoit vne douzaine en vn Camp :
mais quand bien il y en auroit vne

centaine, le Roy est assez riche pour garder que telles gens aillent à l'hospital. Et quand bien le Roy promptement n'y pourroit suppleer, il n'y a Prince, ny Seigneur, qui aye esté aux guerres, où vous ferez remarquer de la marque d'un homme de bien, qui ne soit bien aise d'en retirer quelque'un auprès de soy, & qui ne cherche les moyens pour vous faire faire quelque bien au Roy, & vous avancer à quelque grade. Et d'autre part pensez-vous que le Roy vous laisse tousiours en un mesme estat ou charge? Ne le croyez pas: car on cherchera tousiours à bailler les grandes charges à ceux qui se seront bien acquitez des petites. Doncques fuyez ce vilain vice, qui vous conduira à tout malheur.

*Un bon
cœur ne
se doit
iamais
désespérer
de sa for-
tune.*

Qu'ay-je été moi-même qu'un pauvre soldat comme vous? Qu'ont esté, & qui sont encores tant de vaillans Capitaines qui sont en vie, de qui le Roy, & tout le monde fait grand estime? Nous sommes nous, qui sommes en vie enrichis de la paye de nos soldats? avons-nous achepté de grands biens des larrecins que nous avons fait en nos charges? L'en pourrois nommer

quelques - vns de notre Guyenne ;
(pource qu'ils ne peuuent auoir rien
acquis que ie ne le sçache , ny moy
qu'ils ne le sçachent) lesquels n'ont ia-
mais acquis cinq cens escus de bien ,
& pour cela sont-ils méprisez ? vont-ils
à l'hospital ? le Roy , la Reyne , Mon-
sieur , & tous les Princes , & Seigneurs
de la Cour font autant de compte
d'eux pour l'estime , que tout le mon-
de a de leur valeur , qu'ils gagnent le
devant à beaucoup de grands Sei-
gneurs. Et quand ils sont en leur pa-
trie (où nul n'est prophete) si sont-ils
honnorez des grands & des petits , non
pour le lieu d'où ils sortent , ny pour
le bien , mais pour leur merite. Or
peut-estre qu'il y en aura aucuns qui
diront , si ie ne dérobe le Roy & les
soldats , à present que i'ay charge ,
comment achepteray - je des biens
pour pourvoir mes enfans ? Encores
responderay-je à cela : voulez-vous en-
richir vos enfans de mauuaise renom-
mée & reputation ? O le mauuais he-
ritage , que vous leur laissez ! veu qu'il
faudra que pour vostre mauuaise re-
nommée & reputation , ils baissent la
teste parmy les grands , d'où il faut
qu'ils tirent des biens & charges hon-
norables.

norables. Et quelle difference y aura du recueil & du compte que fera le Roy, & tous les Princes, des enfans qui seront sortis de tels peres que i'ay dit, aux vostres qui n'oseront paroistre deuant personne, & porteront la honte de leur pere sur leur front ? Peutestre qu'il y en aura qui diront, qu'aux charges que i'ay eues du Roy, i'ai fait de grands profits, & que i'en puis parler à mon aise : i'atteste devant Dieu, & l'appelle en témoignage, qu'en ma vie ie n'ay eu trente escus plus que de ma paye : & quelque estat & honnorables charges, que i'ay eues, soit en Italie, ou en France, i'ay été tousiours contraint d'emprunter de l'argent pour m'en revenir.

A mon retour de Sienné, où ie commandois, monsieur le Marechal de Stroczy me donna cinq cens escus. Quand ie reuins de Montalsin à la seconde fois, monsieur Beauclair, qui estoit nostre Thresorier, chercha les bourses de tout Montalsin pour me trouuer trois cens cinquante escus, pour me conduire iusqu'à Ferrare : & si auois-je dix Gentil-hommes avec moy : Monsieur le Duc m'en accommoda, quand ie me iettay dans Ver-

*Necessité
du sieur
de Mont-
luc pen-
dant ses
charges.*

feil, & puis pour me conduire iufques à Lyon, où ie trouuay entre les mains de Catherin Iean, maiftre de la poste, deux ou trois mil francs, que Martineau luy auoit laiffé de mes eftats : & avec cela me conduis deuers fa Majesté. A vn homme de bien & vaillant, iamais rien ne manque. Or ie voudrois fort fçauoir, si pour cela ie fuis allé à l'hospital, & s'il ne m'a cent fois plus profité d'auoir feruy mes Roys & maiftres en toute loyauté, que tous les larrecins que i'eusse fçeu iamais faire. O mes compagnons, prenez exemple à ceux, qui pour estre loyaux en leurs charges, leuent la tête deuant tout le monde : & font estimez & honnorez des petits & des grands : & non à ceux qui par leurs vices baiffent la teste en leurs maisons, ou bien leurs enfans, pour eux. Le bien vous vient lors que vous y pensez le moins : un seul bien-fait du Roy vous vaudra plus que tous les larrecins, que vous fçauriez faire.

O que bien-heureux font les soldats, qui fuient tels Capitaines, lesquels pour leurs vertus & valeur, sont estimez par tout le monde ! & combien leur vie & reputation leur est af-

feurée sous tels Capitaines ! Et en quels malheurs & opprobres tombent ceux qui suivent les autres. Car parmi ceux-là vous apprenez & acquerez de l'honneur & reputation , pour paruenir au même degré , que sont vos chefs. Et au contraire suivans ceux-cy vous ne pouuez apprendre que vices , & choses de peu de valeur , qui vous ameneront plustost à la ruine de vostre vie , que non à l'exaltation de l'honneur & de vostre nom , n'ayant pû apprendre d'eux autre chose , pour le peu de valeur qui est en eux. Sous vn mauvais maistre , on demeure long-tems apprentif , & encores apres ne sçait-on pas beaucoup. Que si vous estes déchargés de ces trois vices , & que vous ayez l'honneur deuant les yeux , il est impossible que tout ne succede bien. Pour le moins aurez-vous ce contentement , si vous vous proposez de mourir en gens de bien. C'est la recompense de la guerre , & ce qu'on doit desirer.

Instruction pour un homme à guerre.

Il y en a un quatriéme , si vous ne le pouuez éuiter , au moins allez y sobrement , sans vous perdre ; c'est l'amour des femmes. Ne vous y engagez pas , cela est du tout contraire à vn

L'amour des femmes nuis

*ne des
gens de
guerre.*

bon cœur. Laissez l'amour au crochet, lors que Mars sera en campagne, vous n'aurez apres que trop de temps : ie me puis vanter que iamais affection, ny folie ne me destourna d'entreprendre & executer ce qui m'estoit commandé. A ces hommes-là il leur faut une quenouille, & non vne épée. Et outre la desbauche & perte de temps, ce mestier amene vne infinité de querelles, & quelquesfois avec vos amis. l'en ay veu plus combattre pour cette occasion que pour le desir de l'honneur. O la grand'vilenie, que l'amour d'une femme vous dérobe vostre honneur, & bien souvent vous face perdre la vie & diffamer ! Quant à vous, soldats, ie vous recommande sur toutes choses l'obeïssance que vous devez à vos Capitaines : afin que vous appreniez de bien commander quelque iour. Car il est impossible, qu'un soldat sçache bien commander, qu'il n'ayt sçeu plustost obeïr. Et notez qu'en l'obeïssance se connoist la vertu & sagesse du soldat : & en la desobeïssance se pert la vie & la reputation. Vn cheval rebours ne fit iamais rien qui vaille. Vous ne devez rejeter en arriere les remonstrances que ie vous

*Instruc-
tion pour
le soldat.*

*L'obeïf-
sance du
soldat.*

fais , pour auoir veu tant de choses en mon temps. Je serois bien ignorant & despourueu d'entendement si ie n'auois retenu l'heur de l'un , & le malheur de l'autre. Ce qui m'a occasionné sur mes vieux & derniers iours écrire ce livre.

Ayant esté nourry en la maison du Duc Antoine de Lorraine , & mis hors de page , ie fus pourueu d'une place d'Archier de sa compagnie , estant monsieur de Bayard son Lieutenant. Et bien tost apres , il me print enuie d'aller en Italie , sur le bruit qui courroit des beaux faits d'armes qu'on y faisoit ordinairement. Et ayant fait vn voyage en Gascongne , ie retirai de mon pere quelque peu d'argent , & vn cheval d'Espagne : & sans y faire long sejour ie me mis en chemin , pour executer mon dessein , remettant à la fortune l'esperance des biens & honneur , que ie deuois auoir. A vne iournée de la maison , ie trouuay pres Laitoure le sieur de Castetnau vieux Gentil-homme , qui auoit longuement pratiqué l'Italie. Je m'enquis bien au long de l'estat de ce pais-là : lequel m'en dit tant de choses , & me raconta tant de beaux exemples de guerre ,

*Comment
cément
du sieur
de Mont-
luc.*

qui s'y faisoient tous les iours, que sans sejourner ny arrester en lieu, que pour repaistre, ie passay les monts, & m'en allay à Milan, estant lors aagé de dix-sept ans. Je trouué là deux de mes oncles freres de ma mere, nommez les Stillats, bien estimez & en bonne reputation, l'un desquels estoit à monsieur de Lescut frere de monsieur de Lautrec, qui fut Marechal de France, & depuis tousiours appellé Marechal de Foix, lequel me donna vne place d'Archier en sa compagnie: Ce qu'on estimoit beaucoup en ce temps-là. Car il se trouuoit de grands Seigneurs, qui estoient aux compagnies, & deux ou trois en vne place d'Archier. Depuis tout s'est abastardy. Aussi tout s'en va à l'enuers, sans que ceux qui viuent, puissent esperer de voir les choses en meilleur estat.

La guerre recommença entre le Roy François & l'Empereur, plus aspre que iamais, luy pour nous chasser de l'Italie, & nous pour la conseruer: Mais ce n'a esté que pour y servir de tombeau à vn monde de braues & vaillans François. Dieu fit naistre ces deux grands Princes ennemis iurez, & enuieux de la grandeur l'un de l'aut-

*Le sieur
de Mont-
luc en
l'aage de
17. ans
en Italie.*

*Cette
guerre
fut l'an
1521.*

tre. Ce qui a cousté la vie à deux cens mille personnes, & la ruine d'un million de familles. Et enfin ny l'un ny l'autre n'en ont rapporté qu'un regret d'être cause de tant de miseres. Que si Dieu eust voulu que ces deux Monarques se fussent entendus, la terre eust tremblé sous eux: Et Solymán, qui a vescu en mesme temps, eust eu assez affaire à sauuer son estat, au lieu que cependant il l'a estendu de tous costez. L'Empereur a esté un grand Prince, lequel toutesfois n'a surmonté nostre maistre que de bon-heur pendant sa vie, & de ce que Dieu luy a fait la grace de pleurer ses pechez dans un Convent, où il se rendit deux ou trois ans auant mourir. Or pendant cette guerre, qui dura vingt-deux mois, i'y vis de tres-belles choses, pour mon apprentissage, & me trouuay ordinairement en tous les lieux, où ie pouuois penser acquerir de la reputation, à quelque prix que ce fust: aussi fut-il tué sous moy cinq cheuaux en dix iours: & en deux iours deux que Monsieur de Rocquelaure cousin germain de ma mere me donna. De ce premier commencement ie gaigné tellement l'amitié de ceux de la compagnie, qu'un

*Cinq che-
vaux
tués en
dix iours
sous le
Sieur de
Montluc.*

chacun m'aydoit à me remonter ayant perdu mes chevaux. Je fus aussi au combat fait prisonnier , & apres bien-tost deliuré par le moyen de mes amis.

Que ceux qui desirent avec les armes acquerir de l'honneur facent resolution de fermer les yeux à tous perils & hazards , aux premieres rencontres où ils se trouueront. Car c'est sur eux qu'on iette les yeux , pour voir s'ils ont rien de bon au ventre. Que si au commencement ils font quelque acte signalé , pour monstrier leur courage & leur hardiesse , cela les marque pour iamais , & les fait reconnoistre , mesme leur donne le cœur & le courage de faire encores mieux. Or nous perdismes en cette guerre le Duché de Milan. Dequoy ie pourrois bien écrire au vray l'histoire , encores que ie ne sois pas grand Clerc. Et si le Roy me le commandoit , i'en dirois bien la verité , la sçachant aussi bien qu'homme de France , encor' que ie fusse bien ieune en ce temps-là : i'entends des lieux où i'estois , & non des autres. Car ie ne veux rien écrire par ouïr dire. Mais parce que ie ne veux m'occuper à écrire les faits d'autrui , ny les fautes par eux commises , avec
beaucoup

*Perte du
Duché de
Milan.*

beaucoup de particularitez, dont i'ay la memoire auffi frefche que i'auois lors, & que tout ce que ie fis pour lors en ce pais-là, fust fans aucune charge, estant commandé d'autrui, ie ne m'arresteray plus longuement sur ce sujet assez triste, qui a esté traitté par autre : seulement ie diray ce mot, qu'il n'y eut point de faute de la part de monsieur de Lautrec, qui y fit tout le deuoir d'un bon & sage general : Aussi estoit-il vn des plus grands hommes de guerre, que i'aye iamais connu. Le n'écriray aussi de la bataille de la Bicoque, où ie me trouuay combattant à pied, comme fit aussi monsieur de Montmorancy depuis Connestable : laquelle bataille ledit Sieur de Lautrec fut forcé d'accorder, pour l'opiniastreté des Suiffes. I'ay veu en mon temps le despit des gens de cette nation estre cause de la perte de plusieurs places, & interrompre grandement les affaires du Roy. Ils sont à la verité vrais gens de guerre, & seruent comme de rempars à vne armée, mais il faut que l'argent ne manque pas, ny les viures aussi : Ils ne se payent pas de paroles.

La bataille de la Bicoque vers Pasques l'an 1522.

Les Suiffes souuent causent de malheurs.

Après la perte malheureuse de ce beau Duché de Milan, toutes les forces reuindrent en France, ensemble la compagnie dudit Sieur Mareschal de Foix, en laquelle i'eus vne place d'homme d'armes, & vn archier d'appoinctement. Quelque temps apres l'Empereur Charles dressa vne armée pour reprendre Fontarabie, à cause dequoy nostre compagnie & plusieurs autres furent mandées se trouuer à Bayonne pres monsieur de Lautrec, qui estoit Lieutenant du Roy en Guyenne. Ledit Sieur de Lautrec pour pouuoir faire teste à l'ennemy, qui faisoit mine de vouloir entreprendre quelque chose sur la frontiere, fit dresser quatorze ou quinze enseignes de gens de pied. l'auois tousiours eu envie de me ietter parmy les gens de pied : ce qui me fit demander congé pour trois mois au Capitaine Sayas, lequel portoit le drapeau en l'absence du Capitaine Carbon son frere, pour accepter l'enseigne que le Capitaine la Clotte me presenta : lequel mal-aisement me l'octroya, apres auoir aussi envoyé deuers le Capitaine Carbon, pour l'obtenir. Soudain apres la Clotte fut commandé aller à

*Le Sieur
de Lautrec
Lieutenant
du Roy en
Guyenne.*

*Le Sieur
de Montluc
Enseigne
de gens de
pied.*

Bayonne, parce que les ennemis se renforçoient d'heure à autre. Quelques iours apres le Capitaine Carbon *Carbona* print les compagnies de monsieur de Lautrec, & de monsieur le Marechal son frere, avec deux compagnies de gens de pied, qui estoient celles de Megrin, Comenge, & la Grotte, pour nous conduire par les chemins des bois droict à saint Iean de Lus, là où les camps de nos ennemis estoient. Or comme nous fumes à demy quart de lieuë de Lus, sur le haut d'une petite montaigne, ayant desia passé vne petite riuiera sur vn pont de bois distant d'un demy quart de lieuë de cette montaigne, au deslous de laquelle passoit vn ruisseau de quinze ou vingt pas de large, profond iusques à la ceinture, ioignant lequel y a vne plaine, qui s'estend comme en pante droit audit ruisseau, duquel lieu on découure S. Iean de Lus, qui est vn des plus beaux bourgs de France, sur le bord de la grand'mer, le Capitaine Carbon, qui commandoit à la troupe, laissa les deux cornettes sur cette petite montaigne, l'une desquelles portoit le Capitaine Sayas, qui estoit la nostre, & le Capitaine Iean-

not d'Andouins celle de monsieur de Lautrec, tous deux en absence, l'un du Capitaine Carbon, l'autre du Capitaine Artigueloube : & laissa seulement vingt cheuaux à chacune, & nos deux compagnies de gens de pied, & print le reste des gens d'armes, en-
Gramont. semble le Seigneur de Gramont, qui depuis mourut au Royaume de Naples, étant Lieutenant de la compagnie de monsieur de Lautrec.

Toute cette troupe passa le ruisseau, cheminant au long de la plaine, droit à S. Jean de Lus, ayant départy leurs gens en trois troupes, comme nous pouuions aisément découvrir du haut de la montagne, où nous estions. Estans arriuez en la plaine, ils firent alte plus d'une heure, cependant qu'un trompette alla par deux fois sonner la fanfare aux ennemis. Mais comme il se voulut retirer, ne pensant que personne sortist du camp des ennemis ; les cheuaux qu'il avoit envoyé à la teste de la plaine, luy vindrent rapporter, que tout le camp des ennemis marchoit. Et soudain apres nous commençâmes à découvrir trois de leurs scadrons de gens de cheual, qui marchoient les uns

apres les autres. Le premier des leurs vint attaquer le premier des nostres. Auquel lieu se rompirent beaucoup de lances, plus des nostres, toutes-fois, que des leurs : parce qu'en ce temps-là les Espagnols ne portoient que des lances gayer, longues, & ferrées par les deux bouts. Pendant cette charge le Capitaine Carbon retire les autres deux troupes pas à pas deuers nous. Enfin la seconde des ennemis se joignit à la leur premiere : & rembarrent la nostre iusques à la seconde, que monsieur de Gramont menoit. Là il y eut vn grand combat, & force gens portez par terre d'un costé & d'autre : Entre lesquels furent les Seigneurs de Gramont, duquel le cheual fut tué sous luy, de Luppe guidon de monsieur de Lautrec, de Poigreffi, qui depuis s'est fait huguenot, de la Faye de Xaintonge, qui est encores en vie, & plusieurs autres. En mesme instant nous decourismes vn'autre grande troupe de caualerie venant vers nous vn peu à main gauche. Ce qu'ayant apperceu nos Capitaines portans nos enseignes dirent ces mots, nous sommes tous perdus. Surquoy ie leur dis, qu'il valoit mieux

*Combat à
S. Jean
de Lus.*

*Resolu-
tion du
sieur de
Montluc.*

hazarder quatre-vingts ou cent hommes de pied , pour sauver nos gens de cheval , qui estoient engagez. Le Capitaine la Clotte & Megrin me respondirent , que ce seroit double perte , ioint aussi qu'ils se doutoient , que les soldats n'y voudroient pas aller , voyant leur mort devant les yeux. Or à tout ce propos , il n'y avoit que les deux Capitaines , avec les enseignes des gens de cheval , & moy ayant laissé nos gens de pied à quinze ou vingt pas de nous : ie me doute , que s'ils eussent entendu ma proposition , voyant la gendarmerie perdue , que ie n'eusse pas esté suivi , comme ie fus. Il faut le plus qu'on peut dérober aux soldats la connoissance du danger , qui se presente , si on veut , qu'ils aillent de bon cœur au combat. Sur cela ie fis response aux Capitaines ; que ie prendrois le hazard de les conduire , & que perdus pour perdus , il vaudroit mieux hazarder & perdre quatre-vingts ou cent piétons , que non pas toute nostre gendarmerie. Et sur ce sans plus consulter (les longues consultations bien souvent font perdre beaucoup de bonnes entreprises) ie prins la course vers

*Prudence
à un chef*

les soldats, ensemble les Capitaines (car il se falloit haster) & leur dis seulement ces mots. Allons allons, mes amis, secourir nos gendarmes. Surquoy ie fus suiuy de cent soldats tirez de nostre compagnie : & tous bien encouragez descendismes de la montagne, & moy à la teste de mes gens nous passâmes le ruisseau. Ce fait ie donnay vingt soldats au Bastard d'Auzan, pour les conduire (lequel n'a point fait de honte aux legitimes de cette maison, qui ont tous esté vaillans hommes.)

D'Auzan.

Il faut noter, que la troupe que j'avois, n'estoit que arbalestiers, car encores en ce temps-là, il n'y auoit point d'arquebusiers parmi nostre nation. Seulement trois ou quatre iours auparavant six Arquebusiers Gascons s'estoient venus rendre du camp des ennemis, de nostre costé, lesquels ie retins, parce que par bonne fortune i'estois ce iour là de garde à la porte de la ville, & l'un de ces six estoit de la terre de Montluc : que pleust à Dieu, que ce malheureux instrument n'eust iamais esté inuenté, ie n'en porterois les marques, lesquelles encores aujourd'huy me rendent lan-

Arbalestiers François.

Mal aduenu des arquebusiers.

guissant, & tant de braues & vaillans hommes ne fussent morts de la main le plus souuent des plus poltrons, & plus laschès, qui n'oseroient regarder au visage celuy, que de loin ils renuersent de leurs mal-heureuses balles par terre. Mais ce sont des artifices du diable pour nous faire entretuer. Apres donc auoir passé le ruisseau, ie commandé au bastard d'Auzan de ne faire tirer sa troupe, mais seulement faire mine de tirer : afin de soustenir & prester faueur à la mienne, pour auoir temps de tirer, & tourner rebander. Or ainsi que i'estois au pied de la montagne, ie ne pouuois voir ce que faisoit nostre gendarmerie. Mais comme ie me fus acheminé plus auant, ie vis toutes les troupes des ennemis assemblées à vn, & celles de main gauche marcher au trot droit aux nostres qui auoient fait ferme, ne pouuant cheminer ny en auant ny en arriere, à cause de quelques pierres.

Le Capitaine Carbon, qui n'estoit point armé, ayant esté auparauant blessé d'une arquebuzade au bras gauche, vint à moy me voyant pres d'eux, & me dit ces mots : O Montluc mon amy pousse hardiment, ie

Le Capitaine Carbon en courage le sieur de Montluc

ne t'abandonneray pas. Prenez garde seulement, luy dy-je, mon Capitaine à vous sauuer, & ces gens-d'armes, & en mesme instant ie crie, compagnons tirez à la teste des chevaux. Je n'estois pas à douze pas des ennemis, lors que ie leur fis cette salue. Il se verifia au dire des prisonniers qui furent prins quelques iours apres, qu'il y mourut ou fut blessé à ce rencontre plus de cinquante cheuaux, & deux caualiers tuez, ce qui fit faire ferme à leurs troupes. Cependant le Capitaine Carbon eust loisir de se retirer au grand galop avec sa troupe droit au ruisseau, où i'estois passé: & ceux qui auoient perdu leurs chevaux se tenans à la queue des autres, se sauuerent ainsi, & passerent tous le ruisseau: ce qui leur estoit force de faire, autrement la troupe de main gauche leur donnoit par le flanc de nostre costé, à la faveur de vingt arbalestiers de d'Auzan, qui soustinrent: cependant nous rebandasmes tous, & tirasmes encores. Et comme le Capitaine Carbon eut passé le ruisseau avec la caualerie, & remonté Monsieur de Gramond, & chargé les autres en croupe il commanda audit Sieur de Gramond

de courir au haut du coustau , & faire retirer au grand trot les enseignes de gens de pied & gens de cheval droit à l'autre riviere , là où estoit le pont tirant au chemin de Bayonne. Soudain il tourna vers moy , ayant en sa compagnie un Italien nommé le chevalier Diomedes , & le sieur de Mainahaut , & trouva que ie me retirois droit à un fossé , qui bordoit vn marais , duquel ie pouvois estre à dix ou douze pas. Ce qui l'empescha de se joindre à moy , de façon qu'il eust assez affaire à se sauver. Si gaigné-je en despit des ennemis le fossé du marais à la faveur d'Auzan , lequel ie fis passer en diligence , pour faire teste : ce qu'il fit.

Cependant les Espagnols faisoient semblant de me vouloir charger , mais ils n'oserent m'enfoncer. Tandis ces six arquebusiers faisoient merueilles de tirer. Et comme i'eus mes gens à cinq ou six pas du fossé , je les fis ietter dedans : & à la faueur dudit d'Auzan nous montasmes tous sur la leuée de ce fossé , sauf trois soldats , qui y furent tuez à coups d'arquebuse ; pour n'auoir esté si dispos que les autres. C'est là comme en un petit fort où ie leur fis teste. Or il faut noter , que la troupe

des ennemis qui estoient venus à main gauche, fit alte aupres du ruisseau, quand elle vit que nostre gendarmerie estoit desia à demi montagne : & ceux qui auoient combattu, & lesquels i'auois arresté sur le bord du fossé, faisoient là leur retraicte, quand ils virent venir trois scadrons d'arquebusiers au long de la plaine, venant à eux le grand pas. Ce qui leur mit le cœur au ventre, & leur donna courage de passer outre. Ayant descouvert ce nouveau secours, ie me mis au long du fossé du marais, & m'estant desrobé au moyen du destour de leur veuë, ie me jettay dans vn pré fort estroit, & gagnay à la course le pied de la montagne d'où i'estois party : & apres avoir repassé le ruisseau, ie regagnay la montagne. Le danger où ie m'estois veu, tant pour les gens de cheval, que i'auois en queue, que pour ce bataillon d'infanterie, qui venoit à nous, ne me fit point perdre l'entendement au besoin, pour prendre la commodité pour ma retraicte. Pendant laquelle ie fis tousiours tenir ceste poignée d'hommes, que i'auois serrez : & les accourageant, parlant à eux par fois, ie leur faisois tourner visage, & saluer les caualiers,

qui me suiuoient à coups de trait & d'arquebuse. & comme i'eus gagné le haut, ie me mis dans un vergier, fermant la clie sur moy : afin que la caualerie n'y peust entrer promptement. Et à la faveur de plusieurs vergiers, qui sont peuplez de pommiers, ie me retiray droit au pont, iusques à vne Eglise, qui s'appelle à Haitée, où ie trouuay le grand chemin tout couuert de leur cauallerie, y ayant toutesfois un grand fossé entre deux, d'où ie leur fis tirer quelques arquebusades, & quelques coups de trait, sans qu'il y eust gueres de coups perdus. E pource qu'ils ne pouuoient venir à moy, ils furent forcez les vns tirer en auant, & les autres se retirer. Alors ie fis mettre dans le clos du cymetiere une partie de mes gens, pensant faire encores teste : qui fut la plus grand'folie que i'auois faite en tout ce combat. Car cependant une bonne troupe de leurs gens de cheual coula aulong du pré droit au pont, si auant que ie me vis enfermé sans esperance de me pouuoir sauuer.

Or comme le Capitaine Carbon eut gagné le pont, & que la gendarmerie, & les gens de pied furent passez, il dit à Monsieur de Gramond, qu'il s'en

alloit au grand trot & galop ; car desia il descouvroit dans les vergiers l'infanterie ennemie : ce que ie ne pouuois faire , & ne les apperceus iusques à ce qu'ils commencerent à me tirer. Alors ie fis signe aux soldats , qui estoient dans le cymetiere de se ioinde avec moi dans le grand chemin. Et parce que le Capitaine Carbon ne me pouuoit descourir , il me tint pour mort ou perdu , & mes gens aussi. Qui fut cause qu'il laissa le Capitaine Compai , qui estoit bon soldat , au bout du pont avec vingt cinq cheuaux & trente arbalestiers du Capitaine Megrin , voyant toutes leurs troupes de cheval à main gauche , & à main droicte venir droict au pont : ce qu'il fit pour voir , s'il y auroit quelque moyen de me secourir , si ie n'estois perdu : Et cependant il faisoit rompre le pont , & parce que la troupe des ennemis de main droicte alloit plus hastiuement droict au pont , que celle de main gauche , ie laissay le grand chemin , & à la faveur d'une haye , ie m'en allay droict à la riviere , où il me fallut encore combattre la cauallerie. Toutes-fois ie me fis faire large & me iettay dans la riviere , & en despit d'eux

*Belle resolution
d'un
chef.*

passay de l'autre costé. Les bords de la riuere estant hauts me favoriserent beaucoup : parce que les gens de cheual ne se pouuoient ietter bas : & cependant nos tireurs n'estoient pas oisifs. Enfin ie gaigné le bout du pont, où estoit ledit Capitaine Compai bien empesché à le rompre. Deslors qu'il m'eust apperceu, il me persuada par plusieurs fois de me sauuer, & me presenta la croupe de son cheval : mais il n'eust autre responce de moy, sinon que Dieu m'auoit conserué & mes soldats aussi, lesquels ie n'abandonnerois iusques à ce que ie les eusse mis en lieu de seureté. Surquoy nous descourismes l'arquebuserie Espagnole venant droit au pont. Nous n'estions pas assez fort pour soustenir ce choc, voila pourquoy Compai & les arbalestiers de Megrin prenent le devant pour le retour, & ie demeure à la queuë, ayant gaigné vn fossé qui bordoit vn pré, à la faueur duquel les gens de cheual ne me pouuoient choquer.

Il ne restoit lors que mes six arquebusiers, car les arbalestiers auoient employé tous leurs traits : Toutesfois pour monstrier qu'ils n'estoient recreus, ie leur fis mettre l'espée nuë à la main,

& l'arbaleste en l'autre pour leur servir de bouclier. Or parce que les gens du Capitaine Compai auant partir auoient rompu la pluspart du pont, cela fut cause que la cauallerie ne fust si tost à nous, ayant esté contrainte aller passer à deux arquebusades plus haut à main droite. Pendant que leurs gens de pied avec grand'difficulté passoient vn à vn par dessus les gardefous, qui estoient au pont, il m'estoit aisé de les deffaire, si ie n'eusse veu que la cauallerie me venoit enfermer. Nostre honneur despendoit de nostre retraicte. Gaignant donc tousiours chemin de fossé en fossé, ayant fait environ demy quart de lieuë : ie fis alte : afin que mes gens ne fussent hors d'haleine, & vis que les ennemis auoient fait de même, & cogneus à leur contenance qu'ils auoient perdu l'enuie de me suiure : dequoy ie fus bien estonné, & aisé quant & quant : car nous n'en pouuions plus : ayant prins un peu d'eau & de pommade, & du pain de millet en quelques pauvres maisons, que nous trouuâmes en chemin. Cependant le Capitaine Compai envoya quelques cheuaux pour sçauoir de nos nouuelles, me pensant mort ou pris.

Belle retraite.

Nous voila enfin en lieu de feureté , sans auoir perdu que trois soldats dans le premier fossé , & le bastard d'Auzan , qui s'amusa dans vne maisonnette pres l'Eglise.

Pendant tout ce rencontre , & ce combat , l'alarme vint à Monsieur de Lautrec , & la nouuelle , que nous estions tous deffaits : Ce qui lui donna beaucoup de deplaisir , pour la consequence qu'apporte ordinairement , lors qu'au commencement on donne curée aux ennemis. Il fit mettre tout en bataille : mais comme il fut vn peu esloigné de la ville , il vid venir nos enseignes de gens de pied , que le Seigneur de Gramond conduisoit , lequel lui raconta ce qui estoit aduenu : & me fit cest honneur , de lui tesmoigner , que i'estois cause de leur conseruation & salut , mais que i'y estois demeuré pour gaiges. Le Capitaine Carbon n'estoit encor arrivé : parce qu'il attendoit le Capitaine Compai , pour sçauoir nouvelles du tout. A la fin il arriva : auquel Monsieur de Lautrec dit ces mots : Et bien , Carbon , estoit il temps de faire vne telle folie , comme celle que vous auez faite ? Elle n'est pas si petite , que vous
n'ayez

n'ayez mis en hazard de me faire perdre
 cette place de Bayonne , qui est si im-
 portante. Il lui respondit , Monsieur , *Propos*
 i'ay fait vne grande faute , & la plus *du sieur*
 grand folie , que ie fis iamais. Iusques *de Lautrec au*
 icy ne m'en estoit aduenü de pareille : *Capitaine*
 mais puis que Dieu a voulu que nous *ne Car-*
 n'ayons été deffaits , ie seray plus sage *bon.*
 à l'aduenir. Monsieur de Lautrec luy
 demande , s'il y auoit nouuelles de
 moy , lequel luy dist , qu'il pensoit
 que ie fusse perdu : mais cependant
 qu'il se promenoit pres la ville , en at-
 tendant nouuelles , arriua le Capitaine
 Compai , lequel les asseura que i'estois
 sauvé , & leur raconta la belle retraite
 que i'auois faite en despit des ennemis,
 & à leur barbe , sans auoir perdu que
 quatre hommes , & qu'il estoit impos-
 sible que les ennemis n'eussent souffert
 beaucoup de perte. Je ne fus pas
 plustost arriué à mon logis , qu'un
 Gentilhomme me vient chercher de
 la part de Monsieur de Lautrec , le-
 quel me fit aussi grand chere qu'il
 eust sceu faire à Gentil-homme de
 France , me disant ces mots en Gascon,
Montluc mon amic , you n'oublideray iamai
lou seruice qu'abes fait au Roy , & m'en so-
uiera tant que you viura. Il n'y a pas

*Defaut
du fleur
de Lau-
trec.*

moins d'honneur de faire vne belle retraicte, qu'aller à vn combat. C'estoit vn Seigneur qui n'auoit gueres accoustumé de caresser personne. L'ay souuent remarqué cette faute en luy : toutesfois pendant tout le souper il me fit beaucoup de faueur, laquelle tousiours depuis il me continua : mesme quatre ou cinq ans apres se resouvenant de moy, il m'enuoya de Paris en Gascongne vn courier, avec vne commission de gens de pied, me priant de l'accompagner au voyage qu'il fit à Naples. Et depuis m'a tousiours plus estimé que ie ne vallois. Voila le premier lieu, auquel ie me trouuay iamaïs commandant, & où ie commençay à marquer ma reputation.

Vous Capitaines, mes compagnons, qui me ferez cest honneur de lire, peutestre ma vie, nottez, que la chose du monde que vous deuez desirer le plus, c'est de chercher l'occasion, par laquelle vous puissiez monstrier ce que vous valez, quand vous commencerez à porter les armes : car si à vostre commencement vous demeurez victorieux, vous faictes deux choses entre autres. La premiere, c'est que vous vous faictes louer & estimer

aux grands , & par ce moyen par leur rapport vous ferez cogneus du Roy , duquel nous deuons tous esperer la recompense de nos bons seruices & labours : La seconde est , que comme les soldats cognoissent vn Capitaine , lequel à son commencement a fait quelque chose de bon , tous les vaillans hommes recherchent d'estre à luy , esperant que puis qu'il a eu si bon commencement , toutes choses lui doiuent succeder heureusement , & par ce moyen ils seront employez. Car c'est le plus grand despit qu'un homme de bon cœur puisse auoir , lors que les autres prennent les charges d'executer les entreprinſes, & cependant il mange la poule du bon homme aupres du feu. Ainsi vous vous trouuerez tousiours accompagnez de braves hommes , avecques lesquels vous continuerez à gaigner honneur & reputation. Et au contraire , si vous estes battus au commencement , soit pour vostre faute , ou lascheté , tous les bons hommes vous fuiront , & ne vous demeurera que gens de peu de valleur : avecques lesquels quand vous seriez le plus brave homme du monde , vous ne pouuez gaigner que mauuaise reputa-

Le commencement & apprentissage d'un Capitaine

Le danger qu'il y a au commencement qu'on porte les armes

*Il faut
quelque-
fois ha-
zarder
une par-
tie pour
sauver le
reste.*

tion. Mon exemple vous pourra servir de quelque chose. Et encores que ce ne soit pas grand cas de ce rencontre, que ie vous ay descrit : si est-ce , que des petits faiëts de guerre , quelque-fois ont fait beaucoup de profits. Souuenez-vous , mes compagnons , quand vous vous trouverez en estat de voir vne grande force sur vos bras , laquelle vous pouuez tenir en bride par la perte de peu d'hommes, de ne craindre point le hazard. Peut-estre que la fortune vous sera fauorable , comme elle fut à moy. Car ie puis dire , que si ie ne me fusse présenté pour la conduite de cent hommes de pied , qui firent tres-bien leur deuoir , que toute la cauallerie des ennemis estoit sur nos bras , laquelle nous n'auions moyen de soustenir.

*Des an-
ciennes
compa-
gnies de
gens de
pied.*

Incontinent apres , le camp des ennemis se retira en Nauarre , & Monsieur de Lautrec cassa la moitié de ces compagnies , & referua les deux enseignes de Monsieur de Cauna , & celle du Baron Iean de Cauna , estant chascune de trois cens hommes , qui fut la premiere fois que l'on les reduit à ce nombre. Car auparauant elles estoient toutes de cinq cens , ou de mille hommes : qui apportoit beaucoup de

soulagement aux finances du Roy ,
 parce que tant de Lieutenans , En-
 seignes , Sergens & autres Officiers
 emportent beaucoup de paye , que
 aussi le commandement d'un bon
 nombre d'hommes appelle les Gentil-
 hommes de maison à ces charges. Les-
 quels à present les desdaignent , vo-
 yant tant de capitaineaux , ausquels
 on voit donner ces charges sans auoir
 iamais donné coup d'espée. Or Mon-
 sieur de Lautrec me donna la compa-
 gnie de mon Capitaine , encore que
 pour lors ie n'eusse atteint que l'aage
 de vingt ans. Et apres auoir lais-
 sé quatre compagnies dans Bayonne ,
 il s'en alla en poste à la Cour , qui en-
 hardit nos ennemis à redresser le camp,
 & mettre le siege deuant Fontarabie ,
 laquelle ils prindrent auant que Mon-
 sieur de Lautrec fust de retour. La
 perte de cette place proceda de la
 faute , ou meschanceté d'un nepueu
 du Connestable de Nauarre , nommé
 Dom Pedro de Nauarre , fils du feu
 Marechal de Nauarre , lequel ayant
 esté banny d'Espagne , parce qu'il
 soustenoit le party du Roy Henry de
 Nauarre , fust mis dans cette ville avec
 quatre cens hommes bannis comme

*Le sieur
 de Mont-
 luc fait
 Capitai-
 ne en
 chef.*

*Prise de
 Fontara-
 bie.*

1523

luy : où il fut depuis si bien sollicité par son oncle , qu'il se tourna de son costé. Ce qui fust cause de la perte de la place , laquelle estoit imprenable , encores que les ennemis eussent fait deux grandes bresches. Et parce que ie n'y estois pas , & que ie ne veux parler par ouïr dire , ie n'en diray autre chose , si ce n'est , que le Capitaine Frauget qui la rendit , & qui s'en deschargeoit sur ledit Dom Pedro , fust dégradé à Lion. La perte de ceste place nous osta vn grand pied , que nous auions en Espagne. Ce fust là où quelques ans auparauant le Sieur de Lude acquit vne gloire immortelle , pour auoir soustenu le siege vn an entier avec toutes les extremitez du monde. Celui-là en rapporta honneur , & Frauget honte & ruine. Ainsi va le monde & la fortune. Cependant si quelque Prince , ou Lieutenant de Roy passe les yeux sur mon liure (peut-estre en pourra il lire de plus inuiles) qu'il notte par cest exemple , & autres que i'ay veu , & que peut-estre ie pourray coter cy-apres , qu'il est tres-dangereux de s'aider de celuy qui quitte son Prince & Seigneur naturel , non pas qu'on le doine refuser , quand

*Le Capitaine
Frauget
degradé.*

il se vient ietter entre ses bras , mais on ne luy doit donner vne place avec laquelle il puisse faire sa paix , & r'entrer en grace avec son Prince. Ou pour le moins si on le fait , que le temps ait apporté vne telle assurance , qu'il n'y ait nulle doute : car cependant comme il se fera accoustumé au païs , où il vient exilé & fugitif , & aura acquis & receu des bienfaits. Si on le veut employer , mettez le loing de ceux avec lesquels il peut auoir pratiqué. A ce que i'ay ouï dire aux Capitaines de l'Empereur , quand bien Charles de Bourbon eust pris Marseille , & la Prouence , l'Empereur n'eust pas fait ceste faute , de la luy bailler en garde , quoy qu'il eust promis. Mais passons outre.

*Combien
il est dan-
gereux de
se seruir
du sujet
d'un
Prince
estranger.*

Toutes les compagnies de gens de pied estans cassées , sauf celles qu'on mit en garnison , & ne voulant m'enfermer dans les murailles , ie me remis dans la compagnie de Monsieur le Mareschal de Foix , iusques à ce que le Roy François entreprit le voyage pour aller combattre Monsieur de Bourbon , lequel estoit venu assieger Marseille , avec le Marquis de Pesquiere , lequel sieur de Bourbon pour

vn despit s'estoit tourné du costé de l'Empereur. Il n'y a rien qu'un grand cœur n'entreprenne pour se vanger. & parce que le Roy ne permit à Monsieur le Marechal de Foix de mener que vingt hommes d'armes de sa compagnie, & qu'à mon arriuée ie trouuay que ie n'estois du nombre des esleuz, ie me despitay, & m'en allay avec cinq ou six Gentils-hommes, lesquels me firent cest honneur, de venir avec moy, pour nous trouver à la bataille, avec resolution de combattre avec les gens de pied. Mais Monsieur de Bourbon leua son siege apres l'y auoir tenu six semaines. Le Seigneur Rance de Cere Gentil-homme Romain, des plus agueris & experimentez, & le Sieur de Brion y estoient dedans, avec bonnes forces que le Roy y auoit enuoyées. Ledit Sieur de Bourbon se trouua trompé, & ses intelligences courtes. Le François ne scauoit lors, que c'estoit de se rebeller contre son Prince. Deslors qu'il sentit, que le Roy s'approchoit, il se retira par les montagnes, & descendit au Piedmont par Sallusses & Pignerol, non sans beau-coup de perte. Il se sauua à Milan, laquelle

*Rance de
Cere Gen-
til-hom-
me Ro-
main.*

laquelle il fut contraint, & le Viceroy de Naples aussi de quitter & sortir par vne porte, pendant que nous entrions par l'autre. Le Seigneur Anthoine de Leue, qui estoit l'un des plus grands Capitaines, que l'Empereur ait eu, & croy, que sans les gouttes, qui le trauailloient fort, qu'il eust surpassé tous ceux de son aage, il fut choisi pour estre mis dans Paue, avec vne troupe d'Allemands, pour l'opinion qu'on auoit, que le Roy donroit là, comme de fait il fit : Le siege dura sept ou huit mois : cependant Monsieur de Bourbon s'en alla en Allemagne, là où il brigua tant avec l'argent que Monsieur de Sauoye luy auoit presté, qu'il amena avec luy dix mille Allemands, & fit venir quatre ou cinq cens hommes d'armes de Naples. Et ayant dressé son camp à Lode, s'en vint donner la bataille au Roy, vn iour de saint Mathias, estant nostre camp affoibly, tant pour la longueur du siege, que pour les maladies, qu'il y auoit eu. Et encores par malheur le Roy auoit peu auparauant cassé trois mille Grisons, qu'un Colonel du pais mesme commandoit, lequel s'appelloit le grand Diant. Et croy que ce

Louange d'Anthoine de Leue.

Siege de Paue.

La crainte de la despenſe apporte quelque-fois grand mal.

fuſt pour euit^r la deſpenſe. Hé que ces petites meſnageries apportent quelquefois de perte. Auſſi quelques iours auant Monſieur d'Albanie avec beaucoup de forces , eſtoit allé par commandement du Roy à Rome , pour de là ſe ietter dans le Royaume de Naples : mais enfin tout alla en fumée. Car à noſtre grand malheur nous perdiſmes ceſte bataille, & toutes ces entrepriſes reuindrent à neant.

Morts & pris en la bataille.

Le diſcours de cette bataille eſt publié en tant de lieux que ce ſeroit perdre temps à moy d'y employer le papier. Je diray ſeulement, qu'elle ne fut guere bien conduite en pluſieurs endroits de noſtre coſté , qui fut cauſe de faire perdre ceux qui faiſoient leur deuoir. Le Roy fut prins, Monſieur le Mareſchal de Foix prins, & bleſſé d'une arquebuzade dans la cuiſſe, qui luy entroit dans le petit ventre. Monſieur de ſainct Pol prins & bleſſé de treize playes , lequel auoit eſté laiſſé pour mort au camp , & deſpoüillé tout en chemiſe : mais vn Eſpagnol luy couppant vn doigt pour auoir vne bague , qu'il ne pouuoit luy arracher , le fit crier , & ayant eſté recogneu, fut apporté avec lediſt Sieur Mareſchal

dans Pauie , au logis de la Marquise de Scadalfol. Plusieurs autres grands Seigneurs y moururent , comme le frere du Duc de Lorraine , Monsieur l'Admiral de Chabanes , & plusieurs autres prins. Entre lesquels estoient le Roy de Nauarre , Messieurs de Neuers , de Montmorancy , de Brion , & autres. Je ne veux taxer la memoire de personne, pour la perte de ceste bataille , ne marquer ceux qui firent mal leur deuoir , mesmement en presence de leur Roy. Pendant le sejour que ie fis en l'armée, ie fus tousiours avec un Capitaine dict Castille de Nauarre , sans prendre aucune solde. Lequel le iour de la bataille conduisoit les enfans perdus. Il me pria luy faire compagnie, ce que ie fis avec les cinq Gentils-hommes , qui estoient venus avec moy. Je fus prins prisonnier par deux Gentils-hommes de la compagnie du Seigneur Anthoine de Leue , lesquels le Samedy matin me laisserent aller , ensemble deux de mes compagnons : car ils voyoient bien qu'ils n'auroient pas grandes finances de moy. Les autres auoient esté tuez , ie me retiray en la maison de la Marquise , où Monsieur le Marechal estoit blessé. Je le

trouuay avec Monsieur de saint Pol , tous deux couchez en vn liët , & Monsieur de Montejan couché en la mesme chambre , estant bleffé en la jambe : là où i'entendis le discours & la dispute , qu'il y eut entre le Sieur Federic Bege prisonnier , & le Capitaine Sucre , qui estoit à l'Empereur , sur la perte de ceste bataille , lesquels ra-
xoient de grand'faute nos François , mesmes plusieurs particuliers , au nom desquels ie pardonne. Je iugeay leur opinion tres-bonne , estans tous deux grands Capitaines. Ce que ie leur ouïs dire, m'a depuis seruy en d'autres executions , avec ce que i'en iugeay moy-mesmes , comme doiuent faire tous ceux qui ont enuie de paruenir par les armes.

*Un homme qui
suit les
armes ,
doit ouyr
les rai-
sons des
vieux
Capitai-
nes.*

Il faut non seulement chercher les occasions de se trouuer aux combats & batailles : mais aussi estre curieux d'escouter , & retenir l'opinion , & raison de ceux qui sont gens experimentez, sur la faute, perte ou gain qui s'en est ensuiuy : car certes c'est grand' sagesse de bien apprendre , & se faire maistre aux despens d'autrui. La France a long tempsploré ceste perte , & la prise de ce braue Prince ; qui

pensoit trouuer la fortune aussi favorable, comme à la iournée des Suisses : mais elle luy tourna le dos, & luy fit voir combien il importe à vn Roy ne se trouver lui mesme à la bataille, veu que bien souuent sa prise mene avec soy la ruine de son estat. Toutesfois Dieu regarda le sien d'un œil de pitié, & le conserua : car les victorieux perdirent le sens, esblouis de leur victoire. Que si Monsieur de Bourbon eust tourné vers la France, il nous eust mis à deuiner.

Il importe qu'un Roy ne se trouue à la bataille.

Le Lundy apres Monsieur de Bourbon commanda que tous ceux qui estoient prisonniers, & qui n'auoient moyen de payer rançon, eussent à vuidier le camp, & se retirer en France. Je fus de ce nombre : car ie n'auois pas grand'finance. Il nous donna vne compagnie de gens de pied pour nostre seureté, & vne de cauallerie, mais sans vivre ny moyen quelconque : de sorte que nous ne mangeasmes iusques à Ambrun, que raues & tronçons de choux, que nous mettions sur les charbons. Auant partir Monsieur le Marechal me commanda de porter ses recommandations au Capitaine Carbon, & à tous ses com-

Rigueur du sieur de Bourbon.

*Remon-
strance
du Sieur
de Foix
à sa mort.*

pagnons , lesquels il prioit ne s'estonner pour cette perte , ains s'esuertuer pour faire mieux que iamais ; & qu'ils eussent à se rendre près de Monsieur de Lautrec son frere. Surquoy il me fit vne tres-belle remonstrance , laquelle ne se passa sans beaucoup de larmes , ce qu'il prononça avec vne parole ferme & assurée , combien qu'il fust fort blessé : aussi mourut-il le Vendredy apres. Je m'en vins à pied sans lance jusques à la Redorte en Languedoc , où estoit sa compagnie. Apres sa mort Monsieur de Lautrec fit donner la tierce partie de sa compagnie au Capitaine Carbon , laquelle il ne commanda gueres : Car peu apres vn meschant homme , natif de Montpellier , qui auoit fauorisé le camp de Monsieur de Bourbon , le tua par derriere aupres de Lumel , courant la poste. Ce fust vn aussi grand dommage, que de Capitaine , qui soit mort y a cent ans : & cuide , s'il eust vescu aux guerres que nous auons veu depuis , qu'il eust fait merueilles , & beaucoup de gens se fussent faits bons Capitaines aupres de luy. Car tous les iours on pouuoit apprendre quelque chose à sa suite , estant vn des plus vigilans &

*Louange
du Capi-
taine
Carbon.*

diligens Capitaines , que i'aye iamais
cogneu , grand entrepreneur , & grand
executeur tout ensemble. La tierce
partie fut donnée au Capitaine Li-
gnac d'Auvergne , qui ne la garda
gueres longuement , parce qu'il perdit
la veuë , & mourut. Et l'autre tierce à *Negrepelice.*
Monsieur de Negrepelice , pere de
cestui-cy , qui vit aujourd'huy , duquel
vn mien cousin germain , nommé le *Serillac.*
Capitaine Serillac portoit l'enseigne.

Cependant Madame la Regente ,
mere du Roy , & tous les Princes li-
guez avec elle , traitterent , & mo-
yennerent la deliurance du Roy , de
forte que , ce grand Empereur qui
s'estoit forgé la conqueste de ce Royau-
me , ne conquist vn seul pouce de
terre. Le Roy en son affliction tira se-
cours de ses propres ennemis ; lesquels
auoient suspecte la grandeur de l'Em-
pereur. Sa Majesté estant de retour , se
ressouuenant des injures & indignitez
qu'il auoit receuës pendant sa prison ,
ayant tenté tous les moyens pour re-
tirer Messieurs ses enfans , fust for-
cé de venir aux armes , & renouueller
la guerre. Ce fust lors , que le voyage *Monsieur*
de Naples fust dressé sous la charge de *de Lautrec va à*
Monsieur de Lautrec , lequel m'enuo- *Naples.*

ya vn courrier en Gascongne, pour dresser vne compagnie de gens de pied. Ce que ie fis en peu de iours : & lay mené sept à huit cens hommes, dont il y en auoit quatre ou cinq cens arquebuziers : combien qu'en ce temps-là n'en y auoit encores gueres en France. Monsieur d'Ausun m'en demanda la moitié pour dresser sa compagnie, ce que lui accordis, & fismes nostre partage aupres d'Alexandrie, laquelle fust renduë audit Sieur de Lautrec, lequel enuoya messieurs de Gramond & de Monpezat assieger le chasteau de Vigeue, deuant lequel en faisant les approches & les tranchées, pour mettre l'artillerie, ie fus blessé d'une arquebuzade par la jambe droite, qui fut cause que ie demeuray boiteux fort long temps : de sorte que ie ne peus estre à l'assaut, qui se donna à Pauie, laquelle fut emportée & demy bruslée. Je me faisois porter apres le camp dans vne litiere, toutes-fois auant que Monsieur de Lautrec partist de Plaifance, pour marcher droit à Boulongne, ie commençay à cheminer.

*Le sieur
de Mont-
luc blessé
d'une ar-
quebuzade.*

*Pauie
prise &
bruslée.*

Or aupres d'Ascolly, il y a vne petite ville nommée Capistrano sur le

haut d'une montagne , assise de sorte qu'il falloit monter tousiours , sauf de la part des deux portes , dans laquelle force soldats du païs s'estoient retirez.

Le Comte Pedro de Nauarre qui estoit nostre Colonel , commanda à nos compagnies de Gascons d'y aller. Ce

*Pedro de
Nauarre
Colonel*

que nous fîmes & assaillîmes la place. Nous fîmes faire des mantelets pour approcher de la muraille , à laquelle nous fîmes deux trous , par lesquels vn homme pouuoit passer facilement , à cinquante ou soixante pas l'un de l'autre : & pour-ce que i'en auois fait l'un , ie voulus donner par là. Les ennemis d'autre part desplancherent & osterent les tables du dessus d'une salle, là où le trou entroit , où ils auoient mis vne grande cuue pleine de pierres.

L'une des compagnies de Monsieur de Luppé nostre Soubs-Colonel , & la mienne commencerent à donner par le trou. Dieu me donna ce que ie luy auois tousiours demandé , qui estoit de me trouuer à vn assaut , pour y entrer le premier , ou mourir. Lors ie me iettay à corps perdu dans la salle , ayant vne cotte de maille , comme les Allemans portoient en ce temp-là , vne espée au poing , vne rondelle au

*Souhait
du sieur
de Mont-
luc.*

*Hardies-
se du sieur
de Mont-
luc.*

bras , & vn morion en teste : mais comme ceux qui estoient à ma queue , se voulurent ietter apres moy , les ennemis verserent la cuue de pierres sur eux , & les attrapperent sur le trou , qui fut cause , qu'ils ne me purent suivre. Je demeuray dedans combattant tout seul à vne porte , qui entroit dans la ruë. Mais du haut de la salle , qui estoit desplanchée on me tiroit infinité d'arquebuzades l'une desquelles me perça la fondelle , & le bras à quatre doigts de la main , & vn autre me froissa tout l'os sur la iointure de l'espaule & du bras , dont ie perdis le sentiment. Me tombant ma rondelle à terre , ie fus forcé de reculer deuers le trou , contre lequel ie fus renuersé par ceux qui combattoient à la porte de la salle , si heureusement toutesfois pour moy , que mes gens eurent moyen de me tirer dehors par les jambes : mais ce fut si doucement , qu'ils me laisserent rouler de haut en bas iusques au fond du fossé. Et tombant au travers de la ruine des pierres , ie me rompis encore le bras en deux lieux. Et comme on m'eut releué , ie dis que mon bras m'estoit demeuré dans la ville : mais vn de mes gens le print me

*Le sieur
de Mont-
luc blessé
de deux
arquebu-
zades.*

pendant en escharpe sur les fesses, & le mit sur l'autre : ce qui me reconforta vn peu. Voyant les soldats de ma compagnie autour de moy. O mes compagnons, dis-je, ie ne vous auois pas tousiours si bien traitez & tant aimez, pour m'abandonner à vn si grand besoin. Ce que ie disois, ne sçachant l'empeschement qu'ils auoient eu.

Alors mon Lieutenant, lequel auoit esté presque assommé sur le trou, nommé la Bastide, pere des Sauaillans, qui sont aujourd'huy, vn des vaillans Gentils-hommes, qui fust dans nostre armée, dit à deux Capitaines, Basques, nommez Martin & Ramonet qui campoient tousiours aupres de ma compagnie, que s'ils vouloient donner avec des eschelles par un quanton qu'il y auoit pres de là, qu'il donroit par le trou mesme, & qu'il vouloit mourir plustost qu'il n'y entraist. A quoy ie les acourageay tout autant que ma foiblesse me le pouuoit permettre. Les eschelles apportées, & liées, par ce qu'elles se trouuerent courtes, la Bastide donne par le trou, ayant mandé aux autres Capitaines de donner par l'autre : mais ils ne firent

La Bastide de Sauaillans.

Capistrano emporté d'assaut.

pas grands faits d'armes. Cependant que la Bastide combattoit , ayant gagné le trou Martin & Ramonet donnerent l'escalade : tellement qu'ils forcèrent les ennemis & entrèrent dedans. Dequoy estant aduerty , i'enuoyay prier la Bastide de me garder autant de femmes & filles qu'il pourroit , afin qu'elles ne fussent violées : ayant cela en deuotion , pour vn vœu que i'auois fait à nostre Dame de Lorette , esperant que Dieu pour ce bien-fait , m'aideroit : ce qu'il fit , & m'en amena quinze ou vingt , qui fust tout ce qui se sauua : car les soldats animez pour me venger , & montrer l'amitié, qu'ils me portoient , tuerent tout iusques aux enfans , & mirent le feu en la ville. Et quoy que l'Euesque d'Ascoly (duquel elle dependoit) priaist Monsieur de Lautrec , les soldats ne voulurent iamais partir , qu'ils ne la vissent en cendres. Le lendemain on m'apporta à Ascoly , où Monsieur de Lautrec m'enuoya visiter par Messieurs de Gramond & de Monpezat , menant deux Chirurgiens, que le Roy lui auoit donnez à son despart , l'un nommé maistre Alesme , & l'autre maistre George , lesquels apres auoir veu mon

*Vœu du
seigneur de
Montluc.*

bras charpenté , comme il estoit ,
 dirent qu'il le falloit couper , pour me
 sauuer la vie , ce qui fust remis au len-
 demain. Monsieur de Lautrec com-
 manda ausdits Sieurs de Monpezat &
 Gramond de s'y trouuer : ce qu'ils luy
 promirent difficilement , pour l'amitié
 qu'ils me portoient , mesmement le
 Sieur de Gramond. Quelques iours
 auparauant mes soldats auoient prins
 vn ieune homme Chirurgien , lequel
 auoit seruy Monsieur de Bourbon.
 Cestui-cy ayant entendu la resolution
 de me couper le bras (car ie l'auois
 retenu à mon seruice) ne cessoit de me
 remontrer , que ie ne l'endurasse pas ,
 me disant que ie n'estois pas à la moi-
 tié de mon aage , & que cent fois le
 iour ie souhaiterois ma mort , me vo-
 yant sans bras. Le matin venu les sus-
 dits Seigneurs , & les deux Chirur-
 giens & Medecins arriuerent en ma
 chambre , avec tous leurs appareils ,
 pour incontinent mettre la main à me
 couper le bras , sans me donner loisir
 de me repentir , ayant receu comman-
 dement de la part de Monsieur de
 Lautrec , de me dire , que ie ne me
 souciaffe de perdre le bras pour sau-
 uer la vie , sans desesperer de ma for-

*On veut
 couper le
 bras au
 sieur de
 Montluç.*

tune : & que si le Roy ne me vouloit faire du bien , que sa femme & luy auoient quarante mil liures de rente , pour me recompenser , & ne me laisser iamais pauvre , seulement que ie prinst patience , & qu'à ce coup ie fisse paroistre mon courage. Or comme ils furent prests à me deslier le bras pour le couper , le ieune Chirurgien ne cessoit de me prescher , estant derriere mon liêt , le contraire. Et comme Dieu aide aux personnes, quand il luy plaist, encores que ie fusse resolu de l'endurer , il me fit changer ma volonté , qui fust cause que tous les susdits Seigneurs & Chirurgiens , s'en retournerent faire le rapport à Monsieur de Lautrec : lequel leur dist , comme eux-mesmes

*Propos
du sieur
de Lau-
treac.*

m'ont asseuré plusieurs fois , ces mots , Aussi bien me repentois-je de luy faire couper : car s'il fust mort , i'eusse eu tout jamais cela sur le cœur : & vivant sans bras , i'eusse eu regret de le voir en la sorte , & qu'il falloit laisser faire à Dieu sa volonté.

Et soudain les susdits Chirurgiens examinerent le mien , pour sçauoir s'il estoit suffisant , car autrement l'un d'eux deuoit demeurer pres de moy : toutesfois ils le trouuerent capable , &

l'instruirent encores mieux sur les accidens qui me pouuoient suruenir. Le lendemain qui fut le quatriesme de ma blesseure , Monsieur de Lautrec me fit porter apres luy à Termes de Bresse , & me laissa dans son logis entre les mains de son hôte , qui estoit Gentilhomme , & pour assurance de ma personne , emmena deux des plus grands de la ville pour ostage : mesmement vn frere de l'hôte , les assurant si j'auois déplaisir, de les faire pendre. Je demeuré en ce lieu deux mois & demy , où ie couchay sur les reins : tellement que tous le grand os , qui est le long de l'eschine , me persa la peau , qui est la plus grand'douleur que ie pense que l'on puisse souffrir en ce monde.

Et encores que i'aye mis par escrit au discours , que i'ay fait de ma vie , que i'ay esté des plus heureux , & fortunéz hommes , qui long temps ayent porté les armes , pour auoir tousiours vaincu la part , où i'ay commandé ; si n'aye- ie pas esté exempt de grandes blesseures , & de grandes maladies : car i'en ay autant eu , que homme du monde scauroit auoir sans mourir , m'ayant Dieu toujours voulu donner bride , pour me faire connoistre , que

*Grandes
blesseures
du sieur
de Mont-
luc.*

*Son natu-
rel.*

le bien & le mal depend de lui, quand il lui plaist. Mais encore ce nonobstant ce meschant naturel aspre, fascheux & collere, qui sent vn peu & par trop le terroir de Gascongne ; m'a tousiours fait faire quelque trait des miens , dont ie ne suis pas à me repentir. Or apres qu'il se fust fait vn petit de pourris au bras , on commença à me leuer , ayant vn cuisinet sous le bras , en le liant avec le corps tout ensemble. Ainsi ie demeuray quelques iours , iusques à ce que monté sur vn petit mulet , que i'auois , ie me fis mener devant Naples , où nostre camp estoit desia assis, ayant enuoyé vn Gentilhomme des miens à pied à nostre Dame de Lorette pour accomplir mon vœu , puis que ie n'y pouuois aller. Le mal que i'enduray ne fut pas si insupportable , ny si grand , comme le regret que i'eus de ne m'estre trouué à la prise de Melphe & autres places , & à la deffaite du Prince d'Orange , lequel apres la mort de Monsieur de Bourbon (qui fut tué au sac de Rome) commandoit l'armée Imperiale. Si ce vaillant Prince , duquel la memoire est deplorable , pour le traict qu'il fit , ne fust mort lors de sa victoire , ie croy qu'il

qu'il nous eust r'enuoyé les Papés en
Auignon encor vn coup.

Or Monsieur de Lautrec me fit tres-
bonne chere , & tous les grands de
l'armée , mesmement le Comte Petro
de Nauarre , lequel me fit donner vne
confiscation vallant douze cens ducats
de rente , nommée la tour de la Nun-
ciade , pres la tour du Grec vn des plus
beaux chasteaux qui soit en la terre de
Labour , & la premiere Baronnie de
Naples , qui estoit à vn riche Espa-
gnol , nommé Ferdyno. Je pensois lors
estre le plus grand Seigneur de la trou-
pe , & à la fin ie me trouuay le plus
coquin , comme vous verrez par le
discours de mon voyage. Je deduirois
bien maintenant comme le Royaume
de Naples s'est perdu . lequel estoit
presque conquis. Plusieurs en ont
escrit : mais c'est grand dommage
qu'ils ne veulent dire la verité , &
qu'ils ne mettent en arriere toute la
crainte qu'ils ont : car les Rois & les
Princes y pourroient prendre exem-
ple , qui les feroit plus sages , pour ne
se laisser pas piper & decevoir, comme
ils font bien souuent : mais personne
ne veut que nos Rois soient si sçauans :
car ils ne feroient pas bien leur profit ,

*Don fait
au sieur
de Mont-
luc.*

comme ils font aupres d'eux. Je lairray donc cela en arriere , pour n'auoir commencé à escrire sur la faute des autres , ioint aussi que ie n'en ay point de commandement : mais seulement m'attendray à escrire mes fortunes , pour servir d'exemple , à ceux qui viendront apres moy , afin que les petits Montlucs , que mes enfans m'ont laissé , se puissent mirer en la vie de leur ayeul.

Il ne se presenta pas grande occasion , depuis que ie fus arriué au camp : car on ne s'attendoit qu'au siege de la ville de Naples , qu'on vouloit auoir par famine, comme nous l'eussions eüe bien tost, sans la reuolte d'André d'Oria , qui manda au Comte Philippin son nepueu , qu'il ramenast des galeres à Genes , avec lesquelles il tenoit la ville de Naples bouclée par la mer , tellement qu'il n'y eust sçeu entrer vn chat , ce qu'il fit , & incontinent y entra force vivres du costé de la mer , pendant que nos galeres tarderent à venir. Dieu pardoint à qui en fut cause : car sans cela la Ville estoit à nous , & par consequent tout le Royaume. Ce Philippin Lieutenant d'André d'Oria gaigna pres Capo Dorsa vne

*Bataille
gagnée
par Phi-
lippin
d'Oria.*

belle bataille nauale, contre Vgo Montcado, & le Marquis de Guast, lesquels vouloient secourir Naples : mais de cette victoire vint nostre ruine. Philippin ayant enuoyé les prisonniers à Genes à son oncle, & le Roy les voulant auoir, le Sieur André d'Oria ne les voulut rendre, se plaignant qu'il auoit deliuré le Prince d'Orange au Roy, sans recompense. Le Marquis de Guast homme fin & rusé, s'il en fut iamais, & qui a esté grand guerrier, sceut si bien esbranler l'esprit mal content d'André d'Oria, qu'enfin il tourna sa robe, & se rendit à l'Empereur avec douze galeres. Le Roy nostre maistre estoit bien aduerty de ses pratiques : mais il auoit le cœur si gros, & se sentoit si offensé d'Oria, qu'il ne le vouloit rechercher, dont il se repentit tout à loisir : car depuis il fut cause de beaucoup de pertes, qui aduindrent au Roy, & mesmes de la perte du Royaume de Naples, de Genes, & autres mal-heurs. Il sembloit que la mer redoutast cest homme. Voila pourquoy il ne falloit pas, sans grande & grande occasion l'irriter ou mescontenter. Le Roy, peut estre, en auoit quelque autre occasion.

Le Marquis de Guast fin & rusé.

Reuolte d'André d'Oria fort preindicia-ble au Roy.

*Arrivée
du Prince
de Na-
uarre.*

Nos galeres arriuerent à la fin, & apporterent le Prince de Nauarre, frere du Roy Henry, avecques quelques Gentils-hommes de sa suite seulement, lequel ne vesquit que trois sepmaines apres : car il arriua au commencement de nos maladies. A son arriuée & descente ; Monsieur de Lautrec luy enuoya Michel Antoine, Marquis de Salusses, pour luy tenir escorte : car il faisoit sa descente à demy mil de Naples, vn peu au deffous de la Magdelaine : & emmena vne grande partie de la gendarmerie avecques les bandes noires Italiennes, que le Comte Hugues de Genes commandoit, depuis la mort du Seigneur Horace Bailhon, qui estoient les compagnies du Seigneur Iean de Medicis, pere du Duc de Florence, qui est à present, lequel auoit esté blessé en vne iambe d'vne arquebuzade devant Paue, estant au seruice du Roy, & de là apporté à Plaifance. Auquel lieu la jambe luy fut couppée : dequoy bien tost apres il mourut. Depuis ledit Seigneur Horace recueillit toutes ses compagnies. Il sembloit que Dieu vouloit quelque mal en ce temps à nostre Roy, lors qu'il estoit deuant

Pauie. Car en premier lieu, on luy con-
 seilla d'en renuoyer les Grisons. Secon-
 dement d'enuoyer Monsieur d'Albanie
 à Rome, avec partie de l'armée. Et
 pour acheuer le mal-heur, Dieu en-
 uoya la blesseure au Seigneur Iean, *Louange*
 lequel à la verité entendoit plus à faire *du sieur*
 la guerre que tous ceux qui estoient *Iean de*
 aupres du Roy, ayant sous sa charge *Medicis.*
 trois mil hommes de pied, les meil-
 leurs qui furent iamais en Italie, avec
 trois Cornettes de gens de cheual: &
 croy fermement, comme aussi font
 bien d'autres que moy, que s'il se fust
 trouué sain à la bataille, les choses ne
 fussent pas allées si mal, comme elles
 allerent. Depuis le sieur Horace creut
 le nombre, de mil hommes, qui furent
 quatre mil, lesquels pour le dueil du
 Seigneur Iean portoient les Enseignes
 noires: & eux-mesmes alloient vestus *Bandes*
 de noir. Aussi on les appelloit les ban- *noires.*
 des noires: & apres se ioignirent avec
 Monsieur le Marquis de Salusses, qui
 temporisa enuiron deux ans en Italie,
 & vers Florence: & apres se vint
 ioindre à nostre armée à Troye, ou
 bien à Nocera, ie ne sçauois dire au-
 quel lieu des deux, pour ce que i'estois
 demeuré blessé à Termes de Bresse.

Mais pour retourner à la descente de Monsieur le Prince de Nauarre , parce qu'il se fit là vne petite faction , où i'eus ma part ; ie la vous veux con-

*Capitai-
ne Arti-
gueloube.*

ter. Il fut commandé au Capitaine Artigueloube , qui estoit Colonel de cinq enseignes Gasconnes , lesquelles souloient estre sous Monsieur de Lupé , & de cinq autres , que commandoit le Baron de Bearn , le tout sous le Comte

*Captan
de Buch
fils aîné
de Can-
dalle,*

Pedro de Nauarre : il fut commandé aussi au Captan de Buch , fils aîné de la maison de Candalle de s'y trouuer.

Ie fus aussi du nombre tout malotru que i'estois. Comme nous fumes bas à la marine , Monsieur le Marquis laissa tous nos piquiers derriere vn grand rempart , que le Comte Pedro de Nauarre auoit fait faire , qui duroit à main droite ou à main gauche pres de demy mil. Tout ioignant il y auoit vn grand portal de pierre , par lequel dix ou douze hommes eussent peu passer de front : & croy , que autresfois il y auoit eu vne porte : car l'arc y estoit & les marques. Ce rempart se ioignoit avec le portal à main gauche & à main droite. Nostre bataillon estoit à cent pas du portal , & celuy des bandes noires estoit à trois cens pas plus en

arriere que le nostre , & la meilleure
 partie des gens à cheual encore plus en
 arriere. Monsieur le Marquis , Mon-
 sieur le Captau , le Comte Hugues , le
 Capitaine Artigueloube , & presque
 tous les Capitaines tant Italiens que *Descente*
 Gascons allerent avec eux; pour favori- *du Prin-*
 ser & veoir la descente du Prince. Ledit *ce de No-*
 Seigneur Captau auoit six enseignes , *uarre.*
 trois Piedmontoises, & trois Gasconnes.
 Ils firent leur demeure si longue à la
 descente , qu'ils demurerent plus de
 deux ou trois grosses heures : car ils
 firent disner ledit Seigneur Prince auant
 qu'il descendit de la galere. Quelques-
 fois vn peu de sejour apporte vn grand
 malheur. Il eust plus valu , que luy &
 tous les siens eussent fait vn bon ieiune,
 mais la vanité du monde est si grande ,
 qu'il semble que c'est se rabaisser , si
 on ne marche tousiours avec toutes
 les pieces qui appartiennent à la Prin-
 cipauté : & cependant on fait force
 pas de clerc. Il vaut mieux marcher en
 simple Gentilhomme , & non pas faire
 le Prince , & faire bien , que non pas
 se tenir sur le haut bout , & estre cause
 de quelque desordre & malheur.

Cependant le Capitaine Artigueloube
 m'auoit mis avec soixante ou
 quatre vingts arquebuziers , sur vn

carrefour bien pres de la Magdelaine ; qui est vne grand'Eglise à cent ou deux cens pas de la porte de Naples. Et en vn autre carrefour , à main gauche de moy , où il y auoit vn petit Oratoire , furent mis trois ou quatre cens arquebuziers des bandes noires , & vne enseigne de piquiers. En ce mesme lieu aussi , & vn peu à costé fut mise la trouppe dudit Seigneur de Candalle , qui estoit de deux ou trois cens arquebuziers , vis à vis de moy enuiron à deux cens pas. Estant ainsi à mon carrefour , ie vis sortir de Naples gens de pied & de cheual , qui venoient gagner la Magdelaine , la teste baissée. Ie montay lors sur vn petit mullet que i'auois , & m'en allay droit à la descente des galeres. Tous les Seigneurs & Gentils-hommes estoient encore dedans s'amusans à faire des accolades. Ie leur fis crier par quelques petits barquerots qui alloient & venoient , que les ennemis fortoient de la ville à troupes , pour les venir embrasser & gagner le derriere de la Magdelaine , & qu'ils pensassent au combat , s'ils vouloient. Il y en eut bien d'esbahis : car tous ceux qui font bonne mine , n'ont pas tousiours enuie d'en manger.

Incontinent

*Ceux de
Naples
sortent.*

incontinent ie m'en retournay à ma troupe, & m'en allay avec deux chemins iusques aupres de la Magdelaine : de là j'apperceus que les ennemis sortoient à pied, tenant la bride en vne main, & la lance en l'autre, se baissant tant qu'ils pouuoient, pour n'estre descouuerts, comme faisoient aussi les gens de pied, qui marchoient en tapinois derriere les murailles, qui sont derriere l'Eglise. Ie donnay soudain mon mullet à vn soldat, afin qu'il courust aduertir Monsieur de Candalle, & le Capitaine Artigueloube, lesquels il rencontra desia en terre. Sur mon aduertissement ils auoient fait mettre vne galere au large, laquelle descouuroit tout ce que ie leur auois mandé : ce qu'ils ne pouuoient faire estant au port. Ceste galere commença à tirer force volées de canon, l'vne desquelles tua deux hommes de ma troupe, tout aupres de moy : de sorte que les ceruelles de l'vn & de l'autre me sauterent au visage. Il y auoit bien là du danger : car toutes les balles venoient où i'estois, tant de ceste galere, que des autres, lesquelles firent le mesme : de façon que voyant que les coups s'enforçoient toujours, car ceux

des galeres pensoient que ie fusse des ennemis , ie fus contraint de me ietter dans les fossez.

*Retraite
du Prin-
ce.*

Cependant on monta promptement à cheual Monsieur le Prince , & au galop le firent sauuer droit au camp , & tous ces Gentils hommes aussi , courant à pied apres luy. Ils n'eurent pas grand loisir de s'arrester avec nous : car ie croy , qu'ils ne vouloient pas si tost mourir , puis qu'ils ne faisoient qu'arriuer. Leur haste fut si grande , qu'ils n'eurent pas loisir de mettre à terre le liët , ny le bagage dudit Seigneur Prince : & y en eut qui demorerent dedans les galeres. Le Seigneur de Candalle , & le Comte Hugues ne firent pas ainsi , car ils s'arresterent au carrefour , où estoient leurs gens. Le Capitaine Artigueloube s'en alla au bataillon derriere le rempart. La feste commença à moy. Je ne sçay si c'est ou bonheur ou malheur , tant y a que tousiours ie me trouuois , où les coups se donnoient , & là où on commençoit. Or vne troupe d'arquebuziers vint droit à moy , courant : & pour ce que i'auois mis derriere vne leuée du fossé , qui regardoit tout au long du grand chemin , venant de-là arquebu-

ziers au long d'une haye, qui bordoit
 vn grand chemin venant de la Magde-
 laine, vne partie de mes arquebuziers,
 & l'autre dans les fosséz à main droite,
 & à main gauche en file, plus pour la
 crainte de nostre artillerie, qui tiroit
 des galeres, que non pas des enne-
 mis, ils s'approcherent de nous à *Combat.*
 moins de vingt pas: lors nous ti-
 rasmes tous à vn coup, qui fut
 cause que cinq ou six hommes tom-
 berent mort par terre. Mes arquebu-
 ziers ne pouuoient faillir de tirer: car
 tout le chemin estoit plein. Ils prin-
 drent la fuite, & les menasmes iusques
 tout ioignant la Magdelaine. Alors ils
 se renforcerent, & se mirent hors du
 chemin à main droite d'eux, & du
 costé où estoit Monsieur de Laual de
 Dauphiné, avecques sa compagnie
 d'hommes d'armes, nepueu de Mon-
 sieur de Bayard, & pere de Madame
 de Gordes, qui est à present fort vail-
 lant Gentil-homme. Monsieur de Can-
 dalle qui auoit veu ma cargue, &
 voyoit que tout se descouuroit, & que
 l'ennemy à pied & à cheual entroit
 dans vn grand pré, où estoit Monsieur
 de Laual, craignant qu'ils m'en fissent
 encores vn autre, m'enuoya cinquante

arquebuziers de renfort : & tout à vn coup vn bataillon d'Allemans se presenta à cent ou six vingt pas de moy , à main droite. Cependant l'arquebuzerie Espagnolle tiroit de furie sur cette gendarmerie , laquelle se retiroit au grand pas , droit au carrefour de Monsieur de Candalle , là où il se fist vne grande faute. Je la vous veux escrire : afin que ceux qui la liront , en puissent tirer profit : car peut-estre les hazards de la guerre les ietteront en mesme estat.

*Faute du
Comte
Hugues.*

Le Comte Hugues , & Monsieur de Candalle auoient mis sur le grand chemin des picquiers , sans laisser place pour retirer la cauallerie : il falloit que Monsieur de Laual en despit qu'il en eust passast par là : car entre monsieur de Candalle & moy , il y auoit vn grand fossé , où les gens de cheual n'eussent sçeu passer. Que s'ils eussent laissé le chemin libre , & qu'ils se fussent mis en bataille derriere le fossé , ils eussent arresté sur cul la furie des ennemis : & ainsi monsieur de Laual se fust sauué aisément au long du chemin , & eust fait vne honorable retraite. Comme les ennemis virent que monsieur de Laual estoit contraint de

prendre le trot , ils le chargerent par gens de pied & gens de cheual de queuë & de teste. Et comme ledit Sieur de Laual se fust ietté dans le grand chemin pour passer outre , il rencontra ces picquiers au milieu d'iceluy , & outre son gré fut contraint de passer outre : & en passant porta par terre tout ce qui se trouua deuant eux : car nos picquiers ne pouuoient faire largue. Cela mit tout en desordre , ie cuiday enragger , voyant vne telle incongruité. Il n'en faut donner le tort à monsieur de Candalle , pour ce qu'il estoit ieune , & ne s'estoit iamais trouué en telle feste : mais au Comte Hugues , qui estoit desia vieux soldat. Ie ne veux pas dire qu'il ne fit bien vaillamment : mais ce n'est pas tout d'estre vaillant & hardy , il faut estre sage : il faut preuoir tout ce qui peut suruenir , veu qu'aux armes , les fautes sont irreparables. Vne bien legere traine souuent apres soy vne grande perte : comme'il fit à luy-mesmes , qui n'auoit songé à tout. Car le Comte Hugues fust prins prisonnier , & monsieur de Candalle aussi estant blessé d'une arquebusade en vn bras. Trois iours apres , les ennemis le renuoyerent à monsieur de Lautrec ,

En la guerre , les fautes sont irreparables.

Le Comte Hugues. prins.

*Mort de
Monsieur
de Can-
dalle &
ses loian-
ges.*

duquel il estoit parent , voyant qu'i s'en alloit mourir , comme de faiët trespassa le lendemain , & fut enseuely à Bresse.

C'estoit vn braue & honeste Seigneur , s'il en sortit iamais de la maison de Foix , s'il eust continué comme il auoit commencé. Le ne cogneus iamais homme si soigneux & desireux d'apprendre le faiët de la guerre , des vieux Capitaines , que celuy-là. Pour cest effet il se rendoit plus subyet du Comte Pedro de Nauarre , que le moindre de ses seruiteurs. Il desiroit entendre la raison de toutes choses , & s'informoit de tout , sans s'amuser à ce que la ieunesse desire & aime. On le trouuoit plustost au quartier du Comte Pedro de Nauarre , qu'à celuy de monsieur de Lautrec. Aussi le Comte disoit tousiours , qu'il se nourrissoit là vn grand Capitaine. Et à la verité quand on le porta , ledit Comte le baïsa la larme à l'œil. Ce fust vne grand'perte. Tout ce qui se trouua là fust mort ou prins , si ce n'est quelques-vns qui se sauuerent par les fossez , sautant de fossé en fossé , encore fust-ce peu de chose. Les ennemis suiuirent de ce costé là tres-bien leur victoire.

De ma part, ie m'acheminay au long d'une haye, faisant tousiours teste aux Allemans, le moins mal que ie pouuois. La bonne fortune voulut pour moy & pour ma troupe qu'ils me suiurent assez froidement. A l'arriuée au portal, dont ie vous ay parlé, ie trouué vne grande troupe de gens de cheual des ennemis, que le Seigneur Dom Ferrando de Gonsague conduisoit, car c'estoit luy qui fist la cargue: de sorte que pour regagner le portal, il me falust combattre, resolu de passer ou mourir. Ie fis faire à mes soldats vne salve d'arquebuzades: car de moy, ie n'auois que la parole. Sur ceste salve ils me firent place. Ainsi ayant passé le portal, ie tournay teste aux ennemis: & fis faire ferme à mes gens. Et en mesme instant arriua leur arquebuzerie, laquelle chargea tout à un coup sur nous ensemble toutes les troupes, tant de pied que de cheual. Voyant ce choc venu sur moy, ie gaigné le derriere de la trenchée avec mes arquebuziers seulement, qui s'estoient sauuez. Monsieur le Marquis se trouua en tel estat, qu'il tenoit le tout pour perdu. Ie combattis le portal vne grande demie heure du derriere de la

*Belle re-
traicte de
Montluc.*

*Diligen-
ce du
Marquis
de Salus-
ses.*

trenchée : car le portal demeura libre tant de leur costé que du nostre. Ils n'osoyent passer, ni nous aussi en approcher, ny enfoncer. Si iamais soldats firent acte de vaillans hommes, ceux-là le firent. Tout ce que j'auois ne pouuoit estre plus haut de cent cinquante hommes. Monsieur le Marquis vint au Capitaine Artigueloube, pour le faire leuer, d'autant que tous estoient le genoüil à terre, parce qu'estans debout, l'arquebuzerie Espagnole les pouuoit veoir : & luy cria, Capitaine Artigueloube, ie vous prie leuez-vous, & donnez : car il faut passer le portal. Mais il luy respondit, qu'il ne se pouuoit presenter au portal, sans perdre les meilleurs de nos gens, comme il estoit vray : car toute l'arquebuzerie Espagnole estoit arriuée. l'estois contre le portal, & oyois tous ces propos. Monsieur le Marquis ne se contentant de ceste response, courust aux bandes noires, leur commandant marcher vers le portal : ce qu'elles firent. le cogneus à leur desmarche le commandement, qu'elles auoient receu, ce qui fust cause, que j'auançay le pas, & crié au Capitaine Artigueloube. Mon compagnon, vous

receuez icy vne escorne pour iamais : car voila les bandes noires sur ma vie, qui viennent au portal, pour emporter l'honneur. Il se leva lors, car il n'auoit pas faute de cœur : donnant la teste baissée au portal. Le voyant venir, ie me iette soudain sur le portal, passant avec tous mes gens, qui me suiuirent, marchant droit aux ennemis, qui n'estoient esloignez de nous, plus de cent pas. Nous fumes suiuis des troupes que le Seigneur Marquis enuoyoit : mais comme la moitié estoit passée, Monsieur le Marquis fit crier de main en main, qu'on fit alte, sans s'auancer plus auant. Les ennemis voyant ceste resolution, & la cauallerie qui venoit à nostre queue, prindrent party de se retirer. Ie m'estois auancé nous saluans à cinquante pas avec bonnes arquebuzades, & auions enuie de nous mesler, lors que Monsieur le Marquis vint luy second à cheual pour m'arrester. Ie croy qu'il fit mal : car si tout fust passé, nous les eussions menez battans iusques aux portes de Naples. Il y eut là d'un costé & d'autre plusieurs portez par terre, qui n'en releveront iamais : & m'estonne que ie n'y demeuray : mais mon heure n'estoit pas venuë,

Les Impériaux se retirent.

*Occasions
qui firent
retirer le
Marquis
de Salus-
ses.*

Ce qui occasionna Monsieur le Marquis de faire sa retraicte, fust pour la crainte qu'il auoit de tenter vn second coup fortune. Il se contenta de la perte, qu'il auoit faite, sans vouloir plus hazarder. Ainsi bien las & harassez nous retournasmes repasser par ce portal, qui auoit esté tant combattu, où maints bons hommes demurerent. Celuy qui estoit avec Monsieur le Marquis, quand il me vint faire retirer, il ne me souuient de son nom, luy dist, car ie l'entendis, Monsieur ie cognois maintenant que le Prouerbe de nos anciens est veritable, qui dist : Qu'vn homme en vaut cent, & cent n'en valent pas vn. le le dis pour ce Capitaine qui a le bras en escharpe, qui est appuyé contre ce tertre. Aussi ie n'en pouuois plus : car il faut confesser qu'il est seul cause de nostre salut ; l'entendis, toutesfois ie ne faisois semblant de l'ouïr, que le Marquis respondit, celuy-là fera tousiours bien par tout où il se trouuera. Encores que cecy soit à mon honneur & à ma louïange, puis qu'il est veritable, ie l'ay voulu mettre par escrit, sans pourtant estre ny glorieux, ny vantard. l'ay acquis assez de gloire sans

*Honneur
au sieur
de Mont-
luc.*

cela. Cecy, peut-estre, donnera enuie aux Capitaines, qui liront ma vie, quand ils se trouueront en quelque grand besoin en faire le semblable. Il faut que ie die, que lors i'estimay plus la loitiange, que me donna ce Gentil-homme, & mondit Sieur le Marquis, que s'il m'eust donné la meilleure terre des siennes, encore que pour lors ie fusse bien pauvre. Ceste gloire me fit enfler le cœur : & encores plus, quand on me dist, qu'en souppant on en auoit entretenu Monsieur de Lautrec & Monsieur le Prince. Ces petites pointes d'honneur seruent beaucoup à la guerre : & font que quand on s'y retrouue, on ne craint rien, il est vray, qu'on se trompe souuent : car on n'en rapporte que des coups. Il n'y a ordre, il en faut prendre & donner.

L'honneur enfle le cœur au soldat.

Capitaines, & vous Seigneurs, qui menez les hommes à la mort, car la guerre n'est autre chose : Quand vous verrez faire quelque braue acte à vn des vostres, louiez-le en public : contez-le aux autres qui ne s'y sont pas trouuez. S'il a le cœur en bon lieu, il estime plus cela que tout le bien du monde. Et à la premiere rencontre il raschera encore de mieux faire. Que si

Instruction aux Chefs.

vous faites comme plusieurs font , qui ne daignent pas faire cas du plus beau faict d'armes qui soit , & qui passent tout par mespris , vous trouuerez qu'il faudra que vous les recompensiez par effets , puis que vous ne le voulez pas faire de parole. l'ay tousiours traité ainsi les Capitaines , qui ont esté sous moy , voire les plus simples soldats : aussi ie les eusse fait donner de teste contre vne muraille : & les eusse arrestez au plus dangereux lieu qui se fust sceu presenter , comme ie fis là.

Voila le premier malheur & la premiere disgrâce , qui nous estoit encores aduenüe en tout ce voyage. Il sembla à tout le monde , que le Seigneur Prince de Nauarre nous auoit apporté tout mal-heur & mal-encontre. Pleust à Dieu qu'il fust demeuré en Gascongne : car aussi vint-il finir ses iours bien loing , sans auoir rien fait que voir Naples. Il mourut trois sepmaines apres son arriuée , ou enuiron : & fut cause de la mort de ce braue ieune Seigneur (que ie regretteray tousiours) qui auoit cest honneur d'estre son parent. Mais encore ce ne fust pas tout : car comme on sceust , qu'un tel Prince arriuoit , tout le monde entra en

*Mort du
Prince de
Nauarre.*

opinion qu'il amenoit quelque beau secours & renfort , voire mesme de l'argent , pour payer l'armée , mais rien de tout cela : car ny luy , ny les galeres ne nous amenerent vn seul homme de renfort , & rien que la maison , & quelques Gentils-hommes volontaires. Cela osta fort le cœur à toute nostre armée grandement affligée. L'ennemy qui le sceut redoubla son courage , & cognut par là , que les eautés Françoises estoient basses , puis qu'un tel Prince venoit en équipage , comme si c'estoit seulement pour venir voir le monde. Il ne s'en falloit prendre à luy , mais à ceux qui l'enuoyent.

C'est vne grande faute aux Rois & aux Princes , qui entreprennent de grandes choses , de tenir si peu compte de ceux qu'ils scauent engagez en entreprinse de consequence , comme estoit celle dudit Sieur de Lautrec. Car la prinse de Naples assieuroit fort l'estat de la France : laquelle eust eu pour longues années les coudées franches. Nous l'eussions longuement disputé , si vne fois il eust esté à nous : car nos pertes precedentes nous eussent fait Sages. Vne autre faute fit nostre

*Avis
aux Rois
& Prin-
ces.*

Roy , de n'enuoyer quelque belle troupe de Noblesse , & de gens de pied avec ledit Seigneur Prince : car cela , comme i'ay dit , fit croire à nos gens , ou qu'il ne faisoit pas grand estat de nous , ou qu'il estoit empesché ailleurs. Ce n'estoit pas la faute dudit Seigneur de Lautrec , qui ne cessoit de faire despesche sur despesche, pour aduertir le Roy de tout. Mais ie retourne à moy : car , comme i'ay tousiours protesté , ie ne veux faire l'Historien , i'y serois bien empesché , & ne sçau-rois par quel bout m'y prendre.

Or voila la derniere faction , où ie me trouuay : & encores que ie ne fusse pas le Chef , qui la commandoit , si auois-ie charge d'une bonne troupe , & bonne part au combat qui fut rendu , lequel fut tres-beau , & non pour tous. Je l'ay escrit pour m'aquiter de ce que i'ay promis , qui est de desduire ce qui s'est fait là où i'ay commandé , passant le reste bien legerement , comme ie fais le surplus de ce malheureux siege , lequel enfin nous fumes contrains de leuer , Monsieur de Lautrec estant mort , au grand malheur de toute la France ; laquelle n'a jamais eu Capitaine doué de meil-

leures parties , que celuy-là : mais il estoit mal-heureux , & mal secouru du Roy , apres qu'on l'auoit engagé , comme on fit à Milan , & puis à Naples. De ma part avec ce qui se sauua , qui fust presque rien , ie m'en reuins à pied la plus-part du chemin , portant mon escharpe , ayant plus de trente aulnes de raffetas sur moy , pour-ce qu'on me lioit le bras avec le corps , vn cuissin entre deux , souhaitant la mort mille fois plus que la vie : car i'auois perdu tous mes Seigneurs & amis , qui me cognoissoient , y estans tous morts , sauf Monsieur de Montpezat , pere de cestuy-cy , & le pauvre Dom Pedro , nostre Colonel prins & mené prisonnier dans la Roque de Naples : où on le fit mourir , ayant l'Empereur mandé qu'on luy fist couper la teste , pour la recompense de ce qu'il s'estoit reuolté contre luy. C'estoit vn homme de grand esprit , auquel Monsieur de Lautrec , qui ne croyoit guere personne , auoit grande creance; si crois-ie , & ne suis pas tout seul , qu'il le conseilla mal en ceste guerre : mais quoy , nous ne iugeons que par les euenemens.

*Pauvre
estat du
sieur de
Montpezat.*

*Mort de
Dom Pe-
dro de
Nauarre.*

En ce bel équipage i'arriuay en

nostre maison , où ie trouuay mon pere assez en necessité , pour n'auoir pas grands moyens de m'aider : d'autant que son pere auoit vendu des quatre parts les trois des biens de la maison , & le laissa encore chargé de cinq enfans d'un second mariage : & nous qui estions dix de nostre pere. Chascun peut penser comme il a fallu que nous , qui sommes sortis de la maison de Montluc , ayons suiui la fortune du monde en toute necessité. Et si nostre maison n'estoit pas si petite , qu'elle ne fut de pres de cinq mil liures de rente auant qu'elle fust vendue. Pour m'accommoder de tous poincts , ie demeuray , trois ans , sans pouuoir guerir de mon bras en aucune maniere. Et apres estre guery , il falust faire tout ainsi que le premier iour que ie sortis hors de page , & comme personne incognue , chercher ma fortune au grand peril de ma vie , endurant beaucoup de necessités, Je louë Dieu du tout : car quelque trauerse que iaye eu , il m'a tousiours aidé.

*Institu-
tion des
Legio-
naires.*

Au premier remuement de guerre le Roy François dressa les Legionaires , qui fust vne tres-belle inuention si elle eut esté bien suiue (pour quelques
temps

temps nos ordonnances & nos loix
sont gardées, mais apres tout s'abastar-
dit) car c'est le vray moyen d'auoir
rousiours vne bonne armée sur pied,
comme faisoient les Romains, & de 1534.
tenir son peuple aguerri : combien que
ie ne sçay si cela est bon ou mauuais.
La dispute n'en est pas petite, si aime-
rois-je mieux me fier aux miens,
qu'aux estrangers.

Le Roy en donna mil au Seneschal
de Toulouse, seigneur de Faudouas, *Faudouas*
lequel me fist son Lieutenant, & en- *denais*
cores que ce fust de la legion de Lan-
guedoc, & qu'il en fust Colonel, ie
luy dressay toute sa compagnie en
Guyenne, & luy fis ses centeniers,
cap-deffcoades, & enseignes. Vn
grand bruit couroit lors par la France,
que l'Empereur pour les grandes intel-
ligences qu'il auoit, s'auançoit pour
la conqueste d'un tel & si grand
Royaume, avec forces inuincibles,
pensant surprendre le Roy nostre
maistre au despourveu, comme de
faict il s'auançoit vers la Prouence. Le
Roy pour s'opposer à vn tel, & si
grand ennemy, manda ses forces de
toutes parts : nous fismes vne telle di-
ligence, aussi n'aye-ie iamais esté pa-

*Les fleurs
de Bar-
bezieux
& de
Montpe-
zat dans
Mar-
seille.*

refseux , que nostre compagnie fut la premiere qui arriua à Marseille : & y trouuafmes Monsieur de Barbezieux , qui estoit de la Rochefoucaut , & de Montpezat , que le Roy auoit fait ses Lieutenans , ayant autant d'autorité l'vn que l'autre , & les Seigneurs de Botieres & de Villebon Preuost de Paris , les compagnies de Monsieur le grand Escuyer Galliot , & dudiect Seigneur de Montpezat , qui venoient de Fossan , tous desmontés , n'ayant chacun qu'vn courtaut : car la redition dudiect Fossan , qui se perdit par l'enorme trahison , & peut estre inouye , du Marquis de Salusses , il fallust , qu'ils laissassent leurs grands cheuaux. L'Empereur estant bien tost apres arriué à Aix , nous eufmes incessamment les compagnies Legionnaires de mil hommes de Monsieur de Fonterailles , pere de ceux ci qui sont en vie , & de Monsieur d'Aubigeous , & celles de Languedoc , Christofle Goast , qui estoit d'Alexandrie , avec sept compagnies d'Italiens. Je ne scaurois dire si les compagnies de Monsieur de Botieres & de Villebon y estoient , bien me souuient de celle dudiect Seigneur de Barbezieux. Et tant

*Descente
de l'Em-
pereur en
Prouen-
ce.*

que l'Empereur demeura à Aix, nous demeurâmes tousiours à Marseille, où ne se fit aucune faction, que celle ^{1537.} que ie vois descrire.

Comme l'Empereur eut demeuré long-temps à Aix, attendant sa grosse artillerie pour nous venir battre, les viures lui diminuoyent tousiours de plus en plus. Pendant ces entrefaictes le Roy arriua à Auignon, là où sa Maiesté fust aduertie, que si l'on brusloit quelques moulins, que l'Empereur tenoit vers Arles, & mesme vn, qui estoit à quatre lieues d'Aix nommé le moulin d'Auriolle, le camp des ennemis seroit bientost affamé. Il fit faire l'exécution du bruslement desdicts moulins, qui estoient vers Arles par le Baron de la Garde, qui auoit vne compagnie de gens de pied, & le capitaine Thorines guidon de Monsieur le Comte de Tandes, & autres, lesquels en vindrent à bout. Et neanmoins les espions raportoient tousiours au Roy qu'il falloit brusler ceux d'Auriolle, d'autant qu'ils nourrissoient ordinairement toute la maison de l'Empereur, & les six mil soldats vieux Espagnols, lesquels il tenoit tousiours pres sa personne. Sa

*Moulins
bruslés
par les
François.*

*Le Capitaine
Goast refuse l'en-
treprise.*

Majesté manda plusieurs fois à Messieurs de Barbezieux & de Montpezat de hazarder vne troupe d'hommes pour aller brusler lesdits moulins d'Auriolle : & le premier à qui il presenta l'exécution , fut audit Christofle Goast, lequel la refusa disant qu'il y auoit cinq lieuës iusques ausdits moulins , où il falloit combattre soixante hommes de garde qu'il y auoit dedans , & vne compagnie entiere dans la ville , & que par ce moyen il luy falloit faire cinq lieuës à aller & autant à reuenir , & qu'à cause de cette longue traite , allant ou reuenant il seroit deffait sur les chemins : car bien tost l'Empereur seroit aduertty , pour n'y auoir que quatre lieuës dudit Auriolle iusques à Aix : D'autre part que les soldats ne sçauroient faire dix grandes lieuës sans séjourner. Ceste responce fut enuoyée au Roy , lequel ne la print pour argent comptant , ains contremanda plus viuement qu'on la presentat à d'autres , & que quand bien mil hommes se perdroient à ceste entreprinse , il ne s'en donnoit pas de peines : car le profit en les bruslant seroit plus grand , que la perte (tant on fait bon marché des hommes.) Surquoy on la presen-

ta à monsieur de Fonteraïlle, lequel vne fois estoit resolu de l'entreprendre: mais il y eust de ses amis qui luy remonstrent sa perte, qu'ils lui firent toucher au doigt, qui fut cause qu'il se refroïdit: & manderent le tout à sa Maïesté, laquelle ayant souuent nouuelles du profit qu'auoit apporté la rupture des autres moulins, poursu-uoit tousiours apres lesdits Seigneurs d'enuoyer rompre ceux cy. Or vn iour apres que i'eus entendu le mal contentement du Roy, & les raisons de ceux à qui l'on auoit présenté l'entreprise, lesquelles à la verité estoient iustes & raisonnables, ie me mis à penser en moy-mesme comment ie la pourrois executer, & que si Dieu me faisoit la grace d'en venir à bout, ce seroit me faire cognoistre au Roy, & retourner en la mesme reputation & cognoissance des grands, que i'auois auparauant acquise, laquelle les deux ans d'oyssiueté, & la longueur de ma blesseure, auoit fait esuanouïr. Ce n'est rien, mes compagnons, d'acquerrir de la reputation, & vn bon nom, si on ne l'entretient & continué. Ayant donc prins en moy ceste resolution de l'executer, ou de creuer, ie m'infor-

Fonteraïlle.

Entre-
prise de
brusler
les mou-
lins
d'Anriol-
le.

may au long de mon hôte , qui estoit du lieu , où ces moulins estoient , Il me dit que Auriolle estoit vne petite ville fermée de hautes murailles , là où il y auoit vn chasteau bien muré , & vn bourg composé de beaucoup de maisons , avec vne grand'ruë par le milieu , & au bout dudit bourg estoit le moulin à main gauche , qui venoit de la ville , & qu'à la porte de ladite ville y auoit vne tour , qui regardoit tout au long de la grand'ruë du moulin , deuant lequel homme ne s'osoit tenir sans encourir peril d'estre tué ou blessé : & par delà le moulin , il y auoit vne petite Eglise à plus de trente ou quarante pas , me disant qu'il falloit passer à Ambaigne deux lieuës de Marseille , & de là iusques Auriolle y en auoit trois , si on passoit par la montagne , ce que gens à cheual ne pouuoient faire aucunement : & que par le chemin de ces cheuaux , il y auoit près d'vne lieuë d'auantage , & si falloit passer vne riuere , où les cheuaux y auoient tousiours eauë iusques à demy ventre , à cause que tous les ponts auoient esté rompus. Apres que tous mon hôte m'eust dit cela , ie consideray que si i'entreprendois l'exécution avec

grand'trouppe , ie serois deffait : car n'y ayant que quatre lieuës iusques au camp de l'Empereur , il seroit incontinent aduertý , & enuoyeroit la cavalerie sur le chemin de mon retour , comme il aduint. Car incontinent , que nous arriuasmes au moulin , le Capitaine du chasteau aduertit l'Empereur. Ainsi ie pensay qu'il me valoit mieux l'entreprendre avec peu d'hommes , estans tous bien ingambe , & le pied leger : afin que si ie venois à bout de l'entreprinse , i'eusse le moyen de me retirer par vn chemin ou autre : considerant qu'encores que ie me perdisse avec petit nombre , la ville de Marseille ne seroit aucunement en danger d'estre perduë , qui estoit ce que plus se disputoit au Conseil. Car perdant mil ou douze cens hommes qu'on iugeoit necessaires pour ceste entreprinse , ladite ville se mettoit en hazard : mesmes en attendant un siege. Je priay mon hoste de me trouver trois hommes qui me guidassent bien la nuit , & que à point nommé ils m'amenaissent deux heures deuant iour aux moulins. Ce qu'il fit : & apres auoir bien consulté avecques ses guides , ie les vis en doute. Enfin mon

*Consideration
d'un entrepre-
neur.*

hôte les fit refoudre, & leur mit le
 cœur au ventre. Je leur donnay à cha-
 cun vn couple d'escus, & les fis tenir
 à mon logis : cecy pouuoit estre enui-
 ron midy. Et ayant disputé avec mon
 hôte combien d'heures duroit la nuit
 pour lors, nous trouuâmes, que
 pourueu que ie partisse à l'entrée de la
 nuit, i'auois le temps qu'il me falloit.
 Et pour ne divulguer mon voyage,
 i'allay à monsieur de Montpezat le
 premier, luy dire ce que ie voulois
 faire, & comme ie ne voulois pren-
 dre que six vingts hommes choisis en
 la compagnie de monsieur le Senes-
 chal, de laquelle i'estois Lieutenant.
 En quelque part que ie me suis iamais
 trouué : i'ay tousiours prins peine de
 discerner les bons des mauuais, &
 iuger leur portée : car tous ne sont pas
 propres à toutes choses. Ledit Sieur
 de Montpezat trouua fort estrange
 mon dire, & pour l'amitié qu'il me
 portoit, me conseilloit de ne faire
 ceste folie : & qu'on m'en bailleroit
 cinq cens si ie les voulois. Je luy dis
 que ie ne le voudrois entreprendre
 avec cinq cens, ce que ie ferois bien
 avec six vingts. Je le tourmentay tant,
 qu'il fut contraint d'aller parler avec
 Monsieur

*Bonne
 partie
 d'un
 chef.*

Monsieur de Barbezieux , lequel le trouua encore plus estrange , & vouloit sçauoir de moy les raisons , & par quel moyen ie voulois executer ceste entreprinse avec si peu de gens. Le luy dis que ie ne voulois declarer à personne , comme i'y voulois proceder. Monsieur de Montpezat luy disoit tousiours , laissez-le aller , quand bien il se perdra & si peu de gens , la ville n'en sera pas perduë : & à tout le moins nous contenterons le Roy. Monsieur de Villebon se moquoit de moy , & disoit à Monsieur de Barbezieux , laissez-le aller , car il prendra l'Empereur , & ferons tous esbahis qu'il le nous amenera demain matin en ceste ville. Or il ne m'aimoit guere pour vne attaque que nous auions eüe au portail Real : & ne me peux tenir de luy dire , qu'il sembloit vn coigne festu , & qu'il ne vouloit rien faire , ne laisser faire les autres. Le tout se passa en risée , encore que ie fusse à demy en colere , il ne me falloit guerres piquer pour me faire partir de la main. Le Seneschal de Thoulouze mon Capitaine adheroit à mon opinion. Et sur l'heure il me fut donné congé d'aller choisir six vingts hom-

98 *Comm. de M. B. de Montluc,*

mes sans plus, ce que ie fis, ne prenant qu'un centenier, & les caps d'escouade, le surplus estoient tous Gentils-hommes, y en ayant vne bonne troupe en ceste compagnie là, laquelle en valloit bien cinq cens. Ce n'est pas tout d'auoir des hommes un grand nombre, quelquefois il nuist plus qu'il ne profite: car ie priay monsieur de Barbezieux de faire fermer les portes de la ville, estant bien asseuré que beaucoup de gens me suiueroient, ce qu'il fit: & ne tarda vne heure que mon entreprise ne fust sçeuë par toute la ville. Iustement au Soleil couchant ie me rendis à la porte avec mes six vingts hommes, où il n'y auoit que le guichet ouuert. La rue estoit si pleine de soldats qui vouloient sortir, qu'à peine pouuois-ie recognoistre les miens, & leur commanday se tenir tous par les mains l'un à l'autre. Je les cognoissois tous.

Tauanes. Et comme ie fus pres de la porte, Monsieur de Tauanes, qui a esté depuis Marechal de France, vint à moy, estant pour lors Guidon de la compagnie de Monsieur le grand Escuyer Galiot, avec quinze ou vingt Gentilhommes de ladite compagnie,

tous de ce quartier de deçà , lequel me dit vouloir venir avec moy. Je le priay plusieurs fois de rompre son dessein , mais ie perdis mon temps luy persuadant cela , car il en estoit resolu , & ceux qui estoient avec luy. Messieurs de Barbezieux , de Montpezat , de Botieres , de Villebon , & Seneschal de Toulouse estoient hors la porte & sur le guichet , nous tirant l'un apres l'autre. Et comme Monsieur de Tauanes voulut passer , Monsieur de Barbezieux ne le vouloit permettre , luy disant qu'il ne seroit pas de la partie , & là il y eust de la colere d'un costé & d'autre. Mais quoy qu'il fit , il s'en fit accroire & passa le guichet , qui fust cause qu'on me retint quinze ou vingt hommes de ceux que j'auois choisis , mais ie ne perdis rien au change : & ce retardement fust cause , qu'il fust nuit close , auant que nous nous missions en chemin. Monsieur de Castelpers Lieutenant de monsieur de Montpezat , qui me por-^{Castel-}_{pers.} toit grande amitié , ayant entendu la mocquerie que l'on faisoit de moy , se delibera de monter à cheual , ayant quinze ou vingt hommes d'armes de ladite compagnie , ayant chacun un

bon cheual , lequel auoit parlé avec monsieur de Montpezat en sortant de la porte , & le pria n'estre malcontent , s'il venoit à l'entreprinse , luy disant , que i'estois Gascon , & que si ie n'en venois à bout , les François se mocqueroient de moy. Monsieur de Montpezat le trouua vn peu aigre : enfin il le laissa venir , & courut monter à cheual , pouuant estre enuiron luy vingtiesme.

*Conduite
du sieur
de Mont-
luc pour
l'entrepri-
se d'Au-
riolle.*

Or pour deduire ceste entreprinse , encore que ne soit pas la conqueste de Milan , elle pourra servir à ceux qui en voudront faire leur profit. Comme nous fumes sur le plan S. Michel, ie baillay au capitaine Belfoileil , centenier de nostre compagnie , soixante hommes , & i'en retins autres soixante , comprins monsieur de Tauanes avec sa troupe. Et lui baillay vne bonne guide , s'accordant avec les autres deux , luy disant , qu'il ne falloit point qu'il s'approchast de moy de cent pas , & que nous marcherions tousiours à demy grand pas. Et comme monsieur de Tauanes & moy commençâmes à nous acheminer , arriua monsieur de Castelpers , duquel nous n'auions iamais entendu la

deliberation. Aussi la fit-il sur l'heure que nous passions le guischet : ce qui nous retarda plus de demie heure. Mais enfin nous resolusmes , qu'il prendroit le chemin des cheuaux , & luy baillay aussi vne de mes guides qu'il fit monter en croupe : de sorte que nous eusmes trois troupes & chacun sa guide. Le luy dis que quand il seroit au bout du bourg , qu'il s'arrestat derriere l'Eglise : car s'il entroit en la ruë , la compagnie qui estoit dans la ville , le tueroit , ou leurs cheuaux , parquoy qu'il ne s'approchast point qu'il n'entendist nostre combat. Et ainsi nous departismes , & cheminastes toute la nuict : & iusques à Aubaigne trouuasmes beau chemin : & de là iusques à Auriolle nous allasmes par montagnes , où ie croy qu'il ne passoit que les chevres. Et comme nous fusmes à demy quart de lieuë d'Auriolle , ie fis alte , & dis à monsieur de Tauanes qu'il m'attendit : car i'auois à parler à Belfoileil , lequel ie trouuay à cent pas ou plus pres de nous : & parlaant à luy & à sa guide , ie luy dis que quand nous arriuerions au bourg , qu'il ne me suivist point , mais qu'il print le chemin qui alloit

*Desseins
pour le
combar.*

droit à la porte de la ville entre le bourg & ladite ville , & qu'il s'arrestast tout contre la porte d'icelle. Car il falloit qu'il gaignast deux maisons des plus proches de ladite porte : & que promptement il les perçat , pour garder que les ennemis ne peussent faire sortie & nous nuire : & que là il combatist sans nous secourir aucunement. Et de main en main fis dire aux soldats que nul n'eust à abandonner le combat de la porte pour venir à nous au moulin , & qu'ils fissent , ce que le capitaine Belfoleil leur commanderoit. Et alors estant retourné vers monsieur de Tauanes , nous nous acheminâmes. Et pour ce qu'il nous falloit passer bien pres du chasteau & de la muraille de la ville , leurs sentinelles nous crierent par deux fois , Qui va là : à quoi nous ne respondîmes rien , ains cheminions tousiours , & comme nous fusmes bien pres du bourg , nous laissâmes le chemin du capitaine Belfoleil , & coulâmes par derriere les maisons dudit bourg : & arriuez que fusmes au bout , où estoit le moulin , il fallust descendre trois ou quatre degrez de pierre pour entrer en la ruë , où nous trouuâmes

une sentinelle, qui ne nous descourrist qu'à la longueur d'une picque de luy, & nous dit, Qui vive: le luy respondis, Espagne. Le cry n'estoit pas Espagne, mais Impery. Parquoy il nous tira sans rien toucher. Lors monsieur de Tauanes & moy nous iettasmes à coup perdu dans la rue: & fusmes bien fuiuis, & en trouuasmes trois ou quatre des ennemis hors sur la porte du moulin, qui rentrent hastiuement dedans. Ladite porte estoit faite à deux parties avec une barre, qui fermoit le tout. A l'une partie, il y auoit un grand coffre derriere, & à l'autre ladite barre la tenoit presque fermée, & eux derriere: ledit moulin estoit plein de gens, haut & bas: car ils estoient soixante dedans avec le capitaine, lequel n'auoit rien que voir au Gouverneur de la ville, ayant chacun sa charge: & fallust que nous entrissions là l'un apres l'autre. Monsieur de Tauanes se voulust ietter dedans: mais ie le prins par le bras, & le tirant arriere, i'y pouffay dedans un soldat, qui estoit derriere moy. Les ennemis ne tirerent que deux arquebuzades, pour ce qu'ils n'auoient le loisir,

*Hardieffe
du sieur
de Tauanes.*

estans tous endormis , sauf ces trois ou quatre , qui estoient en la rue devant le moulin , lesquels auoient esté mis là pour leurs sentinelles. Et comme ledit soldat fut dedans , ie dis à monsieur de Tauanes , entrez à cette heure si vous voulez : ce qu'il fit , & moy apres luy : & commençasmes à mener à bon escient les mains , n'y ayant qu'une seule clarté sur le plancher. Ils gaignerent le haut par un degré de pierre assez large , & deffendoient ce degré du haut du plancher. Cependant ie fis sortir dehors un soldat dire aux autres , qu'ils montassent sur la couverture du moulin , & que le descourant ils leurs tirassent dedans : ce que promptement fust fait : tellement que comme les ennemis entendirent que nos gens estoient sur ladite couverture , & desia leur tiroient : ils commencerent à se ietter dans l'eau par une fenestre , qu'il y auoit derriere ledit moulin. Neantmoins nous montasmes l'eschelle , & y tuasmes ceux qui restoient , sauf le capitaine blessé de deux playes , & sept autres , tous blessez aussi , qui furent prins : le manday au capitaine Belsoleil qu'il print courage de com-

battre la porte de la ville , car le moulin estoit à nous. L'alarme tandis estoit grande dans ladite ville , & ceux de dedans s'efforcèrent par trois fois de sortir : mais nos gens les tenoient de si court , qu'ils n'osèrent du tout ouvrir la porte. Je luy enuoyay encores la pluspart de nos gens pour le secourir , & nous attendîmes à brusler le moulin , & prîmes tous les ferremens d'iceluy , mesme ceux qui seruoient à tourner les meules ; afin qu'ils ne le peussent reffaire , & ne bougeassent de là que le moulin ne fust entièrement bruslé haut & bas : ensemble les meules roulées dedans l'eau. Or monsieur de Tauanes fut marry quand ie le retiris en arriere , & me dit apres en nous en retournant , pourquoy ie ne l'auois laissé entrer le premier , pensant que ie voulussé donner l'honneur aux soldats : ie luy respondis que ie connoissois bien qu'il n'estoit pas encore ruzé , & que ce n'estoit lieu , qui meritaist qu'un si homme de bien que luy mourust : & se falloit garder pour vne bonne bresche , & non pour vn chetif moulin.

Les meulins bruslés.

Sur ces entrefaites arriua monsieur de Castelpers , & lascia sa troupe der-

riere l'Eglise venant à nous à pied : sur ce le iour commençoit à paroistre. Je priay monsieur de Tauanes, & de Castelpers, de se retirer derriere ladite Eglise : car les arquebuzades tomboient fort espoisses au long de la ruë, où l'on pouuoit descouurir ceux qui passoient : & leur dis, que ie m'en allois retirer Belfoileil. Surquoy ils allerent derriere ladite Eglise. Et comme ie faisois retirer nos gens les vns apres les autres, courant deçà & delà le long de la ruë, monsieur de Castelpers se presenta avec vingt cheuaux du costé de l'Eglise, qui nous fist vn grand bien : car peut-estre qu'ils fussent sortis. Je n'eus que sept ou huit hommes blesez, lesquels neantmoins cheminerent, sauf vn Gentil-homme nommé Vigaux, lequel nous chargeasmes sur vn asne, de ceux que nous auions trouué dans le moulin. Et apres nous commençasmes à nous retirer vers le haut d'une montagne, qui estoit presque le chemin que monsieur de Castelpers avoit fait. Et comme les ennemis virent que nous estions si peu, ils sortirent tous en nostre queuë, mais nous auions desia gaigné le haut de ladite montagne quand ils arriue-

*Sortie
des Im-
periaux.*

rent au bas. Et avant qu'ils fussent sur le haut, nous estions au val de l'autre costé, prests d'en monter vne autre, y ayant en ces quartiers là plusieurs colines. Nous n'allions iamais que le pas. Et ainsi cheminâmes droit à Aubaigne. l'avois commandé aux soldats, qui estoient avec nous, que chacun portast vn pain, lequel ils mangèrent par les chemins : i'en auois aussi fait porter quelque peu, lequel ie departis aux gens-d'armes de monsieur de Tauanes : & nous-mesmes en mangions cheminans tousjours. Je mets cecy par escrit, afin que quand vn capitaine fera vne entreprinse de longue traite, qu'il prenne exemple à faire porter quelque peu à manger pour rafraichir les soldats, afin qu'ils puissent soustenir plus longuement le travail, car l'homme n'est pas de fer. Et comme nous fusmes à Aubaigne, deux lieuës de Marseille, nous entendîmes l'artillerie des Galeres & de la ville, qui sembloit que ce fust vne salue d'arquebuzades : & pensions reposer vn peu audit Aubaigne : mais nous fusmes contraints de passer outre, sans autre rafraichissement, entrans en dispute de ce que nous de-

L'Em-
pereur
deuant
Marseil-
le.

uions faire. Si est-ce que nous nous
asseurâmes bien, que l'Empereur
estoit arriué deuant la ville, & que
de mesme il l'assiégeroit, pensans
d'ailleurs qu'il nous seroit impossible
d'y pouuoir rentrer. Ce qui nous fai-
soit souuent despiter & maudire l'en-
treprinse pour nous voir enfermez de-
hors. Et tout tomboit sur moy qui en
estoit l'auteur. Monsieur de Castel-
pers s'estoit vne fois resolu de s'en
aller donner de cul & de teste à tra-
uers le camp de l'ennemy, pour ren-
trer dans la ville: mais comme il nous
vint dire son aduis, nous luy remon-
trâmes, qu'il s'alloit perdre pour son
plaisir: & que puis que nous auions
fait tous ensemble vne si belle faction,
de laquelle le Roy auroit grand con-
tentement, nous deuions nous per-
dre, ou nous sauuer tous ensemble.
Le capitaine Trebous guidon de la
compagnie de monsieur de Montpezat
luy remontra le semblable. Et ainsi
resolusmes de laisser le grand chemin,
en allant au trauers des montagnes à
main gauche, pour aller tomber der-
riere Nostre-Dame de la Garde, fai-
sans dessein que si nous ne pouuions
entrer dans la ville, le capitaine de la

Garde nous receuroit. Et ainsi destournasmes nostre chemin qui fust bien pour nous : car Vignaux & les Bleres prindrent le grand chemin droit à Marseille , & n'eurent pas fait cinq cens pas , qu'ils rencontrèrent quatre ou cinq cens cheuaux , que l'Empereur auoit enuoyé au deuant de nous , pour nous combattre , ayant esté aduerty par ceux d'Auriolle de l'exécution que nous auions faite. Et sans que l'Empereur se trouua parti la nuit pour venir deuant Marseille , & que les messagers ne trouuerent de long temps à qui parler , ie pense que nous eussions esté défaits : mais l'Empereur ne le sceut iusques au point du iour. Surquoy il enuoya promptement ces quatre ou cinq cens cheuaux au chemin d'Aubaigne , lesquels ne firent aucun desplaisir audit Vignaux , ny à ceux qui estoient avec lui , sinon qu'ils leur osterent les armes. En cette façon nous allasmes tout le iour avec le grand chaud de montagne en montagne , sans trouuer de l'eau : tellement que nous cuidasmes tous mourir de soif. Or nous pouuions tousiours voir le camp de l'Empereur , & entendions fort clairement les es-

Retraité

110 *Comm. de M. B. de Montluc* ,
carmouches. Monsieur de Castelpers ,
& ses gens-d'armes alloient à pied
comme nous , tirant leurs cheuaux
par les brides. Et comme nous arri-
uasmes pres Nostre-Dame de la Gar-
de , le capitaine du Chasteau qui pen-
soit que nous fussions ennemis , nous
fit tirer trois ou quatre coups d'artil-
lerie , qui nous contraignirent de nous
ietter derriere des rochers. Nous luy
faisions signe des chapeaux , mais
pour cela il ne cessoit de tirer. Enfin
luy ayant enuoyé vn soldat pour luy
faire signe , il cessa de tirer , comme
il entendit qui nous estions : & ainsi
que nous fusmes deuant Nostre-Dame
de la Garde , nous vismes l'Empereur
qui se retiroit par là où il estoit venu.
Et Christofle Goast qui auoit tenu tout
le iour l'escarmouche, commença aussi
à se retirer deuers la ville. Lors nous
commençasmes à descendre la mon-
tagne : & comme monsieur de Bar-
bezieux & monsieur de Montpezat ,
qui estoient sur la porte de la ville ,
avec quelques autres capitaines nous
eurent descouverts , ils voulurent ren-
trer dedans , pensans que nous fussions
des ennemis : mais à la fin quelqu'un
dit , que si nous en estions , ceux de

La Garde nous tireroient. Et aussi ledit
 sieur de Montpezat recogneut mon-
 sieur de Castelpers. Nous arriuasmes
 donc à la porte de la ville, où nous
 fumes fort careffez, & mesmement
 quand ils entendirent que nostre en-
 treprinse estoit si bien reüssie. Ils par-
 lerent avec le capitaine du Moulin,
 qui estoit blessé à la teste & au bras,
 & apres chacun se retira dans la ville.
 Je pensois bien que monsieur de Bar-
 bezieux, lors que le Roy arriua à
 Marseille, me presentast à sa Maiesté,
 & luy dit comme j'auois fait l'entre-
 prinse : afin d'estre cogneu de sa Ma-
 iesté. Mais tant s'en faut qu'il le fist,
 qu'au contraire il s'attribua tout l'hon-
 neur, disant que c'estoit luy qui auoit
 inuenté ladite entreprinse, & qu'il la
 nous auoit baillé à executer. Mon-
 sieur de Montpezat se trouua fort ma-
 lade, qui n'en peut rien dire : de sorte
 que ie demeuray autant incogneu du
 Roy que iamais. Ce que ie sçeus par
 le moyen du Roy Henry de Nauarre,
 qui m'a dit auoir veu les lettres que
 ledit sieur de Barbezieux en auoit es-
 crites au Roy, par lesquelles il s'attri-
 buoit tout l'honneur de ladite entre-
 prinse. Monsieur de Lautrec n'eust

*Le sieur
 de Barbe-
 zieux s'a-
 tribuë
 l'honneur
 de ceste
 entreprè-
 se.*

*Il ne faut
 qu'un
 chef des-
 robe l'hon-
 neur de
 son sol-
 dat.*

pas fait cela. Il siet mal de desrober l'honneur d'autrui. Il n'y a rien qui descourage tant vn bon cœur. Monsieur de Tauanes qui est en vie, peut tesmoigner de la verité : & si est-ce que ces ruptures de moulins, tant d'un costé que d'autre, mesmement de celui-là, mirent le camp de l'Empereur en si grande nécessité, qu'ils mangeoient le bled pilé à la Turquie. Et les raisins qu'ils mangeoient, mirent leur camp en vn si grand desordre de maladie & mortalité, mesmement parmy les Allemans, que ie pense qu'il n'en retourna iamais mille en leur pays. Voilà la fin de ceste entreprinse.

*Considerations
pour vn
Capitaine.*

Doncques nottez capitaines, qu'en ceste entreprinse, il y eust plus de l'heur que de la raison, & que i'y allay comme à tatons, si est-ce qu'elle fust fort bien compassée, & ne suis pas d'aduis que vous pensiez que cela procedast tant de mon heur, que vous ne regardiez bien aussi que ie n'oubliai aucune chose de tout ce qu'il falloit faire pour venir au bout de l'exécution. Et d'ailleurs il faut, que vous nottiez que mon principal fondement estoit, que l'ennemy estant
dedans

dedans la ville , par la raison de la guerre , ne deuoit sortir de son fort , iusques à ce qu'il auroit recogneu nos forces , ce que difficilement pouuoit-il faire pour l'obscurité de la nuit : & neantmoins si ne me fié-ie pas tant en ceste raison , que ie ne leur baillasse vne bride , qui fut Belsoleil & sa troupe. Il faut souuent hazarder , car on ne se peut pas asseurer de l'issue. Je tenois presque asseurée la prinse du moulin : mais ie iugé le retour dangereux.

Or l'Empereur se retira avecque sa perte & sa honte , où ce grand capitaine Anne de Montmorancy , lors grand Maistre , & depuis Connestable , acquist beaucoup d'honneur. Ce fust une des plus grandes pertes , qu'il receut iamais , son grand capitaine Antoine de Leue mourust de regret à ce qu'on dit. I'ay autrefois ouy dire au Marquis de Guast , que ceste entreprinse estoit sortie dudit Seigneur Antoine de Leue seul. Luy & son maistre cogneurent que c'est d'attaquer vn Roy de France dans son Royaume. Apres cette retraite , ie ne voulus plus estre Lieutenant de la compagnie de monsieur le Seneschal ;

*Mort
d'Antoine
de Leue.*

lequel s'il eust peu me l'eust entiere-
ment remise entre mes mains. Mon-
sieur de Botieres me fit cest honneur
de me presenter son guidon , que ie
ne voulus accepter , ayant mis mon
opinion sur les gens de pied , plus
que sur les gens de cheual. Et me
sembloit que ie paruiendrois plustost
par le moyen de l'infanterie : qui fut
cause que ie m'en retournay chez
moy , où ayant demeuré quelque
temps , voulus aller en Piedmont sui-
ure monsieur de Botieres qui estoit
Lieutenant du Roy : & passay à Mar-
seille, où monsieur le Comte deTande
me retint six ou sept mois. Quelque
temps apres l'Empereur dressa vn
camp pour aller assieger Theroane :
le Roy en mesme temps en faisoit
dresser vne autre pour la secourir. Je
pris lors la poste & m'en allay à la
Cour , où monsieur le grand Maistre
me donna vne compagnie de gens de

*Capitaine
Guerre.*

pied , & vne autre au capitaine Guerre ,
lesquelles nous dressâmes incon-
tinent à Paris , ou aux environs : &
fusmes tous deux de la garde de mon-
sieur le Dauphin , qui depuis fut le
1537. Roy Henry second. Le camp marcha
à Hesdin , & à Anchi le chasteau , les-

quels furent prins par monsieur le grand Maistre, comme fust aussi saint Venant : & apres que nos ennemis n'eurent peu rien faire deuant The-roane, laquelle monsieur d'Annebaut rafreschit à la barbe des ennemis. Mais par malheur à la faute de quelques ieunes Gentilshommes, qui voulurent rompre leurs lances, ils chercherent les ennemis, lesquels les desfirent; tout fut prins, le sieur d'Annebaut & autres. Peu de iours apres les Imperiaux se retirerent, comme fist aussi le camp du Roy. Quant à moy, voyant qu'on ne feroit pas grand cas en ce quartier-là, ie m'en retournay apres en Prouence, où i'auois laissé mes grands cheuaux & armes. Et huit ou quinze iours apres ie reçeus vn paquet dudit Seigneur grand Maistre, où il y auoit vne commission pour dresser deux enseignes, & marcher en Piedmont, où le Roy s'en alloit pour secourir Turin, estant monsieur de Botieres dedans. Et incontinent montay en poste pour m'en venir en Gascogne, de sorte qu'en huit iours i'eus dressé les deux compagnies, desquelles ie fis mon Lieutenant le capitaine Merens. Et estant

*Prise de
monsieur
d'Anne-
baut.*

1538. pres de Toulouse , ie luy laissay la troupe , & prins la poste , ayant entendu que monsieur le grand Maistre estoit desia arriué à Lyon , & qu'il marchoit en haste pour aller gaigner le pas de Suze , où il monstra qu'il n'estoit pas apprenti à la guerre : & voyant que ie ne me pouuois trouuer avec les compagnies pres de luy à ce combat , ie m'y voulois trouuer seul. Je ne sceus toutesfois faire si bonne diligence que ie ne trouuasse le Roy à Sorges , & monsieur le grand Maistre estoit deux iournées plus auant. Sa Maiesté me commanda m'en retourner au deuant de mes compagnies , & me rendre avec Ambres & Dampons , qui en auoient chacun autres deux , & que monsieur de Chauigni nous commanderoit : me mandant en outre , que nous allassions mettre le siege deuant Barselonnette , & nous saisir de toutes les villes des enuirs.

Comme ie fus à Marseille , on m'aduertist , que mes deux compagnies s'estoient desbandées. Car comme l'ambition du monde est grande , mon frere , monsieur de Lieux manda à mon Lieutenant , qu'il l'attendist ,

temporisant par le pays , parce qu'il rassembloit vne compagnie , & sous ombre des deux miennes il marcheroit. Mon Lieutenant mal aduisé s'y accorda , nonobstant la promesse qu'il m'auoit faite de faire cinq lieues par iour. Mais comme mondit Lieutenant eust laissé le grand chemin , & tourné deuers Albigeois pour temporiser , il se rendit deuant vne ville nommée Pisle , où les habitans d'icelle refuserent les portes , qui fut cause qu'il y donna l'assaut , & l'emporta. Mondit frere , qui estoit à vne iournée de luy avec sa troupe , ne sceust arriuer que cela ne fust fait. Et apres qu'ils eurent saccagé ladite ville , ils eurent si grande crainte de marcher , que tous se desbanderent. Vn chef ne doit gueres abandonner sa troupe , si ce n'est par grande occasion. Le desir que i'auois d'estre des premiers , me fit quitter la mienne , ce qui fust cause de ce desordre. Je fus contraint de redresser deux autres compagnies en Prouence , là où monsieur le Comte me fauorisa fort , faisant ma monstre à Villeneuve d'Auignon , & fis si grande diligence , que i'arriuay encore deux iours plu-
tost que Ambres , ny Dampons aux

*Le frere
de Lioux
frere du
sieur de
Montluc*

*Le capi-
taine ne
doit gue-
res aban-
donner sa
troupe.*

vallées : & prins le chasteau & la ville de Mieulan , où ie fis alte , attendant monsieur de Chauigny , & les compagnies desdits Dambres & Dampons , qui combattoient le passage du Lauzet : lesquels ny eussent sceu entrer , car toutes les vallées estoient là , qui le deffendoient. Et comme les Espagnols qui estoient à Barselonnette , & qui estoient aussi allez defendre le passage , entendirent que i'auois prins Mieulan , ils se retirerent par les montagnes , car ie tenois le grand chemin vers Barselonnette , & les communes voyant que lesdits Espagnols s'en alloient , abandonnerent de nuit le passage , au moyen dequoy ils entrerent dedans. Nous allasmes assieger Barselonnette , deuant laquelle demeurasmes trois semaines , où i'eus vne arquebuzade par le bras gauche : toutesfois ne me toucha à l'os , ce qui fust cause que ie fus bien tost guery. Puis apres le Roy ayant secouru Turin , sa Maiesté s'en retourna. Et pour ne m'estre trouué en Piedmond , tous trois fusmes mandez d'en ramener nos compagnies. Monsieur Dambres s'en alla trouuer sadiète Maiesté en poste , &

*Le sieur
de Mont-
luc blessé
d'une ar-
quebuzade.*

fit tant qu'il luy en laissa vne. Et
 comme i'entendis la grand' difficulté
 qu'il y auoit euë , ie ramenay les
 miennes en Prouence , & me retiray
 en ma maison. Aussi fit-on vne trefue ^{Trefue}
 pour dix ans , voyant qu'on n'auoit ^{pour dix}
 peu faire la paix. l'ay voulu mettre ^{ans.}
 cecy par escrit , encore que ce ne soit
 rien qui vaille , pour monstrier à tout
 le monde , que ie n'ay iamais esté en
 sejour , ains tousiours prest au pre-
 mier son de tabourin. Les iours de
 paix m'estoient années. Sur la fin de
 ceste guerre , le Roy honora mon-
 sieur le grand Maistre de l'estat de
 Connestable , lequel auoit tousiours
 vacqué , comme a fait iusques icy ,
 depuis la mort du Seigneur de Mont-
 morancy. Ce que nos Rois ont faict
 à mon aduis , pour oster la ialousie ^{Le danger}
 entre les Princes , & pour le danger ^{ger qu'il}
 qu'il y a de mettre vne si grande ^{y a de}
 charge en la main d'un seul , tesmoing ^{faire un}
 sainct Pol , & Bourbon. Ce dernier ^{Connesta-}
 a esté bien fidelle , & est mort au ^{ble.}
 seruice de sa Maiesté , s'estant tou-
 siours monstrier grand & sage capi-
 taine. La verité me force de le dire ,
 & non pas l'obligation que ie luy
 aye , car il ne m'a iamais aimé ni les
 siens aussi.

*Rupture
de la tref-
ue, pour
la mort
de Fre-
gouse &
Rincon.*

Pendant ceste trefue i'essayé, mais en vain, d'estre courtisan : ie fus toute ma vie mal propre pour ce mestier. Le suis trop franc & trop libre, aussi y trouue-je fort peu d'acquit. Or apres le vilain & sale assassinat, qui fust faict és personnes des Seigneurs Fregouse & Rincon Ambassadeurs du Roy nostre Maistre, picqué d'un tel outrage, & voyant qu'il n'en pouuoit auoir raison, delibera rompre la trefue, & pour cest effect dressa ses armées, l'une desquelles il bailla à monsieur d'Orleans, qui fut à Luxembourg : & l'autre à monsieur le Dauphin, qui vint en la Comté de Roussillon, pour la remettre en l'obeyssance de son pere, ayant monsieur le Mareschal d'Annebaut, (qui depuis a esté Admiral) avec luy. Et pour ce que i'entendis, que ledit Seigneur Mareschal menoit les compagnies de Piedmont, que monsieur de Brissac commandoit, & encores avec luy vn ingenieux nommé Hieronimo Marin, qu'on estimoit le plus grand homme d'Italie, pour assieger places, il me print enuie d'aller au camp pour apprendre quelque chose dudit ingenieux. Et comme ie fus là, ie me rendis

*Hieronimo
Marin.*

rendis pres de monsieur d'Affier , qui commandoit l'artillerie en l'absence de son pere , lequel ne bougeoit d'au-
pres dudiët Hieronymo Marin. Et fus ^{Monsieur} aux approches qui se firent de la Cité ^{le Dau-} de Perpignan , laquelle on assiegea , ^{phin de-} mais dans deux nuicts ie cognus qu'il ^{uant Per-} ne faisoit rien qui vallust , car il com-
mença les tranchées si loing , que de huit iours il ne pouuoit estre en batterie , ainsi que luy mesme disoit. Et ie luy respondis que dans ce terme-
là les ennemis auroient faict leur ville quatre fois plus forte qu'elle n'estoit par ce costé. Pour ceste entreprinse le ^{Belle ar-} Roy auoit dressé vne des plus belles ^{mée.} armées , que i'aye iamais veu. Elle estoit de quarante mille hommes de pied , deux mille hommes d'armes , & deux mille cheuaux legers , avec tout l'attiral necessaire. Monsieur de Montpezat en auoit esté l'auteur , mais l'Espagne estoit toute abreueuée de son entreprinse. Et encores que la ville fust bien munie , si peux-ie bien dire , que si monsieur le Mareschal d'Annebaut m'eust voulu croire , il en fust venu à bout. Je l'auois tres-bien recogneuë : parce que monsieur le Connestable estant allé à Leucate ,

traictant la paix quelques années auparavant , auec Granuele deputé de l'Empereur , m'auoit enuoyé auec le General Bayard & le President Poyet, qui depuis a esté Chancelier : ausquels le deputé de l'Empereur donna permission de s'aller esbattre audict Perpignan pour trois ou quatre iours , par le moyen de monsieur de Veli Ambassadeur pour le Roy. Lediect Seigneur Connestable me fit prendre les habillemens de cuisinier de monsieur de Poyet , afin que sous cest habit ie recogneusse la place , & encores y cuiday-ie moy - mesme estre reconnu : si trouuay-ie commodité par le moyen d'un seruiteur dudiect le Veli qui estoit vn Flament , qui l'auoit laissé : auquel ie dis , que ie voulois aussi laisser le mien , de voir la place : car il me mena tout à l'entour de la ville , dehors & dedans : de sorte que ie rapportay à monsieur le Connestable tout le fort & le foible de ladiecte ville. Lequel me dit , que ie l'auois fort bien recogneuë , comme par d'autres , qui auoient long - temps demeuré dans icelle , il auoit esté fidellement aduerty. Or l'allée de Poyet & Bayard estoit faité en feinte , les-

*Le sieur
de Mont-
luc recog-
noist Per-
pignan ,
faisnant
estre le
cuisinier
de mon-
sieur
Poyet.*

quels ne voulurent mener en leur compagnie l'ingenieur du Roy , comme monsieur le Conneftable vouloit , craignant qu'il fust recogneu , & eux retenus prifonniers : & compterent audiēt Seigneur la peur qu'ils auoient eüe , quand vn Capitaine Espagnol me recogneust , mais ie desaduouay la depte contre-faisant & mon pays , & mon langage , faignant ſçauoir mieux manier vne lardouere , qu'une espée , disant estre cuisinier de monsieur le President Poyet , lequel ne respondit mot de la grand' peur qu'il auoit , si i'estois recogneu : mais le general Bayard se print à rire à part avec luy & luy dit , qu'il n'estoit pas le premier , qui auoit esté trompé : car celuy qu'il pensoit , estoit vn des bons capitaines que le Roy eust. De tout ce compte monsieur le Conneftable n'en faisoit que rire : si est-ce , que ie luy dis , que tant qu'il viuroit , il ne me feroit plus seruir d'espion. C'est vn mestier trop dangereux , & que i'ay tousiours hay : tant y a que ce coup-là ie deuins cuisinier , pour recognoistre la place , ce que ie fis tres bien. Voilà pourquoy ie dis , que si monsieur d'Annebaut m'eust creu ,

*Le sieur
de Mont-
luc es-
pion.*

facilement il eust prins la ville : mais il voulut adiouter plus de foy à vn masson Gascon aposté , que les ennemis auoient ietté dehors faignant se venir rendre , pour amuser monsieur le Marechal , à le faire venir assaillir la ville par le costé qu'il l'assaillist , & à son ingenieur , qu'à moy. Tellement que nous ne fismes rien qui vaille la peine de le dire , ny de l'escrire. Par malheur c'estoit le premier coup d'essay de monsieur le Dauphin , qui vouloit aussi bien faire , que monsieur d'Orleans son frere , qui print Luxembourg : mais ce n'estoit pas sa faute. Deux iours auant que le camp deslogeast , ledict Seigneur Marechal alla autour de la ville , ie monstray à monsieur d'Estree , qui est encores en vie , le lieu par où ie voulois qu'on l'attaquast , & de fort pres , encores que les canonades & arquebuzades , qu'ils nous tirerent , nous fissent bien tenir au large. Et apres l'auoir veu , il dit ces mots : O mon Dieu quelle erreur nous auons faict. Mais lors il n'estoit plus temps de s'en repentir : car le secours y estoit entré , & le temps des pluyes approchoit , qui nous eust fermé le pas de nostre retraicte. En-

*Mauuai-
se issue de
Perpi-
gnan.*

côres eufmes nous affez affaire , tant ce pays estoit mauuais pour se tenir là.

Pendant ce siege , la compagnie de monsieur de Boleues vacqua , laquelle monsieur le Dauphin enuoya demander pour Boqual , qui depuis s'est fait Huguenot , i'en escriuis à monsieur de Valence mon frere , qui estoit à la Cour à Salers. Le Roy estoit si marry , pour le mauuais succez de ceste entreprinse contre monsieur le Dauphin , & contre monsieur d'Annebaut , qui l'auoit aussi enuoyé demander pour vn autre , que sa Maiesté ne la voulust accorder à l'vn , ne à l'autre , ains la me donna à moy. Le camp estant leué , monsieur de Brissac eust pour garnison Capestaing , & monsieur de l'Orge Colonel des Legionaires Turchan , là où on auoit retiré toutes les munitions des farines , qui estoient demeurées du camp. Et trois iours apres tous les Legionaires le laisserent & ne luy demeura que les capitaines. Il manda à monsieur de Brissac , que s'il ne l'alloit secourir bien - tost , il seroit contraint d'abandonner lesdites munitions , & se retirer. Parquoy nous marchasmes diligemment sans

*Siege
levé de-
nant Per-
pignan.*

demeurer que la moitié d'une nuit dehors, & le trouuâmes qu'il ne luy estoit rien demeuré, si ce n'est Messieurs de Denez, & Fonteraille, avec leur train. Or y auoit vn chasteau sur la montagne, tirant à Perpignan à vne lieuë de Tuchan, & à main gauche de Milau. Et estans sortis lesdicts Seigneurs de Brissac & de l'Orge dudict Tuchan, pour aller ouyr Messe à vne petite chapelle, à vn jet d'arbaleste de là, au sortir de la Messe nous entendîmes tirer force arquebuzades audiect chasteau. Et descourîmes force gens autour d'iceluy: ensemble la fumée des arquebuzades. Je dis à monsieur de Brissac, s'il luy plairoit que j'allasse iusques là avec trente ou quarante de mes soldats: ce qu'il m'accorda. L'enuoyay soudain la Moyenne qui estoit mon Lieutenant, les charger: & me fis amener vn cheual, avec lequel ie marchay droit au chasteau. Le Peloux, qui estoit Lieutenant de la compagnie de monsieur de Brissac eust enuie d'y venir, comme eust aussi Monbasin, saint Laurens, qui estoit Breton, & Fabrice, estans tous lances passades dudict Seigneur, & cinquante ou

soixante soldats de la compagnie du dict Seigneur de Brissac. Le fis grande diligence : & comme les ennemis me descoururent , lors que ie commençois à monter la montagne , ils se retirèrent à vne plaine , qui est au desous de Tantauel , & se coucherent sous des oliuiers attendans de leurs gens , qu'ils auoient encores laissé à Milau. Le capitaine du chasteau estoit Barennes archer de la garde du Roy , lequel Monsieur de Montpezat y auoit mis , & me monstrant ledict Barennes les ennemis , arriua ledict Peloux & ses soldats , & encores vn gentil-homme nommé Chamant , fort braue gentil-homme : & bien que nous eussions cognoissance qu'ils estoient plus de quatre cens hommes , comme aussi Barennes l'asseuroit , nous concludmes de les aller combattre. Ce quartier-là estoit tout rocher couuert d'vn peu de tailles : & pour y aller il falloit passer à trauers. Parquoy nous resoluimes que le Peloux prendroit vn petit sentier , qu'il y auoit à main droicte , & moy vn autre , qui estoit à main gauche. Et le premier qui arriueroit à la plaine , les iroit assaillir , les vns par deuant , & les

autres par derriere : & concluant cela , les ennemis se leuerent , & les visines tout à nostre aise. Monbasin , Chamant , sainct Laurens & Fabrice , qui estoient à cheual voulurent venir avec moy : dequoy le Peloux fut marry , parce qu'ils estoient à monsieur de Brissac comme luy , sauf Chamant , qui estoit à monsieur le Dauphin. Artiguedieu , & Barennes vindrent pareillement avec moy. Des le commencement de nostre descente les ennemis nous perdoient de veuë , & nous à eux , à cause des taillis & de la vallée , qui estoit assez grande. Le Peloux print son chemin avec sa guide , & moy le mien. Et aussi-tost que i'arrinay à la plaine , ie tins ce que i'auois promis : car ie chargeay les ennemis de queue & de teste , nous meslant de telle sorte , qu'il y demeura sur la place plus de vingt des leurs , & les menay tousiours battant iusques au bout de la riuere , qui pouuoit estre à quatre cens pas ou plus de là. Mais comme ils nous virent si peu , ils se r'allierent , & moy me voulant retirer , ils marcherent droit à moy. Sur quoy ie fis alte , & eux aussi à la longueur de quatre

*Combat
Drencon-
tre pres
Tauanel.*

ou cinq picques les vns des autres ,
ce que ie ne vis iamaïs faire. Quant
au Peloux , quand il fut à demy mon-
tagne , il eust opinion , que i'auois
prins le meilleur chemin , & tourna
tout court venant suiure le mien : &
la fortune tourna si bien pour moy ,
que comme nous estions picque à
picque , arquebuzé à arquebuzé de
si pres que i'ay dict , comme deux
mastins , qui s'entre-regardent pour
se battre , la troupe du Peloux se
monstra à la plaine. Ce qu'ayant des-
couuert les ennemis , ils tournerent le
fer de leurs picques deuers nous , &
la teste vers la riuere : & ainsi s'en
allerent , & nous sur leur queue à ar-
quebuzades & coups de picques. Ils
marchoient si serrez que nous ne pou-
uions plus nous mesler. Et estans sur
le bord de la riuere ils firent alte ,
tournans leurs picques deuers nous.
Et encore que la troupe du Peloux
fist diligence de nous venir secourir :
neantmoins nous fusmes contrainsts de
nous retirer à quinze ou vingt pas des
ennemis , lesquels incontinent passe-
rent la riuere tous de flotte , en eauë
iusques à la ceinture , Monbason fust
bleffé d'une arquebuzade à la main ,

dont il est depuis demeuré estropiat.

*Grand
combat.*

Les cheuaux de sainct Laurens , & Fabrice furent tuez , & le mien blessé de deux coups de picque , la Moyenne mon Lieutenant blessé de deux coups d'arquebuzade en vn bras. Chaman , qui estoit descendu de cheual , eust trois coups de picque aux deux cuisses , Artiguedieu vne arquebuzade & vn coup de picque à vne cuisse , bref de trente à trente cinq hommes , que nous estions , il n'en demeura que cinq ou six qui ne fussent blesez , & seulement trois de morts sur la place. Ils perdirent vn Sergent des plus renommez , qu'ils auoient , ensemble xx. ou xxv. autres de morts , & plus de xxx. de blesez , comme nous dirent le lendemain deux soldats Gascons , qui estoient avec eux devant Perpignan au siege , qui n'auoient peu eschapper pour se venir rendre. Cependant messieurs de Brissac & de l'Orge se doutant bien qu'il en auendroit , comme il fit , monterent à cheval , & vindrent au chasteau de Tantaue si bien à propos , qu'ils virent tout le combat , desesperez de la cargue , que i'auois faite : & par deux ou trois fois nous tindrent pour perdus : & en

furent mauuaise chere au Peloux pour *Faute du Peloux.*
 n'auoir pas tenu la resolution , que
 nous auions faiçte : laquelle s'il eust
 fuiui , à la verité nous les eussions tous
 taillez en pieces : & eussions emporté
 les deux drapeaux qu'ils auoient. Si
 est-ce que ie cuide qu'il ne tint pas à
 luy , car il estoit vaillant , mais à la
 guide qui les conduisoit , les menans
 par mauuais chemin , comme lediçt
 Peloux nous diçt depuis. Tant y a que
 le champ me demeura avec la perte
 de trois hommes seulement. Des gen-
 til-hommes , il n'en mourut vn seul.
 Bientost apres arriua le Baron de la
 Garde à Nice , avec l'armée Tur- *Arrivée de l'armée Tur-*
 quesque , conduicte par Barberouffe : *quesque.*
 laquelle estoit composée de cent ou
 six vingts galleres. Tous les Princes
 Chrestiens , qui soustenoient le party
 de l'Empereur , faisoient grand cas
 de ce que le Roy nostre Maistre auoit
 employé le Turc à son secours. Mais
 contre son ennemy on peut de tout
 bois faire flesches. Quant à moy si ie
 pouuois appeller tous les esprits des
 Enfers , pour rompre la teste à mon
 ennemy , qui me veut rompre la
 mienne , ie le ferois de bon cœur.
 Dieu me le pardoint. Monsieur de

Valence mon frere fut enuoyé à Venise, pour excuser & couvrir nostre faict : car ces Messieurs crioient plus que tous, & le Roy ne vouloit perdre leur alliance : lequel fit vne harangue en Italien, que i'ay voulu mettre icy en François, attendant qu'il nous fasse voir son histoire : car ie ne crois pas, qu'un homme si sçauant, comme on dit qu'il est, veuille mourir sans escrire quelque chose : puis que moy, qui ne sçay rien, m'en suis voulu mesler. Voicy ce qu'il dict,

Harangue de l'Euesque de Valence aux Vénitiens.

L'EMPEREUR estant la cause de toutes les ruines, miseres & calamitez aduenues à la Chrestienté (Illustriissimes Seigneurs) c'est chose que chascun doit trouuer bien estrange que ses ministres soient si impudents & effrontez d'en donner la coulpe au Roy Tres-Chrestien mon Seigneur, le blasphemant de ce qu'il tient vn Ambassadeur à Constantinople. Mais ie demanderois volontiers à ces gens-là, s'ils pensent que les choses tramées par le commandement de l'Empereur, & Roy des Romains, puis dix ans en ça, avec le grand Seigneur, soient si secretes, que la plus grande partie de la

Le Roy des Romains recherche le Turc.

Chrestienté n'en soit abbreuuee. Ne
sçait-on pas les trefues , les traiçtez
d'accord & de paix non generale :
mais particuliere , & les offres tant de
fois par luy faictes de donner vn grand
tribut , & le payer annuellement au
grand Turc pour le Royaume d'Hon-
grie , combien qu'il pensoit estre vn
cas de conscience , d'endurer qu'un
petit Roy commandast à ce Royaume,
sous la faueur & appuy du Turc , luy
semblant chose bien peu conuenable
aux Chrestiens. A quoy à la verité ie
pourrois adiouster , qu'au temps , que
la paix fut concludë entre vostre Sere-
nissime Seigneurie & le Turc , le Roy
des Romains , par l'entremise secreete
de ses Agens , s'efforça de tout ce qu'il
peust , pour l'empescher , comme il
fust clairement verifié par l'intercep-
tion de leurs courriers & despeschés.
Les mesmes ministres de l'Empereur
estimoient aussi s'eximer de tout blas-
me en faisant grand cas , & accommo-
dant à leur poste , selon leur coustume,
le seiour que l'armée Nauale du grand
Seigneur à faict quelques mois dans
nos ports. Et sous ce pretexte veulent
par leurs calomnies passionnées forger
vn nouveau article de foy , disant ,

*Rois qui
se sont ai-
dez des
infidelles,*

Qu'un Prince pour sa deffence ne peut,
ny ne doit s'aider du secours de ceux
qui sont de contraire religion à la
sienne ; ne s'aduifans pas qu'en blas-
mant le Roy mon Seigneur , ils taxent
Dauid , Roy ualeureux & saint Pro-
phete , lequel se trouuant poursuiuy
par Saül , s'enfuit vers le Roy Achis ,
idolatre & ennemy de la Loy de
Dieu. Et quelque temps apres luy-
même se rengea parmy les escadrons
des infideles , qui marchoiẽt pour
combattre le peuple de sa propre Loy.
Et par mesme moyen ils blasment
Aza , Roy des Juifs , qui appella à son
secours le Roy des Syriens idolatre ,
pour se deliurer de l'oppression du Roy
d'Israël. Ils blasment aussi Constantin
Prince Tres Chrestien , & celuy de
tous les Empereurs , qui a mieux me-
rité de la République Chrestienne ,
lequel en la plus grande partie de ses
expeditions & armées , conduisoit
avec soy vn grand nombre de Gots
idolatres. Ils taxent Boniface , tant re-
commandé par saint Augustin en ses
Epistres , lequel pour sa deffence , &
peut estre pour la vengeance de quel-
que iniure receuë , appella en Affrique
les Vandales , hommes ennemis de
nostre religion.

Ils medisent de Narses esclaue de Justinian capitaine tres-valeureux : mais sur tout religieux , comme on peut iuger par le tesmoignage de saint Gregoire , & par les Eglises , qu'il a edifiées dans ceste Illustrissime Cité , & dans la ville de Rauenne , lequel appella à son aide les Lombars , qui en ce temps abhorroient le nom des Chrestiens. Arcadius l'Empereur de Constantinople iugé par tous les Historiens , non moins religieux que prudent , voulant sur ses derniers iours laisser quelque tuteur , & protecteur , qui fut capable pour conseruer la dignité & autorité de l'Empire , tourna sa pensée deuers le Roy de Perse idolatre , & le pria par son testament , de vouloir accepter la tutelle & deffence de son fils , & de l'Empire. Ce qui fut singulierement louié par tous les Princes Chrestiens de ce temps. Et d'autant plus que le Roy de Perse n'accepta pas seulement la charge , mais s'en acquitta fidellement iusques à sa mort. Deuant que Heraclius se laissa empoisonner du venin de l'heresie , il s'aida en vne infinité de guerres des soldats Sarrazins. Basile & Constantin fils de Iean Empereur de Constanti-

*Narses**Le Roy
de Perse*

nople prindrent la Pouille & Calabre par le moyen, & avec l'aide des forces Sarrazines, qu'eux mesmes auoient chassé de l'Isle de Candie. l'en pourrois dire autant de Federic, qui avec l'aide des Sarrazins seigneuria la plus grand'part de l'Italie. le vous pourrois amener Henry & Federic freres du Roy de Castille, lesquels au temps du Pape Clement quatriesme, accompagnez de Conradin, appellerent les Sarrazins, tant par terre que par mer, non pour la tuition & deffence de leur pays, mais pour chasser les François de l'Italie : & en peu de temps avec l'armée des Barbares, s'impatronerent de la plus grande partie de la Sicile. le pourrois parler de Ludouic Sforce, lequel avec plusieurs autres Potentats d'Italie employa les forces de Bajazer.

*Princes
qui se
font seruis
des infi-
delles.*

Que diray-je de Maximilian de la maison d'Autriche, lequel non pour se deffendre, ains pour ruiner vostre estat (Tres-Illustrissimes Seigneurs) tascha de prouoquer & aigrir le Turc contre vous, à vostre grand'ruine & dommage : ce qui se trouue fidèlement escrit par le Seigneur Andrea Mocennigo, qui est des vostres, ensemble les remedes, desquels vous
vſates

vsates en telle necessité. Qui si les raisons naturelles , si les exemples tirées de la Sainte Escriture , & des Histoires Chrestiennes ne suffisoient , pour vous confirmer & persuader entiere-ment la verité de ceste cause , ie pour-rois l'accompagner de plusieurs autres, que ie laisse pour n'ennuyer vos Seigneuries , & qu'aussi ie pense qu'il ne vous en reste aucun scrupule , veu que ie uous ay par les exemples , cy-dessus alleguez , faict voir le foible fonde-ment de l'article de foy nouvellement forgé par les Imperialistes. Et qui plus est , ie dis & maintiens , que le Roy Tres-Chrestien mon Seigneur , à l'imitation de tant de signalez & religieux Princes , peut sans faire tort au rang qu'il tient , ny au nom Tres-Chrestien qu'il porte , s'aider en toutes ses affaires & necessitez du secours , & ayde du grand Seigneur. Et si cela se peut avec la verité & raison entendre de tous ses affaires necessaires , combien à plus forte raison doit estre non seulement excusé , mais grandement estimé le Roy Tres-Chrestien , lequel , non pour besoin qu'il ait de deffendre , non pour vne seule vengeance , que sa Maiesté eust peu desi-

rer de tant de torts receus , de tant d'iniures à luy faictes , de tant d'affassins & meurtres executez contre ses subiects par l'Empereur , & à sa suscitation , n'a voulu accepter autre secours , sinon celuy , que l'on void par experience estre à tous les Chrestiens plus vtile , que dommageable ? Et si quelqu'un de ceux qui fauorisent le party de l'Empereur , demandoit comment l'armée Turquesque peut estre dans nos ports , non moins pour le bien de l'Italie , que pour nostre profit particulier , ie luy pourrois demander pour responce , par quel moyen on pourroit prouuer , que la Chrestienté ait receu aucun dommage en ce que nous auons receu & rafraichy ceste armée dans nos ports. A quoy ie suis assure que ne me pourroit respondre le plus aduisé & plus affectionné des partisans Imperiaux , sinon que ce fut quelqu'un qui print plus de plaisir d'en ouyr conter & deuiser , que d'entreprendre le discours veritable , & la negotiation , & en apprendre la raison. Mais pour ne laisser la moindre chose du monde , qui peult engendrer quelque doubte en l'esprit de ceux qui ne sont informez de ce fait entiere-

*Nul dom-
mage re-
ceu des
Turcs.*

ment , i'en toucheray ce poinct le plus
brefuement que ie pourray. A toutes
les fois que vostre Serenité a esté re-
cherchée par les Ambassadeurs de
l'Empereur pour donner passage par
les terres de vostre Seigneurie à leurs
soldats Tudesques , Italiens , ou Espa-
gnols , tout aussi tost on a entendu
mille plainte des assassinats & desbor-
demens de leurs soldats. Et y a seule-
ment quelques mois que les Tudes-
ques qui disoient aller à Carignan <sup>*Sacrile-
ges des
Alemands.*</sup> faire leurs Pasques , pour surmonter
ceux-là , qui auoient si vilainement
taché l'honneur de vos subiets , & si
meschamment pillé leur bien , des-
ployent vne partie de leur rage contre
les Eglises , coupant avec vn grand
vitupre & melpis de la Religion
Chrestienne , les oreilles , le nez , &
les bras des Crucifix & des autres
Images , qui representoient les Saints
qui sont au Ciel.

L'armée grande & puissante (Sere-
nissime Prince) partit de Constanti-
nople , estant composée de soldats
estrangers de nostre Religion. Et estant
destinée & enuoyée pour le secours du
Roy , mon Seigneur , passa au milieu
de vos Isles , s'arresta au pays de l'E-

glise, trauffera les terres des Sienois & Genoïs (peuples qui plus volontiers fauorisent la grandeur de l'Empereur, que leur propre liberté. (Mais il ne se peut sçauoir, ny ne se trouuer personne qui se plaigne, qu'aucun tort luy ait esté fait, ains ont vsé de toute courtoisie, & donné libre passage à tous ceux qui ont esté rencontrés en mer, & payé tout ce qu'il a fallu prendre passant pays pour leur prouision & auitaillement de l'armée. Lequel bien ie ne crois pas qu'on puisse rapporter ailleurs, qu'à la seule présence du capitaine Polin Ambassadeur du Roy. De façon que iamais au passé, ny Turcs, ny Chrestiens ne se sont si modestement comportez.

*Capitaine
ne Polin
depuis
Baron de
la Garde.*

Qui fera celuy-là (Serenissime Prince) qui puisse ou vetuille nier, que si l'armée n'eust esté retenue par la Maiesté du Roy mon Maistre, pour la deffence de ses frontieres, que la Chrestienté n'en eust esté assaillie avec infinies pertes ? qui fera celuy qui ne iugera, que ceste armée avec vne si grande puissance eust triomphé d'une infinité d'ames Chrestiennes, & de quelque ville d'importance, si nous ne l'eussions conuertie à nostre profit ?

ce qui auroit reüssi au bien des affaires du grand Seigneur , & aduantage grand de ses capitaines ennemis de nostre foy. Doncques ceste armée estant disposée & capable pour faire quelque haut exploit , toute personne de bon iugement pensera qu'il a esté plus utile à la Chrestienté , qu'elle aye esté employée pour seruir à la Maiesté du Roy mon Seigneur , que non pas si de foy-mesme elle sans aucun frein eust marché contre les Chrestiens. Si bien qu'outre qu'il estoit besoin & necessaire au Roy mon Maistre s'aider de ceste armée , pour reprimer l'insolence des gens de l'Empereur , lesquels auoient ia prins quatre de ses galleres dans le port de Tolon , il se peut aussi dire sans replique , qu'en cecy nostre vtilité priuée estoit conioincte avec le bien public de toute la Chrestienté. Je crois (Serenissime Prince) vous auoir représenté clairement , & confirmé par raisons toutes euidentes , & argumens certains , deux poincts principaux : Le premier , que le Roy sans preiudice du nom & de l'honneur de Tres-Chrestien , a accepté les forces qui luy ont esté enuoyées par le grand Turc : Le second , que

ce secours a esté plus vtile que dommageable à la Chrestienté. Et i'adiousteray le troisiésme avec la briefueté que l'importance de la matiere me permettra : C'est, que la Maiesté du Roy, non pour ambition de dominer, non pour se venger des iniures receuës, non pour s'inuestir du bien d'autrui, non pour recouurer ce que iniustement luy a esté vsurpé, mais seulement a retenu ce secours pour deffendre, i'entens (Illustrißimes Seigneurs) pour deffendre son Royaume, lequel l'Empereur de tousiours avec des violences ouuertes, avec des cauetelles secrettes, avec des intelligences, avec des trahisons contre toute raison & iustice, a cherché de ruiner; & maintenant ses ministres, comme s'ils parloient par mocquerie, n'ont point honte de dire, que sa Maiesté Cesarée n'a esté esmeuë par autre raison d'entreprendre contre le Royaume de France, que pour dissoudre l'amitié qu'on dist estre entre la Maiesté du Roy & le grand Seigneur ! O les delicates consciences ! ô les saintes propositions ! ô réponces bien iustificées, pour s'en seruir toutesfois enuers quelques fots & ignorans, & non pas

enuers vous (Illustriſſimes Seigneurs)
qui avec voſtre admirable & accouſtu-
mée prudence , auant meſme que
i'aye parlé , auez en voſtre conſcience
& en voſtre eſprit iugé tout le con-
traire : & recognoiſſez que le fonde-
ment de la guerre n'a eſté autre , que
le deſſein de ruiner ce Royaume là : *La France*
qui depuis mil ans en ça , s'eſt monſtré *ce refuge*
le vray & prompt recours de toutes *des affligés.*
perſonnes oppreſſées , & le ſeul refuge
de tous Eſtats affligez. le voudrois en-
tendre de ceux qui inuentent de ſi
ſubtils argumens , quel ſainct éguilon
de la foy pouſſa l'Empereur ligué avec
le Roy d'Angleterre , de venir aſſaillir
la France par les coſtez de la Cham-
pagne & de la Picardie , faiſant
reüſſir finalement tout le fruit de ſon
entreprinſe au bruſlement de ie ne
ſçay quels villages , & ſieges de Me-
ziers pour luy fort honteux ? Quelle
religion les poiſonna au temps que
l'Italie viuoit en repos & aſſurance ,
pour eſtre Naples , Milan , Florence &
Genneſ , poſſedez par diuers Princes ,
de venir mettre le tout en trouble &
diſcorde ? Quelle religion (diſ-je)
l'eſmeut de ſe ioindre & liguier avec
le Pape Leon pour eſleuer l'Eſtat de

*Trames
de l'Em-
pereur.*

Milan , lequel par droicte ligne appartient aux Enfans de mon Roy ? Quel si grand zeile de la foy les conseilloit de vouloir faire tuer le Roy par le moyen d'un Prince de France , lequel il auoit pour cest effet avec promesses & larmes suborné ? & voyant que ceste mal'heureuse pratique (plustost qu'approcher de l'execution) estoit toute descouuerte , il enuoya le Seigneur de Bourbon en France avec un nombre infiny de gens , sous esperance de pouuoir gagner à force ouuerte , ce que la bonté & prudence de Dieu ne luy permettant pas , il n'auoit peu executer avec ses trahisons ? Quelle inspiration du Saint Esprit peut-estre celle là , qui conduisoit il y a sept ans l'Empereur avec sept mil fantassins , & dix mil cheuaux , pour assaillir la France , & y entrer par la Prouence & par la Picardie ? Quel commandement de l'Euan-gile se pourra iamais trouuer tel que l'ont trouué ceux-cy , qui se monstrent en apparence si grands zelateurs du nom Chrestien , qui puisse iamais iustifier aux yeux de tout le monde la confederation de l'Empereur & du Roy d'Angleterre , veu que ledict Roy Anglois

*Partage
de la
France.*

glois à la fuscitation & poursuite de
la Cesarée Maïesté , a esté par les
Papes declaré schismaticque , heretique
& rebelle ? Laquelle conspiration ne
se peut baptizer du nom d'un secours
necessaire , ains vne iniuste , meschan-
te & detestable coniuration faicte
entr'eux deux , pour s'entre-partir un
Royaume Chrestien & Catholique ,
lequel de tout temps , lors qu'il s'est
présenté quelque occasion pour l'a-
grandissement de nostre foy , s'est tou-
siours monstré prompt à employer
& son sang , & ses moyens. Quelle
immense charité pourra estre celle-là ,
qui en si peu de temps n'induit l'Em-
pereur d'embrasser , favoriser , & se
conioindre aux Princes Alemans , les-
quels puis vingt ans en ça il auoit iugez
heretiques , schismatiques , & alienez
de nostre foy ?

Tout le monde (Serenissimes Prin-
ces) ne luy bastoit pas , tant il estoit
enclin à l'ambition & à la vengeance.
N'eust-il pas senty le honteux icorne ,
qui luy fut faict par le Roy d'Angle-
terre en la personne de sa tante , si son
dessein de subiugner toute la Chref-
tienté, ne l'eust transporté à oublier cest
outrage ? combien de fois en vain pour

*Il en-
tend lors
qu'il re-
pudiaſt la
Reine
Catheri-
ne.*

obuiet à l'entreprinse Turquesque, & à l'éuidente ruine de l'Hongrie & de l'Alemagne a on tanté & cherché les moyens, pour mettre quelque paix & vnion entre ces Princes ? Mais laifans à part toutes les haines particulieres, les intereſts priuez, le reſpect de la religion, le deſir de la commune liberté, l'obligation de tant de benefices anciennement receus des noſtres, & depuis quelque temps de nous, finalement à noſtre grand dommage ils ſe ſont conioincts & raliez, & firent tout ainſi qu'Herodes & Pilate, leſquels d'ennemis capitaux qu'ils eſtoient, deuindrent amis & ſ'associerent pour perſecuter IESVS-CHRIST. Ira doncques l'Empereur (Sereniſſime Prince) avec intention de ſ'emparer de la France, & d'offencer ce Roy, lequel apres auoir receu tant d'injures accorda ſi volontiers & ſi amiablement la trefue de dix ans. S'en ira l'Empereur avec intention de ruiner ce Prince, lequel apres eſté tant de fois indignement aſſailly dans ſon Royaume, & comme reuenant des obſeques de ceſt Illuſtriſſime & Sereniſſime Dauphin, qui luy fuſt ſi poltronnement par les corruptions de

*Empoi-
ſonnement
du Dau-
phin.*

l'Empereur empoisonné, alla neantmoins avec tous ses autres Enfans & Princes de son sang iusques en la galere dudict Empereur avec peril de sa propre vie, luy monstrant combien la paix necessaire à tous les Chrestiens estoit continuellement desirée de sa Maiesté ? S'en ira l'Empereur avec intention de ruiner, brusler, & mettre en proye ce Royaume, passant par lequel il a esté bien vieigné, caressé & honoré, & non autrement, que si c'eust esté, qu'il fust descendu du Ciel en terre ? S'efforcera-il avec des moyens indus & uiolens de se rendre Seigneur de ce Royaume, dans lequel durant cinquante iours par la courtoisie & benignité du Roy mon Seigneur, il s'est trouué plus respecté que son naturel Seigneur : & avec tout pouuoir d'y commander plus qu'en sa propre maison ? Iront les Tudesques avec intention de faire serfs & esclaués, ceux qui pour conseruer la liberté de la Germanie se sont si liberallement employez aux despens & perte de leur cheuance, & effusion de leur sang ? Iront les Alemans, & les Anglois avec volonté de détruire ceste religion, que nous avec nos valeureuses armées, & avec

la doctrine d'un nombre infiny d'hommes excellens en ſçauoir, auons publiée par tout le monde. Iront les Eſpagnols, qui ſi ſouuent & à force d'armes ont eſté par nous reduits à la Foy Chreſtienne, avec intention d'en prendre la vengeance, & pour nous contraindre à laiſſer la Religion, laquelle avec ſi grand honneur du Nom de Chriſt, nous auons ſi longtemps conſeruée? Que ſi nous ſommes contre tout deuoir abandonnez du reſte des Chreſtiens: (ce que Dieu ne permette) nous pourrons, nous ſubiects du Roy mon Seigneur, tres-juſtement demander vengeance à Dieu contre tous d'une ſi grande ingratitude.

Ce ne ſeront pas les merites deus à nos peres anciens, pour auoir par la grace de Dieu, gagné & acquis à la Chreſtienté tant de victoires ſoubs la conduite de Charles Martel, au temps qu'ils combattirent & taillèrent en piéces cinquante mille Sarrazins venus d'Eſpagne.

Ce ne ſeront pas les merites que nos majeurs, par la grace de Dieu, ont acquis à la Chreſtienté, au temps que par leurs forces ſoubs la conduite de Charlemagne, les Infidelles & Sarra-

zins furent chassés des Espagnes , & d'une partie de l'Asie : Ce ne seront pas les merites , que par la grace de Dieu les nostres ont acquis au temps d'Urbain second , lequel sans beaucoup de peine ny contradiction , disposa nostre Roy , ses Princes , nostre Noblesse , & generallyment tout le Royaume , contre les aduersaires de nostre Foy , si bien que tous ensemble , & par nostre secours , conquirent le Royaume de Hierusalem , & la Terre Saincte. Pourrons lire iamais les Chrestiens sans recognoissance de l'obligation que nous avons sur eux , l'Oraison prononcée par l'Euesque Oliuiense , au temps de Calixte en presence de vostre Serenissime Seigneurie : Le commencement de laquelle contient ces mots , Aucun de nous n'ignore (Illustrissimes Seigneurs) qu'il y a vingt ans , que ce victorieux exercitè des Gaulois passa d'Europe en Asie , ou par la benignité de Dieu , & par leur vertu tout le pays de Bastero iusques en Syrie , a esté destourné de la foy de Mahomet. Ce ne seront pas donc les recompenses des merites de tant d'expeditions contre les aduersaires de la foy heureusement faites

*Grandes
conques-
tes des
François.*

*Confide-
rations
pour le
Pape.*

par nos ancestres au temps de Philippes & Charles de Valois. Et quand la Saincteté verra tant de nations ensemble conioinctes , & avec vn malheureux desir de ruiner le reste de la Chrestienté , & resolu d'opprimer ce Royaume , qui sur tous les autres a bien merité de la Republique Chrestienne , ie ne croy pas qu'elle ne veuille pour nostre tution & deffence nous prester l'aide & secours qu'elle iugera nous estre necessaire. Et quand sadite Saincteté en vferoit autrement elle feroit son tres-grand dommage , & contre le deuoir d'Italien , de Chrestien , & de Pontife. D'Italien , pource que nostre Sainct Pere scait bien que la seruitude & calamité de l'Italie ne peut naistre d'autre accident , que de la ruine & destruction du Royaume de France : De Chrestien , d'autant qu'ayant esté de tout temps le Nom de Christ deffendu & amplifié par ce Royaume , & estant à ceste heure combattu par le moyen & ambition de l'Empereur , & de tant de nations allienez de nostre Religion , il ne pourra estre abandonné en ce besoin , sinon des mauuais Chrestiens. De Pontife , par ce que ce sera contre le deuoir de

la Saincteté , puis qu'elle est entiere-
ment , & en toutes sortes esclaircie &
tres-affeurée , comme l'Empereur
obstiné en sa volonté , resolu de
mettre sous son ioug, François & Ita-
liens , & tous autres Chrestiens , n'a
iamais voulu prester l'oreille à aucune
condition de paix , que la Saincteté
luy ait proposée. Au contraire le Roy
mon Seigneur desireux d'icelle , & du
repos des Chrestiens , a voulu bien
souuent remettre tous ses droicts &
differentes au iugement du Saint Pere.
Doncques pour faire l'office de vray
Pontife , & de vray Iuge ne pourra-il
pas prendre les armes contre celuy ,
qui sans honte n'ozeroit nier qu'il ne
soit le seul perturbateur du bien & du
repos public ? Et quand il ne fera cela ,
pour luy reprocher son ingratitude en
cest endroict , les os de Gregoire troi-
sième , d'Estienne second , d'Adrian
premier , d'Estienne quatrième , de
Gregoire neuvième , de Gelase second ,
d'Innocent second , d'Eugene sixième ,
d'Innocent quatrieme , d'Vrbian &
de plusieurs autres Pontifes s'esleue-
ront tout à coup , lesquels estant per-
secutez , partie par les ennemis de la
Foy , partie par les Empereurs , ont

esté secourus par les forces de ce Royaume Tres-Chrestien , & par le moyen de ceste Couronne , comme l'ancrè sacrée de toute la Chrestienté , & ont esté garentis & restituez au Sainct Siege. Les os , les cendres du Pape Clement s'esleueroient , lequel contre toute raison & iustice reduict en extrême calamité par l'Empereur (lequel maintenant allié & fortifié d'heretiques , prepare & excite tant de tragedies aux bons & vrais Chrestiens) fust deliuré de toutes ses oppressions par les forces du Roy mon Seigneur , avec vne notable perte des nostres. Je ne croy pas (Illustrißimes Seigneurs) que vous ayés du tout oublié l'union & confederation , qui depuis sept cens ans a esté inuiolablement gardée entre ceste Illustrißime Seigneurie , & la Couronne de France.

*Alliance
des François
& Vénitiens.*

Oublierez vous l'estroicte alliance , qui estoit entre vous & nous aux dernieres guerres ? Vous n'aurez perdu la memoire de ceste entreprinse en laquelle vous & nous en si peu de temps conquistmes Constantinople. Pourrez-vous supporter qu'une nation , que vos majeurs ont tant aimée & honorée , demeure affoiblie par le

moyen de vos ennemis , avec laquelle n'estans , ny vous ny nous degenez de la vertu de nos predecesseurs , vous pouuez encores esperer de faire d'autres entreprinſes , qui seront pour vostre accroissement avec le bien de toute la Chrestienté. I'espere , Illustriſſimes Seigneurs , que vous considererez avec vostre accoustumée prudence , que s'il aduenoit (ce qu'à Dieu plaſe) quelque sinistre accident au Roy mon Seigneur , la liberté de vostre Serenissime Republique seroit sans aucun remede exposée en proye à celuy , qui ne tend à autre fin , que soubmettre les deux à vn mesme ioug , comme ceux qui se sont trouuez vnis tousiours pour la deffence de la commune liberté. Et quand vous ferez autrement , en nostre faueur , s'esleueroient les os de nos anciens peres , lesquels voyans Philippe Maria Vicomte auoir subiugué Genes , & ia reduict toute la Toscane en vn miserable estat , pour ne vouloir souffrir vne chose si iniuste , & laisser enuironner le pays de Princes si puissans , reprendrent avec l'aide des Florentins Genes. Et par ce moyen non seulement repousserent l'ambition de ce tyran : mais avec vne fin-

guliere louïange & obligation de l'Italie, reconquirent Bresse, Bergame, & Cremone.

Pour la memoire de tant de braues actes, ie crois vous auoir osté toutes les difficultez & empeschemens, qui par les calomnies des Imperiaux, vous estoient opposez. Et comme seruiteur de tous vous (Illustrissimes Seigneurs) ie vous coniure & supplie vouloir considerer en quel estat se trouue la miserable Italie : & generallyment toute la Chrestienté. Et auant vous resoudre & prendre party, vouloir non seulement escouter le Reuerendissime & Tres-Illustre Cardinal de Ferrare : mais examiner par le menu, ce qu'il proposera à vostre sublimité de la part du Roy mon Seigneur. Ie supplie encore vn coup vostre Serenité vouloir avec son accoustumée prudence, considerer comme l'Empereur est non seulement la cause de la ruine & misere de l'Italie : mais aussi le recognoistre comme insidiateur de la liberté de ceste Illustrissime Seigneurie. Reconnoissez, reconnoissez, ie vous supplie, la maison d'Austriche, pour vostre ennemie capitale, & comme celle qui de tout temps a fait tout effort d'en-

*L'Empereur
ruine
de l'Italie.*

iamber & vsurper les biens & pays d'autrui, & spécialement ceux de vostre Illustrissime Seigneurie. Au contraire, recognoissez la Maiesté du Roy Tres-Chrestien, mon Seigneur, pour vostre ancien, fidelle, & affectionné amy: & avec quelle promptitude il vous a departy ses moyens, pour le recouurement de vos places occupées iniustement par ceux de la maison d'Austriche. La reprise de Bresse & Veronne en peuuent donner ^{Alliance de France & Venise.} asseuré témoignage. Et si ne vous faut craindre, qu'une telle amitié se puisse dissoudre ou violer en aucune sorte: parce que n'y ayant entre la Couronne de France & ceste Illustrissime Seigneurie aucuns differens ny anciens, ny recens, & ne tenant l'un aucune chose de l'autre, les occasions défailent aussi, pour lesquelles les amitiés se peuuent dissoudre entre les Princes: ains au contraire leur vnité, alliance, & conformité sont telles, que la ruine de l'une menasse & promet asseurement la dissolution & calamité de l'autre.

IE ne sçay pas quelle opinion resta à la Seigneurie d'une si grande affaire,

ny si l'eloquence de mon frere leur fit
trouuer bon , ce qu'ils trouuoient si
mauuais. Vne chose sçay-ie bien , que
lors & depuis i'ay tousiours ouïy blas-
mer ce fait : & crois que nos affaires
ne s'en sont pas mieux portées : mais
ce n'est pas à moy à demesler de si
grandes fuzées. Ce grand secours du
Turc arriué , tout le monde pensoit
que la terre ne fust assez capable pour
eux. Voila que c'est des choses qu'on
n'a pas essayées. Monsieur d'Anguien ,
qui estoit pour lors Lieutenant du Roy
en Prouence , assembla quelques En-
seignes de Prouenceaux, & vint se plan-
ter deuant Nice , où apres auoir faict
vne grande batterie , l'assaut fut donné
par les Turcs & Prouenceaux ense-
mble : mais ils furent repoussez. Enfin la
ville se rendit , non pas le chasteau.
Monsieur de Sauoye sollicitoit cepen-
dant le Marquis de Guast pour le se-
courir , lequel se mit en campagne
avec vne bonne armée. Les Turcs
méprisoient fort nos gens : si croy-ie ,
qu'ils ne nous battroient à forces pa-
reilles. Ils sont plus robustes , obeyf-
sans & patiens que nous : mais ie ne
croy pas qu'ils soient plus vaillans : ils
ont vn aduantage , c'est qu'ils ne son-

*Siege de
Nice par
les Turcs.*

gent rien qu'à la guerre. Barberouffe se
 faschoit fort , & tenoit des propos Barberouffe en colere.
 aigres & picquans : mesmement lors
 qu'on fust contrainct luy emprunter
 des poudres & des bales. Tant y a
 qu'ils se rembarquerent sans auoir faiet
 de grands faiets d'armes , aussi l'hyver
 approchoit. Ils se porterent bien mo-
 destement à l'endroit de nos confede-
 rez. Les Prouenceaux aussi se desban-
 derent.

L'auois oublié à vous dire , qu'apres
 le mauuais succès de la guerre de Per-
 pignan : le Roy nous manda marcher
 droit en Piedmont , & monsieur Siege de Cony.
 d'Annebaut qui estoit Admiral , alla
 mettre le siege deuant Cony , là où
 nous fusmes aussi mal qu'à Perpignan ,
 & fusmes bien frottez en donnant
 l'assaut , pour auoir mal recogneu la
 bresche : où ie vis bien faire au braue
 & vaillant capitaine saint Petro Saint Petro Corse.
 Corse , qui fust presque assommé.
 Ledit sieur Admiral se voyant sur
 l'hyver s'en retourna en France , ayant
 prins quelques petites places : & laissa
 monsieur de Botieres Lieutenant du
 Roy , lequel l'enuoya en garnison à
 Gauaret : & moy à Sauillan , où mon-
 sieur de Termes estoit Gouverneur .

qui en fut bien aise : car il nous demandoit. Pendant nostre séjour il se dressa plusieurs entreprises tant sur Turin , que sur nous : & nous aussi sur nos ennemis , esprouuans tantost la bonne , tantost la mauuaise fortune. Mais parce qu'il n'y a rien de mon particulier , ie m'en tairay : aussi ne ferois-ce iamais faict , si ie voulois escrire tous les combats , où ie me suis trouué.

*Les Suisses mal
propres à
garder les
places.*

Après que les Turcs se furent retirez , comme nous auons dict , monsieur de Sauoye & le Marquis de Guast mirent le siege à Montdeui , où le Seigneur de Dros Piedmontois estoit Gouverneur , ayant avec luy quatre compagnies Italiennes , & deux compagnies de Suisses , des six de monsieur de saint Iulian , qui firent tousiours fort bien , encore que ce ne soit leur mestier de garder places : & y fust donné deux ou trois assauts. Monsieur de Botieres n'auoit nul moyen de les secourir : car le Roy auoit lors peu de soldats en Piedmont. Les Suisses , qui auoient perdu leurs Capitaines & Lieutenans de coups de canons , se commencerent à mutiner contre le

Seigneur de Dros Gouverneur, tellement qu'il fust contrainct de capituler. Pour luy oster toute esperance de secours, le Marquis de Guast, qui a esté vn des plus fins & rusez capitaines de nostre aage, fit contre-faire des lettres de monsieur de Botieres, par lesquelles il luy escriuoit, qu'il print party, n'y ayant moyen de le secourir : il ne peust descourir la ruse, & se rendit vies & bagues sauues, voyant la mutinerie des Suisses. Toutefois la composition (à la grand'honte de Guast) fust mal gardée, & le Seigneur de Dros poursuuiuy, lequel se sauua sur vn cheual d'Espagne, & bien pour luy : car tout l'or du monde ne l'eust sceu sauuer, pour la haine que le Duc de Sauoye luy portoit, par ce qu'estant son subiect, il s'estoit reuolté contre luy. On disoit qu'il s'estoit fauue habillé en Prestre, par le moyen d'vn soldat Italien, qui auoit esté à luy. Je croy toutesfois, que ce fust comme i'ay dict, le puis dire sans mentir, que c'estoit vn des vaillans hommes & des meilleurs esprits, qui sortit iamais de Piedmont. Il mourut à la bataille de Serisolles fort vaillamment. Et le iour mesme que le Mont-

*Ruse du
Marquis
de Guast.*

*Loüange
du Sei-
gneur de
Dros.*

deui se perdit , i'estois party de Sauillan avec vingt cinq soldats , au grand regret de monsieur de Termes , pour essayer si ie pourrois entrer dedans : car avec grand'trouppe il estoit difficile : & auois vne guide , qui me vouloit conduire par des baricaues , & par vne riuiera qu'il y a au Montdeui , par dedans laquelle il falloit que nous allissions longuement , n'y ayant eue que jusques au genou : & crois que par là i'y eusse entre , ores qu'il n'eust de rien seruy , de tant qu'il m'eust fallu passer par le chemin des autres , veu que les estrangers nous donnoient la loy : mais ils en porterent la peine , car on en massacra plusieurs à l'yssue de la ville. I'auois prins dix soldats d'auantage , plus que des vingt-cinq ,

Maupas. pour me tenir escorte à passer le Maupas qui est vn lieu ainsi appellé , & à demy mil de Marennes, où on ne faillait gueres iamais de trouuer rencontre de la garnison de Fossan. Et au dessus , & à main droicte de Maupas y auoit vne hostellerie abandonnée ; d'où on pouoit veoir tout ce qui venoit devers Sauillan droit à Cairas , & dudit Cairas audit Sauillan. Comme ie descendis en la plaine , tirant droit à

Maupas ,

Maupas , il y auoit soixante soldats Italiens de Fossan regardans tousiours vers ceste hostellerie , qui est sur vn lieu haut. le vis partir la troupe qui alloit gagner le Maupas du costé de Cairas , pour m'aller combattre en ce destroict : qui fust cause que ie tournay chemin à main droicte , & les allay prendre par derriere venant à l'hostellerie : mais ils m'apperceurent , & voulurent gagner le chemin de Fossan pour se retirer , ayant quatre cheuaux qui les menoient : toutesfois ie les poursuiuis de si pres , que ie les contraignis de se ietter dans vne maison , où il y auoit vne estable tout contre , à laquelle ie mis le feu : & ainsi qu'ils se virent perdus , ils commencerent à crier misericorde , se iettans à coup perdu les vns par les fenestres , & les autres par la porte : mes soldats en tuerent quelques-vns , pour ce qu'un de leurs compagnons , qu'ils aimoient fort , estoit mort , & deux blesez , le reste ie les renuoyay à Sauillan , tous attachez avec cordes d'arquebouzes , de tant que les miens , qui les menoient n'estoient si grand nombre qu'eux. Puis m'acheminay droit à Cairas , & au moulin dessous

*Combat
entre
pres le
Maupas.*

Cairas , trouuay monsieur de Cental ,
Gouuerneur dudit Cairas , qui me dit
que le Montdeui estoit rendu , ayant
encores en main les lettres qu'on luy
auoit escrit. Ie retournay tout court,
pour regagner Sauillan , & dire la
perte à monsieur de Termes , pour en
aduertir monsieur de Botieres : mais
comme ie fus au deca de Cairas , &
au commencement de la plaine , pres
des maisons , qu'il y a , qui s'appellent
les Rodies , regardant en arriere , ie
vis vne troupe de gens à cheual , qui
venoient deuers Fossan au long de la
prairie tirant à Albe qu'ils tenoient
pour lors : & m'arrestay à ces mai-
sons , pour voir ce qu'ils feroient : &
estant assez pres de moy , me descou-
urirent , & me voulurent approcher
s'acheminans par vne petite montée
qu'il y auoit , bordée de hayes aux
deux costez. Et comme ie les vis à
demy montez , i'enuoyay au deuant
quatre ou cinq arquebuziers , qui leur
blessèrent vn Cheual , surquoy ils
tournerent arriere. Ce que voyant ie
pensois que ce fust de peur , qui fust
cause , que ie m'acheminay dans la
plaine , & n'eus fait cinq cens pas ,
que ie les descouris en icelle : car ils

estoyent passez plus bas , estans quatorze sallades tous portelances & huiet arquebuziers à cheual , & vn autre qui venoit apres conduisant le cheual blessé. Je n'auois en tout que vingt-cinq soldats , desquels y en auoit sept picquiers , & le capitaine Fauas , & moy qui auois vne halebarde au poing. Leurs arquebuziers vindrent pour me charger le grant trot , nous iurant , comme firent aussi partie des nostres à eux , & les lanciers firent semblant de vouloir enfoncer , mais assez maigrement : car dès que nostre arquebuzerie tira , ils s'arrestèrent , & firent largue : alors nous prîmes tous courage , & marchâmes droict à eux à grandes arquebuzades. Il en tomba vn par terre , lequel ils abandonnerent : & ainsi descendirent autrefois en la plaine , se retirant droict à Albe. Nous desarmâmes le mort , & le cheual se sauua avec eux. Ainsi ie me retiray à Sauillan , estant deux heures de nuit auant que i'y arriuy. Cecy ay ie voulu mettre par escrit pour vn exemple que les capitaines doiuent prendre : pour ce qu'ores que les gens à cheual viennent charger les gens de pied , il se doiuent resoudre à ne tirer ,

Petit combat.

Instruction pour des gens de pied.

que partie de leur arquebuzerie : & garder tousiours l'autre partie iusques à l'extrémité, ce que obseruant il sera difficile qu'ils soient deffaiçts sans tuer beaucoup des ennemis, lesquels n'osent enfoncer, voyant les arquebuziers afustez. Lesquels bien resolués à la faueur d'un buisson arresteront les caualliers bien longuement, tirant cependant que les autres rechargeront. Nous estions resolués de ne nous rendre point, & combattre plustost avec les espées, craignant qu'ils prissent la reuanche de ce que nous auions faict le matin : car les quatre cheuaux qui se sauuerent à Fossan, leur porterent nouuelle de leur deffaite.

Des que monsieur de Termes entendit la prinse de Montdeui, il delibera s'aller le matin ietter dans Beme : & y estant arriué trouua deux compagnies de Suisses qui estoient là en garnison, ayant reçu les autres de Montdeui, qui abandonnoient lors Beme, & s'en venoient à Cairas, n'y demeurant plus que la compagnie du Comte, vne autre Italienne, & celle du capitaine Renouare. Monsieur de Termes me despescha un homme à cheual, m'escriuant que si iamais ie

voulois faire service au Roy , qu'in-
 continent ie partisse : & c'estoit le
 lendemain que ledict Seigneur arriua
 à Beme , qui estoit vn Dimanche.
 Nous ne faisons lors que sortir de la
 Messe. Apres auoir vn peu mangé ,
 ie me mis aux champs pour y aller :
 toutesfois ie ne sceus tant faire , qu'il
 ne fust plus de trois heures de nuit
 auant que i'y arrinasse : car il me fal-
 lust passer par des valons assez mal
 aisément , d'autant que l'on pensoit
 que la ville fust desia assiegée , estant
 tout leur camp à Carru , à trois petits
 mille de Beme , ayant esté tout le
 iour l'escarmouche deuant la ville. Et
 par fortune monsieur de saint Iulien
 Colonel des Suisses , se trouua audict
 Beme , parce que c'estoit sa garnison ,
 & monsieur d'Aussun qui l'estoit venu
 voir pour entendre à quoy viendrait
 le siege de Montdeuy : & ne fust pos-
 sible audict saint Iulien de retenir les
 Suisses : car ie trouuay toutes les qua-
 tre compagnies desia à demy mil de
 Cairas. I'eus ceste faueur , que mon-
 sieur le Comte , & madame la Com-
 tesse sa mere , vindrent au deuant de
 moy aux portes de la ville , accom-
 pagnez de beaucoup de Seigneurs ,

Le frere
 de Mons-
 ieur se iet-
 te dans
 Beme.

Aussun.

ayant vne grande ioye de ma uenuë , pensant que le matin le siege seroit deuant : mais deux iours apres que ie fus arriuë , leur camp marcha droict à la Trinitat , ayant dressé vn pont sur la riuere pres Fossan : & ce matin que le camp marchoit , cinq ou six cheuaux legers de monsieur de Termes , & quatre ou cinq gentils-hommes du Comte de Beme , qui seruoient de guides , avec cinq ou six arquebuziers à cheual des miens , allerent à la suite de leur camp. Il faisoit vne brotie si espoisse , qu'à peine l'on se pouuoit voir l'vn l'autre. Cela fust cause qu'ils allerent iusques à la teste de leur artillerie , & prindrent le Commissaire , qu'ils nommoient le capitaine de l'artillerie : & le iour deuant Messieurs de Termes , d'Aussun , & saint Iulien estoient partis , ayant eu aduertissement que les ennemis dressoient ce pont. Monsieur de Saint Iulien tira droict à Cairas , où les Suisses ne voulurent demeurer , ains s'en allerent à Carignan : Monsieur de Termes qui craignoit aussi qu'ils allassent à Sauillan , dont il estoit Gouverneur , s'en alla : monsieur d'Aussun s'en alla aussi en haste

droict à Turin. Bref chacun avoit peur de perdre ce qu'il avoit en charge. Ledit pont estoit plus aduancé qu'on ne pensoit : car ceux de Fossan le firent pendant trois ou quatre iours que leur camp seiourna à Carru , & à l'heure que le Commissaire fut prins, la pluspart du camp estoit desia passé, & se campoit vers Marennes : mesmement la bataille des Allemans, qui campa au chasteau & es environs du Palais de Misser Philleber Canebous gentil-homme de Sauillan. Monsieur de Termes avoit mené avec luy à Beme monsieur de Caillac, qui estoit Commissaire de l'artillerie, lequel vouloit demeurer avec moy, pour la bonne amitié que nous nous portions (comme faisons bien encores) & ne pensames iamaïs rien tirer dudit Commissaire prisonnier, iusques à ce qu'il fust tard : lors il nous dict & asseura, que le Marquis alloit assieger Sauillan, dont monsieur de Caillac & moy fumes demy desesperez : car ledict Seigneur de Caillac demeueroit plus audict Sauillan, qu'en autre lieu, & moy pour ce que c'estoit ma garnison, & où j'auois demeuré sept ou huit mois. A la fin nous resolusmes tous.

Caillac

*De l'ain
du Mar-
quis de
Guaft.*

deux de nous aller ietter dedans à tous perils & fortunes, qui pourroient aduenir : i'auois vingt-cinq soldats des miens à cheual, lesquels ie prins avec quatre ou cinq de monsieur de Termes qu'il auoit laissé à Beme au grand regret du Comte, qui ne voulust ia-

Fauas. mais permettre que le capitaine Fauas ne le reste de la compagnie partissent : & arriuasmes enuiron deux heures de nuit à Cairas, parlasmes avec mon-

Cental. sieur de Cental, lequel nous trouuasmes bien fasché, d'autant que les Suisses l'auoient abandonné ce iour-là : & le nous dict, qu'il seroit grand cas, si ne trouuions le camp logé dans les granges de Sauillan, fors les Alemans, qui estoient où i'ay dict, & tenoient iusques à Marennas, par où il nous falloit passer. Car par autre lieu n'estoit que fossez & ruisseaux fort malaisez à passer, n'ayant avec nous aucune guide, pource que nous sçauions assez le chemin : & passasmes par le milieu du village de Marennas, sans trouuer aucun rencontre, pour ce que la cauallerie estoit demeurée encores vers Fossan ; & arriuasmes ainsi à Sauillan enuiron deux heures apres minuit : & trouuasmes à la porte de
la

la ville le capitaine la Chareze frere de Boguemar , lequel monsieur de Termes enuoyoit deuers monsieur de Botieres , pour l'aduertir qu'il attendoit à ce matin le siege. Nous enuoyasmes nos recommandations à monsieur de Botieres , & qu'il s'affeurast , que nous mourrions tous , où la place ne se perdrait point. Monsieur de Caillac & moy allasmes trouuer monsieur de Termes à son logis , & descendismes sans que ledict Seigneur entendit rien de nous , escriuant l'ordre qu'il falloit tenir , & auoit le dos deuers la porte qui estoit ouuerte , ne nous apperceuant iusques à ce que ie l'embrassay par derriere , & luy dis , Pensez - vous iouer ceste farce sans nous ? lequel se leua en sursaut , & me sauta au col , ne pouuant quasi dire mot de ioye : autant en fit à monsieur de Caillac , me disant qu'il luy voudroit auoir cousté la moitié de son bien , & que ma compagnie y fust. Je luy dis , que ie la ferois voler , mais que promptement on trouuaist vn homme , pour porter vne lettre au capitaine Fauas mon Lieutenant. Et sur ce y despeschames vn sien lacquay , qui arriua auant midy à Beme :

*Le frere
de Mont-
luc à Sa-
millan.*

*Capitai-
ne Fauas.*

& incontinent que ledict capitaine Fauas eust veu mes lettres, il alla dire au Comte qu'il luy falloit partir. Lequel luy fit encores grand'instance de demeurer, neantmoins il sortit environ trois heures apres midy : & laissa le drapeau de mon enseigne en passant à Cairas à monsieur de Cental, qui luy dit, Qu'il ne falloit point s'attendre de passer sans combattre : & qu'il luy respondit, Que c'estoit ce qu'il demandoit. Nous auions dit au lacquay, que quand il seroit au bout de la plaine, il le mena droict au moulin dudit Messer Philibert, qui estoit à vn jet d'arquebuzes de son Palais, & que là il se ietast au long du ruisseau, s'apprestant de combattre audit moulin, me doutant qu'il y trouueroit rencontre des Allemans : toutesfois que s'il pouuoit eviter le combat, qu'il le fist, s'attendant seulement à gagner la ville. Cest aduertissement fust bien à propos : car les Allemans estoient deslogés le matin, que nous passasmes, & s'estoient campez à Marennes. Et ainsi arriua environ deux heures apres minuit, qui redoubla la ioye, non seulement à monsieur de Termes, mais à tous les capitaines,

foldats , & aux gens de la ville. Car à la verité dire , i'auois vne des meilleures , & des plus fortes compagnies de Piedmont. Le n'en eus iamais d'autres. Si ie cognoissois quelque besogne , ie trouuois tousiours moyen de m'en deffaire.

Deux heures auant le iour , monsieur de Termes eust nouuelles comme monsieur de Sauoye , & le Marquis de Guast estoient arriuez à Cauilimor deux mil pres Sauillan , le soir mesmes : qui nous fit encores croire , que le camp venoit nous assieger , pource qu'ils s'estoient mis sur le chemin , par lequel on nous pouuoit donner secours. Et comme le iour se monstra , arriuerent des gens de Marennes nous aduertir , que toute l'infanterie prenoit le chemin du Mont-tiron , & descendoit en la plaine de saint Fré , prenant le chemin plustost vers Carignan , que de Sauillan : & de plus en plus nous en venoient nouuelles. Je priay monsieur de Termes me laisser aller vers Cauilimor sur la queuë de leur cauallerie , ce qu'il m'accorda , faisant monter à cheual le capitaine Mons son enseigne avec cinquante salades. Or pendant que i'estois allé

*Capitaine
de Mons.*

*Monsieur
de Tais.**Breuil.**Grande
disgrace
au sieur
de Mont-
luc.*

à Beme, monsieur de Tais, qui estoit
nostre Colonel, auoit enuoyé en dili-
gence à Sauillan les compagnies de
Boguedemar, & du Baron de Nico-
las. Et pource que là mienne estoit
lasse, ie ne prins que le capitaine Fa-
uas, & ceux qui estoient entrez avec
moy, s'estans desia rafraischis, &
quelques quarante des autres qu'es-
toient venus la nuit, le capitaine
Lienard Lieutenant pour lors de Ga-
barret, avec trente ou quarante de sa
compagnie, & le capitaine Breuil de
Bretaigne enseigne du Baron, qui est
encores vivant, ainsi qu'on m'a asseuré
n'agueres, lequel depuis fust blessé à
la iambe d'une arquebuzade, dont il
est boiteux, comme l'on m'a dict,
avec autant de gens de la compagnie
dudict Baron: & nous en allasmes
droict à Cauilimor le long d'un grand
ruisseau, qui va audict Cauilimor,
& à main gauche du grand chemin;
& estant à demy mil de là, arriua un
des gens du capitaine Gabarret, qui
venoit à moy de sa part, me priant
le vouloir attendre, qu'il montoit à
cheual pour venir. Et comme il estoit
long & tardif, il nous arresta de plus
d'un grand quart d'heure: tellement

que si i'eusse fuiuy mon chemin sans
 l'attendre , ie rencontrois monsieur
 de Sauoye à vne petite chapelle hors
 Cauilimor ; tirant à Sauillan , qui
 oyoit la Messe ; n'ayant que vingt-
 cinq cheuaux avec luy pour son es-
 corte : & le Marquis estoit party avec
 toute la cauallerie , prenant le chemin
 de Rouy , distant desia à plus d'un
 grand mil de là. Voyez comme vn
 peu de seiour quelquefois porte dom-
 mage. Peut estre eussions-nous eu là
 vne bonne fortune. Et comme ledict
 Gabarret fust arriué, ie m'acheminay,
 & fus incontinent à Cauilimor , où
 les gens de la ville me dirent , que
 ledict Seigneur n'estoit encores à de-
 my mil de là. Nous nous cuidasmes
 le capitaine Mons & moy desesperer,
 ensemble tous les soldats, ayans perdu
 vne si grande fortune pour la paresse
 dudit Gabarret , lequel nous char-
 geasmes de maledictions. Or apres
 auoir demeuré là vne grande piece ,
 sans sçauoir ce que nous deuions faire,
 nous nous mismes sur nostre retour :
 mais lors il me souuint de l'aduertisse-
 ment de Marennes , qui fust cause que
 nous prismes le chemin à trauers des
 prez tirant à ceste plaine. Cependant

nous oyons tousiours les tabourins du camp, & ceux de derriere en mesme temps : car il n'y a pas demy mil de Cauilimor à la veuë de la plaine : & comme nous fumes à la veuë descouurimes trois ou quatre ragachs, qui suiuoient le camp. Deux ou trois cheuaux legers les coururent prendre, qui nous dirent qu'apres eux venoient deux enseignes de gens de pied, & vne de gens à cheual, que monsieur de la Trinitat menoit. Lesdites deux compagnies de gens de pied estoient celles du Comite Petro d'Apport, Gouverneur de Fossan, qu'un sien Lieutenant nommé le capitaine Ascanio conduisoit : & les gens de cheual conduisoient lediët Seigneur de la Trinitat, & les munitions des farines avec vne grande partie du bagage du camp, là où il y en auoit vne grande quantité de celuy des Allemans, & des Espagnols, que cinquante soldats Allemans conduisoient, & autant d'Espagnols : tellement, qu'ils pouuoient estre plus de quatre cens cheuaux de bagage, & quatre-vingts dix charrettes chargées de viures, & de l'équipage de l'artillerie. Alors le Capitaine Mons s'en alla descouurir

*La Tri-
nitat.*

monſieur de la Trinitat , tellement
que ſon cheual luy fuſt bleſſé , &
tourna incontinent à moy , me diſant
ces paroles , Capitaine Montluc il y
en a là à donner & à prendre. Sou-
dain ie montay ſur vne petite cau-
alle d'un de mes ſoldats , & prins vn mien
ſergent , ayant vingt arquebuſiers ,
& les allay deſcouvrir , leſquels ne
 faiſoient conte de s'arreſter pour les
gens à cheual qu'ils auoient veu : ains
marchoient touſiours tabourin ſon-
nant. Et comme ie fus au pres d'eux ,
ie voyois vne multitude de gens &
cheuaux , qui marchoit par la plai-
ne , qui eſtoit le bagage & les char-
rettes : puis i'apperçeus ſur le haut du
coſté où i'eſtois , marcher deux en-
ſeignes & les gens à cheual , & non-
bray les gens de pied de trois à quatre
cens hommes , & pareillement les
gens à cheual de trente à trente cinq
ſalades. Et tout incontinent m'en re-
tournay au Capitaine Mons , & luy
dis , Qu'ayant failly vne grande for-
tune , il falloir qu'en tentiſſions vne
autre : lequel me fiſt reſponce , Qu'il
eſtoit preſt à faire ce que ie voudrois.
Et ie le priay qu'il m'attendit là : car
i'allois parler à mes ſoldats , & courus

*Rencontre
pres Ca-
uilmor.*

les trouuer. Le Capitaine Gabarret estoit avec ledict Capitaine Mons à cheual : & les Capitaines Fauas , Lienard , & le Breüil conduisoient les gens à pied , & moy arriué parlay à eux & à mes soldats , leur disant , Que comme Dieu nous auoit osté vne bonne fortune , il nous en auoit baillé vne autre en main : & ores que les ennemis fussent trois fois plus forts que nous , si nous ne combattions , puis qu'il s'en presentoit occasion nous n'estions dignes d'estre soldats , tant pour l'honneur , que pour la richesse , que nous auions deuant nos yeux : car le butin n'estoit pas petit. Tous les trois capitaines me responderent que de leur opinion on deuoit combattre. Alors ie haussis la voix parlant aux soldats , Et bien mes compagnons ne ferez-vous pas de l'opinion des capitaines , quant à moy ie vous ay desia donné la mienne , qu'il falloit combattre , & asseurez vous que nous vaincrons : car le presage que i'ay tousiours eu le m'assure , lequel ne m'a iamais menty en quelque chose que i'aye entrepris : croyez mes amis , qu'ils font desia à nous.

Or ay ie tousiours fait entendre

aux soldats , que i'auois certain pre-
 sage , que quand cela m'aduenoit ,
 i'estois seur de vaincre : ce que ie n'ay
 iamais faiët , si non pour y faire amu-
 zer les soldats , afin qu'ils tinssent desia
 la victoire toute gagnée , & m'en
 suis toûiours tres-bien trouué. Car
 mon assurance rendoit assurez sou-
 uent les plus timides. Les simples sol-
 dats sont aisez à pipper , & quelques-
 fois les plus habiles. Et lors d'une voix
 commencerent tous à crier , Comba-
 tons , capitaine , combatons. Je leur
 remonstroys comme ie voulois laisser
 à nostre queue quatre picquiers , pour
 garder qu'aucun ne reculast : & si
 aucun le faisoit , qu'ils le tuassent. A
 quoy ils s'accorderent volontiers :
 & me fust fort difficile de pouuoir
 faire demeurer derriere lesdicts pic-
 quiers suiuant nostre arrest , d'autant
 que tous estoient affectionnez de ve-
 nir les premiers au combat. Et nottez
 que le desordre vient tousiours plu-
 tost par la queue , que par la teste. Je
 commençay à marcher : & comme
 les ennemis descourirent les gens de
 pied , ils firent alte à l'endroit d'une
 grand' baïsse , que l'eau auoit faiët par
 succession de temps , laquelle alloit

Ruse des
 seur de
 Monsie.

les for-
 viers.
 p. 101
 par
 queue que
 par la
 teste.

finir au deffous du mont où nous estions. Ie les vis dans la plaine portans leurs lances droictes sans s'auancer, & vis aussi le capitaine Ascaigne sur vn petit cheual gris, qui faisoit mettre ses picquiers dans la baïsse tous de rang, puis alloit courant aux charrettes pour les ranger pres du bout de la baïsse, là où ils estoient, & de-là couroit au bagage, le faisant demeurer derriere, puis aux gens à cheual. Et cogneus bien à la diligence de ce capitaine que c'estoit vn braue homme, & me mit à deuiner ce qui aduiendroit de nostre combat, me mettant lors en doubte, pour le bon ordre de ce chef. Si est-ce, que la volonté ne me changea iamais : & pendant que le capitaine Ascaigne dresseoit son combat, ie dresseois le mien : & prins l'arquebuzerie, la baillant au capitaine Gabarret, qui estoit à cheual. Et nottez que la leur estoit sur le haut de la baïsse tirant à nous. Ie prins les trois capitaines avec les picquiers, & deffendis aux arquebuziers ne tirer iamais, qu'ils ne fussent de la longueur de quatre picques, & au capitaine Gabarret, qu'il fist tenir cest ordre. Ce qu'il fit. Ie dis aussi

Cap. ne
Ascaigne.

au capitaine Mons , qu'il me prestast
vingt cinq salades pour m'aider à
tuer : car d'un iour , encores qu'ils
eussent eu vn bras attaché , à peine
les eussions nous sçeu tuer : & le de-
meurant pourroit combattre leur ca-
nallerie , encores qu'ils fussent plus
forts que les nostres. A quoy il s'ac-
corda , & donna vingt-cinq salades
au ieune Tilladet (qui est à present
appellé monsieur de Saintôrens) &
au capitaine Ydrou , cheuaux legers
de ladicte compagnie : lesquels sont
encores en vie , & beaucoup d'autres,
qui estoient en ceste troupe. Toutes
nos troupes marcherent en vn coup
droit à eux : & comme ie pensois
que leur arquebuzerie se ietteroit dans
la baïsse , quand ils verroient appie-
cher la nostre , teste baïssée , ce fust au
contraire : car elle marcha droict à la
nostre , & tout à vn coup se tirerent
de plus pres , que de quatre picques.
I'auois dit aux nostres que des qu'ils
auroient tiré , missent la main aux
espées , sans s'amuser plus à recharger,
& leur courussent sus , ce qu'ils firent.
Ie courus avec nos picquiers par le
bout de la baïsse , & nous iettasmes
à coup perdu parmy eux. Ydrou &

*Le Sei-
gneur de
Saintô-
rens.*

Tilladet chargerent monsieur de la Trinitat, & le rompirent : nos arquebuziers & les leurs se ietterent dans la baïsse, toutesfois les nostres demeurèrent maistres : & nos picquiers auoient abandonné les picques, & estoient aux espées, & ainsi combattans courageusement arriuasmes tous aux charrettes : comme aussi fist le capitaine Mons : lesquelles furent renuersées & tous leurs gens en fuite vers deux maisons, qu'il y auoit bas en la plaine. Et poursuiuans tousiours nostre victoire, & les gens à cheual tuant parmy eux, bien peu en arriuerent aux maisons. On en sauua quelques vns, mais des autres fort peu : car ce qui restoit en vie estoit si blessé, que ie croy fermement qu'ils ne firent pas grand fruct. Nos gens d'armes portoient en ce temps là de grands coutelas tranchans pour couper les bras maillez, & destranger les moribons. Oncques de ma vie ie ne vis donner si grands coups. Quant à la cauallerie tout fust prins s'ensuyant droit à Fosfan, sauf monsieur de la Trinitat, luy cinquiesme, pour estre mieux monté que les autres. Le ieune Tilladet les suiuit luy troiesme iusques à deux

Elas
de gens
d'armes.

Deffaite
des Impe-
riaux.

arquebuzades de Fossan, & print vn, qui suiuoit l'vn des drappeaux : car l'enfeigne qui la portoit, l'auoit ietté sur le col de celuy qui emmenoit son cheual. Incontinent apres nous nous acheminasmes, conduisans les charrettes & bagages, & fallust retourner par le mesme chemin qu'ils estoient venus devers Marennnes, d'autant que lesdites charrettes ne pouuoient passer par autre lieu : & pour lors ie vis vn si grand desordre en nostre faiët, que si vingt salades des ennemis fussent tournez à nous, ils nous eussent deffaits : parce que les soldars à pied & à cheual estoient si chargez de bagage & de cheuaux, qu'ils auoient gaigné, qu'il ne fust possible au capitaine Mons de ralier vne seule salade apres de luy, ni moy deux arquebuziers : de sorte que laissasmes les morts sans estre recherchez & fouillez. Les vilains de Marennnes incontinent apres y vindrent, & les despoüillerent : lesquels depuis nous ont dit plusieurs fois y auoir gaigné plus de quatre mille escus : car il n'y auoit que trois ou quatre iours que ces deux compagnies auoient prins monstre pour trois mois. Souuent le butin est cause de la perte.

*Desordre
ordinaire
apres la
victoire*

*Avis
aux capi-
taines.*

Voilà pourquoi les capitaines y doi-
uent prendre garde , mesmement lors
qu'ils sçauent des garnisons voisines ,
qui peuuent venir à eux : il est mal-aisé
d'y pouruoir , car l'auarice du soldat
est telle qu'il creue souuent sous le
faiz , ne voulant prendre aucune rai-
son en payement.

Après ceste defaïcte , nous retour-
nasmes à Sauillan , où trouuasmes que
deux vilains auoient donné l'alarme
à monsieur de Termes : ayant porté
nouuelles , comme nous estions tous
deffaïcts. Nous le trouuasmes à demy
desesperé : mais après il eust vne des
plus grandes ioyes qu'il eust iamais.
Il eust lors bon marché de besongne :
car il se gaigna plus de quarante pu-
tains des Allemans , & plus de vingt
des Espagnols. Ceste vilenie fust en
partie cause de leur desordre. Nous
voulusmes faire mettre tout au butin,
& trouuasmes que n'estions que cent
quarante cinq hommes , & cinquante
cheuaux , me priant tous que chacun
se tint avec ce qu'il auoit gaigné , &
qu'ils me feroient vn present , parce
que ie ne m'estois amuzé à piller. Ce
que ie leur accorday , voyant tout le
monde contant : & me donnerent six

*Present
faict au
sieur de
Montluc.*

cens escus , comme firent aussi les gens à cheual au capitaine Mons : mais ie ne sçauois dire combien. Voilà ce que nous fismes ceste iournée à la queue de leur camp. Il ne mourut sur le lieu de nos gens qu'un soldat du capitaine Baron , & cinq ou six blesez & un mien coporal , lesquels guerirent. Il y a prou de gens de cheual , & de gens de pied en vie , qui se trouuerent au combat , lesquels lors qu'ils liront ce livre , ne me desmentiront. Ie ne sçauois dire , dont ie m'estonne , si monsieur de Caillac s'y trouua , ou si monsieur de Termes le retint avec luy : mais s'il ne s'y trouua , il estoit dans Sauillan , & luy en souuiendra bien. Or l'entreprinse qu'auoit le Marquis de Guast se monstra bien tost : car c'estoit pour s'aller ietter dans Carignan , & là faire un fort , & y laisser vne bonne troupe de gens de pied , comme il fit. Et le iour que ie fis ceste deffaite , il campa à un village pres Carmagnolle à main droicte du chemin de Reconi audict Carmagnolle. Il ne me souuient du nom : & à la minuit il enuoya la pluspart de sa cauallerie passer le pont à Lombriasse , où vne heure ou deux

*De
du M
quis.*

parauant y estoient passez deux che-
 uaux legers de monsieur de Termes ,
 qui s'estoient trouuez au combat , &
 s'estoient desrobez avec leur butin ,
 craignant que l'on leur fist mettre au
 blot : & aduertirent monsieur d'Aus-
 sun , & le Seigneur Francisco Bernar-
 din , qui estoient à Carignan , lesquels
 monsieur de Botieres y auoit enuoyez
 expressement pour la demanteler , luy
 souuenant que monsieur de Termes
 & ledit Seigneur Francisco luy auoient
 dict quatre mois parauant que le Mar-
 quis feroit cela , & s'en empareroit
 pour la fortifier , qui seroit chose fort
 preiudiciable au seruice du Roy. Je
 n'auois affaire d'escrire cecy , si n'es-
 toit pour monstrier aux ieunes capi-
 taines qui liront ce livre qu'ils n'at-
 tendent iamais à faire leur retraicte à
 la teste d'un camp , s'ils ne sont assez
 forts pour donner la bataille. Mais
 comme ces cheuaux legers eurent
 parlé à monsieur d'Aussun , & dit
 la deffaicte que nous auons faicte ,
 il luy print enuie , comme il auoit le
 cœur en bon lieu , de faire quelque
 chose auant se retirer. Ledit Seigneur
 Francisco ayant entendu par lesdicts
 deux cheuaux legers où estoit l'enne-
 my ,

si
 cap
 nes
 10
 Aruc-
 aux
 ti-

my, il iugea qu'au point du iour ils les auroient sur les bras, priant instamment monsieur d'Auffun de se retirer. Ce que ledict Seigneur ne voulut iamais faire: & ainsi qu'il fust iour, virent le Marquis de Guast, toute l'infanterie, & partie des gens à cheual, qui marchoient au long de la riuere. Ledit Marquis s'aduança, & fit parler à monsieur d'Auffun, l'amusant tousiours, le Seigneur Francisco luy crioit, Que le Marquis ne faisoit cela que pour les amuser: mais il n'en voulut iamais rien croire (on ne peut fuir son malheur) iusques à ce que deux cheuaux legers qu'il auoit enuoyé sur le chemin de Lombriast, luy firent le rapport de la verité: mais c'estoit trop tard: car la plus grande part de leur cauallerie estoit passée. Il n'y auoit que deux batteaux, mais ils estoient grands, & auoient commencé à passer vne heure apres minuiet. Alors monsieur d'Auffun dict au Seigneur Francisco Bernardin qu'il se retirast iusques aupres du pont des Loges, & que là il fit alte. Ce qu'il fit. De gens de pied, il n'auoit que le chevalier Absal avec sa compagnie seule, & luy dit, qu'il s'en allast le petit pas

*Route
en prise
du sieur
d'Aussun.*

apres le Seigneur Francisco, & qu'il
fist souuent alte, pour le secourir s'il
auoit besoin. Ce qu'il fit : & tout à vn
coup arriuerent cinquante ou soixante
cheuaux des ennemis attaquer l'escar-
mouche. Bien est vray qu'outre sa
compagnie & celle du Seigneur Fran-
cisco, il auoit trente salades de la
compagnie de monsieur de Termes,
que le vieux Tilladet commandoit,
& estoient partis d'auec monsieur de
Termes, il y auoit sept ou huit iours,
par le commandement de monsieur
de Botieres, & priere qu'il luy fit de
les y envoyer. Ce que ledit Seigneur
regrettoit bien, ne les ayant à l'heure
qu'il attendoit le siege. Ledit Seigneur
d'Aussun commença à faire sa retraite,
& mit ses gens en trois troupes. L'en-
nemy le suiuit tousiours de pres : son
Lieutenant qui s'appelloit Hieronym
Magrin menoit la premiere troupe :
& aucune fois les ennemis le menoi-
ent iusques à la troupe que conduisoit
monsieur d'Aussun : autresfois ledict
Hieronym rechargeoit les ennemis,
ausquels arriuoit tousiours force gens :
& comme ils se virent plus forts,
chargerent le capitaine Hieronym à
toute bride, & le ramenerent dans la

troupe de monsieur d'Auffun, lequel fit vne cargue : & ramena lesdits ennemis iusques dans leur grande troupe : laquelle chargea ledit Seigneur d'Auffun, & le ramena sur le bras dudit capitaine Tilladet. Vne autre troupe d'ennemis qui venoient encores au galop outre ceux là chargea ledit Tilladet qui estoit aduancé pour secourir monsieur d'Auffun : de sorte que l'ennemy estoit plus fort de gens de cheual quatre fois que les nostres. Et tousiours leur arriuoit rafraischissement en mesme heure qu'ils passioient la riuere : tellement que tout alla en desordre & en route, & fust porté par terre monsieur d'Auffun, son Lieutenant, & plus de cinquante prisonniers : le capitaine Tilladet prins deux fois, & recouuert de ses compagnons, lesquels serrez en troupe tournoient le visage iusques au pont des Loges. Le Seigneur Francisco Bernardin qui estoit en bataille aupres du pont, vid venir sur bras tout ce desordre, & voyant qu'il n'estoit suffisant avec sa troupe d'y remedier, print party, & passa le pont, & là fit teste, qui fust cause que beaucoup de nos gens se sauuerent encores, & qui tournoient visage

*Monsieur
d'Auffun
pris.*

sur la faueur au bout dudit pont. Or le chevalier Absal, qui auoit prins vn peu à main gauche, se retiroit le pas, & s'ouuent fit faire alte, qui fust occasion qu'il ne peut gaigner le pont. Car vne partie des ennemis voyant la victoire coururent à luy, qui auoit veu toute nostre caualerie deffaite & en route. Chacun peut iuger quel courage luy & ses gens pouuoient auoir, lesquels furent tous taillez en pieces, le drapeau prins, & il se sauua sur vn petit cheual.

Voilà la route qu'eust monsieur d'Auffun, plus pour vne superbe de vouloir faire quelque chose grande, que non pour faute de cœur ny de conduicte : car en premier lieu il rangea bien ses trois troupes, de sorte que toutes trois combattoient, & luy mesmes ayant esté prins tenant l'espée sanglante au poing, & ietté en terre. Car son cheual estoit mort : & s'il se fust voulu contenter de raison, il ne fust iamais entré en dispute avec le Seigneur Francisco Bernardin : car il y auoit faiët ce que bon capitaine deuoit faire tant de sa personne, que de sa conduicte. Le Roy apres la deliurance dudit Seigneur d'Auffun les

Seigneur
d'Auffun
rangea
Francisco Ber-
nardin en
dispute
sur ceste
rencontre.

appointa : parce que le Seigneur Francisco le fit appeller pour luy reparer le tort qu'il luy auoit fait, ayant dit au Marquis de Guast & ailleurs, qu'il l'auoit abandonné au besoin. Ledit Seigneur d'Auffun le rendit satisfait & contant : & l'un & l'autre auoient bien fait leur deuoir. Mais si ledit Seigneur d'Auffun eust prins le conseil dudit Seigneur Francisco, il n'eust pas esté deffait. Il n'estoit pas raisonnable qu'il se perdist aussi, ne pouuant reparer sa faute d'auoir tant temporisé à faire sa retraite à la teste d'une armée. Si ie voulois mettre en-
core d'autres exemples de ceux qui
veulent combattre à la teste d'un
camp se retirant, ie le pourrois faire :
tesmoing Monchaut, où monsieur le
Mareschal de Stroffe perdit la bataille,
non pas à faute de cœur, car il y fust
fort blessé : ny à faute de conduite,
car il auoit aussi bien rangé ses gens
pour sa retraicte droit à Lusignan,
qu'homme eust sceu faire : Le Sei-
gneur Marion de S. Flour, qui me
perdit presque toute ma cauallerie au-
pres de Piance, en voulant faire de
mesmes à la teste d'un camp. Plu-
sieurs sans consideration tombent en

*Danger
de faire
retraicte
de la teste
d'une ar-
mée*

ces fautes, comme i'ay cy - deuant
 escrit, & en pourrois escrire d'autres,
 qui seroient longues à raconter. Je
 vous prie, capitaines mes compa-
 gnons, ne mesprisez mon conseil,
 car puis que tant de vaillans & sages
 capitaines se sont trouuez mal de ces
 retraites, on n'en peut esperer rien de
 bon. Il faut vouloir ce qu'on peut &
 ce qu'on doit, & non pas à la teste
 d'une armée attaquer vostre ennemy,
 & entreprendre vostre retraite.

Le Marquis de Guast passa le pont
 à l'heure mesme avec tout son camp,
 & se mist dans Carignan, où il desi-
 gna vn fort, enfermant le bourg. Ce
 qu'il eust bien-tost fait: pource que
 les fossez qui enfermoient ledit bourg
 & la ville, luy aiderent beaucoup:
 y laissa deux mille Espagnols, & deux
 mille Allemans, & le Seigneur Pierre
 Colonne pour chef. A la verité il fit
 vne bonne eslection, & ne trompa
 personne de la bonne opinion que
 l'on auoit de luy. Car c'estoit vn hom-
 me qui auoit beaucoup d'entende-
 ment & de valleur: laissant à Car-
 magnolle Cesar de Naples avec quel-
 ques enseignes d'Italiens (du nombre
 desquels ne me souuient) & deux

*Le
 du
 gner
 Pierre
 Colo*

mil Allemans : à Reconis quatre enseignes d'Espagnols , c'est à sçauoir Loys Quichadou , Dom lean de Guibare , Mandosse & Agillere : la caualerie à Pingues , & à Vinus & Vigon : & puis s'en alla à Milan , apres auoir renuoyé le demeurant de son camp à Quiers , & monsieur de Sauoye à Verfeil.

Quelques temps apres monsieur de Termes mena vne entreprinse qui ne fut iamais descouuerte , qu'à monsieur de Botieres & à moy : non pas mesme à monsieur de Tais qui estoit Colonel. Il y auoit vn marchand de Barges , grand amy & seruiteur de monsieur de Termes , & bon François , nommé Granuchin , qui venant de Barges à Sauillan , fust prins des cheuaux legers de la compagnie du Comte Pedro d'Apport Gouverneur de Fossan , lequel tantost on menassoit de pendre , & tantost de le mettre à rançon , de sorte que le pauvre homme demeura huiet iours en desespoir de sa vie : à la fin il s'aduifa de faire dire au Comte , que s'il luy plaisoit qu'il parlast à luy , il luy diroit des choses qui seroient à son profit & honneur. Lequel Comte parla à luy ,

Belle en-
treprinse
conduite
par un
marchad.


& ledit Granuchin luy proposa qu'il ne tiendrait qu'à luy qu'il ne fust Seigneur de Barges, & qu'il estoit en sa puissance de luy mettre le chasteau entre les mains, car la ville n'estoit forte. Le Comte curieux d'entendre à ceste entreprinse, conclud & arresta que Granuchin bailleroit son fils & sa femme en ostage: & ledit Granuchin proposa la façon, disant: Qu'il estoit grand amy du capitaine du chasteau, & que les viures qu'on mettoit dedans passoient par ses mains: & qu'il auoit part à quelque trafic qu'ils faisoient ensemble, sçauoir est, ledit capitaine du chasteau nommé la Mothe & luy, aussi l'Escossois, qui gardoit les clefs du chasteau, estoit fort son amy, auquel faisoit tousiours gagner quelque chose: lequel s'asseuroit de le conuertir, non toutesfois ledit capitaine la Mothe, mais qu'il estoit malade d'une fiebvre quarte qui le tenoit quinze ou vingt heures, & ne bougeoit du lit, ains y demouroit presque tousiours, & comme il seroit hors de prison il s'en iroit plaindre à monsieur de Termes, de deux hommes, qui auoient le bruit d'estre Imperiaux, qui l'auoient vendu, & ad-
uertir

ngi
ei-

uerty les ennemis de son allée , & qu'après auoir laiffé fa femme & son fils pour ostage , il iroit demander raison à monsieur de Botieres , par le moyen de Monsieur de Termes , & puis il s'en iroit à Barges au chasteau , & qu'vn Dimanche matin il feroit sortir de quinze à vingts soldats , que la Mothe y auoit , ne reseruant sinon l'Escoffois , le sommelier , & le cuisinier , pour aller prendre ceux qui l'auoient vendu , ainsi qu'ils seroient à la premiere Messe le matin : & cependant ceste nuict-là le Comte feroit marcher quarante soldats , lesquels seroient embusquez deuant iour à vn petit taillis , qu'il y a loing vne arquebuzade de la fausse porte : & comme il seroit temps de venir , il dresseroit vn drapeau blanc au dessus de la fausse porte. Or il y auoit vn Prestre de Barges qui estoit banny , & se tenoit à Fossan , qui estoit amy de Granuchin , lequel faisoit tout ce qu'il pouuoit pour sa deliurance , qui fust apellé à leur deliberation : pour ce que ledit Prestre auoit parlé souuent au Comte en faueur dudit Granuchin. Et fust conclud que le Prestre se rendroit vne nuict qu'ils arresterent à moitié

194 *Comm. de M. B. de Montluc* ,
chemin de Fossan à Barges , en vn petit
bois : & pour le recognoistre , feroit
vn sifflet , & que s'il auoit conuert
l'Escossois , il le meneroit avecque luy ,
pour arrester ce qu'il falloit faire. Ainsi
Granuchin escriuit vne lettre à mon-
sieur de Termes , par laquelle il le
prioit demander le sauf-conduict à
monsieur de Botieres , pour faire ve-
nir sa femme & son fils à Fossan entrer
pleiges pour luy : car il auoit tant
faict , avecque l'aide de certains amis ,
qu'il auoit moyenné que le Comte le
laissoit aller , moyennant six cens
escus : & que si luy-mesme n'estoit
dehors & en liberté , ne trouueroit
homme , qui voulust achepter de son
bien pour faire l'argent , & que s'il
auoit le sauf-conduict , luy pleust le
bailler à vn sien amy qu'il nomma à
Sauillan , auquel il escriuoit , & prioit
faire les diligences de faire venir sa
femme & son fils audit Fossan. Et
cela fust arresté. Ledit Granuchin sor-
tit & vint audit Sauillan trouuer mon-
sieur de Termes , auquel il compta
toute l'entreprinse , & sa marchan-
dise. Incontinent monsieur de Termes,
qui commençoit desia à tomber ma-
lade d'une maladie , qui luy duroit

chasques fois quatorze ou quinze iours, m'enuoya querir & me communiqua le tout : & tous trois arrestames que ledict Granuchin yroit parler avec monsieur de Botieres, pour luy conter l'entreprinse. Monsieur de Termes luy bailla des lettres adressantes audict Seigneur de Botieres, lequel apres l'auoir entendu, n'en fist pas grand cas : mais seulement escriuit à monsieur de Termes, que s'il cognoissoit qu'on se deust fier audict Granuchin, qu'il en fist comme bon luy sembleroit. à laquelle responce monsieur de Termes eust opinion, que monsieur de Botieres seroit bien aisé qu'il receut quelque escorne, aussi ne s'aimoient ils gueres : de sorte qu'il vouloit rompre l'entreprinse : mais voyant ledit Granuchin desesperé, si elle ne se faisoit & moy encores plus de laisser eschapper vne telle prinse sur nos ennemis, ie priay monsieur de Termes la me laisser conduire. Lequel difficilement le me voulust accorder, craignant tousiours que s'il en aduenoit mal, monsieur de Botieres luy presteroit vne charité enuers le Roi comme c'est la coustume. Car quand on porte quelque dent de



laiet à quelqu'un, on est bien aise qu'il face tousiours quelque pas de clerc, afin que le maistre aye occasion de se courroucer & reculer celuy-là, le blasmant de n'auoir voulu croire les plus sages. Enfin par importunité il m'accorda ladiete entreprinse.

Ledit Granuchin partist pour s'en aller à Barges, & descouurir le tout au capitaine la Mothe, & à l'Escossois : ausquels monsieur de Termes en escriuit aussi, & la nuit venue partirent tous deux seuls (car ledit Granuchin scauoit bien le chemin & se rendirent au bois, là où ils trouuerent le Prestre, & arresterent, Que ledit Comte quitteroit la rançon audiet Granuchin : & qu'il luy bailleroit autant comme les soldats, qui l'auoient prins, luy auoient osté : Et en outre luy bailleroit sa demeure au chasteau près du capitaine, qu'il y mettoit, avec certaine pension d'argent pour s'entretenir : & feroit espouser à l'Escossois vne fille heritiere, qu'il y auoit à Barges : luy donneroit aussi certain entretenement, d'autant qu'il ne pourroit iamais plus retourner ni en Escosse ni en France. Cela fust tout arresté &

*Con-
duite de
l'entre-
prise à
Barges.*

*ne
et
enées
May-
land.*

conclu , & que le Prestre luy apporteroit toutes ces promesses signées , & sellées des seing & armes du Comte , à une cassine qui estoit au frere dudict Prestre , là où il venoit quelquefois la nuit , & que le Dimanche apres l'exécution se feroit. Granuchin vint à Sauillan , apres auoir receu les obligations , & nous monstroit tout. Or il n'y auoit plus iusques au Dimanche que trois iours , il s'en retourna incontinent , & arrestasmes qu'il meneroit deux guides les meilleures qu'il pourroit trouuer : non toutesfois qu'il leur descourrist rien , mais auecques des lettres feintes , où il ne se parloit que de quelque vin , qu'il m'auoit achepté. Les guides furent le samedi à midy à Sauillan. Je prins le capitaine Fauas mon Lieutenant , & dans ma chambre luy communiquay toute l'entreprinse , & comme ie voulois que ce fust luy qui l'executast. A quoy ne contredict , estant homme de bonne volonté , & fust accordé qu'il attacherait les guides par le corps , & qu'il n'entreiroit en chemin aucun , ny carrefour : mais à trauers la campagne. Il eust grande affaire à conuertir les guides , pource qu'il falloit passer trois ou

quatre ruisseaux, & qu'il y auoit de la neige & de la glace par tout. Nous demeurasmes plus de trois heures à disputer ce chemin : à la fin tous les deux guides s'en accorderent, à chacun desquels ie donnay dix escus, & les fis tres bien soupper. Nous advisames qu'il ne falloit mener gueres de gens pour ne faire grand bruit. Nous faisions lors vn rampart pres la porte de Fossan, ayant rompu vn peu de la muraille, & fait vn pont pour aller chercher la terre dehors. Par là ie iettay le capitaine Fauas dehors, luy trente-cinquiesme seulement. Et comme nous fusmes dehors attachasmes les guides pour crainte qu'ils ne se perdissent, & ainsi se mist en chemin. Or l'assignation des ennemis estoit en mesme heure, de sorte que Granuchin leur auoit baillé le chemin pour venir à ce taillis à main droicte, & aux nostres pour venir passer aupres des murailles de la ville à main gauche : & comme ils furent à la fausse porte, Granuchin & l'Escossois s'y trouuerent, qu'estoit l'heure à laquelle l'Escossois auoit accoustumé faire sa sentinelle sur la faute porte, & ne furent iamais descouuerts. Estans arri-

tiez ils les mirent dans vne caue du chasteau , où l'on leur auoit appresté du feu de charbon , du pain & du vin. Cependant le iour arriua , & comme la cloche sonnoit pour dire la Messe bas à la ville , l'Escossois & Granuchin commanderent à tous les soldats qui estoient dans le chasteau , d'aller prendre à la Messe ces deux , que Granuchin chargeoit l'auoir trahy , & n'y demeura que la Mothe , son valet de chambre , qui seruoit de soldat , celuy qui faisoit la despence , le cuisinier , l'Escossois , & Granuchin. L'Escossois leua le pont ; & lors ils firent sortir le capitaine Fauas , le faisant mettre derriere des fassines , qu'il y auoit au fons de la basse-court , les genoux à terre : & apres allerent incontinent mettre le drapeau sur la fausse porte. Et bien-tost apres le Prestre arriua , & enuiron quarante soldats avecques luy : & comme ils furent dedans , l'Escossois ferma la fausse porte , & à l'instant le capitaine Fauas & sa troupe leur coururent sus , lesquels firent quelque peu de deffence : de sorte qu'il en mourust , sept ou huiet : Granuchin sauua le Prestre , & ne voulust endurer qu'il receust aucun des-

plaisir. Or il y auoit vn payſan qui venoit d'une maiſonnette au deſſus du chasteau, lequel apperceuſt entrer par la fauſſe porte ces ſoldats Eſpagnols portant la croix rouge, & couruſt bas à la ville donner l'alarme, & dire que le chasteau eſtoit trahy. Lors les ſoldats qui auoient eſté tirez dehors pour aller prendre les deux hommes à la Meſſe, voulurent retourner au chasteau, mais les noſtres leurs tirerent arquebuzades : toutesſois bien haut pour ne les toucher, faignant eſtre ennemis, crians touſiours Imperi, Imperi & Sauoye : qui fuſt cauſe que leſdits ſoldats s'enfuirent à Pignerol, & porterent nouuelles à monſieur de Botieres, que Granuchin auoit trahy le chasteau, & que l'ennemy eſtoit dedans. Monſieur de Botieres depeſcha bien en collere vn courrier à monſieur de Termes pour l'aduertir de ces nouuelles. Et outre trois ou quatre marchands de Barges, qui tenoient le party du Roy, s'en vindrent fuyans à Sauillan, de ſorte que nous tinſmes entierement que la trahiſon double eſtoit tournée contre nous, comme il aduiant bien ſouuent. Je n'oſois aller voir monſieur de Termes, qui eſtoit

Monſieur
de Botieres
caché.

au liēt malade quasi desespéré , & disoit ces mots souuent , Ha ha monsieur de Montluc , vous m'avez ruiné , pleust à Dieu ne vous auoir iamais creu : & ainsi demeurastes iusques au Mercredy. Cependant ils mirent les soldats qui estoient entrez dans la caue , prenant mes soldats les croix rouges , & mirent vn drapeau blanc aussi avec la croix rouge sur vne tour , ne criant autre chose dans le chasteau , que Imperi , Imperi.

Or incontinent Granuchin fit signer vne lettre au Prestre , par laquelle il mandoit au Comte qu'il s'en vint prendre possession de la ville & du chasteau , que Granuchin lui auoit tenu ce qu'il luy auoit promis : & manda venir vn paysan de son frere , auquel il fit bailler la lettre par le Prestre mesme , luy disant , Que s'il faisoit aucun signe en luy baillant la lettre ou autrement , qu'il le tueroit : Et aussi fit dire par ledit Prestre audit laboureur quelques autres paroles de bouche. Le paysan s'en va sur vne iument courant à Fossan , là où il n'y a que douze mil. Et tout incontinent le Comte se resolut d'y enuoyer ceste nuit vn sien coporal nommé Ianin ,

charge de luy mander le tout , & qu'il s'estoit mis à dormir. Le Comte apres auoir veu ceste lettre , se resolut de partir , non pas le lendemain , qui estoit le mardy , mais le mercredy apres. Quand Dieu nous veut punir , il nous oste l'entendement , comme il aduint au faict de ce gentil-homme. En premier lieu le Comte estoit reputé pour vn des acors hommes , & autant sage & vaillant qu'il y eust en tout leur camp ; & neantmoins il se laissa auugler à deux lettres de ce Prestre , & mesmement par la derniere , de laquelle il ne deuoit rien croire , qu'il ne vist lettre de son coporal. Et deuoit regarder si l'excuse estoit suffisante de dire que sondit coporal s'estoit mis à dormir. Mais nous sommes auuglez quand nous souhaitons quelque chose. Croyez , Messieurs qui faiëtes des entreprinſes , que vous deuez songer tout , peser tout iusques à la moindre petite particularité : car si vous estes fin , vostre ennemy le peut estre autant que vous. A fin , dit-on , fin & demy. Ce qui le trompa encores le plus , fut , que le mardy ceux de la ville , qui pensoient estre deuenus Imperiaux , laissant encores quelque dou-

Erreur
du gou-
verneur
de Fos-
san.

puis
pour
chef.

te , pour les cris qu'ils auoient ouys au combat , enuoyerent cinq ou six femmes au chasteau vendre des gasteaux , pommes , & chastaignes , pour voir si elles pourroient descouurir qu'il y eust de la trahison : car tous ceux qui estoient demeurez dans la ville auoient desia pris la croix rouge. Et comme nos gens les virent venir contre-mont , ils se doubterent bien que c'estoit pour quelque occasion. Ce qui leur fis resoudre de faire bonne mine , & allerent abbatre le petit pont leuis : & les firent entrer dedans. Lors mes soldats se mirent à promener en la basse court avec leurs croix rouges , fauf trois ou quatre , qui parloient bon Espagnol , lesquels parlerent ausdites femmes , & leurs achepterent ce qu'elles portoient , feignant estre Espagnols. Et apres elles s'en retournerent à la ville assurant les habitans qu'il n'y auoit point de finesse : & apporterent vne lettre aussi , que la Mothe , escriuoit à vn sien amy à la ville , par laquelle il le prioit d'aller vers monsieur de Botieres , pour luy dire , qu'il n'auoit iamais esté consent à la trahison de Granuchin , & la baillerent à vne de ces femmes , sçachant

*se de
un
n.*

bien que celuy à qui il escriuoit ne s'y trouueroit pas, & qu'il seroit des premiers, qui s'en seroit fuy, à cause qu'il estoit bon François. Mais ils vouloient que la lettre tombast entre les mains de ceux, qui tenoient le parti Imperial, comme il aduint.

Ainsi que le Comte arriua le Mercredy matin, nos gens du chasteau le descourirent au long de la plaine. Les gens de la ville luy allerent au deuant à la porte, où estant il leur demanda si la chose estoit certaine, que ledict chasteau estoit entre ses mains. Auquel ils respondirent, qu'ils le tenoient pour vray : mais que à la premiere fois que les gens y entrerent, on y tira force arquebuzades dedans, & s'y fit vn grand bruit : & le lundy matin quand les autres y entrerent, ils ouyrent de mesmes vn grand bruit, lequel dura plus longuement que le premier, & qu'il leur sembloit entendre vne fois crier, France, & vne autre fois Imperi & Duco : toutefois que hyer ils auoient enuoyé de leurs femmes audit chasteau avec des fruiçts, fouasses, & chastaignes, lesquelles ils auoient laissez entrer, & virent que tous les soldats portoient la

croix rouge. Surquoy le Comte dist à son Lieutenant , qu'il descendist , & qu'il fist repaistre sa compagnie : & dist à ceux de la ville qu'ils luy aprestassent promptement quelque chose à manger : car dès qu'il auroit mis ordre au chasteau , il viendrait dîner , & prendre leur serment de fidelité , & ce fait , s'en retourneroit à Fossan. Or il y a vne montée fort mal-aisée de la ville au chasteau , qui fust cause , que le Comte descendit à pied , acompagné d'un sien neveu , d'un autre gentil-homme & son trompette. Et comme il fust à l'entrée du pont , qui estoit baissé & la porte fermée , toutesfois le guischet estoit ouuert , de sorte qu'un homme y pouvoit passer , & un cheual le tirant par la bride. Granuchin , & le Prestre estans à la fenestre , l'ayant salué , luy dirent qu'il entrast. Auxquels il respondist tousiours , qu'il n'en feroit rien , qu'il n'eust parlé au coporal Ianin. Comme ils virent qu'il ne vouloit entrer , Granuchin dist au Prestre , pour le faire oster de là , qu'il allast dire au coporal Ianin que monsieur estoit à la porte : & luy mesmes s'osta de la fenestre , feignant d'aller en bas : alors le capitaine Fauas & les

*Le Comte
va au
chasteau.*

soldats coururent ouvrir la porte , qui n'estoit point fermée à clef , & tout à vn coup sauterent sur le pont. Le Comte , qui estoit vn des plus dispos hommes de l'Italie , qui tenoit son cheual par la bride , estant vn des bons cheuaux dudit pays , lequel ie baillay depuis à Monsieur de Tais , bondit par dessus vne petite muraille qui estoit pres du pont , & tirant le cheual apres luy , sur lequel il vouloit sauter. Car il n'y auoit cheual si grand , pourueu qu'il peust prendre l'arson , qu'il ne se mist en selle armé de toutes pieces. Il fust poursuiuy du Bastard de Bazardan nommé lanot , qui est encore en vie , estant pour lors de ma compagnie : lequel par malheur ne voulust , ou ne peust passer la petite muraille , pour luy sauter au colet , mais luy tira vnē arquebuzade , laquelle luy donna au defect de la cuirasse , & luy entra dans le ventre , perçant à trauers les boyaux iusques presque de l'autre costé , dequoy il tomba par terre. Le capitaine Fauas print son neveu , vn autre print le trompette , l'autre se fauva contre bas , criant , Que le Comte estoit prins ou mort. Le Lieutenant & toute sa compagnie tournent remonter

*Le Comte
Pedro
gouver-
neur de
Fossan
blessé.*

remonter à cheual d'un si grand effroy , qu'ils ne cessèrent le galop iusques à Fossan. Que si Ianin à la seconde entrée n'y eust esté tué , on eust non seulement attrapé le Comte , mais peu à peu toute sa troupe : car on l'eust forcé de parler à eux , luy tenant la dague aux reins , s'il eust fait nul signe , Et peut estre eussions nous eu moyen d'enfiler quelque entreprinse sur Fossan : car vne en amene vne autre. Ce faict sur la nuict , on me depescha le capitaine Milhas de ma compagnie , pour me porter les nouvelles , & me faire le discours , comme tout estoit passé , avec vne lettre du Comte , par laquelle il me prioit , que puisqu'il estoit mon prisonnier & de mes gens , pouuant plus gagner à sa vie , que à sa mort , ie luy fisse ceste courtoisie de luy enuoyer à toute diligence vn medecin , vn chirurgien , & vn apoticaire. Le capitaine Milhas me vint trouuer , estant entré lors qu'on ouuroit la porte de la ville , & me trouua , que ie m'habillois. Lequel me conta le tout ayant demeuré depuis le Dimanche , iusques au Mercredi en grand peine & ennuy. Car ores que ie regretasse la place , ie re-

grettois encores plus mon Lieutenant & mes soldats, la pluspart desquels estoient gentil-hommes. Or incontinent ie m'en courus au logis de monsieur de Termes, que ie trouuay dedans le liect malade. I'auzerois dire que luy, ny moy n'eusmes iamais vne plus grand'ioye : car nous sçauions bien qu'on nous eust accommodez de toutes façons. Et soudain ie fis partir vn medecin, vn chirurgien & vn apothicaire, ausquels ie baillay trois cheuaux des miens, qui ne cesserent d'aller, iusques à ce qu'ils furent là : mais il n'y eust ordre de le sauuer : car il mourut à la mi-nuiet, & fut porté à Sauillan, lequel tout le monde desiroit veoir, comme faisoit aussi monsieur de Termes tout malade. Il fust regretté beaucoup. Le lendemain i'en-uoyai le corps à Fossan, & retins le nepueu, & le trompette, & les autres qui estoient prisonniers à Barges, iusques à ce qu'ils m'eussent renuoyé la femme & le fils dudit Granuchin. Ce qu'ils firent le lendemain & moy de mesmes leur deliuray tous les prisonniers.

*Mort du
Comte.*

*Instru.
Non aux
capitai-
nes.*

le vous prie capitaines, qui lirez & verrez cecy, considerez si c'est entre-

prinse d'un marchand. Vn vieux capitaine seroit bien empesché de la conduire avec tant de ruzes & finesse que cestuy cy fist. Et encores que le capitaine Fauas en fust l'executeur, neantmoins ce marchand fust non seulement l'origine de tout, mais aussi l'executeur : ayant eu le cœur pour se vanger, de mettre en hazard & sa femme & son fils. En lisant cecy mes compagnons, vous pouuez apprendre la diligence avecques si grandes froidures, les ruzes & finesse qui furent iouées dans le chasteau par l'espace de quatre iours, telles qu'homme ne les sceut decouvrir ny des nostres, ni des leurs, nous tenant tous en doute. Le Comte s'y porta pour vn sage cheualier bien legerement lors de la seconde lettre : mais il repara sa faute lors qu'il ne voulust entrer sans veoir son homme. Tout cela ne luy seruit de rien, comme vous avez veu. Lors que vous dresserez ces entreprinse, pesez tout, n'allez iamais à l'estourdy : & sans vous precipiter ny croire de leger, iugez s'il y a de l'apparence. l'en ay veu plus de trompez, qu'autrement. Et quelque assurance, & quelque promesse qu'on vous donne, faites vne

Considerations pour un chef de guerre

contrebaterie. Et ne vous fiez pas tant à celuy qui conduit la marchandise, que vous n'ayez quelque corde en main pour sauuer vostre fait de l'autre costé. C'est mal fait blasmer celuy qui conduict vne entreprinse, si elle ne reussit : car il faut tousiours tanter si elle ne porte, pourueu qu'il n'y ait de la faute ou sottises, c'est tout vn. Il faut essayer & faillir : car se fiant aux hommes on ne peut lire dans leur cœur. Mais allez y sagement. I'ay tousiours eu ceste opinion, & croy qu'un bon capitaine la doit auoir, qu'il vaut mieux aller attaquer vne place pour la surprendre, lors que personne ne vous tient la main, que si quelque traistre la conduit. Car pour le moins estes vous assuré, qu'il n'y a point de contre trahison : & vous retirez, si vous faillez, avec moins de danger : car vostre ennemy ne vous peut dresser des embusches.

*Cesar de
Naples
enueye au
secours de
Fossan.*

Cesar de Naples estant ce iour à Carmagnolle fut aduertuy de la mort du Comte, dequoy il fust bien fasché : & pour assurer Fossan y voulut enuoyer trois compagnies Italiennes ; lesquelles d'autres fois y auoient esté en garnison. C'est à sçauoir, Blaise de

Somme Neapolitain , & Baptiste Mil-
lanois , & Rouffanne Piedmontois ,
lesquels ne voulurent partir prompte-
ment (craignant que nous les combat-
tissions) & qu'ils n'eussent vne bonne
& forte escorte. Les Allemans , qu'il
auoit avecques luy , n'y voulurent
aller. Qui fust cause, qu'il manda à
Reconis , aux quatre compagnies Es-
pagnoles , qui y estoient en garnison :
C'est à sçauoir , Dom lean de Gueuare
maistre de camp , Louys Quichadou ,
Aquilbert , & Mandosse : surquoy ils
furent deux iours , sans oser se mettre
en chemin. Cependant monsieur de
Termes fust aduertie par son espion ,
que lesdictes compagnies Italiennes
partoient le matin pour s'aller ietter
dans Fossan , & que deux compagnies
de caualerie leur tenoit escorte. Or
n'auoit-il rien entendu que les Espa-
gnols y deussent aller. Ledit seigneur
ne faisoit que commencer à releuer de
sa maladie , lequel me communiqua
l'affaire le matin mesmes , & à la
mesme heure que l'espion estoit arri-
ué, conclumes que nous prendrions
quatre cens hommes de pied de toutes
nos compagnies , choisis & esleus :
sçauoir , deux cens arquebuziers , &

*Entre-
prise
pour dé-
faire le
secours de
Fossan.*

deux cens picquiers portant corselets. Le capitaine Tilladet (qui n'auoit perdu de ses salades que deux ou trois) n'estoit encore reuenu à Sauillan , qui estoit cause que la compagnie de monsieur de Termes n'estoit pas si forte. Et d'autre part monsieur de Bellegarde , qui estoit son Lieutenant , estoit à sa maison , & en auoit quelques-vns avecques luy. Et à ceste occasion le capitaine Mons ne peust amener que quatrevingts salades : & nous rapporta l'espion que les compagnies Italiennes deuoient prendre le chemin mesmes que leur camp auoit tenu venant à Carignan, qui estoit par la plaine , où nous auions combatu les Italiens. Nous concludmes que nous prendrions le chemin de Marennnes , & que nous leur serions au deuant. Et ainsi que nous voulions sortir de la ville , arriua monsieur de Cental , qui venoit de Cental , ayant avec luy quinze salades du seigneur Mauré , & vingt arquebuziers à cheval. Ce qui nous destourna vn peu , pource qu'il pria monsieur de Termes luy donner vn peu de temps pour faire repaistre ses cheuaux : car ainsi falloit il qu'il passa par le mesme chemin , que nous

voulions pour s'en aller à Cairas qui estoit son gouuernement. Auquel nous dismes , que nous n'irions que le petit pas , & que l'attendrions à Marennès , mais qu'il se hatast : car si nous entendions que les ennemis fussent prests de passer , ne le pourrions attendre. Monsieur de Termes vne fois auoit enuie d'y venir : mais nous capitaines le priaimes de ne venir point , pource qu'il ne faisoit que sortir de maladie , & qu'aussi la ville demeueroit seule , & s'il aduenoit quelque inconuenient sur nous , seroit pour se perdre.

Estans arriuez audit Marennès nous fismes alte , attendans monsieur de Cental , ou nous ordonnasmes nostre combat en telle sorte : sçauoir est , que les capitaines Gabarret & Baron meneroient les deux cens corselets & moy les deux cens arquebuziers. Et tout incontinent me mis deuant auecques mesdits arquebuziers , venant les corselets apres moy , & sortismes hors du village. Le capitaine Mons fit deux troupes de ses gens de cheual. Je ne sçay à qui il bailla la premiere , pource que tous estoient compagnons : mais ie pense bien que ce fust au Massès , ou Mousserie , ou à Idron ,

*Ordre
pour le
combat.*

ou au ieune Tilladet. & comme nous
fusmes vn peu marché en auant,
plustost que de nous monstrier à la
vallée, par où les ennemis deuoient
passer, fismes alte. Ie prins vn gentil-
homme nommé la Garde avecques
moy estant à cheual, & me mis vn
peu deuant pour descouurer la vallée.
Tout incontinent ie descouure de
l'autre costé, sur la plaine du Babe
(qui est vn chasteau appartenant au
Chastelier de Sauoye) les trois compa-
gnies Italiennes, & la cauallerie qui
marchoient droict à Fossan. Surquoy
ie me cuiday desesperer, en maudif-
sant monsieur de Cental, & l'heure
que iamais il estoit venu, cuidant
qu'il n'y eust d'autres gens que ceux
que ie voyois de l'autre costé, les-
quels desia estoient fort auant. Et
comme ie m'en voulois retourner pour
dire à la troupe qu'ils estoient passez,
ie regarday bas (car pardeuant ie ne
regardois qu'à la plaine de l'autre
costé) & decouris les Espagnols, &
les monstray à la Garde (qui ne les
auoit apperceus, non plus que moy)
portant presque tous chausses iaunes,
& voyons contre le Soleil reluire les
armes: & cognus qu'il y auoit des
corselets.

corselets. Nous ne pensions rencontrer rien que ces trois compagnies Italiennes, & sans l'attente de monsieur de Cental, eussions rencontré les Espagnols & Italiens ensemble, lesquels à nostre aduis nous eussent deffaits, veu la deffence que firent les Espagnols seuls. I'auertis incontinent les capitaines du tout, & qu'il ne falloit point qu'ils se montraissent encores, car les Espagnols ne bougeoient & faisoient alte. Je commençois aussi à perdre la veüe des Italiens, qui marcheoient droict à Fossan. C'estoit vne grande faute à eux de s'esloigner tant les vns des autres. La Garde retourne à moy, & me dist, que monsieur de Cental commençoit à arriuer, venant avec ledict la Garde vn soldat à cheual, lequel ie fis demeurer sur le haut, tenant tousiours sa veüe vers les Italiens, & descendis bas avecques la Garde pour nombrer ces gens, lesquels me tirerent quelques arquebuzades : mais nonobstant ce, ie m'approchay de si pres, que ie les peus nombrer, & les comptay de quatre à cinq cens hommes au plus : & incontinent retournay sur le haut, & vis que leur cavallerie retournoit à eux, ayant laissé

Bonne fortune du sieur de Mont-luc.

Reconnaissance des ennemis.

les Italiens , qui desia estoient fort auant, & hors de nostre veuë. Ie depeſchay ceſoldat deuers mes compagnons, pour qu'ils commençaſſent promptement à marcher , car les Eſpagnols commençoient à ſonner le tabourin pour s'en retourner. Leurs compagnies de gens de cheual estoient celles du Comte de S. Martin d'Eſt , parent du Duc de Ferrare , lequel n'y estoit point , mais bien ſon Lieutenant , & Rozalles Eſpagnol. Celles des Eſpagnols à pied , estoient Dom Ioan de Guybarre , Aguillere , & Mandoffe , & la moitié de celle de Louys Guichadou , lequel s'estoient mis avec l'autre moitié dans le chasteau de Reconis. Or monsieur de Cental , & le capitaine Mons vindrent à moy ſeuls , & virent comme moy , que leſdicts Eſpagnols ſe mettoient en file , laquelle nous iugions de vnze ou bien de treize par file. Cependant la cauallerie leur arriua.

Or nous auoient-ils desia deſcouuerts encores qu'ils n'en euſſent veu que cinq que nous eſtions , & i'auois eſté recogneu quand ie deſcendis bas par le ſergent de Mandoffe , qui auoit eſté prins à la deſſaite des Italiens , &

rendu trois iours apres. Ils mirent
 toute leur cauallerie deuant , & vingt
 ou vingt-cinq arquebuziers seulement
 à la teste d'icelle , vne grande troupe
 à la teste de leurs picquiers , & le de-
 meurant à la queuë , & ainsi commen-
 cerent à marcher tabourin battant. Je
 prins mes deux cens arquebuziers , &
 les mis en trois troupes , l'une menoit
 le capitaine Lienard, & l'autre le Pallu,
 Lieutenant à monsieur de Carces , qui
 auoit ses deux compagnies à Sauillan : *Rencon-
 tre des François
 & des Impe-
 riaux.*
 & moy ie prins l'autre , & me mis à
 leur queuë , les corselets venoient
 apres , & de prime ariuée me fut tué
 la Garde. Ils cheminoient tousiours
 au grand pas , sans iamais faire sem-
 blant de se rompre , tirant en grande
 furie sur nous , & nous sur eux : telle-
 ment que ie fus contrainct de faire
 ioindre ledict capitaine Lienard à
 moy , pour ce que de leur teste estoit
 party vne troupe d'arquebuziers
 pour refoncer le derriere. Et fis venir
 pareillement le Pallu : & ainsi mar-
 cherent tousiours , iusques à ce qu'ils
 furent à la veuë du chasteau de saint
 Fré , qui fust trois mil ou plus , tou-
 iours combattant à arquebuzades. Je
 les auois vne fois presque mis en routte

passant vn fossé pres d'une maison , où il y auoit vne basse-court : & les tins de si pres , que nous mîmes la main aux espées , & s'en ietta vingt ou vingt-cinq dedans la basse-court : & estans poursuyvis d'une partie de nos soldats furent taillez en pieces : & cependant ils acheuerent de passer le fossé. Nostre cauallerie les cuida charger , ce qu'elle ne fist : car ce qui les en garda , c'estoit les arquebuzades , lesquelles leur auoient tué beaucoup de cheuaux. Et quant aux capitaines , Gabarret & Baron firent vn erreur : parce que , comme ils nous virent à ce fossé pesle mesle , ils mirent pied à terre , prenans leurs picques , mais ils n'y purent arriuer. Que si les corselets eussent peu cheminer , comme nos arquebuziers , ie les eusse deffaits-là , mais il n'estoit possible pour la pesanteur de leurs armes , & ainsi s'acheminèrent gaignant pays. Et comme ils furent pres d'un petit pont de brique , ie laissay nos arquebuziers combattant tousiours , & courus à nostre cauallerie , qui estoit en trois troupes. Monsieur de Cental menant la sienne , qui se tenoit tousiours à la large des arquebuzades , marchoit un peu deuant,

où vn peu à costé. Auquel dis ces paroles : Ha monsieur de Cental ne voulez-vous point charger ? Ne voyez-vous pas que les ennemis se sauuent, s'ils sont delà le pont : & incontinent gagneront le bois de saint Fré : & s'ils se sauuent nous ne sommes dignes de porter iamais armes. Et quant à moy ie les quitte des maintenant. Lequel me dist, enragé de colere, Qu'il ne tenoit point à luy : mais que i'allasse parler au capitaine Mons. Ce que ie fis, & luy commençay à dire ces mots : Ha mon compagnon, faut-il que nous receuions ce iourd'huy vne si grande honte, perdant si belle occasion, pour ce que vous autres gens à cheual ne voulez charger ? lequel me respondit, Que voulez-vous que nous fassions, vos corselets ne peuuent arriuer au combat, voulez-vous que nous les combattions tous seuls ? Surquoy ie luy respondis en iurant de colere, Que ie n'auois que faire des corselets, souhaitant de bon cœur, qu'ils fussent à Sauillan, puis qu'ils ne pouuoient se ioindre au combat. Il me dict, Allez parler à la premiere troupe : & cependant ie m'aduanceray. l'y courus, & commen-

*Propos
du sieur
de Mont-
luc au
sieur de
Cental*

çay à remonſtrer aux gentilshommes de monsieur de Termes , qu'il n'y auoit que neuf ou dix iours que nous auions combatu les Italiens : & à cest heure que nous deuions combattre les Espagnols pour acquerir plus grand honneur , faut-il qu'ils nous eſchappent ? Lesquels me respondirent tous d'une voix. Il ne tient point à nous , il ne tient point à nous , Or ie leur dis , s'ils me vouloient promettre de charger dès qu'ils verroient que j'aurois faict mettre les espées aux mains aux arquebuziers pour leur courir sus. Ce qu'ils m'accorderent à peine de leurs vies. Alors j'aurois vn mien nepueu nommé Serillac , qui depuis fust Lieutenant de Monsieur de Cypierre a Parme , & prins prisonnier avecques luy , & depuis tué à Montepulſianne , & à la verité en ces trente ſalades , il y auoit des meilleurs hommes , que monsieur de Termes eust en toute ſa compagnie. Ie dis audict Serillac , Serillac tu es mon nepueu , mais ſi tu ne donne le premier , ie te defauouë , & dis que tu ne m'eſt point parent. Alors il me diſt promptement ces mots : Si , ie donneray mon oncle , vous le

Serillac.

verrez tout à cest heure : & de faict
 baissa la veuë pour donner , ensemble
 tous se compaignons. Le leur criay
 qu'ils attendissent , que ie fusse à mes
 gens : alors ie courus aux arquebu-
 ziers , & à mon arriuée leur dis , qu'il
 n'estoit plus question de tirer arque-
 buzades : car il falloit venir aux mains.
 Capitaines , mes compaignons , quand
 vous vous trouuerez à telles nopces
 pressez vos gens , parlez à l'vn & à
 l'autre , remuez vous : croyez que
 vous les rendrez vaillans tout outre ,
 quand ils ne le feroient qu'à demy.
 Tout à vn coup ils mirent la main
 aux espées. Et comme le capitaine
 Mons , qui estoit vn peu en auant , &
 monsieur de Cental , qui estoit à costé
 virent baisser la visiere à la premiere
 troupe , & me virent courir aux ar-
 quebuziers , & en mesme instant les
 espées aux mains des soldats , ils co-
 gnurent bien que i'auois trouué gens
 de bonne volonté , & commencerent
 à s'approcher. De ma part ie mis pied
 à terre prenant vne halebarde à la
 main (c'estoit mon arme ordinaire au
 combat) & courusmes tous à corps
 perdu nous ietter sur les ennemis. Se-
 rillac tint sa promesse : car il donna

*Instruc-
 tion aux
 capitai-
 nes.*

deuant , comme tous confesserent , son cheual fut tué à la teste des arquebuziers , & des gens à cheual de sept arquebuzades. Tilladet , Lauit , Idron , Monfelier , les Maurens , & les Masses , tous gentils - hommes Gascons , qui estoient en ceste troupe , compagnons dudit Serillac , chargerent du cul & de teste dans les gens à cheual , lesquels ils renuerferent tous sur la teste des gens de pied. Monsieur de Cental donna aussi par le flanc à trauers des gens à cheual & des gens de pied. Le capitaine Mons donna pareillement par l'autre costé : de sorte qu'ils furent renuersez tous , tant ceux de pied que de cheual. Lors nous commençâmes à mener les mains , y demeurant morts sur la place plus de quatre vingts ou cent hommes. Rozalles capitaine d'une des deux compagnies de cheuaux legers se sauua luy cinquiesme , comme fit Dom Ioan de Guibarre maistre de camp , sur vn Turc , avec son page seulement , qui se trouua à cheual , pour ce qu'il auoit eu vne arquebuzade à trauers d'une main , dont il est demeuré estropiat , & cuide qu'il est encore viuant.

*Deffaite
des Im-
peraux.*

Voilà la verité de ce combat , comme il fust fait , y ayant pour le iourd'huy beaucoup de gentils-hommes en vie qui s'y trouuerent. Je n'en demande autre tesmoignage que le leur, pour sçauoir si i'ay failly d'un seul mot d'en escrire la verité. Monsieur de Cental mena prisonnier le Lieutenant du Comte saint Martin , pource qu'un de ces gens l'auoient prins , quelques autres à pied & à cheual , qui estoient prisonniers de ses gens : & avec nous les capitaines Aguillere & Mandosse , le Lieutenant de Rozalles , celuy qui portoit sa cornette , & celuy qui portoit celle du Comte Saint Martin , non qu'ils eussent les drapeaux & tout le demeurant des gens de pied & de cheual à Sauillan. En dix iours toutes ces trois factions se firent , à sçauoir la deffaite des Italiens , la mort du Comte Pedro d'Apport à Barges , & ceste-cy des Espagnols. Je veux donc dire , pource qu'il me touche , que si iamais Dieu a accompagné la fortune d'un homme , il a accompagné la mienne. Car il ne s'en fallust d'un quart d'heure , que ne rencontrissions les Espagnols & les Italiens tous ensemble. Et croy fer-

*Bonheur
du sieur
de Mont-
luc.*

mement que si Dieu n'y eust mis la main, nous fussions esté deffaits. Mais il nous envoya Cental, qui nous amusa bien à propos pour nous. Que si cela fust advenu, on n'ouyt iamaïs parler d'un plus furieux combat, que celuy-là fust esté. Car s'ils estoient braves & vaillans, nous ne leur deuions rien. C'estoit vne belle petite troupe que la nostre. Et pour ne laisser rien en arriere, ie ne voudrois pas qu'on pensast que les corselets n'arriuaissent au combat pour faute de cœur, n'y ayant autre chose qui les empeschast de s'auancer que la pesanteur de leurs armes. Car nous n'auions à peine acheué, qu'ils arriuerent au lieu du combat, maudissant leurs armes qui les auoient empeschez d'auoir part au gasteau.

Or ces trois compagnies & demie d'Espagnols deffaites, & les trois qui allerent à Fossan, ce qui s'estoit retiré avec monsieur de Sauoye & le Marquis de Guast, les deux mille Allemands, & les deux mille Espagnols, qui estoient dans Carignan, furent cause que le camp de l'ennemy s'affoiblit fort : de sorte qu'au bout de quelque temps monsieur de Botieres

se resolut , ayant monsieur de Tais , & de Saint Iulien aupres de luy , d'assembler toutes les forces qui estoient dans les garnisons pour dresser vn camp volant. Et me manda que ie l'allasse trouuer à Pignerol avec ma compagnie , les deux de monsieur de Carces , & celles du Comte de Landrian Italien. Mandoit aussi à monsieur de Termes qu'il ne retint que deux compagnies avec luy , sçauoir celle de Gabarret , & du Baron de Nicolas. La garnison estoit fort bonne , & furent bien aises lesdicts gentils-hommes , que monsieur de Termes les priaist de demeurer avec luy. Je veux escrire icy vn mot pour tenir en ceruelle les capitaines , & pour leur monstrer qu'ils doiuent penser en tous les inconueniens qui leur peuuent aduenir , & de mesmes aux remedes. Monsieur de Termes vouloit executer vne entreprinse à Castilholle au Marquisat de Salusses , sur trois enseignes d'ennemis qui s'estoient mis en trois palais l'vn aupres de l'autre , ayant bastionné les ruës : tellement qu'ils pouuoient aller de l'vn à l'autre : & pensoit ledict Seigneur faire d'vne pierre deux coups. C'estoit qu'il m'ac-

*Entre-
prinse des
seigneur de
Botieres.*

compagneroit iusques à Castilholle , & en emporteroit avec deux pieces qu'il amenoit les palais , & que de-là ie m'en irois à Pignerol , & il s'en retourneroit à Sauillan , menant les deux compagnies du Baron de Nicolas avec luy , pour luy seruir d'escorte à ramener l'artillerie. Toute la compagnie des ennemis estoit logée à Pinguons , Vinus & Vigon , & en deux ou trois autres places circonvoisines. Je n'estois point d'opinion d'exécuter ceste entreprinse : pource que les ennemis estoient si pres dudict Castilholle , qu'en sept ou huit heures ils pouuoient venir à nous , & en autant de temps estre aduertis. Monsieur de Termes qui estoit desirieux d'exécuter ceste entreprinse , ne voulut prendre en payement aucune raison que ie luy en donnasse. Et mesmement qu'il n'y auoit pas quatre mois que Messieurs d'Auffun & de Saint Iulien y auoient deffait deux compagnies , & prins leurs capitaines où i'estois avec eux , d'autant qu'ils m'auoient demandé à monsieur de Botieres , & ma compagnie quant & moy : & luy disois que c'estoient les mesmes capitaines qui estoient sortis de prison ,

*Discours
sur l'en-
treprinse
de mon-
sieur de
Termes.*

apres auoir payé leur rançon , lesquels auoient cogneu la faute , par laquelle ils s'estoient perdus , & y auoient bien remedié. Car depuis qu'un homme a fait vne perte en vn lieu , il a bien la teste grosse , s'il se trouue en mesme hazard , s'il n'y pouruoit , & ne se fait sage à ses despens. Aussi ay-ie ouï dire à de grands capitaines , qu'il est besoing d'estre quelquefois battu , & d'auoir souffert quelque route : car on se fait sage par sa perte. Mais ie me suis bien trouué de ne l'auoir pas esté : & aime mieux m'estre fait aduisé aux despens d'autrui , qu'aux miens.

Toutes mes remonstrances ne seruirent de rien , & commençâmes à marcher sur l'entrée de la nuit , de sorte qu'une heure deuant iour nous y arriuasmes. Monsieur de Termes mit son artillerie à cent pas d'un des palais : le Baron de Nicolas s'offrit incontinent à la garder : & fallut que le capitaine Palu , le Comte de Landrian & moy fissions le combat. Ie gagnay l'un des palais , non celuy que l'artillerie battoit : mais rompant les maisons d'une à autre , iusques à ce que ie fis vn trou audit palais , par

lequel on me garda bien d'entrer (il me souuenoit de ce trou où i'auois esté si bien estrillé au voyage de Naples) qui fust cause que ie mis le feu à vne petite maison ioignant iceluy palais. Alors ils se retirerent dans l'un des autres, ayant duré le combat iusques à deux heures apres midy, sans que personne s'en meslast que nos quatre compagnies. l'y perdis quinze ou seize soldats. Monsieur de Carces autant ou plus, & le Comte de Landrian n'en demeura pas exempt. Et neantmoins nous les auions reduits à quitter l'autre que l'artillerie battoit, & se remettre au troisiéme. Et pour ce qu'il falloit desmurer deux portes, on ne fust point d'opinion de tenter plus auant la fortune : mais que monsieur de Termes s'en deuoit retourner en diligence à Sauillan, & moy tirer mon chemin avec les quatre compagnies droit à Pignerol, à mon grand regret. Car ie voulois paracheuer, ou me perdre, & tout le demeurant de ma compagnie. On a tousiours remarqué ce vice en moy, que i'ay esté trop opiniastre à vn combat. Mais quoy qu'on die, ie m'en suis plûst bien que mal trouué. Qui fust cause

que monsieur de Termes condescen- *Monsieur*
 dit à ne faire rien dauantage , crai- *de Termes*
 gnant d'y perdre quelque capitaine , *se retire.*
 dont il en eust peu auoir reproche :
 pource que le Lieutenant du Roy n'a-
 uoit rien entendu de ceste entreprinse,
 & m'acheminay droit à Barges. Ainsi
 que ie fus au bourg la nuit me sur-
 print : il falloit encorés que ie passasse
 trois grands mil de plaine , auant que
 ie peusse arriuer à Cabours , où ie
 voulois repaistre , & y seiourner trois
 ou quatre heures : & estant à l'entrée
 de la plaine , ie manday au capitaine
 Lienard (qui estoit avec moy) aller
 parler avec monsieur de Botieres pour
 son capitaine , quel chemin y auoit
 iusques à Cabours (car ie n'auois ia-
 mais esté en ce pays-là) lequel me dit
 que c'estoit vne plaine : alors ie fis
 alte , & commençay à discourir avec
 le capitaine Lienard comme nous es-
 tions partis de Sauillan le soir aupa-
 rauant , & qu'en sept ou huit heures
 Cesar de Naples pouuoit estre aduert
 de nostre parlement , & que deux
 iours deuant l'on sçauoit par tout Sa-
 uillan que i'allois à Pignerol : dequoy
 aisément ledict Cesar pouuoit estre *Consid.*
 aduertty , & qu'il n'y auoit iusques à *rations*
d'un chef.

Vigon six ou sept mil , où estoit la plus grande partie de la cauallerie, ne pouuant passer ceste plaine sans courir vn grand peril , & mesmement la nuict , qui n'auoit point de honte. Lediect capitaine Lienard m'accordoit que tout cela pouuoit estre : toutes-fois ie n'auois autre chemin que celuy là , sinon que ie voulusse allonger de trois ou quatre mil , & passer le pas aupres de la source , où il pensoit y auoir de l'eau. Mes guides entendoient nostre discours , qui me dirent qu'il y auoit eauë iusques à demy cuisse. Je ne trouuay homme qui ne fust contraire à mon opinion , & moy contre l'opinion de tous , ie tournay à main gauche , & prins le chemin droict à la montagne : & par bonne fortune ie n'y trouuay eauë que iusques au genoüil , tellement que gagnasmes le long de la montagne , tirant droict à Barges , là où nous ne pensasmes arriuer que ne fut la pointe du iour. Ce que nous fismes sans dormir le iour que nous partismes , le soir nous ne dormismes point , la nuict nous nous mismes à cheminer , puis tout le long du iour à combattre le palais : & l'autre nuict apres à cheminer

miner iusques à Barges , qui sont quarante-huict heures. I'ay fait pareille traicte sans dormir cinq ou six fois en ma vie , & plusieurs fois en ay demeuré trente-six. Il faut , mes compagnons , de bonne heure s'accoustumer à la peine & à pastir , sans dormir & sans manger : afin que vous trouuans au besoing , vous portiez cela patiemment.

Instruction pour les capitaines.

Or mon opinion n'estoit pas vaine : car Cesar de Naples ayant esté aduerti de nostre entreprinse , partist de Carmagnolle avec cinq cens arquebuziers à cheual , & print cinq cens chevaux à Vinus & à Vigon , & vint faire deux embuscades au milieu de la plaine , vn jet d'arbaleste à costé de mon chemin , où il demeura toute la nuit. Et comme ie fus arriué à Barges vn peu apres le soleil leuant , ie m'estois mis à dormir , sur quoy i'ouys l'artillerie de Cabours qui leur tiroit en se retirant , car il falloit qu'ils passassent par le fauxbourg dudit Cabours. Ie ne fus pas bien aduerty de ceste embuscade , iusques à ce que trois iours apres mon arriuée à Pignerol monsieur de Botieres se mist en campagne , & allasmes droict à Vigon.

234 *Comm. de M. B. de Montluc*,
pour forcer la cauallerie qui estoit
dedans : car de gens a pied ils n'en
auoient point avec eux , & gaignas-
mes les maisons qui sont aupres de la
porte. Ce que n'ayant peu faire , nos-
tre camp se retira à vn mil de là , &
la nuit la cauallerie abandonna la
ville secretement : & au point du
iour que nous y pensions aller donner
l'assaut (ayant fait venir monsieur de
Botieres deux canons de Pignerol) n'y
trouuâmes personne , ains la place
uide. Et de mesme en firent ceux de
Vinus , de Pingues , & tous les autres
se retirerent à Carmagnolle.

*Considé-
rations
que doit
auoir un
chef de
guerre.*

L'ay voulu discourir cecy , & l'es-
crire , pour esueiller les esprits aux
capitaines à bien considerer , que lors
qu'ils se trouueront en vne telle af-
faire ; ils compassent le temps que
l'ennemy peut estre aduerty , le temps
aussi qu'il faut qu'ils ayent pour leur
retraicte. Et si vous trouuez que l'en-
nemy aye temps pour vous trouuer
sur les champs , & que vous ne soyez
assez forts pour le combattre , pour
la peine de trois ou quatre lieues da-
uantage , ne laissez à destourner vostre
chemin. Car il vaut mieux estre las ,
que prins ou mort. Il faut , mes capi-

taines , que vous ayez non seulement l'œil , mais aussi l'esprit au guet. C'est sur vostre vigilance que vostre troupe repose , songez à ce qui vous peut aduenir , mesurant tousiours le temps , & prenant les choses au pis , sans mespriser vostre ennemy. Si vous sçauiez avec paroles allegres & ioyeuses flatter le soldat & l'esueilleur , luy représenter par fois le danger où le peu de sejour vous mettra , vous en ferez ce que vous voudrez : & sans luy donner loisir de dormir , vous le mettrez & vous aussi en lieu de seureté , sans engager vostre honneur , comme plusieurs , que j'ay veu attraper couchez (comme on dit) à la Françoisse , ont fait. Nostre nation ne peut pastir longuement , comme fait l'Espagnolle & l'Allemande. La faute n'en est pas à la nation ny à nostre naturel , mais cela est la faute du chef , ie suis François impatient (dit on) & encores Gascon , qui le surpasse d'impatience & colere , comme ie pense qu'il fait les autres en hardiesse : mais si ay-ie tousiours esté patient , & ay porté la peine autant qu'autre sçauroit faire. Et i'en ay veu plusieurs de mon temps & autres que j'ay nourris ,

*Naturel
du François.*

236 *Comm. de M. B. de Montluc,*
s'endurcissoient à la peine & au labeur. Croyez, vous qui commandez aux armes, que si vous estes tels, vous en rendrez aussi vos soldats à la longue. Tant y a que si ie n'en eusse ainsi usé, i'estois mort ou pris. Mais reuenons à nostre propos.

Le lendemain nous allasmes passer la riuere du Pau, sur laquelle fismes vn pont de charrettes pour passer l'infanterie : car la cauallerie n'y auoit eue que iusques au ventre, & la passasmes toute la nuit. Et au point du iour ie fus avec vne troupe d'arquebuziers tout aupres de la ville, lors que tout estoit presque passé. Le

Cesar de Naples se retire. m'amusay à attaquer l'escarmouche, ayant quelques gens à cheual qui vindrent avec moy. Cesar de Naples incontinent mit ses gens en ordre pour abandonner Carmagnolle, & commença à prendre son chemin, se retirant pour passer vne riuere qu'il y a, & gagner Quiers. Et sans qu'il fallust que nostre cauallerie fist vn grand cerne pour passer les fosses, nous les eussions combattu, & peut estre deffaits. Et pour ne mentir point sans cela aussi, si l'on eust gueres voulu, ie scay bien qu'il ne tint point

à nos compagnies , ny à monsieur de Tais. Monsieur le President Birague , s'il veut dire la verité , sçait bien à qui il tint : car il estoit alors au camp pres monsieur de Botieres , & vid bien ce qu'on faisoit , & ce qu'on disoit : & sçait bien que ie les suiuis avec deux cens arquebuziers , toujours tirant sur leur retraicte plus d'un mil & demy : creuant de despit de veoir combien laschement on marchoit , qui monstroient bien qu'on n'en vouloit pas manger.

C'est vne mauuaise chose , quand le chef craint de perdre. Qui va avec crainte , ne fera rien qui vaille. S'il n'y eust eu de plus grands que moy en ceste troupe , sans tant marchander , i'eusse fait comme du combat des Espagnols , que i'auois deffaits , il n'y auoit que quinze iours. Il y eust beaucoup d'excuses de tous costez , pourquoy nous ne les auions combattus , & non seulement là , mais par tout le Piedmont , où on parloit de nous (Dieu le sçait) fort honorablement. Apres qu'on eust entendu la couillonade , autrement ne se peut elle appeller , monsieur de Botieres n'estoit gueres content en soy-mesme.

*Vn chef
qui craint
ne fera
rien de
bon.*

*Le fleur
de Botie-
res peu
respecté.*

Mais ie lairray ce propos pour en prendre vn autre : aussi n'auoit-il pas grande creance , & estoit mal obey , & peu respecté. S'il y auoit de la faute de son costé , ie m'en remets à ce qui en est. Il y en a assez en vie qui en peuuent parler mieux que moy : si estoit-il sage & bon Cheualier , mais Dieu n'a fait personne parfait de tous poincts.

Trois ou quatre iours apres arriua le fleur Ludouic de Birague , qui proposa à monsieur de Botieres vne entreprise : qui estoit , que s'il uouloit laisser monsieur de Tais deuers les quartiers de Boulongne (où il estoit Gouverneur) avec sept ou huit compagnies , qu'il luy bastoit de prendre Cassantin , S. Germain , S. Iago. Et pource que monsieur de Botieres estoit sur l'entreprise de rompre le pont de Carignan , celle-cy estoit fort mal aisée à resoudre auant la rupture du pont. Or estoit arriué monsieur de Termes avec sa compagnie , & les deux compagnies du Baron de Nicolas : & arresterent entre eux , que monsieur de Tais s'en pouuoit aller avec le Seigneur Londiné avec sept enseignes , & qu'il en demeureroit

encores cinq ou six , les trois compagnies de monsieur de Dros , qu'il auoit refaictes , & sept ou huit autres Italiennes. Je n'ay pas bonne souuenance si monsieur de Strossy estoit encores arriué. C'estoient les siennes. Baste , que nous faisons François ou Italiens dix huit enseignes , sans les Suisses. Et fust arresté au Conseil , qu'auant que mettre la main à la rupture du pont , l'on verroit comme succederoit l'entreprinse dudict Seigneur Ludouic : car si elle succedoit mal , & qu'ils fussent deffaicts , le Piedmont demeueroit en peril. Mais quelques iours apres nouuelles vindrent à monsieur de Botieres qu'ils auoient prins saint Germain , saint Iago , & trois ou quatre autres villotes fermées. Je ne veux oublier que monsieur de Tais vouloit m'emmener , de sorte qu'il y eust de la contestation : mais monsieur de Botieres protesta de ne rompre le pont que ie n'y fusse. Monsieur de Termes , monsieur d'Auffun , le President Birague , le sieur Francisco Bernardin tenoient le mesme party de monsieur de Botieres , & fus contraint de demeurer , à mon grand regret , ayant grand enuie d'aller avec ledit

*Entre-
prinse du
sieur Lu-
douic de
Birague.*

Seigneur de Tais , pource qu'il m'aimoit , & auoit grande fiance en moy , autant que de capitaine qui fust en la troupe , & qu'il cherchoit tousiours les lieux où les coups se donnoient. Lesdites nouuelles venuës , se fit la deliberation de la rupture du pont en ceste maniere.

*Entre-
prise pour
rompre le
pont de
Carignã.*

Il fust ordonné que i'irois avec cinq ou six compagnies Gasconnes combattre les cent Allemans & les cent Espagnols , lesquels toute la nuit estoient en garde au bout du pont , depuis que nostre camp estoit à Pingues. A quoy ie respondis , que ie ne voulois tant de gens : car il falloit que ie passasse par des lieux estroits : & menant si grande troupe feroit vne si longue file , que la sixiesme partie n'arriueroit pas au combat. Bref , que ie ne voulois que cent arquebuziers , & cent corselets , pour estre egaux aux ennemis : esperant qu'auant que le ieu se passast , ie ferois cognoistre que nostre nation valloit autant que celle des Allemans & Espagnols : & que Boguedemar , la Palu , & quelque autre capitaine qu'il y auoit (dont ne me souuient du nom) meneroient le demeurant de toute la troupe à
trois

trois cens pas de moy pour me secourir , si les ennemis sortoient de Carignan pour secourir les leurs. L'on remist cela à ma discretion. Il y auoit vne maison à main gauche du pont , & vis à vis , où il fust ordonné que les Italiens , qui pouuoient estre de douze ou quatorze enseignes , iroient à ceste maison pour me fauoriser , si les ennemis sortoient , ou bien que monsieur de Dros avec lesdites compagnies , s'il estoit arriué (dont ie n'en ay bonne mémoire : toutesfois ie pense que non , & que c'estoient les Italiens) & monsieur de Botieres demeureroient à demy mil de nous avec toute la caualerie , & les Suisses qui estoient à Carmagnolle. Et le capitaine Labardac , avec sa compagnie viendrait par de là la riuere avec deux canons , pour tirer vne volée ou deux à vne maisonnette qui estoit au bout du pont de nostre costé , où les ennemis faisoient leur garde : & que monsieur de Salcede (qui s'estoit n'aguères venu rendre à nous) entre-
Ordre
pour rompre le
pont.

se mettre sous ledit pont , & couper les pilliers non du tout , mais seulement en laisser de la grosseur de la jambe d'un homme : & comme cela seroit fait , on couperoit les longues pieces de bois , qui tiennent le pont par dessus : & cela se separant , les pilliers fondroient d'eux-mesmes , & se romproient , luy fust baillé aussi certains artifices à feu. On luy faisoit entendre qu'ils brusseroient les pilliers , si on les y attachoit. Et comme chacun suivoit son ordre , ie m'en allay droit au pont , avec mes deux cens hommes choisis de toutes nos compagnies , la teste baissée : où ie n'y sceus estre si tost , que le canon n'eust tiré vne volée à la maisonnette , & donnay dedans , y tuant vn Allemand , que ie trouuay à mon arriuee , lequel n'estoit encores du tout mort. Et quoy que ce fut la nuit , il faisoit vne lune si claire , que l'on voyoit aisément depuis vn bout iusques à l'autre , sauf que d'heure à autre il tomboit vne nuée de broüillart de verglas , durant aucunesfois demie heure , autrefois moins. Quand cela tomboit on ne se voyoit à vn pas l'un de l'autre.

Or, ou du coup de canon, ou du bruit que ie faisois à la maison, n'estant à cent pas du pont, les ennemis prindrent la fuite, & se retirerent vers Carignan. le leur fis tirer quelques arquebuzades, mais ie ne passay plus outre le bout du pont. Et en mesme instant arriua monsieur de Salcede au dessous, avec ses païsans & ses batteaux: lequel de pleine arriuée attacha ses feux artificiels aux pilliers: mais cela ne fust qu'autant de temps perdu: & fallust qu'il fist mettre ses gens à la hache. Ayant attaché leurs batteaux ausdits pilliers, commencerent au bout où estoient les Suisses, venant tousiours droict à moy, qui tenois le bout du pont du costé des ennemis. Ceste furie de païsans dura trois ou quatre heures à couper: de sorte qu'encores que les pilliers fussent de quatre en quatre, & bien gros, auant que nous eussions aucun empeschement, ils furent coupez iusques à l'endroit où i'estois. Monsieur de Salcede en faisoit tousiours reposer vne troupe au bord de la riniere contre la terre, où ils auoient fait faire vn peu de feu, & d'heure en autre les changeoit. Pendant ces

*Salcede
besongne
à la res-
ture du
pont.*

entrefaictes les ennemis enuoyerent
 recognoistre par trente ou quarante ar-
 quebuziers , sur l'heure que le verglas
 tomboit , lesquels ie ne peus apper-
 ceuoir ny ouyr , qu'ils ne fussent à
 moins de quatre picques de moy , &
 tirerent à trauers de nous. Ce fait s'en
 retournerent tout incontinent : & si
 ne nous virent - ils pas , à l'occasion
 du verglas & broüillart. Or messieurs
 de Termes & de Moneins vindrent
 à nous , avec trois ou quatre cheuaux,
 pour sçauoir que c'estoit de ces ar-
 quebuzades : puis enuoyerent deuers
 monsieur de Botieres , luy dire que
 ce n'estoit rien , & que nous n'auions
 point laissé pour cela l'exécution , &
 demurerent tous deux seuls avec
 moy. Et ne tarda pas vne heure apres
 que le verglas recommença à retom-
 ber , & reuindrent les ennemis à nous :
 c'est à sçauoir six cens Espagnols choi-
 sis , & six cens Allemans picquiers ,
 faisant son ordre , le Seigneur Pierre

*Le Sei-
 gneur
 Pierre Co-
 lonne pour
 les Impé-
 riaux.*

Colonne en ceste maniere (car ie
 sçeus tout depuis) que deux cens ar-
 quebuziers viendroient la teste baïf-
 sée droict à nous , choisis encores
 parmy les six cens , les autres quatre
 cens à leur queue , à cent pas d'eux ,

& à deux cens pas derriere , les six cens Allemans. Or auois-ie mis les capitaines qui menoient apres moy les enseignes , au derriere de moy deux cens pas contre vne leuée de fossé : & aucunesfois le capitaine Fauas mon Lieutenant venoit devers moy , & Boguedemar , voir ce que nous faisions , puis s'en retournoient à leur lieu. Du costé du pont deuers les Suisses , nous auions rompu par aduventure vingt pas , ayant commencé de couper par le dessus , & trouuâmes que comme le pont se separa , il en tomba là quinze ou vingt pas , qui nous donna grande esperance. Cependant monsieur de Salcede faisoit toujours encores couper les pilliers , non du tout , mais un peu dauantage qu'au commencement , qui estoit cause , qu'il auoit ses païsans departis en trois troupes , les vns dans les batteaux , d'autres sur le pont à couper les traueses , & dix ou douze qu'il y auoit aupres du feu. Comme Dieu veut aider les hommes , il nous monstra ceste nuit vn vray miracle : En premier lieu , les deux cens arquebuziers vindrent à moy me trouuant en telle sorte , qu'à peine y eust soldat , qui

eust le feu sur la serpentine ; car ils alloient par fois de dix à douze au feu des païsans , pour eschauffer vn peu les mains , ayant deux sentinelles à cent pas de moy sur le chemin de la ville , me fiant que les Italiens y en missent de leur costé , car ils en estoient encores vn peu plus pres que moy : mais c'estoit à costé. Je ne sçay comme ils firent : car ie n'auois rien sinon mes deux sentinelles , qui coururent à moy : & comme nous estions à l'entrée de l'alarme arriuerent les Espagnols , crians Espagne , Espagne : & tirerent sur nous tous les deux cens arquebuziers en vn coup. Messieurs de Termes & de Moneins , qui estoient tous deux seuls & à cheual , s'encoururent aupres de monsieur de Botieres , qui auoit desia veu le commencement du desordre. Et nottez que presque tous les deux cens hommes que i'auois au bout du pont se mirent en fuite droit aux enseignes : & tout à vn coup les enseignes se mirent aussi en fuite : & les Italiens qui estoient à main gauche en firent de mesmes , lesquels ne s'arrestèrent qu'il ne fussent à la teste de la cauallerie , où estoit monsieur de Botieres. Nostre mot estoit ,

Saint Pierre , mais ne me seruit de rien. Alors ie commençay à crier, Montluc , Montluc , meschans malheureux m'abandonnerez vous ainsi ? Et de fortune i'auois avec moy trente ou quarante ieunes gentils-hommes , n'ayans encores poil de barbe. C'estoit la plus belle & braue ieunesse , qui fust iamais veu en vne petite compagnie. Ils pensoient que ie m'en fusse comme les autres , lesquels oyans mon cry tournerent incontinent à moy : & sans attendre autre chose , ie charge droict où ils me tiroient les arquebuzades , nous passant au long des oreilles ; mais de nous voir les vns les autres n'estoit possible , à cause du grand verglas , qui tomboit avec vne espeffe fumée parmy. Et en courant droict à eux , mes gens tirerent tout à vn coup , criant aussi bien France , comme ils faisoient Espagne. Et oze-
rois affermer à la verité , que nous leur tirasmes les arquebuzades à moins de trois picques. De quoy leur deux cens arquebuziers furent renuersez sur les quatre cens , & le tout renuersé sur les six cens Allemans : tellement que tout se mit en route & en fuite droit à la ville. Car ils ne nous pouuoient

*Desordre
aduenu
la nuit.*

*Gens
criards.*

reconoistre. Je les suivis environ deux
cens pas : & nous troubla le grand
bruit que nostre camp faisoit , (ie
n'en ouys jamais un pareil) vous
eussiez dict , que tous estoient apostez ,
s'entre-appellans les vns aux autres.
Ces grands criards ne sont pas pour-
tant les plus vaillans. Il y en a qui
font les empressez , mais cependant
pour vn pas qu'ils aduancent , en re-
culent deux. Ce grand bruit fust cause
que ie n'eus jamais cognoissance du
desordre des ennemis , ny eux aussi du
nostre , à cause des grands cris qu'ils
faisoient à l'entrée , qui n'estoit qu'une
fausse porte aupres du chasteau , ou
deux ou trois hommes seulement pou-
voient passer de front : Et ainsi m'en
retournay au bout du pont , où ie
trouvay monsieur de Salcede tout
seul , avec dix ou douze païsans de
ceux qu'il rafraischissoit : car les autres
qui estoient dans les batteaux coup-
perent leurs cordes , & s'en firent le
long de la rivièrè droict à Montcallier.
Ceux qui couppoient les traufferes de-
vers les Suisses , laisserent leur coi-
gnées & haches sur le pont , se iettant
dans l'eauë , où ils n'auoient l'eau que
iusques à la ceinture , pource qu'on

n'estoit pas encores à la profondeur de la riuere. Les Suiffes, qui ouyrent ce grand bruit, se mirent à courir vers Carmagnolle, ayant opinion que nous, & tout nostre camp estions en route, & prenans les deux canons, s'en allerent tant qu'ils peurent gaigner Carmagnolle. Penuoyay vn de mes soldats deuers la fuite, pour sçauoir nouuelles du capitaine Fauas mon Lieutenant, lequel il trouua ayant rassemblé trente ou quarante soldats, qui reuenoit vers le pont, voir ce que i'estois deuenu, pensant que fusse mort: & incontinent despescha deuers Boguedemar, la Palu, & autres capitaines qui auoient faict alte, r'alliant vne partie de leurs gens, les faisant marcher droict au pont à grande haste, disant que i'auois repoussé les ennemis, lesquels incontinent se mirent au grand pas pour me venir trouuer. Le capitaine Fauas arriua le premier tout deschiré & rompu, par ce que les soldats a foulle luy auoient passé dessus le ventre, comme il les pensoit r'allier, lequel nous trouua monsieur de Salcede & moy au bout du pont, estans sur le propos de ce que deuions faire. Et comme il arriua nous compta

ses fortunes , & de ses compagnons : & le voyant ainsi acoustré tout nostre cas ne fust que risée , la huée de nostre camp dura plus d'une grande heure.

Les autres capitaines estans arriuez , nous conclusmes d'acheuer de rompre le pont , ou d'y mourir. Et promptement ie prins cinquante ou soixante soldats , monsieur de Salcede ses dix ou douze païsans , qui luy estoient demeurez. I'ordonnay au capitaine Fauas , Boguedemar , & la Palu , qu'ils demeurassent au bout du pont & missent les sentinelles iusques aupres de la ville. Je pensois que les Italiens fussent encor à la maison , & ordonnay au capitaine Fauas qu'il iroit lui mesmes la recognoistre , voir s'ils y estoient : & à son retour , trouua que i'auois faict prendre les haches , que les païsans auoyent laissées sur le pont , à quinze ou vingt soldats , & avecques les dix ou douze païsans nous couppions les trauerses dudict pont. Et estant arriué le capitaine Fauas nous dit n'y auoir trouué personne. Ce qui nous cuida mettre vn peu à deuiner , que nous deuions faire : mais pour cela n'arrestasmes d'executer nostre premiere resolution. Et apres

*Le Pont
rompu.*

que les cris furent passez , arriuerent Messieurs de Termes , & de Moneins , lesquels me commanderent de la part de monsieur de Botieres , que i'eusse à me retirer. Lediect sieur de Moneins mit pied à terre , car monsieur de Termes ne pouuoit à cause de ses gouttes , & nous vint trouuer , & vit que depuis le desordre nous auions faict tomber plus de trente pas du pont , & deux coupes que desia nous auions faict , & commançons à la troisieme , qui estoit à quinze ou vingts pas chacune. Lequel s'en retourna vers monsieur de Botieres , pour luy dire comme tout estoit passé , ayant monsieur de Salcede perdu presque tous ses paisans : mais que nos soldats auoyent prins les haches , avecques lesquelles ils faisoient merueilles de couper : & que tous les capitaines & soldats , monsieur de Salcede , & moy nous estions resolus de mourir plustost que de bouger de là , qu'il ne fust couppé. Alors monsieur de Botieres enuoya protester contre moy de la perte , qui pourroit aduenir contre son commandement. Ce que lediect sieur de Moneins fit : & nous diect dauantage , que lediect sieur

252 *Comm. de M. B. de Montluc,*

de Botieres auoit commencé prendre son chemin pour s'en retourner, combien qu'il fist alte à vn mil de nous. Ce que ie croy qu'il faisoit, afin que ie me retirasse : car il n'auoit pas faute de cœur, mais il craignoit tousiours de perdre. Celuy qui est de cest humeur se pourra conseruer, mais non pas faire grand'conqueste. Monsieur de Termes s'estoit arresté au bout du pont, comme il entendit que monsieur de Botieres s'acheminoit : lequel sieur ne retourna pas en arriere pour apporter ma responce auecques monsieur de Moneins, mais manda incontinent à sa compagnie, qu'ils ne bougeassent d'où il les auoit laissés : & ainsi coupasmes tout le demeurant de la nuit, iusques à ce qu'il fust pres d'vne heure de iour, que nous nous acheminasmes iusques à la petite maisonnette, qui estoit sur le tertre. Monsieur de Moneins retourna encores à nous à point nommé, lors que le dernier coup de hache se donnoit, & monsieur de Termes courut à sa compagnie, pour l'aduancer vn peu deuers nous, afin de fauoriser nostre retraite : monsieur de Moneins courut aussi vers monsieur de Botieres, le-

*Naturel
du Sieur
de Botie-
res.*

*Rupture
du pont.*

quel il trouua attendant son retour : de sorte que nous nous retirâmes sans empeschement aucun , ayant osté aux ennemis vne grande commodité. Or ay-ie voulu mettre ceci par escrit , non pour me louer d'une grande hardiesse , mais seulement pour monstrier à tout le monde , comme Dieu a conduit ma fortune. Je n'estois pas si fol , ny si vaillant , que si i'eusse peu veoir les ennemis , ie ne me fusse retiré : & peut estre eusse fuy comme les autres. Ce seroit temerité & non hardiesse. Il n'est pas mal seant d'auoir peur , quand il y a grande occasion : car avecques trente ou quarante hommes , ie n'eusse pas esté si mal aduisé d'attendre le combat.

En cecy les capitaines pourront estre instruits de ne prendre iamais fuite , ou pour parler plus honnestement vne hastiue retraicte , sans auoir recogneu qui les doit chasser : & encore le voyant , chercher les remedes pour resister iusques à ce qu'ils n'y voyent plus ordre. Car apres que tout ce que Dieu a mis aux hommes , y est employé , alors la fuite n'est pas honteuse ny vilaine. Mes capitaines , mes compagnons , croyez que si vous n'y em-

Instruction pour les capitaines.

*Bonne
instruc-
tion pour
un capi-
taine.*

ployez le tout , chascun dira , & ceux
mesmes qui auront fuy avecques vous,
s'il eust faict cecy , s'il eust faict cela ,
le malheur ne fust point advenu : la
chose eust mieux succedé. Et tel en
braue & parle plus haut , qui fuit ,
peut estre , le premier. Et voyla l'hon-
neur d'un homme de bien (pour bien
vaillant qu'il soit) en dispute de tout
le monde. Quand il ne s'y peut rien
plus , il ne faut estre opiniastre , ains
ceder à la fortune : laquelle ne rit pas
toufiours. On n'est pas moins digne
de blasme lors qu'on se pert se pou-
uant retirer de la meslée , & qu'on se
uoid perdu , que si du premier coup
on prenoit la fuite. L'un est toutesfois
plus vilain , que l'autre : l'un vous
faict estimer mal-aduisé , & de peu
d'entendement , & l'autre poltron &
couard. Il faut euter & l'une & l'autre
extremité. Il faut venir à ces folles &
desesperées resolutions , lors que vous
vous voyez tombez és mains d'un im-
pitoyable ennemy , & sans mercy ,
c'est là où il faut creuer & vendre
bien cher vostre peau. Un desesperé en
vaut dix. Mais fuir , comme on fist ,
sans voir qui vous chasse , cela est hon-
teux & indigne d'un bon cœur. Il est

vray qu'on accuse le François d'une chose, c'est qu'il fuit, & combat par compagnie. Aussi font bien les autres. De toutes tailles bons ouuriers. Or apres que la place fust renduë, ie vous diray comme nous sçeusmes le desordre des ennemis. Ce fust par les gens mesmes de Carignan, & par la bouche propre du Seigneur Pierre Colonne, qui le compta à Susanne en la presence du capitaine Renouard, qui l'amenoit au Roy, par le commandement de monsieur d'Anguien, comme sa capitulation portoit apres la bataille de Serizolles, que ie vous conteray en son lieu.

*De tous
mesliers
mauvais
ouuriers.*

Ceste rupture du pont ne fust faicte sans grande consideration: car bien tost apres les ennemis commencerent à pastir, ne pouuant auoir aucun rafraichissement de Quiers, comme ils auoyent parauant de nuiet à autre. Et ayant entendu Messieurs de Tais, & le Seigneur Ludouic de Birague le succez de l'entreprinse du pont, manderent à monsieur de Botieres, que s'il vouloit venir es quartiers, où ils estoient, qu'ils pensoient, qu'on emporteroit Yurée. Surquoy monsieur de Botieres & son conseil furent d'opi-

*Importance de
la rupture
du
pont.*

nion qu'il y deuoit aller , & laisser garnison à Pingues , Vinus , Vigon : & autres lieux plus proches de Carignan. Et me semble que monsieur d'Aussun y demeura chef , avecques douze ou quatorze enseignes Italiennes , & trois ou quatre des nostres , sa compagnie , & quelques autres de gens à cheual , desquelles ne me souuient. Les ennemis n'auoyent nul homme à cheual dans Carignan , qui estoit cause qu'ils estoient tenus à l'estroit d'un costé & d'autre. Et partit monsieur de Botieres avec Messieurs de Termes , de Saint Iulien , President Birague & sieur Mauré : & allasmes nous reünir ensemble à saint Iago , & saint Germain : puis nous acheminasmes deuant Yurée , où ne fismes rien, pour ce qu'il ne fust possible de rompre la chaussée de l'eauë. Que si elle se fust peu rompre , nous estions dedans , d'autant que par ce costé-là il n'y a forteresse autre que la riuere , & fusmes contraincts d'aller assieger Saint Martin , lequel nous prismes par composition , ayant enduré deux ou trois cens coups de canons , & autres places és enuirs de là. Ainsi que nous en retournions vers Chiuas pendant


*Siege de
Yurée.*

pendant le siege d'Yurée , monsieur de Botieres eust aduis , que monsieur d'Anguyen venoit , pour commander en son lieu. Le Roy estoit mal content de luy , de ce qu'il auoit avec tant de loisir laissé fortifier Carignan , avec d'autres occasions particulieres. Il faut cheminer bien droit , pour contenter tout le monde. Lediect sieur de Botieres en fust fort fâché , Et disoit-on , que par despit il auoit quitté Yurée , laquelle à la longue il eust prins : mais ie ne le croy pas. Tant y a que monsieur d'Anguyen arriva amenant pour renfort sept compagnies de Suysses , qu'un Colonel nommé le Baron commandoit. Et croy que ce fust à cest'heure là que monsieur de Dros vint avec sept ou huit enseignes de Prouenceaux , ou Italiens. Monsieur de Botieres se retira en sa maison en Dauphiné. Il y a bien des affaires en ce monde , & ceux qui ont de grandes charges , ne sont pas sans peine. Car s'ils hazardent trop , & qu'ils perdent , les voila mal estimez & iugez pour fols & mal aduisez , s'ils sont longs & lents on se moque , voire le tient-on à couardise : les sages tiendront vn entre-denx. Mais cepen-

*Le Roy
mal con-
tant de
monsieur
de Botie-
res.*

*Retraicte
du sieur
de Botie-
res.*

dant nos maistres ne se payent point de ces discours , ils veulent qu'on face bien leurs affaires. Tel caquete des autres , que s'il y estoit se trouueroit bien empesché.





COMMENTAIRES
DE MESSIRE
BLAISE DE MONTLUC,
Mareschal de France.

LIVRE SECONDE.



La venuë de ce brave & genereux Prince, lequel promettoit beaucoup de luy pour estre dotié d'insinies bonnes parties, estant doux, humain, vaillant, sage, & liberal, tous les François & nos partisans s'esiouyrent beaucoup, & moy particulièrement, parce qu'il m'aimoit, & estimoit plus que ie ne meritois. Apres qu'il eust recogneu ses forces, ses munitions, & les places que nous tenions, & qu'il eust pourueu au tout au moins mal qu'il eust peu, vers le commencement de Mars il me despescha devers le Roy, pour l'aduertir du tout, &

*Monsieur
d'Angu-
yen Lieu-
tenant de
Roy en
Pied-
mont.*

1544.

*Le sieur
de Mont-
luc en-
uoyé vers
le Roy par
monsieur
d'An-
guen.*

comme le Marquis de Guast dressoit vne grande armée, & qu'il luy venoit nouveaux Allemans de renfort, & le Prince de Salerne venoit aussi du costé de Naples, qui menoit six ou sept mil Italiens. C'estoit au temps que l'Empereur & le Roy d'Angleterre s'estoient accordez, & auoient faict Ligue pour entrer dans le Royaume de France, lequel ils auoient partagé. Je demeuray à la Cour pres de trois semaines, m'estant acquitté de ma charge, qui estoit en somme de demander quelque secours, & congé de donner vne bataille. Et sur la fin dudit mois arriuerent des lettres au Roy de la part de monsieur d'Anguien, par lesquelles il aduertissoit, comme estoit arriué à Milan sept mil Allemans, lesquels estoient les meilleurs, que l'Empereur eust deuant Landrecy, où il y auoit sept regimens. Mais il ne peut combattre lors le Roy, & il commanda à tous les sept Colonels de choisir mil hommes chacun de leurs troupes, leur faisant laisser leurs Lieutenans pour tenir leurs regimens prests. Et ainsi les enuoya en Italie se ioincre avec le Marquis de Guast. Et supplioit monsieur d'Anguyen sa Majesté, de

me renuoyer incontinent deuers luy ,
 avec priere de me faire quelque bien
 pour recompense de mes seruices , &
 pour m'encourager à faire mieux.
 Sadiète Maiefté me donna vn Estat de
 Gentil-homme seruant , (en ce temps-
 là ce n'estoit pas peu de chose , ny à si
 bon matché comme à ceste heure) &
 me fist seruir à son disner , me com-
 mandant qu'apres le disner ie fusse
 prest pour m'en retourner en Pied-
 mont : ce que ie fis. Et sur le midy
 monsieur l'Admiral d'Annebaut me
 manda aller trouuer le Roy , qui
 estoit desia entré en son Conseil , là
 où assistoient monsieur de Sainct Pol ,
 monsieur l'Admiral , monsieur le
 grand Escuyer Galliot , monsieur de
 Boissy , qui depuis a esté grand Es-
 cuyer) & deux ou trois autres , des-
 quels il ne me souuient , & monsieur
 le Dauphin , qui estoit debout der-
 riere la chaire du Roy. Et n'y auoit
 assis que le Roy , monsieur de saint
 Pol pres de luy , monsieur l'Admiral
 de l'autre costé de la table vis à vis
 dudiét sieur de saint Pol. Et comme
 ie fus dans la chambre , le Roy me
 dict , Montluc , ie veux que vous
 retourniez en Piedmont , porter ma

*Le sieur
 de Mont-
 luc gen-
 til-hom-
 me ser-
 uant.*

*Propos
 du Roy
 sur la
 creance
 du sieur
 de Mont-
 luc.*

deliberation, & de mon Conseil à monsieur d'Anguyen : & veux que vous entendiez icy la difficulté que nous faisons, pour luy pouuoir bailler congé de donner bataille, comme il demande. Et sur ce commanda à monsieur de saint Pol de parler. Alors ledict sieur de saint Pol proposa l'entreprinse de l'Empereur & du Roy d'Angleterre, lesquels dans cinq ou six semaines auoient resolu entrer dans le Royaume : l'un par vn costé, & l'autre par l'autre : & que si monsieur d'Anguyen perdoit la bataille, le Royaume seroit en peril d'estre perdu : pource que toute l'esperance du Roy, quand aux gens de pied, estoit aux compagnies qu'il y auoit en Piedmont : & qu'en France il n'auoit que gens nouueaux & legionnaires : estant beaucoup meilleur & plus assésuré de conseruer le Royaume, que non le Piedmont, auquel falloit seulement se tenir sur la deffensive, sans mettre rien au hazard d'une bataille, la perte de laquelle perdrait non seulement le Piedmont, mais mettroit le pied à l'ennemy en France de ce costé-là. Monsieur l'Admiral en dict de mesmes, & tous les autres aussi, discour-

*Advis du
sieur de
S. Pol.*

rant chacun comme il luy plaisoit. Je trepignois de parler : & voulant interrompre lors que monsieur Galliot opinoit , monsieur de saint Pol me fist signe de la main , & me dit , Tout beau , tout beau : ce qui me fist taire : & vis que le Roy se print à rire. Monsieur le Dauphin n'opina point , & croy que c'estoit la coustume , mais le Roy l'y fit assister , afin qu'il apprint : car deuant ces Princes il y a tousiours de belles opinions , non pas tousiours bonnes. On ne parle pas à demy , & tousiours à l'humeur du maistre. Je ne ferois pas bon là , car ie dis tousiours ce qu'il m'en semble. Alors le Roy me dit ces mots : Auez vous bien entendu , Montluc , les raisons qui m'esmeuent à ne donner congé à monsieur d'Anguyen de combattre , & de rien hazarder. Je luy respondis , que ie l'auois bien entendu ; mais que s'il plaisoit à sa Maiesté me permettre de luy en dire mon aduis , ie le ferois fort volontiers , non que pour ce sa Maiesté en fist autre chose , sinon ce qu'elle & son Conseil en auoient déterminé. Sa Majesté me dit qu'il le vouloit , & que ie luy en disse librement ce que m'en sembloit. Alors ie

commençay en ceste maniere, il m'en fouiient, comme s'il n'y avoit que trois iours : Dieu m'a donné vne grande memoire en ces choses, dont ie le remercie. Car encores ce m'est grand contentement à present, qu'il ne me reste rien plus, à me resouvenir de mes fortunes pour les d'escrire au vray, sans rien adiouter : car soit le bien, soit le mal, ie le veux dire.

*Discours
du sieur
de Mont-
luc au
Roy pour
demander
bataille.*

Sire, ie me tiens bienheureux, tant de ce qu'il vous plaist, que ie vous die mon aduis sur ceste deliberation, qui a esté tenuë en vostre Conseil : que parce aussi que i'ay à parler deuant vn Roy soldat, & non denant vn Roy qui n'a iamais esté en guerre. Auant qu'estre appellé à ceste grande charge que Dieu vous a donnée, & depuis, vous avez autant cherché la fortune de la guerre, que Roy qui iamais ait esté en France, sans auoir espargné vostre personne non plus que le moindre gentil-homme. Doncques ne doy- ie craindre, puis que i'ay à parler à vn Roy soldat (Monsieur le Dauphin, qui estoit derriere la chaire du Roy, & vis à vis de moy, me faisoit signe de la teste, qui me fist penser qu'il vouloit que ie parlasse hardiment, ce
qui

que me donnoit plus de hardiesse, de laquelle ie n'ay iamais eu faute, car la crainte ne me ferma iamais la bouche) Sire, dis-ie, nous sommes de cinq à six mille Gascons comptez; car vous sçavez que iamais les compagnies ne sont du tout complètes, aussi tout ne se peut iamais trouver à la bataille: mais i'estime que nous serons cinq mil cinq cens, ou six cens Gascons comptez, & de cela ie vous en responds sur mon honneur: tous capitaines & soldats vous bailleront nos noms, & les lieux d'où nous sommes, & vous obligerons nos testes, que tous combattrons le iour de la bataille, s'il vous plaist de l'accorder, & nous donner congé de combattre. C'est chose que nous attendons & desirons il y a long temps, sans tant conniller. Croyez, Sire, qu'au monde il n'y a point de soldats plus resolu que ceux-là, ils ne desirent que de mener les mains. Il y a d'ailleurs treize enseignes de Suisses. Je cognois les six de saint Iulien, mieux que celles du Baron, lesquelles Fourly commande. I'ay veu faire la monstre à toutes. Il y peut auoir autant d'hommes comptez parmy eux, que parmy nous. Ils vous

feront pareille promesse que nous ,
 qui sommes vos sujets , & vous en-
 voyeront les noms de tous , pour les
 envoyer à leurs Cantons , afin que
 s'il y en a quelqu'un qui ne fasse son
 deuoir , qu'il soit degradé des armes.
 C'est chose à laquelle ils se veulent
 sous-mettre , comme ils m'ont asseuré
 à mon depart. Et puis que c'est vne
 mesme nation , ie croy que ceux du
 Baron n'en feront pas moins. Vostre
 Majesté les a peu cognoistre à Lan-
 drechy. Voilà donc , Sire. , neuf mil
 hommes ou plus , desquels vous pou-
 vez faire estat , & vous asseurer qu'ils
 combattront iusques au dernier souf-
 pir de leurs vies. Quant aux Italiens
 & Prouenceaux qui sont avec mon-
 sieur de Dros , & aussi des Gruyens ,
 qui nous sont venus trouuer deuant
 Yurée , ie ne vous en asseureray pas :
 mais i'espere qu'ils feront tous aussi
 bien que nous , mesmement quand
 ils nous verront mener les mains. Je
 leuois lors le bras en haut , comme
 si c'estoit pour frapper , dont le Roy
 se sous-rioit. Vous deuez aussi auoir
 quatre cens hommes d'armes en Pied-
 mont , desquels il s'y en trouuera bien
 trois cens , & autant d'archers , qui

*Italiens ,
 Prouen-
 ceaux &
 Gruyens.*

*Hommes
 d'armes.*

font en mesme volonté que nous. Vous y auez, Sire, quatre capitaines de cheuaux legers, qui sont Messieurs de Termes, d'Auffun, Francisco Bernardin, & Maure, chacun desquels doit auoir deux cens cheuaux legers. & entre tous quatre ils vous serviront de cinq à six cens cheuaux. Tous lesquels desirent faire paroistre l'envie qu'ils ont de vous faire service. Je sçay ce qu'ils valent, & cognois leur courage. Le Roy lors s'esmeut vn peu, de ce que routes les compagnies de la gendarmerie, ny celle des cheuaux legers n'estoient complecttes : mais ie luy dis, qu'il estoit impossible, & qu'il y en auoit qui auoient obtenu congé de leurs capitaines pour aller à leurs maisons se rafraischir, & d'autres estoient malades : mais que s'il plaisoit à sa Maiesté donner congé aux Gentils-hommes, qui le luy demanderoient pour se trouuer à la bataille, ils suppleroient bien au deffaut qui pourroit estre esdites compagnies. Puis doncques, Sire, dis-ie lors, continuant mon propos, que ie suis si heureux que de parler deuant vn Roy soldat, qui voulez vous qui tuë dix mil hommes, & mil ou douze cens

*Cheuaux
legers.*

cheuaux, tous resolu de mourir, ou de vaincre? telles gens que cela ne se deffont pas ainsi: ce ne sont pas des apprentifs. Nous auons souuent sans aduantage attaqué l'ennemy, & l'auons le plus souuent battu. I'oserois dire, que si nous auions tous vn bras lié, il ne seroit encores en la puissance de l'armée ennemie de nous tuer de tout vn iour, sans perte de la plus grande part de leurs gens, & des meilleurs hommes. Pensez donc quand nous aurons les deux bras libres, & le fer en la main, s'il sera aisé & facile de nous battre. Certes, Sire, i'ay appris des sages capitaines pour les auoir ouy discourir, qu'une armée composée de douze à quinze mille hommes, est bastante d'en affronter vne de trente mille. Car ce n'est pas le grand nombre qui vaine, c'est le bon cœur. Vn iour de bataille la moitié ne combat pas. Nous n'en voulons pas dauantage: laissez faire à nous. Monsieur le Dauphin s'en rioit derriere la chaire du Roy, continuant tousiours à me faire signe de la teste: car à ma mine il sembloit que ie fusse desia au combat. Non, non, Sire, ces gens ne sont pas pour estre def-

faicts : si Messieurs , qui en parlent , les auoient veus en besongne , ils changeroient d'aduis , & vous aussi : ce ne sont pas soldats pour reposer dans vne garnison , ils demandent l'ennemy , & veulent monstrier leur valeur : ils vous demandent permission de combattre : si vous les refusez vous leur osterez le courage , & serez cause que celuy de vostre ennemy s'enflera. Peu à peu vostre armée se deffera. A ce que i'ay entendu , Sire , tout ce qui esmeut Messieurs , qui ont opiné deuant vostre Maiesté , est la crainte d'une perte , ils ne disent autre chose si ce n'est , si nous perdons , si nous perdons : ie n'ay ouy personne d'eux qui aye iamais dit , si nous gagnons , si nous gagnons , quel grand bien nous aduiendra ? Pour Dieu , Sire , ne craignez de nous accorder nostre requeste , & que ie ne m'en retourne pas avec ceste honte , qu'on dit que vous auez peur de mettre le hazard d'une bataille entre nos mains , qui vous offrons volontiers , & de bon cœur nostre vie. Le Roy qui m'auoit fort bien escouté , & qui prenoit plaisir à voir mon impatience , tourna les yeux deuers monsieur

*Raisons
du sieur
de Mont-
luc.*

de saint Pol. Lequel luy dit alors ,
 monsieur , voudriez-vous bien chan-
 ger d'opinion pour le dire de ce fol ,
 qui ne se soucie que de combattre ,
 & n'a nulle consideration du malheur
 que ce vous seroit , si nous perdions
 la bataille ? C'est chose trop impor-
 tante pour la mettre à la cervelle d'un
 ieune Gascon. Alors ie luy respondis
 ce mesme mot : Monsieur , assurez-
 vous que ie ne suis point brauache ,
 ny si éceruelé que vous me pensez. Ie
 ne dis point cecy pour brauerie : car
 s'il vous souvient de tous les aduer-
 tiffemens que le Roy a eu depuis que
 nous sommes retournez de Perpignan
 en Piedmont , vous trouuerez qu'à
 pied ou à cheual où nous auons trou-
 ué les ennemis , nous les auons tou-
 siours battus : si ce n'est lors que mon-
 sieur d'Aussun fut rompu , lequel ne
 se perdist , que pour auoir combattu
 à la teste d'un camp , ce qu'un bon
 capitaine ne doit iamais faire. Il n'y a
 pas encores trois mois , vous l'auiez
 entendu , car tout le monde le sçait ,
 les deux beaux combats , que nous
 fismes à pied & à cheual en la plaine
 vis à vis de Samfre , contre les Ita-
 liens premierement , & puis contre

*Replique
 d'un sieur de
 Montluc
 à monsieur
 de S. Pol.*

les Espagnols en dix iours : ayant monsieur d'Auffun quinze iours avant qu'il fut prins, combattu & deffaict toute vne compagnie d'Allemands. Regardez donc nous qui sommes en cœur & eux en peur, nous qui sommes vainqueurs & eux vaincus, nous qui les desestimons cependant qu'ils nous craignent, quelle difference il y a d'eux à nous ? Quand sera-ce doncques que vous voulez que le Roy baille congé de combattre, sinon lors que nous sommes en l'estat, auquel nous nous trouuons à present en Piedmont ? Ce ne sera pas quand nous aurons esté battus, qu'il le doive faire : mais à present que nous sommes coustumiers de les battre. Il ne nous faut faire autre chose, sinon de bien aduiser de ne les aller assaillir dans vn fort, comme nous fîmes à la Bicquoue. Mais monsieur d'Anguyen a trop de bons & de vieux capitaines, pour faire vne telle erreur : & ne sera question, sinon de chercher le moyen de les trouuer en campagne rase, où il n'y ait haye ni fossé, qui nous puisse garder de venir aux mains : & alors (Sire) vous entendrez des plus furieux combats, que iamais ayent esté. Et

*Faute
faite à la
Bicquoue.*

*Promesse
de la vi-
ctoire.*

vous supplie tres humblement ne vous attendre à autre chose , sinon d'auoir nouuelles de la victoire. Et si Dieu nous fait la grace de la gagner (comme ie me tiens assure que nous ferons) vous arresterez l'Empereur & le Roy d'Angleterre sur le cul , & ne sçauront quel party prendre. Monsieur le Dauphin continuoit plus fort en riant à me faire signe , qui me donnoit encores vne grande hardiesse de parler : tous les autres parloient & disoient , que le Roy ne se devoit aucunement arrester à mes paroles. Monsieur l'Admiral ne dit iamais mot : mais se sous-rioit , & croy qu'il s'estoit apperceu des signes que monsieur le Dauphin me faisoit ; estant presque vis à vis l'un de l'autre. Monsieur de Sainct Pol recharge encore , disant au Roy : quoy , Monsieur , il semble que vous voulez changer d'opinion , & vous attendre aux paroles de ce fol enragé ? Auquel le Roy respondit , disant , foy de Gentil-homme , mon cousin , il m'a dit de si grandes raisons , & me represente si bien le bon cœur de mes gens , que ie ne sçay que faire. Lors ledict Seigneur de saint Polluy dit : ie voy bien que vous estes

desia tourné (Il ne pouuoit voir les signes que monsieur le Dauphin me faisoit : car il auoit le dos tourné à luy , comme faisoit monsieur l'Admiral) Surquoy le Roy adressant sa parole audict Sieur Admiral luy dict , qu'est-ce que luy en sembloit. Mon-
Aduis de monsieur l'Amiral.
sieur l'Admiral se print encores à souffrire , & luy respondit , Sire , voulez-vous dire la verité ? vous auez belle enuie de leur bailler congé de combattre. Je ne vous assure ray pas , s'ils combattent , du gain ny de la perte , car il n'y a que Dieu qui le puisse sçauoir : mais ie vous obligeray bien ma vie & mon honneur que tous ceux-là qu'il vous a nommez , combattront & en gens de bien , car ie sçay ce qu'ils valent pour les auoir commander. Faiçtes vne chose , nous cognoissons bien que vous estes à demy gagné , & que vous penchez plus du costé du combat , qu'au contraire , faiçtes vostre requeste à Dieu & le priez , qu'à ce coup vous vueille aider & conseiller , ce que vous devez faire. Alors le Roy leua les yeux au ciel ,
Priere du Roy à Dieu.
& ioignant les mains iettant le bonet sur la table , dict : Mon Dieu ie te supplie , qu'il te plaise me donner aujour-

d'huy le conseil de ce que ie dois faire pour la conservation de mon Royau-
me : & que le tout soit à ton honneur
& à ta gloire. Surquoy monsieur l'Ad-
miral luy demanda , Sire , quelle opi-
nion vous prent-il à present ? Le Roy
apres avoir demeuré quelque peu se
tourna vers moy , disant comme en

*Congé
pour la
bataille.*

s'escriant , Qu'ils combattent , qu'ils
combattent. Or doncques il n'en faut
plus parler , dit monsieur l'Admiral ,
si vous perdez , vous seul ferez cause
de la perte , & si vous gaignez , pa-
reillement : & tout seul en aurez le
contentement en ayant donné seul le
congé. Alors le Roy & tous se leve-
rent , & moy ie treffaillois d'aise. Sa
Maiesté se mit à parler avec monsieur
l'Admiral pour ma despesche , & pour
donner ordre au payement , dont nous

*Propos de
monsieur
de S. Pol
à Mont-
luc.*

auions faite. Monsieur de saint Pol
m'accosta & me disoit en riant ; fol
enragé , tu feras cause du plus grand
bien , qu'il pourroit venir au Roy , où
du plus grand mal. Ledit Sieur de
saint Pol ne m'auoit rien dict pour
hayne qu'il me portast : car il m'ai-
moit autant que capitaine de France ,
& de longue main , m'ayant cognu
du temps que i'estois à monsieur le

que me donnoit plus de hardiëſſe , de laquelle ie n'ay iamais eu faute , car la crainte ne me ferma iamais la bouche) Sire , dis-ie , nous ſommes de cinq à ſix mille Gaſcons comptez : car vous ſçavez que iamais les compa- *Gaſcons.* gnies ne ſont du tout complètes , auſſi tout ne ſe peut iamais trouver à la bataille : mais i'eſtime que nous ſerons cinq mille cinq cens , ou ſix cens Gaſcons comptez , & de cela ie vous en reſponds ſur mon honneur : tous capitaines & ſoldats vous bailleront nos noms , & les lieux d'où nous ſommes , & vous obligerons nos teſtes , que tous combattrons le iour de la bataille , s'il vous plaift de l'accorder , & nous donner congé de combattre. C'eſt choſe que nous attendons & deſirons il y a long-temps , ſans tant conniller. Croyez , Sire , qu'au monde il n'y a point de ſoldats plus réſolus que ceux-là , ils ne deſirent que de mener les mains. Il y a d'ailleurs treize *Suiſſes* enseignes de Suiſſes. Je cognois les ſix de ſainct Iulien , mieux que celles du Baron , leſquelles Fourly commande. J'ai veu faire la monſtre à toutes. Il y peut auoir autant d'hommes comptez parmy eux , que parmy nous. Ils vous

feront pareille promesse que nous ,
 qui sommes vos sujets , & vous en-
 voyeront les noms de tous , pour les
 envoyer à leurs cantons , afin que
 s'il y en a quelqu'un qui ne fasse son
 devoir , qu'il soit dégradé des armes.
 C'est chose à laquelle ils se veulent
 sous-mettre , comme ils m'ont assuré
 à mon départ. Et puis que c'est vne
 mesme nation , ie croy que ceux du
 Baron n'en feront pas moins. Vostre
 Majesté les a peu cognoistre à Lan-
 drechy. Voilà donc , Sire , neuf mil
 hommes ou plus , desquels vous pou-
 vez faire estat , & vous assurer qu'ils
 combattront iusques au dernier souf-
 pir de leurs vies. Quant aux Italiens
 & Prouenceaux qui sont avec mon-
 sieur des Cros , & aussi des Gruyens ,
 qui nous sont venus trouuer deuant
 Yurée , ie ne vous en assureray pas :
 mais i'espere qu'ils feront tous aussi
 bien que nous , mesmement quand
 ils nous verront mener les mains. Je
 leuois lors le bras en haut , comme
 si c'estoit pour frapper , dont le Roy
 se sous rioit. Vous deuez aussi auoir
 quatre cens hommes d'armes en Pied-
 mont , desquels ils'y en trouuera bien
 trois cens , & autant d'archers , qui

*Italiens ,
 Prouen-
 ceaux &
 Gruyens.*

*Hommes
 d'armes.*

congé : toutesfois à la fin sa Maieſté leur permist : lesquels n'empirerent la feste : car apres eux vindrent plus de cent gentils-hommes en poste , pour se trouuer à la bataille. Entr'autres les Sieurs de larnac , de Chastillon , depuis Admiral , le fils de monsieur l'Admiral d'Annebaut , le Vidame de Chartres , & plusieurs autres : desquels n'y mourust que monsieur d'Asfier , que j'aimois plus que moy-mesmes , & Chamans , qui avoit esté blessé , quand ie combattis les Espagnols en la plaine de Perpignan. Quelques autres en y eust de bleſsez , mais non qu'ils mourussent. Il n'y a Prince au monde , qui ait la noblesse plus volontaire , que la nostre. Vn petit sous-^{Louange de la Noblesse Française.}ris de son maistre , échauffe les plus refroidis sans crainte de changer apres vignes & moulins en cheuaux & armes , on va mourir au liêt , que nous appellons le liêt d'honneur.

Estant arriué au camp ie m'acquittay de ma charge enuers monsieur d'Anguyen : & luy presentay mes lettres du Roy , qui fut grandement reſiouy : & me dit ces mesmes mots en m'embrassant , ie ſçauois bien que tu ne nous apporterois pas la paix. Or

*Retour
du sieur
de Mont-
luc en
Piedmôt.*

sus , mes amis , dit-il à ceux qui estoient aupres de luy , à ce que vous voyez , il faut faire. Je luy racomptay la difficulté , qu'il y auoit eu d'auoir le congé , & que le Roy seul en estoit cause. Ce qui nous devoit plus encourager à bien faire au combat. Il fut aussi tres-aisé , quand ie luy dis que les Seigneurs sus-nommez venoient apres moy , estant bien certain qu'encores plusieurs viendroient apres eux , comme ils firent , me recommandant ledict Seigneur , que ie m'allasse acquitter enuers tous les Colonels , Capitaines de gens d'armes , cheuaux legers , & de gens de pied , de la charge que le Roy m'auoit donnée. Ce que ie fis , n'y ayant cognu homme , qui ne se reioüist grandement , leur faisant bien au long entendre l'assurance que i'auois donnée au Roy de la victoire. Je ne me contentay pas d'en parler aux chefs , mais en parlay aux particuliers , les assurant que nous serions tous recompensez du Roy. Et faisois la chose plus grande qu'elle n'estoit. Il faut souuent mentir pour son maistre. Pendant mon sejour monsieur d'Anguyen boucla Carignan , ne le pouuant emporter de

*Carignan
bouclé.*

force sans beaucoup de perte , campant cependant à Vimeus & Carmagnolle : & bientoſt apres l'arrivée de ceſte Nobleſſe , le Marquis de Guast partiſt avec ſon camp le Vendredy ſainct , d'Aſt vint loger à la montagne pres Carmagnolle : & le iour de Paſques partit pour venir à Serizolles. La compagnie du Comte de Tande eſtoit ce iour-là de garde. Le capitaine Vaurines en eſtoit Lieutenant , lequel manda à monſieur d'Anguyen , que le camp marchoit , & que l'on oyoit les tabourins clairement. Monſieur d'Anguyen me commanda de monter à cheual , & que ie couruſſe deſcou-
rir le tout , pour en porter nouvelles certaines , ce que ie fis. Le capitaine Taurines me bailla vingts ſallades. J'allay ſi auant , que ie deſcouvris la cauallerie , qui paſſoit au long des bois de l'Abbaye Deſteffarde , & oyois les tabourins les vns marcher auant , & les autres en arriere. Cela me mit en peine de deſcouvrir ce que ce pouuoit eſtre. A mon retour trouvay monſieur d'Anguyen , Meſſieurs de Chaſtillon qui a eſté Admiral , de Dampierre , de S. André , Deſcars pere de ceux-cy , d'Affier , & de l'ar-

*Le ſieur
de Mont-
luc deſ-
couvre les
ennemis.*

nac , dans la chambre dudiect Seigneur d'Anguyen parlant à luy , ayans faict porter leurs armes sur les liets dans ladite chambre : & luy rapportay ce que i'en auois veu. Alors tous ces Seigneurs luy dirent , Allons , Monsieur , allons les combattre aujourd'huy qui est bon iour , car Dieu nous aidera : lors me commanda lediect Seigneur , que i'allasse dire à Messieurs de Tais , & de Saint Iulien , de mettre les regimens en campagne : & envoya vn autre à la gendarmerie & cauallerie en faire de mesmes , ce qui fust fait tout incontinent , & nous mismes hors Carmagnolle en vne plaine tirant à Serizolles , & là tout le monde se mist en bataille. Monsieur de Mailly Commissaire de l'artillerie fust aussi-tost là avec l'artillerie que pas vn de nous. Nous oyons les tabourins des ennemis aussi clair presque comme les nostres. Je ne vis à ma vie camp si volontaire , ni soldats si desireux de combattre , que cestuy-là , sauf quelques-vns des grands de l'armée , qui persecutoient tousiours M. d'Anguien de ne hazarder point , & luy mettoient deuant , la perte que ce seroit au Roy s'il perdoit la bataille , laquelle

quelle peut-estre pourroit causer la perte du Royaume de France. Autres luy mettoient en teste qu'il deuoit combattre : de sorte qu'ils mettoient en tel trouble ce pauvre Prince , qui estoit encores bien ieune , qu'il ne sçauoit de quel costé se tourner. Vous pouuez penser si ie me passionnois , & si i'eusse parlé haut , si c'eust esté bille pareille. Encores ne me-peus-je tenir de parler. Les Seigneurs qui estoient venus de France tenoient tous le party de combattre. Je pourrois bien nommer qui estoient & les vns & les autres si ie voulois , mais ie ne le veux faire : car ie ne me suis pas mis à escrire pour dire mal de personne. Mais monsieur l'Admiral de Chastillon , & monsieur de Iarnac , qui sont encores en vie , le sçauent aussi bien que moy. Les vns & les autres auoient raison , & n'estoient poussez d'aucune peur : mais seulement la crainte de perdre tout les retenoit en bride : & tel peut estre , comme i'ay veu souuent , opine contre sa volonté , & contre la pluralité des voix : afin qu'apres il puisse dire , si la chose succede mal , ie n'estois point de cest aduis : ie l'auois bien dit ,

*Le fleur
d'Anguyé
en doute
sur la ba-
taille.*

*Diffimula-
tion
parmy les
guerriers.* mais ie n'en fus pas creu. He qu'il y
a de tromperie au monde ! & en
nostre mestier , plus qu'en nul autre
qui soit.

Ainsi que nous deuions marcher
pour aller combattre , il y en eust
quatre ou cinq qui tirerent à part
monsieur d'Anguyen , descendans à
pied , & l'entretinrent se pourmenant
plus de demie heure. Tout le monde
grinsoit les dents de ce qu'on ne mar-
choit. Enfin leur conclusion fut que
tous les regimens de gens de pied se
retireroient à leurs logis , comme
aussi l'artillerie & la gendarmerie , &
que monsieur d'Anguyen avec quatre
ou cinq cens cheuaux , & partie des
capitaines qui estoient de son conseil
s'en iroient sur la plaine de Serizolles
descouvrir le camp de l'ennemi , que
i'amenerois apres lui quatre cens ar-
quebuziers , & tout le demeurant au
logis. Je vis lors vn monde de per-
sonnes desesperez : & croy que si
Dieu eust tant voulu pour monsieur
d'Anguyen qu'il fust marché , il en
eust emporté la bataille sans grande
difficulté : car les tabourins que i'a-
uois ouy retourner en arriere , c'es-
toient tous les Espagnols qui alloient

retirer deux canons , qui s'estoient
engagez sans pouuoir tirer auant ni
arriere : & n'eussions trouué rien à
combattre que les Allemans , Italiens ,
& la cauallerie , laquelle ni le Mar-
quis mesme , ne nous pouuoit eschap-
per. Et comme nous eusmes demeuré
plus de trois heures vis à vis des enne-
mis , qui estoient en vne plaine entre
Sommeriue & Serizolles , lesquels ne
pensoient rien moins que de combat-
tre (& dit le Marquis à monsieur de
Termes depuis estant prisonnier, com-
me il m'a raconté , que iamais il n'a-
uoit eu tant de peur d'estre perdu ,
que ce iour-là : car le meilleur de son
esperance , estoit en l'arquebuzerie Es-
pagnolle) monsieur d'Anguyen s'en
retourna à Carmagnolle aussi mal con-
tent , que Prince fust iamais : & à la
descente d'un bois retournant audict
Carmagnolle ie luy dis en passant ,
present Messieurs de Dampierre & de
S. André , ces mots : Monsieur , Mon-
sieur , ce matin quand vous vous estes
leué , que pouuiez-vous demander à
Dieu autre chose , que ce qu'il vous
a donné aujourd'huy , qui est de trou-
uer en pleine campagne sans haye ne
fosse vos ennemis , ce que vous auez

*Peur du
Marquis
de Guast.*

*Propos de
sieur de
Montluc
à mon-
sieur
d'An-
guyen.*

*Diffimula-
tion
parmy les
guerriers.* mais ie n'en fus pas creu. He qu'il y
a de tromperie au monde ! & en
nostre mestier , plus qu'en nul autre
qui soit.

Ainsi que nous deuions marcher
pour aller combattre , il y en eust
quatre ou cinq qui tirerent à part
monsieur d'Anguyen , descendans à
pied , & l'entretinrent se pourmenant
plus de demie heure. Tout le monde
grinsoit les dents de ce qu'on ne mar-
choit. Enfin leur conclusion fut que
tous les regimens de gens de pied se
retireroient à leurs logis , comme
aussi l'artillerie & la gendarmerie , &
que monsieur d'Anguyen avec quatre
ou cinq cens cheuaux , & partie des
capitaines qui estoient de son conseil
s'en iroient sur la plaine de Serizolles
descourir le camp de l'ennemi , que
i'amencerois apres lui quatre cens ar-
quebuziers , & tout le demeurant au
logis. Je vis lors vn monde de per-
sonnes desesperez : & croy que si
Dieu eust tant voulu pour monsieur
d'Anguyen qu'il fust marché , il en
eust emporté la bataille sans grande
difficulté : car les tabourins que i'a-
uois ouy retourner en arriere , c'es-
toient tous les Espagnols qui alloient

retirer deux canons , qui s'estoient engagez sans pouuoir tirer auant ni arriere : & n'eussions trouué rien à combattre que les Allemans , Italiens , & la cauallerie , laquelle ni le Marquis mesme , ne nous pouuoit eschapper. Et comme nous eusmes demeuré plus de trois heures vis à vis des ennemis , qui estoient en vne plaine entre Sommeriue & Serizolles , lesquels ne pensoient rien moins que de combattre (& dit le Marquis à monsieur de Termes depuis estant prisonnier, comme il m'a raconté, que iamais il n'auoit eu tant de peur d'estre perdu , que ce iour-là : car le meilleur de son esperance , estoit en l'arquebuzerie Espagnolle) monsieur d'Anguyen s'en retourna à Carmagnolle aussi mal content , que Prince fust iamais : & à la descente d'un bois retournant audict Carmagnolle ie luy dis en passant , present Messieurs de Dampierre & de S. André , ces mots : Monsieur , Monsieur , ce matin quand vous vous estes leué , que pouuiez-vous demander à Dieu autre chose , que ce qu'il vous a donné aujourd'huy , qui est de trouuer en pleine campagne sans haye ne fossé vos ennemis , ce que vous auez

*Peur du
Marquis
de Guast.*

*Propos de
sieur de
Montluc
à mon-
sieur
d'An-
guyen.*

tant désiré ? Je vois bien que vous voulez plustost croire ceux qui vous conseillent de ne combattre , que ceux qui vous conseillent de combattre. Alors il commença à renier , & dit qu'il n'en croiroit plus personne que foy-mesmes , à quoy ie cognus bien que ie l'auois mis en colere : ie rechargeay en cheminant , disant , & non Monsieur non ; de par Dieu n'en croyez personne que vous-mesmes : car nous sçauons bien que vous ne desirez autre chose que le combat , & Dieu vous aidera : & m'en allay ainsi droict à Carmagnolle fasché , me souuenant de ce que i'auois tant asseuré le Roy en son Conseil , & dès que ledit sieur arriva à Carmagnolle , il appella tous ceux qui entroient en son Conseil. Je trouuay à mon arriuée tous les capitaines de nostre regiment mutinez , iusques aux soldats , lesquels demandoient paye : mais on les amusa sur l'arriuée de monsieur de Langey ,

*Le sieur
de Mont-
luc char-
gé des ca-
pitaines
de parler
à mon-
sieur
d'An-
guyen.*

qui portoit quelque argent. Je fus prié par monsieur de Lamolle l'aîné , qui avoit deux enseignes , lequel fust tué le lendemain , que ie parlasse à monsieur d'Anguyen pour tous , & ils m'aduouieroient. Nous voilà tous dans

la salle : & par fortune Messieurs de Dampiere & de S. André n'estoient encores entrez , qui nous trouuerent tous mutinez , & nous dirent ces mots , Ayez patience , ie vous prie , iusques à ce que Monsieur sera hors du Conseil : & ie croy qu'ils lui auoient parlé par le chemin : car ie trouuay monsieur d'Anguyen au milieu d'eux , & ainsi entrerent dans la chambre , & ne tarda gueres qu'ils sortirent. Monsieur de Dampierre sortit le premier , qui nous trouua tous à la porte de la chambre. Et pour ce que monsieur d'Anguyen venoit apres luy , en me regardant il mist la main à la bouche , en signe que ie ne disse mot. Monsieur d'Anguyen passa tout en courroux droit à sa chambre , & les autres Colonnels & Capitaines chacun à son logis , & ne bougeasmes point. Incontinent apres Messieurs de Dampierre & de S. André sortirent en la salle , & nous dirent ces mots , Allez vous en à vos logis , preparez vous : car nous combattrons demain : en sortant nous regardions ceux qui vouloient qu'on combattit , lesquels se rioient deuers nous autres , qui nous donna aussi esperance de combattre.

*Resolution
du
combat.*

Car le soir que j'accompagnay monsieur de Dampierre à son logis, il me dit la proposition qu'avoit fait monsieur d'Anguyen au Conseil, qui fut sur l'erreur qu'il cognoissoit auoir fait de ne combattre point, ayant perdu vn aduantage qu'il ne pourroit recouurer, & qu'il les prioit tous de le considerer & se resoudre de combattre. Alors il y en eust qui commencerent à discourir ce qu'ils luy auoient dit auparauant de la perte que le Roy feroit, avec plusieurs autres choses & raisons pour l'empescher: d'autres tenoient l'opinion qu'ils auoient tousiours suiue, qu'il falloit donner la bataille. Mais monsieur d'Anguyen, qui se vid estre tombé en mesme dispute qu' auparauant, se mit en colere, & dit qu'il estoit resolu de combattre à quelque prix que ce fut: & que s'il y auoit homme qui voulut plus disputer le contraire, il ne l'estimeroit iamais tel qu'il l'auoit estimé. Alors vn qui l'auoit tant empesché, respondit, O monsieur est-ce vne resolution que vous auez prise de combattre? Ouy, dit monsieur d'Anguyen. Or donc respondit l'autre, il n'est pas question de disputer autre chose: &

*La bataille
resolue.*

arrestèrent que chacun se retireroit en sa charge : & qu'une heure deuant iour nous serions en la mesme plaine , qu'estions le iour deuant , pour marcher droit où les ennemis seroient rencontrez , ce qui fust fait , remontrant cependant aux Capitaines & soldats , que le payement se feroit mal à propos à la teste de l'ennemy , & qu'il falloit attendre. Ce fut vne ruse pour amuser ceux qui demandoient de l'argent. Et pource que le iour deuant nous les auions laissez en la plaine , qui est entre Serizolles & Sommeriue , monsieur d'Anguyen ne sçauoit bonnement , s'ils estoient à Sommeriue ou à Serizolles , combien que le capitaine de Sommeriue luy auoit mandé , que le camp vouloit loger là. Le Seigneur Francisco Bernardin enuoya trois de ses cheuaux legers vers ledict Serizolles , & allerent si pres , qu'ils descouurirent le camp qui estoit en armes , & les tambourins commençoient à sonner. Ce qui les auoit fait retourner à Serizolles , c'estoit pour attendre les Espagnols , qui estoient allez au deuant des deux canons , comme desia i'ay escrit. Monsieur de Termes en tourna

*Ruse pour
amuser
les soldats
qui de-
mandoient
paye.*

renuoyer trois ou quatre des siens aussi, & cependant nous marchions par deffous tirant à Sommeriue : & quand les cheuaux légers furent reuenus, & porterent les mesmes nouuelles, nous tournasmes à main gauche, & montasmes sur la plaine, où estoit toute l'armée, nous fismes alte.

Le sieur de Montluc conduit l'arquebuzerie.

Et là monsieur d'Anguyen, & monsieur de Tais me baillerent à conduire toute l'arquebuzerie. Je le remerciay tres-humblement de l'honneur qu'il me faisoit, & que j'esperois avec l'aide de Dieu m'en acquiter si bien, qu'il auroit occasion d'en demeurer content : & autant en fis-je à monsieur de Tais, qui estoit mon Colonel : lequel vint commander aux Capitaines & Lieutenans, que ie voudrois prendre qu'ils m'eussent à obeïr, comme à luy mesmes. Or ie prins quatre Lieutenans, qui furent le Breuil, que j'ay cy deuant nommé, le Guisquet, le capitaine Lienard, & le capitaine Fauas, qui estoit le mien. Ausquels Fauas & Lienard ie baillay le costé de main droicte, & moy avec les autres deux allay à la gauche tirant à la maisonnette, qui fut tant combattuë, & fut ordonné que les Suisses & nous combattrions

combattrions ensemble à l'auant garde, que monsieur de Botieres commandoit, lequel peu auant le bruit de la bataille auoit esté r'appellé de sa maison. La bataille deuoit estre conduite par monsieur d'Anguien, ayant sous sa cornette les ieunes Seigneurs venus de la Cour. En l'arrieregarde commandoit monsieur Dampierre, où estoient quatre mille Gruyens, & trois mil Italiens, conduits par les Sieurs du Dros & des Cros, ensemble tous les guidons & archers des compagnies. Or il y auoit vn coutau en pendant du costé de Serizolles & de Sommeriue. C'estoit vn taillis non gueres espois. Les premiers des ennemis que nous vismes entrer en la plaine venir deuers nous, ce furent les sept mil Italiens, que le Prince de Salerne conduisoit, & à leur costé trois cens lanciers commandez par Rodolphe Baglion, qui estoient au Duc de Florence: l'escarmouche commença par ce coutau, & dans le pendant les ennemis auoient faict alte vis à vis de nous: & comme ceste escarmouche fut attaquée, ie baillay vne troupe au capitaine Brueil, qui estoit celle du plus pres de moy, & au capitaine

*Ordre
pour la
bataille
donné à
Serizolles
le 11.
Auiil
1544.*

Gasquet la dernière, à deux cens pas les vnes des autres, & de la mienne ie baillay quarante ou cinquante arquebuziers à vn mien sergent nommé Arnaut de Saint-clair, homme vaillant & qui sçauoit bien prendre son party, & ie les soustenois. Estant à la maison ie descouuris trois ou quatre troupes d'arquebuziers Espagnols, qui venoient la teste baissée pour gagner la maisonnette : & les capitaines Fauas & Lienard combattoient les Italiens, au valon à main droicte. L'escarmonche commença de tous les deux costez, & par fois me ramenoient iusques à la maison, autrefois ie les ramenois à eux iusques à leur troupe : car il s'en estoit meslé vn autre avec la première : & sembloit que nous iouissions aux barres. A la

*Escar-
monche.*

fin ie fus contrainct faire marcher le capitaine Brueil à moy : car ie voyois toutes les troupes assemblées avec vne troupe de caualerie à leur costé. Je n'auois pas vn homme de cheual avec moy : toutesfois i'auois aduertuy monsieur d'Anguyen, que leur caualerie estoit avec leur arquebuzerie, qui venoit à moy. Baste, que personne ne vint de long-tems : de façon

que ie fus contrainct quitter la maison, non sans grand combat, qui dura long temps. Je renuoyai le capitaine Brueil à son mesme lieu. L'escarmouche dura de trois à quatre heures sans iamais cesser. Iamais on ne vid mieux faire. M. d'Anguyen m'enuoya M. d'Aussun, me commandant que ie regagnasse la maison, qui ne me faisoit auantage ni defauantage. Je lui respondis, allez dire à M. d'Anguyen qu'il m'enuoye de la cauallerie pour combattre ceste cauallerie, qui est a costé de leurs arquebuziers, laquelle il voyoit aussi bien que moy, car ie ne suis pas pour combattre cauallerie & infanterie ensemble en campagne raze. Alors il me dict, il me suffit, que ie le vous aye dit : & tourne en arriere & le va dire à monsieur d'Anguyen, lequel derechef m'enuoya monsieur de Moneins pour me dire qu'en vne sorte ou autre il vouloit que la regagnasse, avec lequel il vint le Seigneur Cabry frere du Seigneur Mauré, menant soixante cheuaux tous lanciers, & Monsieur de Moneins qui en pouuoit auoir enuiron vingt cinq, ne faisant encores que commencer à dresser sa compagnie. Je lui respondis tout de

*Confession
tion de
sieur de
Montluc.*

mesme qu'à monsieur d'Auffin, & que ie ne voulois point estre cause de la perte de la bataille, mais que s'ils vouloient aller combattre ceste cauallerie, qui estoit au costé de leurs arquebuziers, que ie regagnerois bien la maison. Alors ils me respondirent, que j'auois raison, & qu'ils estoient tous prests, & incontinent ie mande au capitaine Brueil, qu'il vint à moy, & au capitaine Gasquet qu'il se mit en sa place, & incontinent le capitaine Brueil se mit à main droite, la cauallerie au milieu : & marchasmes le trot droict à eux, car nous n'estions pas à trois cens pas les uns des autres. Pour cela l'escarmouche ne cessoit iamais : & comme nous aprochasmes de cent ou six vingts pas, nous commençames à tirer : & leur cauallerie tourna le dos, & leur infanterie aussi : & vis tous leurs lanciers tout à vn coup tourner le dos se retirans dans leurs troupes. Incontinent monsieur de Moneins & le Seigneur Cabry s'en allerent à monsieur d'Anguyen pour luy dire ce qu'ils auoyent veu de leur cauallerie, & que s'il ne m'amenoit de la cauallerie pour me faire espaule, ie ne pouuois faillir d'estre rompu. Le renuoye

les capitaines Brueil & Gasquet en leurs lieux. Il y auoit vn petit marets aupres de Serizolles , & vn grand chemin creux , qui empeschoit , qu'ils ne pouuoient passer , pour venir à nous en bataille. Or le marquis de Guast auoit fait passer six pieces d'artillerie , lesquelles desia estoient bien auant deça le marets , & comme il vist ses gens repoussez , il eust crainte que tout le camp suiuit , & qu'il perdit son artillerie. Il fist passer promptement les Allemans ce marets & chemin creux : & comme il fut en la plaine , ils se remirent en bataille , car ils n'auoient sçeu passer qu'en desordre : & cependant la cauallerie & arquebuzerie Espagnole vindrent à moy , comme auparavant , & n'ayant point de caualerie avec moy ie fus contraint leur quitter la place , & me retiray d'où i'estois party. Or ie descouris leurs Allemans & leur artillerie : & en mesme temps que ie me retirois , monsieur de Termes & le Seigneur Francisco Bernardin se vindrent mettre à main droite de nostre bataillon & sur le bord du coutau , qui estoient fort à l'estroict & vis à vis du bataillon des Italiens , car leurs lanciers estoient

*Disposi-
tion des
troupes
Françoi-
ses.*

vis à vis de nos picquiers : Monsieur de Botieres avec sa compagnie , & celle de monsieur le Comte de Tande à main gauche de nostre bataille : les Suisses estoient enuiron soixante ou quatre vingts pas au derriere de nous & vn peu à costé. Or nostre arquebuzerie , que les capitaines Fauas , & Lienard conduisoient , aucunesfois ils repoussioient les ennemis iusques à leur bataille , autresfois les ennemis les repoussioient aussi pres la nostre. Je sçay bien qu'il me falloit courir desfarmer nostre bataillon d'arquebuziers du costé de monsieur de Botieres qui fai'oient le flanc , & leur bailler pour faire la cargue , ce qu'ils firent : & d'une grande furie les repousserent iusques aupres de leur bataille & fut bon besoing , car leur arquebuzerie auoit presque gaigné le flanc de nostre cauallerie. Je cours là , ou ils estoient , & commençâmes une furieuse escarmouche , grande & forte : car toutes les trois troupes miennes nous meslâmes , ce qui dura vne grand'heure.

*Grande
escarmou-
che.*

Or les ennemis auoient mis leurs pieces d'artillerie au costé de la maisonnette , qui tiroit en butte dedans

nostre bataille. Monsieur de Mailly s'auança avecques la nostre , & se mist auprès de nous , & commença à tirer à eux vers la maisonnette : car il ne pouuoit là où nous tenions l'escarmouche , sans tuer des nostres , & regardant deuers nostre bataille , ie vis monsieur de Tais qui commençoit à marcher les piques baissées droit aux Italiens. Ie courus à luy , & luy dis , où voulez-vous aller , Monsieur , où voulez vous aller ? Vous allez perdre la bataille : car voicy les Allemans qui vous viennent combattre : & vous prendront par flanc. Les capitaines estoient cause de cela , lesquels luy crioient menez nous au combat, Monsieur , il nous vaut mieux mourir main à main , que d'estre tuez à coups d'artillerie.

C'est ce qui estonne le plus , & bien souuent fait plus de peur que de mal : ^{Le canon fait plus de peur} mais si est-ce qu'il me creust , & les ^{que de mal} priay mettre tous le genouil à terre & leurs picques bas : car ie voyois les Suisses derriere couchez tout de leur long , qui ne paroissoient rien : & de là ie m'en cours à l'arquebuzerie. Or commençoient desia leurs arquebuziers se retirer derriere la maison , &

comme ie voulois marcher droit à eux , ie descouris le front de la bataille des Allemans , & soudain ie dis aux capitaines Brueil & Gasquet qu'ils se retirassent peu à peu vers l'artillerie. Et falloit faire place aux picquiers pour venir aux mains. Et m'en cours à nostre bataille , & à mon arriuée leurs dis.

*Propos
du sieur
de Mont-
luc aux
soldats.*

O mes compagnons , combattons bien , que si nous gagnons la bataille , nous nous pouuons faire estimer plus que iamais les nostres n'ont faict : Car il ne se trouuera aux histoires , que les Gaulois ayent iamais combattu les Germains picque à picque , qu'ils n'ayent esté deffaicts , & pour nous marquer de ceste honorable marque , que de valoir plus que nos predecesseurs n'ont valu , cela nous doit donner double courage de se battre pour vaincre , & faire cognoistre à nos ennemis ce que nous valons. Souuenez-vous , compagnons , de ce que le Roy nous a mandé , & la gloire que ce nous fera de nous presenter à luy apres la victoire. Or monsieur , dis-ie à monsieur de Tais , il est temps de se leuer , comme il fit promptement. Je commençay à crier haut , Mes

*Cecy est
pardon-
nable à
un guer-
rier non
versé aux
histoires.*

compagnons , peut-estre qu'il n'y a icy gueres de gens qui se soient trouuez en bataille. Si nous prenons la picque au bout du derriere , & nous combattons du long de la picque , nous sommes deffaits : car l'Allemand est plus dextre que nous en ceste maniere. Mais il faut prendre les picques à demy , comme fait le Suisse , & baïsser la teste pour enfermer & pousser en auant , & vous le verrez bien estonné. Alors monsieur de Tais me crioit , que ie courusse au long de la bataille leur faire prendre les picques de ceste sorte , ce que ie fis. Les Allemands marchoiẽt grand pas droict à nous. Je m'en courus deuant la bataille , & mis pied à terre , car i'auois laissé vn mien lacquay tousiours deuant le bataillon avec ma picque. Et comme monsieur de Tais , & les capitaines me virent descendu , tous crierent à vne fois , Remontez capitaine Montluc , remontez , & vous nous conduirez au combat. Alors ie leur respondis , Que si i'auois à mourir ce iour là , ie ne pouuois mourir en vn plus honorable lieu qu'avec eux , la picque au poing. Je criay au capitaine la Burte Sergent Maior , qu'il courust

*Aduis du
sieur de
Montluc
sur le
combat.*

touſiours au tour du bataillon , quand nous nous enſerrerions , & qu'il criſt luy & les ſergens derriere & par les coſtez , Pouſſez ſoldats , pouſſez : afin de nous pouſſer les vns les autres , & ainſi vinſmes au combat. L'Allemand venoit à nous grand pas & trot , de ſorte que leur bataille eſtoit ſi grande , qu'il ne ſe pouuoient ſuiure : & y voyons de grandes fenestres & des enſeignes bien derriere. Et tout à coup nous nous enſerrafmes au moins vne bonne partie : car tant de leur coſté , que du noſtre , tous les premiers rangs , ſoit du choc ou des coups furent portez par terre. Il n'eſt pas poſſible pour des gens de pied , de veoir vne plus grande furie. Le ſecond rang & le tiers furent cauſe de noſtre gain : car les derniers les pouſſoient tant qu'ils furent ſur les leurs. Et comme noſtre bataille pouſſoit touſiours les ennemis ſe renuerſoient. Je ne fus iamais ſi habile & ſi diſpoſt , & me fuſt bon beſoin : car ie donnay plus de trois fois du genoüil à terre. Les Suiffes furent fins & accors : car iuſques à ce qu'ils nous virent de la longueur de dix ou douze picques , il ne ſe leuerent point ; & apres coururent furieux comme

*Grande
& ſu-
rieuſe
charge.*

sangliers , & donnerent par flanc :
 Monsieur de Botieres par le quanton :
 Monsieur de Termes, & le Seigneur
 Francisco donnerent à Rodolphe Ba-
 glion en mesme temps , & le renuer-
 ferent : sa cauallerie se mist en route.
 Les Italiens qui virent leur cauallerie
 rompue , & les Lansquenets & Alle-
 mans renuersez & en route , com-
 mençerent à prendre la descente du
 vallon , & gaigner tant qu'ils peurent
 droict au bois. Monsieur de Termes *Le fient*
 eust son cheual tué au choc , lequel *de Ter-*
 par fortune se trouua par terre engagé *mes près.*
 bien auant , de sorte que les Italiens le
 prindrent & l'emmenèrent , aussi
 n'auoit-il gueres bonnes iambes.

Il faut noter que le Marquis de
 Guast auoit fait vn bataillon de cinq
 mille picquiers , qui estoient deux
 mille Espagnols , & trois mille Alle-
 mans , estant ceux-là que le Comte
 Laudron auoit mené en Espagne du
 nombre de six mille , où ils auoient
 demeuré dix ans ou plus n'ayant
 guieres qu'ils estoient reuenus , & qui
 parloient aussi bon Espagnol , que
 Espagnols naturels. Il auoit fait ce
 bataillon pour abattre les Gascons :
 car il disoit , qu'il craignoit plus nostre

300 *Comm. de M. B. de Montluc,*

bataillon , que pas vii des autres. Et auoit opinion que ces Allemans , qui estoient tous hommes d'eslite defferoient nos Suiffes. Et mist à la teste de ceste bataille trois cens arquebuziers seulement , comme enfans perdus , lesquels il auoit reserués pour cest effect , & tout le reste tint l'Escar-mouche. Et comme il fut aupres de la maisonnette du costé des Allemans il voit les Gruyens qui estoient tous armez à blanc. Il pensa que ce fussent les Gascons , & leur diët , *Hermanos , hermanos , a qui estant lous Gascones , sarraes à ellos.* Ils ne furent iamais à deux cens pas de luy , qu'il apperceust nostre bataille , qui se leuoit , & cogneust son erreur : mais il n'y pouuoit plus remedier , nous portions tous armes noires. Ceste bataille de cinq mil picques s'en alla le grand pas droit aux Gruyens. Il falloit qu'ils passassent à costé de monsieur d'Anguyen , lequel Seigneur fust mal conseillé : car il donna avec la gendarmerie tout au trauers du bataillon , les autres par flanc. Et là fust tué & blessé beaucoup de gens de bien & des principaux , comme monsieur d'Assier , le Sieur de la Rochechouard , & plusieurs

Le Marquis de Guast de-cen.

Erreur de monsieur d'Anguyen.

Les Seigneurs d'Assier , de la Rochechouard tués.

autres , & encore plus à la seconde recharge. Il y en eut qui passerent & repasserent au trauers , mais tousiours il se r'allioient , & vindrent en ceste maniere aux Gruyens , qui furent bien tost renuersez sans tirer vn seul coup de picque. Et là moururent tous leurs capitaines & Lieutenans , qui estoient au premier rang , & fuirent droict à monsieur des Cros. Mais ce bataillon d'Espagnols , & d'Allemans suyuoient tousiours au grand trot leur victoire , & renuerferent ledit Sieur des Cros : Le sieur des Cros tué. & là y mourust , & tous les capitaines. M. d'Anguyen ne le peut secourir , pource que presque tous les cheuaux de sa cauallerie à ces deux furieuses , mais Monsieur d'Anguyen, rompu. trop inconsiderées charges , estoient blesez , & s'enalloient le pas par la campagne à costé des ennemis. Il estoit au desespoir , maudissant l'heure que iamais il auoit esté né voyant la fuite de ses gens de pied , & qu'à peine luy restoit il cent cheuaux pour soustenir le choc. M. de Pignan de Montpellier (qui estoit à luy) me dist que deux fois il se donna de la pointe de l'espée dans son gorgerin , se voulant offenser soi mesmes. Et me dist au retour , qu'il s'estoit veu en tel estat

lors , qu'il eust voulu qu'on luy eust donné de l'espée dans la gorge. Les Romains pouuoient cela , mais non pas les Chrestiens. Chacun en disoit lors sa ratelée. Nous estions à la paille iusques au menton , & aussi aises que nos ennemis marris. Retournons aux coups : car il y en auoit à donner & à prendre. La lascheté des Gruyens luy porta beaucoup de perte de ce costé. Je ne vis iamais de plus grands grües que ces gens là , indignes de porter armes , s'il ne se sont rendus plus courageux. Ils sont voisins des Suisses , mais il n'y a non plus de comparaison , que d'un asne à un cheual d'Espagne. Ce n'est pas tout d'auoir des hommes en compte , il faut auoir du bon creu , car cent en valent mille. Un braue & vaillant capitaine avec mille hommes , dont il s'asseure , passera sur le ventre à quatre mille.

*Lascheté
des Gru-
yens.*

*Le Mar-
quis de
Guast
rompu.*

Tout ainsi comme monsieur d'Anguyen voyoit massacrer ses gens sans les pouuoir secourir , le Marquis de Guast voyoit faire le mesmes aux siens par vne pareille fortune. Voyez comme elle se mocquoit de ces deux chefs d'armée. Car comme il vid Rodolphe Baglion renuersé & ses Alle-

mans pareillement , il print sa caual-
lerie & se retira deuers Ast , monsieur
de sainct Iulien , qui seruoit de maistre
de camp & de Colonel des Suisses , se
trouua à cheual , & à la verité dire ,
il estoit foible de sa personne , n'ayant
pas grand'force de porter grand far-
deau d'armes à pied : il vist renuerfer
leur bataille de l'un costé , & la nostre
de l'autre. Et auant qu'aller à mon-
sieur d'Anguyen , il nous vid Suisses &
Gascons dans ces cinq mille Allemans
& Espagnols tuans à toutes mains. Et
alors il tourna en arriere , & trouua
monsieur d'Anguyen pres du boistirant
à Carmagnolle assez mal accompa-
gné : & luy cria , Monsieur , Mon-
sieur , faictes tourner visage : car la
bataille est gagnée : le Marquis de
Guast est en route , & tous les Ita-
liens & les Allemans en pieces. Or
desia ce bataillon d'Allemans & d'Es-
pagnols auoient faict alte , se tenans
pour perdus , quand ils virent ,
qu'homme de pied ni de cheual ne
venoit à eux : & cogneurent bien
qu'ils auoient perdu la bataille , &
commencerent à prendre à main
droict à la Montagne , d'où ils estoient
partis le iour deuant. le pensois estre le

*Monsieur
d'Angu-
yen se re-
tire , pen-
sant la
bataille
perdue.*

*Ruze du
sieur de
Montluc.*

plus fin capitaine de la troupe , d'auoir inuenté de mettre vn rang d'arquebuziers entre le premier & le second rang , pour tuer les capitaines du premier. Et auois dict à monsieur de Tais trois ou quatre iours auparauant , que plustost que pas vn des nostres mourust , ie ferois mourir tous leurs capitaines du premier rang. Et ne luy voulus dire le secret , iusques à ce qu'il m'eust baillé à conduire l'arquebuzerie , & alors il appella la Burthe Sergent Maior, & luy dist, qu'incontinent fist election des arquebuziers , & qu'il les y mist , & à la verité ie ne l'auois iamais veu ny ouy dire , & pensois estre le premier qui l'eust inuenté : mais nous trouuâmes qu'ils auoient esté aussi accors que nous , car ils y en auoient mis comme nous. Lesquels iamais ne tirerent , comme ne firent les nostres , que ne fussions de la longueur des picques. Là se fist vne grande tuerie. Il n'y auoit coup , qui ne portast.

Or monsieur d'Anguien ayant entendu le gain de la bataille qu'il tenoit pour perduë , apres la route de ceux de son costé , & de ces lasches Gruyens , car pour les asseurer , il s'estoit mis

mis pres d'eux , se mist à la queue de ces Allemans & Espagnols. Cependant plusieurs de ceux qui auoient prins l'effroy se r'allierent pres de luy.

Tromperies en la guerre.

Tel faisoit bien l'empreslé , qui n'a gueres fuyoit : tel auoit rompu la bride à son cheual , pour en ietter la faute sur luy. Peu auant la bataille par bonne fortune il auoit mandé à Sauillan chercher trois compagnies d'Italiens fort bonnes pour se trouuer à la meslée , lesquelles estans à Reconis ouyrent l'artillerie , & cogneurent que la bataille se donnoit. Ce qui fust cause , qu'ils prindrent tous les arquebuziers qu'ils purent à cheual , & vindrent tousiours courans si à propos , qu'ils trouuerent monsieur d'Anguien qui fuyuoit les ennemis , n'ayant vn seul arquebuzier avec luy , lesquels mettant pied à terre , se mirent sur leur queue , & ledict Seigneur d'Anguien avec la cauallerie , tantost aux costez , tantost à la teste poussant la victoire. Il nous enuoya vn homme de cheual en diligence : afin que tournissions à luy , car il falloit encores combattre.

Monsieur d'Anguien pour suit la bataille.

Et nous trouua le messager à la Chapelle pres la porte de Serizolles , ayant acheué de tuer avec vne telle furie ,

Grande tuerie à la bataille de Serizolles.

qu'il n'y demeura vn seul homme en vie, qu'un Colonel nommé Aliprand de Mandruce, frere du Cardinal de Trente, qui demeura dans les morts ayant sept ou huit playes. Caubois cheual leger de monsieur de Termes reuenant à trauers des morts le vid, qui estoit encores en vie, mais tout nud: lequel parla à luy, & le fist porter à Carmagnolle pour rachepter monsieur de Termes s'il estoit en vie, comme il fust faict. Les Suisses entuant & ruant leurs grandes coutelades crioient tousiours Montdeui, Montdeui, là où on leur auoit faict mauuaise guerre. Bref, tout ce qui fist teste fust tué de nostre costé.

*Des Suisses se ven-
gent de ce
qu'on leur
fit à
Montde-
ui.*

Après auoir entendu ce que monsieur d'Anguien nous mandoit, incontinent la bataille des Suisses & la nostre tourna deuers luy: ie ne vis iamais deux bataillons si tost refaits. car de nous mesmes nous nous mîmes en bataille en cheminant, & allions tousiours ioints coste à coste. Les ennemis qui s'en alloient le grand pas tirant tousiours arquebuzades, & faisant tenir nostre cauallerie au large, nous commencerent à descourir. Et comme ils virent que nous leur estions

*Autre dé-
faite des
Impe-
riaux.*

à quatre ou cinq cent pas, & la caual-
 rie sur le deuant qui les vouloit char-
 ger, ils ietterent les picques, se iettans
 entre les mains de la cauallerie. Les
 vns en tuoient, & les autres en sau-
 uoient, y en ayant tel qui en auoit
 plus de quinze ou vingt autour de luy,
 les fuyans tousiours de la presse pour
 crainte de nous autres, qui voulions
 tout esgorger : mais si ne sceurent-ils
 faire si bien, qu'il n'y en eust plus de
 la moitié de tuez : car tant que nos
 gens en pouuoient trouuer, autant en
 estoit despesché. Or veux- ie escrire
 ce que ie deuins.

Monfieur de Valence mon frere
 m'auoit enuoyé de Venise vn cheual
 Turc, vn des plus braues coueurs
 que ie vis iamais. l'auois vne opinion,
 laquelle tout le monde ne m'eust sceu
 oster, c'est que nous deuions gagner
 la bataille. Et baillant mondit cheual
 à vn seruiteur que i'auois, vieux sol-
 dat, auquel ie me fiois beaucoup, luy
 dis qu'il se tint tousiours derriere le
 bataillon de nos picquiers, & que si
 Dieu me faisoit la grace que i'eschap-
 passe de l'escarmouche, ie mettrois
 pied à terre pour combattre avec nos
 picquiers, & s'il voyoit quand nous

*Fantaisie
 du sieur
 de Mont-
 luc.*

viendrions aux mains , que nostre bataille fust renuerfée , qu'il fist estat que i'estois mort , & qu'il se sauuaft sur le cheual. Et au contraire s'il voyoit que nous renuerfiffions la bataille des ennemis , qu'il fuiuft tousiours , sans se mesler , à la queuë de nostre bataillon : & comme ie cognoistrois la victoire ie laisserois l'exécution : pour venir à luy prendre mon cheual , pour aller apres la cauallerie voir si ie pourrois prendre quelque bon prisonnier. L'auois mis vne folie en ma teste , que ie deuois prendre le Marquis de Guast, ou mourir , me fiant en la vitéffé de mon cheual , & m'imaginois d'en tenir vne bonne rançon ou recompense du Roy. Comme i'eus fuiui vn peu la victoire , ie demeuray derriere , pensant trouuer mon homme. Aussi estois-ie si las de frapper & courir , & encore de crier , que ie n'en pouuois plus. Deux gros mâtins d'Allemands me cuiderent aflommer : m'estant deffaict de l'vn , l'autre gaigna au pied : mais ce ne fust gueres loing. Certes ie vis là donner de beaux coups. Ie cherche mon pendart de valet , mais ce fust en vain , car comme leur artillerie tiroit à nostre bataille , & donnoit souuent

par dessus nostre bataillon, & alloit donner sur le derriere, cela fit oster mon homme d'où ie le pensois trouver, lequel s'alla mettre derriere les Suisses. Et voyant le desordre des Gruyens & Prouenceaux, il pensa que nous estions de mesmes, qui fust cause qu'il s'enfuit iusques à Carmagnolle. Voila comme on se trompe au choix qu'on faict : car ie n'eusse iamais pensé qu'il eust eu si tost la peur aux talons. Je trouuay le capitaine Mons n'ayant qu'un seruiteur, qui auoit mieux fait que le mien : car il luy auoit gardé vne petite haquenée, sur laquelle il me monta en croupe, car i'estois fort las, & allasmes tousiours voyant tuer ces Allemans. Et comme nous fumes mandez de monsieur d'Anguien mesmes pied à terre, allans à pied iusques à l'entiere deffaicte des Espagnols & Allemans : & soudain ie vis venir mon homme, & luy reprochay qu'il s'en estoit fuy : il me respondit qu'il n'estoit pas tout seul, ains auoit esté bien accompagné de plus grands que luy, & des mieux vestus, & que ce qu'il en auoit faict estoit pour leur tenir compagnie. Sa plaisanterie appaisa ma colere : car il ne s'en fallust

*Plaisante
responce
du valet
du sieur
de Mons-
lus.*

310 *Comm. de M. B. de Montlus,*
guerres que ie ne iouasse des miennes.
Nous nous ralliasmes vingt ou vingt-
cinq cheuaux de monsieur de Termes,
du Seigneur Francisco Bernardin , &
du sieur Mauré , & allasmes le grand
galop apres le Marquis de Guast : &
avec nous se mist vn gentil-homme ,
duquel ie ne sçay le nom , estant toutes
fois de ceux qui estoient venus de la
Cour en poste pour se trouuer à la
bataille. Et trouuasmes deux cheuaux
legers qui emmenoient prisonnier le
Seigneur Charles de Gonzague : &
l'auoient prins à la queue de leur
troupe : qui nous donna encore plus
de courage de picquer apres. Et com-
me nous descourusmes la troupe &
de bien pres , nous vismes qu'ils
s'estoient recogneus : & s'estoient ser-
rez s'en allans au trot les lances en
main. Lors ie dis à ceux qui estoient
avec nous , Ces gens se sont recogneus,
Il ne feroit pas bon donner dedans ,
& me doubte qu'en pensant prendre
quelque prisonnier , ils nous pren-
droient à nous , comme l'Anglois. Et
ainsi nous en retournasmes : & ay opi-
nion encore que si mon poltron de
valet ne m'eust failly , i'eusse prins
quelque homme d'autorité. Et en

*Les enne-
mis ral-
liés sur
leur re-
traicte.*

nous en retournant ce gentil-homme s'accosta de moy & me dict : Iesus , capitaine Montluc , en quel peril a esté ceste bataille d'estre perduë ? moy qui n'auois veu ny ouy dire aucune chose du desordre , & pensois que les derniers que nous auions deffaicts estoient ceux de Carignan , qui fussent fortis , pour se trouuer à la bataille , alors ie luy respondis , en quelle sorte sommes nous entrez en aucun peril ? car tout aujourd'huy nous auons eu la victoire entre nos mains. le voy bien , dit il , que vous n'avez pas veu le grand desordre qui y a esté , & me conta ce qui estoit aduenu à la bataille. Que comme ie prie à Dieu qu'il m'aide , s'il m'eust donné deux coups de dague , ie croy , que ie n'eusse point saigné. Car le cœur me ferra , & fist mal d'ouyr ces nouuellës : & demeuray plus de trois nuicts en ceste peur , m'esucillant sur le songe de la perte.

Ainsi arriuasmes au camp , où estoit monsieur d'Anguien. le courus à luy , & luy dis ces mots , faisant bondir mon cheual , Et pensez vous , Monsieur , que ie ne sois aussi bon homme à cheual qu'à pied ? Alors il me dit ,

estant encores tout triste , Vous ferez
toufiours bon en vne sorte & en autre.

*Monsieur
d'Angu-
yen fait
Cheualier
le sieur de
Montluc.*

Il se baissa & me fist cest honneur de
m'embrasser , & me fist sur l'heure
Cheualier , dont ie me sentiray toute
ma vie honoré pour l'auoir esté en ce
iour de bataille , & de la main d'un
tel Prince. Mal'heureux fut celuy qui
nous l'osta si pauurement. Mais laissons
cela. Lors ie luy dis , Monsieur , vous
ay ie aujourd'huy serui à vostre con-
tentement ? car monsieur de Tais luy
auoit desia dict que i'auois combattu à
pied avecques eux. Il me respondit ,
Oüy , capitaine Montluc , oüy ie n'ou-
blieray iamais ce que vous auez fait ,
& ne le celeray pas au Roy. Alors ie
luy respondis , Monsieur , il est en
vous de me faire le plus grand bien ,
que vous scauriez faire à gentil-hom-

*Le sieur
de Mont-
luc de-
mande
auoir la
charge de
porter les
nouuelles
de la vic-
toire.*

me du monde. Alors il s'escarta me
tirant à part , afin que personne ne
l'ouït , & me demanda , qu'est-que
ie voulois qu'il fist pour moy. Le luy
dis que c'estoit qu'il m'enuoyast por-
ter les nouuelles du gain de la bataille
au Roy : & qu'il n'y auoit homme
qui le deust faire si tost que moy ,
veu ce que i'auois dit à sa Maïesté & à
son Conseil pour obtenir le congé de
combattre :

combattre : & que les derniers mots que i'auois dit au Roy, estoient qu'il s'attendit seulement d'auoir nouuelles de la victoire. Il me tourna redire qu'il estoit raison, que i'y allasse plustost que tout autre. Et ainsi retourna toute l'armée victorieuse à Carmagnolle. Mais comme ie pensois estre despesché pour partir la nuit, on me dist que monsieur Descars auoit gagné tout le monde, pour qu'il y allast. Monsieur de Tais m'auoit aussi promis, mais à la fin se laissa gagner, comme monsieur d'Anguyen, qui estoit le plus grand mal'heur qui me pouuoit aduenir. Car ayant vaincu le Conseil du Roy & leur deliberation, & que sa Maiesté m'auoit faict cest honneur que de condescendre à mon opinion, & luy apporter les nouuelles de ce que ie lui auois promis & asseuré dans si peu de iours, ie laisse à penser à vn chacun, si i'eusse esté le bien venu : & quel tort me fust faict, mesmement ayant commandé ce iour là vne grande & honorable charge, & au contentement du Lieutenant du Roy. C'eust esté vn bonheur à moy, & beaucoup d'honneur aussi d'apporter au Roy ce que ie lui auois promis & asseuré. Il

n'y eust ordre , il fallust passer par là : à peine me peut-on appaiser. L'auois beau me fascher & remonstrier le tort qu'on me faisoit. Cent fois depuis me suis-ie repenty que ie ne me desrobay le soir mesme. Je me fusse rompu le col , ou i'y fusse arriué le premier pour en porter la nouuelle au Roy. Je m'asseure qu'il ne m'en eust senty que bon gré , & eust faict ma paix avec les autres. Or quittay-ie alors toute ma fortune , n'esperant iamais plus estre rien , & vins demander congé à Monsieur d'Anguien pour m'en venir en Gascogne. Ledit Seigneur me promettoit beaucoup de choses , me cognoissant fasché , monsieur de Tais me faisoit de mesmes me voulant retenir : mais ie fis tant qu'ils me donnerent congé avec promesse de retourner. Et pour estre plus asseurez de moy , ledit sieur d'Anguien me fist prendre vne commission de luy , pour promptement mettre aux champs mille ou douze cens hommes pour amener en Piedmont : afin de remplir nos compagnies , car à la verité nous auions perdu beaucoup de gens.

Or il faut dire à present dequoy eueust le gain de ceste bataille. Je ne le

ſçay que par monsieur de Termes <sup>De l'Em-
pereur &
du Roy
d'Angle-
terre.</sup> meſmes, auquel le Marquis de Guast l'auoit raconté eſtant au liēt bleſſé d'vne arquebuzade à la cuiſſe. Il lui dit, que l'Empereur & le Roy d'Angleterre ſ'eſtoient accordez, qu'au meſme temps il deuoient entrer dans le Royaume de France chacun par ſon coſté : & que l'Empereur luy auoit enuoyé les ſept mille Allemans pour eſtre ſi fort, que monsieur d'Anguyen ne l'ozaſt combattre, & apres marcher droit à Lombrias pour dreſſer vn pont ſur la riuiera, & mettre dans Carignan les viures, qu'il portoit avec luy, & tout ce qu'il pourroit aſſembler : & en tirer les quatre mille Eſpagnols & Allemans, & y laiſſer quatre mille Italiens, pour ſ'en reuenir vers Yurée. Et deuoit r'enuoyer à l'Empereur les ſept Colonnels Allemans avec leurs gens. Et qu'il lui demeureroit environ cinq mille Allemans & autant d'Eſpagnols, & quatre mille Italiens. Et qu'en meſme temps que l'Empereur & le Roy d'Angleterre entreroient, il deuoit deſcendre par le val Doſte par où il tiroit droit à Lion, où n'y auoit que les gens de la ville, ni aucune fortereſſe, & eſtant

entre les deux riuieres^r, pensant dominer toutes les terres de monsieur de Sauoye, le Dauphiné, & la Provence. Tout cecy me conta monsieur de Termes, apres qu'il fust retourné, qui n'estoit pas entreprinse, qui ne fust bien aisée à estre faicte, si nous n'eussions gaigné la bataille, à laquelle moururent de douze à quinze mil hommes des ennemis. Le gain fust grand, tant pour les prisonniers, que pour le bagage, qui estoit tres-beau & riche. Et outre cela plusieurs se rendirent d'effroy, & enfin Carignan: dequoy ie ne toucheray les particularitez, parce que ie n'y estois pas. Si on eust sçeu faire profit de ceste bataille, Milan estoit bien esbranlé. Mais nous ne sçaurions iamais faire valloir nos victoires. Il est vrai que le Roy estoit assez empesché à garder son Royaume de deux si puissans ennemis.

*Quel profit appor-
ta la ba-
taille de
Serizol-
les.*

Sa Maiesté estant aduertie du grand appareil, que faisoit & l'un & l'autre, retira la plus part des forces de Piedmont, où i'arriuay lors que monsieur de Tais auoit esté mandé pour emmener tout ce qu'il pourroit: car ie n'arrestay gueres chez moy. ie ne haïssois rien tant que ma maison, &

quoy que i'eusse resolu pour le tort qui m'auoit esté faict , de n'aller plus en ce pais-là : si est-ce que ie ne m'en peus empescher. Monsieur de Tais auoit faict election de vingt & deux enseignes , nos bandes furent bien remplies. Et encore se dressa vne compagnie nouuelle , que monsieur de Tais donna au capitaine Castetgeloux pour l'amour de moy , qui m'auoit aidé à mener les gens , & qui auoit porté mon enseigne au Royaume de Naples : & commençames à marcher en France , despartans nos compagnies de cinq en cinq. l'amenois la premiere troupe , & m'en allay deuant à Suzanne , pour garder que les soldats ne se missent deuant , & pour mettre ordre aux estappes : & en trouuay beaucoup par les chemins , qui fust cause que ie cheminay. La nuit i'arriuy à Villaume deux heures deuant iour : & à l'hostellerie ou i'allay descendre , trouuay le Seigneur Pierre Colonne , que le capitaine Renouard amenoit prisonnier au Roy , suiuant la capitulation de Carignan. Ils estoient desia leuez. Lediect capitaine Renouard me mena en la chambre dudiect Seigneur , lequel me dist à l'ar-

*Arri-
vement
du sieur
de Mont-
luc, avec
le Sei-
gneur
Pierre
Colonne.*

rivée, qu'il sçauoit bien que c'estoit moy qui auois rompu le pont de Cargignan, & que i'auois conduict l'arquebuzerie à la bataille. Et discourant dudit pont, ie luy dis, que si les gens eussent fuiuy leur fortune, ils n'eussent trouué à combattre que moy, avecques quarante hommes au plus, & que nostre camp auoit esté tellement en desordre, que s'ils l'eussent poursuiuy, nous estions tous deffaicts. Le capitaine Renouard luy confirmoit aussi qu'il estoit vray. Alors il pensa vn peu, puis leua la teste vers moy, & me dict: *E voi diceti che se la nostra gente seguito hauessi la sua fortuna: no haueua à combattere piu di voi co quarante soldati, & hauessimo poste in fuga tutta la vostra gente. Io vi dico che si voi hauesti seguita la nostra m'haueresti messo fuori di Cargignano, per che la mia gente hauia pegliato il spauento cossi forte che la cita no era bastante di vasscurar li.* Et nous compta le grand desordre des siens: nous disant, qu'il auoit pensé autres-fois que les Espagnols n'auoient point de peur: mais qu'à ceste heure il cognoissoit bien, qu'ils en auoient autant que les autres. Et qu'il se trouua lors en telle extremité, qu'il fust contrainct luy-

mesmes se ietter à la porte , veoir s'il
 les pourroit arrester : mais ils le pen-
 ferent porter par terre. Et entrerent
 tous à telle foule , qu'ils mirent la
 porte presque hors des gons. Et comme
 ils furent tous entrez en ce desordre ,
 ie me iettay (disoit-il) sur la porte
 pour la fermer. Et cognoissant tous les
 capitaines nom par nom les appellois
 à m'aider : mais iamais homme ne s'y
 presenta , & sans vn mien seruiteur ,
 qui m'entendist crier , ie ne l'eusse
 sceu iamais fermer. Et le desordre fut
 si grand dans la ville , qu'il s'en ietta
 plus de quatre cents par dessus les
 courtines , lesquels le matin mou-
 roient de honte s'en retournant. Et
 voyla pourquoy ie vous dis que si vous ^{Grand}
 mesmes eussiez suiui vostre fortune , ^{effroy à}
 vous estiez maistre de la ville avecque ^{Cari-}
 quarante hommes. le cogneus par ce ^{gnan}
 qu'il me dist , le vieux prouerbe estre
 veritable , qui dict , Que si l'ost sça-
 uoit ce que fait l'ost , souuent l'ost
 defferoit l'ost.

Or encores qu'apres la reddition de
 Carignan les gens de la ville nous
 asseurassent de ce grand desordre ,
 nous ne pouuions adiouster foy , &
 mesmes le premier , au moins qu'il

fust si grand : car cela est estrange. Mais puis que le chef mesmes le confessoit , faut doncques croire , qu'il estoit vray : & qu'ils estoient poussez de quelque esprit : car nous ne leur faisons point de mal ayant autant de peur qu'eux , & peut estre plus. La nuit est vne chose effroyable , lors qu'on ne void , qui vous assaut. Cecy me fait conclure , que le tout m'aduient d'un grandheur : car hardiesse ne se peut cela appeler , ains plustost la plus grand'folie , que homme scauroit faire. Et croy qu'entre tous les heurs & fortunes , que Dieu ma donné , celle la en est vne des plus remarquables , & plus estranges. Mais suivons nostre dessein.

*Grande
leur &
force de
la France.*

Le desir de vengeance poussa l'Empereur à se rallier & liguier , contre la foy promise au Pape , avec le Roy d'Angleterre : lequel pour despit s'estoit faict Lutherien. Ces deux grands Princes auoient party , à ce qu'on disoit , le Royaume (comme le Marquis de Guast raconta au Sieur de Termes , & depuis ie l'aprins d'un gentil-homme Anglois à Boulogne) toutes-fois c'estoit disputer la peau de l'ours. La France bien vnice ne peut

estre conquise sans perdre vne douzaine de batailles , veu la belle noblesse qu'il y a , & les places fortes qui s'y trouuent. Et croy que plusieurs se trompent de dire , que Paris prins la France seroit perduë. C'est à la verité le thresor de ce Royaume , & vn sac inestimable : car les plus gros du Royaume y apportent tout , & croy qu'au monde il n'y a vne telle ville. On dit qu'il n'y a escu qui n'y doie dix sols de rente vne fois l'année. Mais il y a tant d'autres villes & places en ce Royaume , qui seroient bastantes pour faire perdre trente armées : de forte qu'il seroit aisé se ralier , & leur oster celle-là , avant qu'ils en eussent conquis d'autres , si le conquerant ne vouloit despeupler son Royaume pour repeupler sa conqueste. Je dis cecy , parce que le dessein du Roy d'Angleterre estoit de courir droict à Paris , cependant que l'Empereur entreroit par la Champagne. Leurs forces ioinctes estoient de quatre vingts mille hommes de pied , vingt mille cheuaux , auec vn nombre infini d'artillerie. Je vous laisse à penser si nostre Roy auoit dequoy songer à ses affaires. Certes ces pauures Princes ont plus de

*Les gran-
des forces
des enne-
mis.*

peine que nous : & croy qu'il fit bien de rappeler les forces de Piedmont : encor qu'il en y ait , qui disent que l'estat de Milan estoit perdu , & que l'Empereur eust rappellé ses forces pour le sauuer. Cela despend de l'euement. Tant y a , que Dieu voulust que ces deux Princes ne se peurent entendre entr'eux , chascun voulant faire son profit. Aux choses que i'ay veu & ouy dire , quand deux Princes entreprennent la conqueste d'un Royaume, iamais ils ne s'accordent : car chacun pense tousiours que son compagnon le veuille tromper , & sont en deffiance l'un de l'autre. Je n'ay pas fort veu les liures , mais i'ay ouy dire , qu'ainsi perdismes nous au commencement le Royaume de Naples : car celuy d'Espagne nous trompa. Ceste crainte & deffiance nous a sauuez , & en a bien sauué d'autres , comme les Historiens sçauent. Je craindrois plus vn grand feul , que non pas deux qui veulent partir le gasteau. Tousiours il y a du reproche , & deux nations ne s'accordent pas volontiers , vous le verrez icy ; l'Anglois s'arresta deuant Boulogne , laquelle luy fust laschement renduë par le Sieur de Veruin , qui en

*Boulogne
renduë.*

perdist la vie. Ce tableau deuroit estre deuant ceux qui entreprennent de tenir les places. Cela ne plaisoit pas à l'Espagnol , qui n'en rapportoit nul profit , & voyoit bien qu'il vouloit faire ses affaires.

Or monsieur de Tais nostre Colonel amena vingt & trois enseignes au Roy , qui estoient celles qui s'estoient trouuées à la bataille , ie tombé malade à Troyes , & arriuay au camp lors qu'il estoit pres de Boulogne. Là où ledict Sieur de Tais me bailla la

patante , que le Roy m'auoit enuoyée pour estre Maistre de camp. Il ne se fist rien , à tout le moins que ie m'y

Le sieur de Mont-luc maistre de camp.

veuille amuser , iusques à la camifade de Boulogne. Comme nous arriuasmes pres de la Marquise , monsieur le Dauphin , qui commandoit l'armée , trouua qu'il y auoit trois ou quatre iours , que la ville estoit prinse , combien que desia il le sçauoit , & que le Roy d'Angleterre s'estoit embarqué & auoit faict voile en Angleterre. Il est à

Le Roy d'Angleterre se retire.

presumer , que ce Prince s'en alla pour fuir le combat , pour ce que nous trouuasmes tout en desordre. Premièrement nous trouuasmes toute son artillerie deuant la ville en vne prairie ,

qu'il y auoit à la descente de la tour Dordre. Secondement fut trouué plus de trente barriques pleines de corselets, qu'estoit la munition qu'il auoit faict venir d'Allemagne pour armer les soldats, qu'il laissoit pour la garde de la ville. Tiercement il laissa toute la munition des vivres, comme farines, vins, & autres choses à manger. Nous trouuâmes tout en la ville basse: de sorte que si monsieur de Taligny (on m'a dict qu'il est encores en vie) pere de celui qui est Huguenot, & qui traictoit la paix pendant ces troubles, est celui-là qui fust prins en la camisade en la ville basse, dont n'en eschappa homme que luy, il tesmoignera qu'il n'y auoit pas vivres en la ville haute pour quatre iours: car luy-mesmes le me compta.

*La ca-
misade de
Bologne.*

L'occasion de la camisade, que nous donnâmes, fust telle. Vn beau fils de monsieur le Marechal du Bies, non pas ce beau monsieur de Veruin, mais l'autre du nom duquel ne me souuient, vint à monsieur de Tais, & luy compta qu'un sien espion, qui venoit de Boulogne, luy auoit asseuré qu'il n'y auoit encores rien à la ville haute, & que tout estoit bas: & que

si on entreprenoit promptement d'aller prendre la ville basse (ce qui estoit bien aisé) que dans huit iours , on auroit la haute , la corde au col. Et que si monsieur de Tais vouloit , il le meneroit le matin recognoistre le tout. Et disoit aussi cet espion , qu'il n'y auoit encores nulle bresche de la ville remparée , & que toute la ville estoit ouuerte , comme vn village.

Monsieur de Tais fust enuieux d'aller voir le tout , & m'y emmena avec luy , & ce beau fils de monsieur le Marechal. Nous pouuions estre cent chevaux de toutes nos compagnies.

*Les sieurs
de Tais
& de
Montluc
recognois-
sent la
ville.*

Nous arriuasmes iustement à la pointe du iour deuant la ville , laissant la tour Dordre deux ou trois cens pas à main droïcte , & vismes cinq ou six pavillons à la descente sur le grand chemin , qui va à la porte de la ville. Nous n'estions que cinq ou six chevaux : car les autres monsieur de Tais les auoit laissez derriere vne petite montaigne. Ce beau fils de monsieur le Marechal & moy descendismes iusques au premier pavillon , & passasmes à costé dans le camp à main gauche , & allasmes iusques au second , & de là nous descourismes

326 *Comm. de M. B. de Montluc,*
toute leur artillerie, n'en estant loin
qu'à quatre-vingt pas, & n'y vismes
iamais que trois ou quatre soldats
Anglois, qui se promenoient aupres
de l'artillerie, & audict second pa-
villon, nous oyons parler Anglois.
Lors ce beau fils dudict Seigneur Ma-
reschal m'en fist retourner vers mon-
sieur de Tais, lequel incontinent que
i'eus parlé à luy, descendit de là où
ie venois, & s'arresta avec ce gentil-
homme. Cependant le iour commen-
ça à paroistre grand: de sorte que les
sentinelles d'aupres de l'artillerie co-
gneurent que nous n'estions pas des
leurs, & donnerent l'alarme: & pour
tout cela nous ne vismes qu'hommes
sortir de la tour Dordre. Si est-ce que
l'on m'a dict depuis, que Dondellat,
que monsieur de S. Pol auoit nourri
page, estoit de garde à la tour. Et
ainsi nous nous en retournasmes.

Monsieur de Tais s'en alla trouver
monsieur le Dauphin, & monsieur
d'Orleans son frere avec cedit gen-
til-homme, & là arresterent qu'il
leur falloit donner le matin au point
du iour vne camifade: & que mon-
sieur de Tais avec nos compagnies
donneroit le premier par trois bres-

ches qu'il y auoit à la muraille , qui estoit du costé de nostre venue , c'estoient des bresches qu'on auoit faict pour plaisir. Le Reingraue pria monsieur le Dauphin , que luy & sa troupe d'Allemands donnassent avec nous : mais monsieur de Tais auoit desia promis au Comte Pedemarie , qu'il prieroit monsieur le Dauphin de le laisser donner avec luy , qui fust nostre malheur entierement. Car si les Allemans fussent venus avec nous , iamais les ennemis ne nous en eussent tirez , & eussent conuié beaucoup de gens , à plustost nous venir secourir qu'ils ne firent. Nous partismes de nuit avec des chemises sur nos armes : & rencontraimes le Reingraue avec tous ses Allemans prests à passer vn pont de bricque qu'il y auoit aupres de la Marquise , lequel il ne vouloit abandonner , ains vouloit passer apres nous , quelque promesse qu'il eust faite au Comte Pedemarie. De quoy monsieur de Tais aduertit monsieur le Dauphin. Cependant monsieur l'Admiral d'Annebaut arriua , & fist tant que le Reingraue se retira en a riere , nous laissant passer , & les t aliens apres , & quant à luy ne vouloit bou-

*La cam-
pale arre-
stée.*

*Le fleur
Dampier-
re,*

ger d'aupres de la bataille de la gendarmerie , qui estoit pres de la Marquise. Monsieur Dampierre qui estoit Colonel des Grisons vint iusques aupres de la tour Dordre , où il mist en bataille ses gens. Or m'auoit baillé monsieur de Tais vne troupe pour donner par le chemin , que le iour deuant nous auions recogneu , qui estoit à main droicte de luy. Je donnay à l'artillerie , & ceux qui estoient demeurez avec monsieur de Tais & les Italiens donnerent par ces trois bresches , & l'emporterent fort brauement. Et par là où estoit l'artillerie , n'y auoit ni porte ni bresche , qui fust cause que ie m'en allay tout au long de la muraille , du costé de la riuere ; & trouuay vne bresche de dix ou douze pas , par là où i'entray sans resistance aucune , & m'en allay droict à l'Eglise , où ie ne vis vn seul capitaine des nostres , sauf vn qui couroit le long de la riuere droit à ces bresches. Je l'appellay , mais il ne m'entendit point.

*Le fleur
de Tais
bleffé.*

Or il faut noter , que monsieur de Tais fust bleffé & contrainct se retirer. Je ne sçay que deuint le Comte de Pedemarie : mais on me compta apres

apres que tous les capitaines Gascons & Italiens estoient fortis de la ville , & n'y auoient point arresté , pour vn bruit qui leur vint , que les Anglois auoient gaigné les bresches par dehors la ville , comme il estoit vray : mais il n'y auoit pas deux cens hommes , qui estoient fortis de la ville haute par le dehors. Et encores me dit-on , que c'estoit Dondellet , qui se sauuoit de la tour Dordre droit à la ville. Toutes les enseignes demurerent dans la ville. Je n'apperçeus iamais rien de tout cecy : car ie croy que si ie me fusse apperçeu du desordre , ieusse fait comme les autres. Je ne veux pas faire le braue. I'y trouuay deux capitaines Italiens seulement avec leurs troupes & drapeaux deuant l'Eglise : & quand ie fus deuant icelle , ie m'amusay vn peu à combattre trois ou quatre maisons , où il y auoit force Anglois dedans , & les prins par force , & la pluspart sans armes. Les vns auoient des accoustremens de blanc & rouge : & les autres de iaune & noir. Il y auoit bien des soldats aussi , qui ne portoient pas ces couleurs : à la fin ie cogneus que tous ces vestus de liurées estoient pionniers , pour ce

qu'ils n'auoient point d'armes, comme ceux qui se deffendoient. Si y eust-il plus de deux cens hommes de morts en ces maisons : puis marchay droit à l'Eglise, où trouuay lesdicts capitaines Italiens, l'un nommé Cezar, & l'autre Hieronyme Megrin, & monsieur Dandelot, & monsieur de Nouailles, qui estoit Lieutenant de monsieur de Nemours, avec les Italiens : & leur demanday, où estoient tous nos capitaines : ils me responderent, qu'ils ne sçauoient qu'ils estoient deuenus. Le commençay à appercevoir qu'il y auoit du desordre, ne voyant vn seul homme de nos compagnies, que ceux qui estoient entrez avec moy, & enuiron cinquante ou soixante d'autres, qui s'estoient amusez à saccager & piller, & s'estoient ralliez avec moy au combat des maisons. Tout à vn coup voici vne grande troupe d'Anglois qui venoient la teste baissée droit à nous, qui estions deuant l'Eglise, & en la rue ioignant à icelle, criant, *vuho, goeht, the e*, c'est à dire, Qui va là ? le leur respondis en Anglois, *Afrind, Afrind*, qui veut dire, Amis, amis : car de toutes les langues qui se sont meslées parmy

*Desordre
en la ca-
misade de
Boulogne.*

nous, i'ai appris quelques mots, & passablement l'Italien & l'Espagnol, cela m'a par fois serui. Comme ces Anglois eurent fait d'autres demandes, & que ie fus au bout de mon Latin, ils poursuuiurent en criant, *Quil, Quil, Quil*: cest à dire, Tue, Tue, Tue. Alors ie criay aux capitaines Italiens, *Aiutate mi, & state appreso mi, perche io me ne vo assabir li, non bisogno lassiar mi inuestire*. Je tournay la teste baissée droit à eux, lesquels tournerent visage. Et les menay battant iusques au bout de la ruë: & tournerent tous à main droicte au long de la muraille de la ville haute, de laquelle on me tiroit de petites pieces, & force coups de fleches. Je me retire iusques aux Italiens; où ie ne fus plustost arriué, qu'ils vindrent encores pour me recharger: mais i'auois vn peu de courage, d'autant que ie les auois trouuez assez aisez à prendre la fuite, & les laissay venir iusques aupres de nous où ie les chargay. Et me sembla qu'ils la prindrent encores plus aisément. Je me retiray autrefois deuant l'Eglise; & alors commença vne si grande abondance de pluye, qu'il sembloit que Dieu me voulust

Les Anglois en fuite.

faire noyer : & vint d'une des bresches par là où nos gens estoient entrez dix ou douze enseignes , qui n'auoient pas six soldats avec eux , & avec moy en pouuois auoir autant. Alors vn des enseignes me dict que les bresches estoient prinſes , & que les capitaines estoient sauuez. Et ayant entendu cela ie dis aux deux capitaines Italiens , qu'ils tinſſent vn peu ce quanton , où estoit l'Eglise : car il y auoit vne muraille deuant la porte d'icelle , & que i'allois combattre la bresche par où i'estois entré : & que dès que i'aurois gaigné , ie les enuoyerois querir pour se retirer à moy : & si d'auenture les ennemis venoient à eux , qu'ils leur ſouuint comme i'auois fait , & qu'ils les chargeaſſent. Je m'en allay à la bresche , où ie vis deſia dix ou douze Anglois , deux deſquels baissaient la teste : les vns sauterent par la bresche , les autres tirerent à main droite au long de la muraille par dedans. Et comme nous fuſmes dehors en viſmes encores quinze ou vingt qui couroient contre nous au long de la muraille par dehors , & tournerent à main droite deuers les autres bresches par là où nos gens estoient entrez. Je priay vn

Gentil-homme de Bourgongne (il ne me souuient du nom) qui estoit monté sur vn cheual qu'il auoit gagné , qu'il allast chercher Cezar-port , & Hieronyme Megrin , ce qu'il fit volontiers , pourueu que ie luy promisse de l'attendre. Je lui assurai sur ma vie que mort ou vif il me trouueroit à ceste bresche. La pluye continuoit tousiours de plus en plus , où estant ledict Gentil-homme de retour , me dit qu'il n'auoit peu passer iusques à eux , & qu'ils estoient retirez dans l'Eglise , ou qu'ils estoient morts. Et tout à vn coup voicy venir droit à nous le grand trot au long de la muraille trois ou quatre cens Anglois , & nous trouverent sur le point que nous voulions rentrer pour aller secourir les Italiens , mais comme nous les vismes venir à nous , nous fusmes contraints de changer de propos.

Messieurs Dandellot , de Nouailles , & ce Gentil-homme de Bourgongne , & trois ou quatre autres ne m'abandonnerent iamais , depuis qu'ils m'eurent rencontré deuant l'Eglise , & bien leur en print : car ils fussent passez le mesme chemin des autres. Et comme les Anglois venoient de ceste

furie , il se print vn cry parmy nous , les vns me crioient que nous nous sauuiſſions vers la riuere , les autres vers la montagne : mais tout à vn coup ie me resolus de leur remonstrer , Qu'avez-vous affaire d'aller à la montagne ? il nous faut passer pres de la ville haute , car d'aller droict à la riuere , ne voyez-vous pas qu'elle croist & est desia si haute , que nous

Effroy
parmy les
François. nous noyerions tous ? que personne ne parle plus de cela , mais baïſſons la teste , car il faut combattre ceux-

Reso'u-
tion du
sieur Dan-
delot. cy. Monsieur Dandelot me dit tout haut , he capitaine Montluc , ie vous prie , combattons - les : car ce party est le meilleur. Il estoit homme fort courageux , c'est dommage qu'il se fit apres Huguenot. Je croy que c'estoit vn des braues Gentil hommes de ce Royaume. Nous allasmes droict à eux , & dès que nous arrivasmes de la longueur de quatre ou cinq picques , ils nous tirerent force coups de fiesches , & nous courusmes droict à eux pour les inuestir avec les picques : & n'y eust que deux arquebuzades de tirées , & tout incontinent tournerent visage , & s'enfuirent de là où ils venoient. Nous les poursuiuismes & de

Bien pres : & comme ils furent au quanton de la ville deuers leurs gens qui tenoient presque toutes nos enseignes enfermées, lesquels les voyant venir, & nous apres eux, abandonnerent les bresches pour les secourir, & lors se r'allians tous ensemble, vindrent courans droict à nous, qui estions tout au pied de la montagne de la tour Dordre. Je dis à monsieur Dandelot sauvez-vous contre la montagne, & aux enseignes & tous les soldats pareillement. Quant à moy ie voulus voir le succez du tout avec quatre ou cinq picquiers, me retirant vers vn ruisseau, qui estoit pres de l'artillerie. Et comme ils eurent abandonné les bresches pour venir à nous, nos enseignes sauterent dehors au pied deuers le vallon, par là où ils estoient venus. Et ainsi qu'ils furent au pied de la montagne, où monsieur Dandelot & les enseignes montoient, ils virent autrefois que nos enseignes estoient passées par les bresches, & que ledit Seigneur Dandelot avec les autres enseignes estoient desia à demy montagne. Ils cuiderent tourner autrefois apres les autres : & n'en purent atteindre au plus haut que huit

ou dix soldats , qu'ils taillèrent en pieces. Cinq ou six Anglois vindrent à moy : ie passay le ruisseau , où il y auoit eauë iusques au genoüil dessus le bord d'icelle. Ils me tirèrent quelques coups de fiesches , & m'en donnerent trois dans la rondelle , & vne au trauers de la manche de maille , que i'auois au bras droict , lesquelles pour mon butin ie portay à mon logis. Puis allay monter la montagne au derriere de la tour Dordre. Monsieur le Dauphin ayant monsieur d'Orleans son frere , & monsieur l'Admiral avec luy , faisoit marcher les Lansquenets pour nous secourir dans la ville ; mais auant qu'ils fussent pres , le desordre estoit venu , & trouuerent Messieurs Dandelot & de Nouailles avec les enseignes qui auoient monté la montagne.

*Le fleur
de Mont-
luc sort le
dernier de
Boulogne.*

Pendant ceste confusion monsieur le Vidame de Chartres , & mon frere monsieur de Lieus estoient venus iusques à bas , voir si on pouuoit entendre nouuelles de moy : mais ils furent bien ramenez : & dirent à monsieur le Dauphin , qu'ils tenoient pour tout certain que i'estois mort dans la ville : pource qu'ils auoient veu tous les capitaines ,

pitaines, sinon moy. Monsieur Dandelot arriua au bout de demie heure, auquel monsieur le Dauphin demanda s'il sçauoit ce que i'estois deuenue, il luy dit que ie les auois sauuez, & tous ceux qui estoient avec luy : mais que ie ne m'estois pas sçeu sauuer moy-mesmes, ce que i'eusse bien peu faire si i'eusse voulu. Ledit sieur Dandelot me tenoit pour mort, pensant que ie me fusse laissé attrapper aupres de leur artillerie, ou d'un nauire qu'il y auoit sur le ruisseau que ie passay, mais ie n'estois pas si sot, car i'appelle Dieu en tesmoing, qu'il me punisse, si de tout ce iour-là ie perdis iamais l'entendement. Et me seruit bien que Dieu me le conseruaist : car si ie l'eusse perdu nous eussions receu vne grande escorne : laquelle n'eussions sçeu couvrir, & i'eusse esté en grand danger de n'estre iamais Marechal de France. Nous eussions perdu toutes nos enseignes, & ceux qui les portoient avec. Lesquels toutesfois Dieu me fist la grace de sauuer. Deslors qu'on est saisi de la peur, & qu'on perd le iugement, on ne sçait ce qu'on fait, c'est la requeste principale que vous deuez faire à Dieu de vous garder

*Grand
iugement
du sieur
de Mont-
luc.*

*Instruc-
tion pour
vn hom-
me de
guerre.*

l'entendement : car quelque danger qu'il y ait , encores y a-il moyen d'en sortir , & peut-estre à vostre honneur. Mais lors que la crainte de mort vous oste le iugement , adieu vous dis. Vous pensez fuir à poupe que vous allez à prouë. Pour vn ennemy il vous semble que vous en voyez dix deuant vos yeux , comme font les yvrongnes , qui voyent mille chandelles au coup. Ole grand heur que c'est à un homme de nostre mestier , quand le danger ne luy oste le sens , il peut prendre son party & euter la mort & la honte. l'allay demander le soir le mot à monsieur le Dauphin , pour ce que monsieur de Tais estoit blessé : & comme ie vins deuant eux , monsieur d'Orleans , qui auoit tous-jours accoustumé de se ioier avec moy , comme faisoit bien monsieur le Dauphin , commença à chanter la camifade de Boulogne , & l'assaut de Couy pour les vieux soldats de Piedmont , se mocquant de moy , & me monstrant au doigt. Lors ie commençay à me courroucer , & maudire ceux qui en estoient cause. Monsieur le Dauphin rioit , & à la fin il me dit , Montluc , Montluc , vous autres ca-

*Propos de
Monsieur
le Dau-
phin au
sieur de
Montluc.*

pitaines ne vous pouuez aucunement excuser, que vous n'ayez mal faict. Comment, Monsieur, dis ie, auriez vous opinion que i'eusse fait faute? Si ie le sçauois, ie m'en irois tout à ceste heure me faire tuer dans la ville. Vrayement nous sommes bien fols de nous faire tuer pour vostre seruice. Surquoy il me dit, non, non, ie ne dis point vous, car vous estes le dernier capitaine qui estes sorti de la ville plus d'une heure apres les autres. Il me fit bien cognoistre quand il fut Roy, que ie n'auois point failly, pour l'estime qu'il fit tousiours de moy. Car quand il s'en alla en Piedmont, il m'enuoya querir par vn courier expres à ma maison, où ie m'estois retiré pour raison de quelque haine que Madame d'Estampes auoit conceuë contre moy, à cause de la querelle de Messieurs de la Chasteigneraye & Iarnac. Tousiours à la Cour il y a quelque charité qui se preste, & par malheur les Dames peuent tout: mais ie ne veux pas faire le reformateur. Madame d'Estampes en fit bien chasser de plus grands que moy, qui ne s'en vanterent pas, & m'estonne de ces braues Historiens qui

Erreur en la camifade de Boulougne. ne l'osent dire. Voilà le fucccez de la camifade de Boulougne, Que fi le camp eult marché à noſtre queuë, il ſe pouuoit tout loger dans la ville, & en quatre ou cinq iours, comme deſia i'ay dit, la ville haute eult eſté à nous. Que l'on le demande à monſieur de Teligny, ſi c'eſt luy qui fut prins priſonnier: & l'on verra ſi ie mens. Ie ne ſçay qui fut cauſe que monſieur le Dauphin ne marcha: mais ie diray bien tousjours qu'il ſe devoit faire: & ſçay auſſi qu'il ne tint pas à luy: mais ce ne ſeroient que diſputes d'en parler dauantage. Il ne faut qu'un poureux pour retarder tout le monde. S'ils fuſſent venus, les Anglois ne ſçavoient quel party prendre, ie les cognus gens de peu de cœur, & croy qu'ils vallent plus ſur l'eauë que ſur terre. Voyant l'hyver ſur les bras, monſieur le Dauphin ayant laiſſé monſieur le Mareſchal du Biez à Monſtreuil pour harraffer Boulougne, alla trouuer le Roy, lequel auoit auſſi appointé avec l'Empereur, s'eſtant vne ſi grande force évanouië, pour s'eſtre ces deux Princes mal entendus pour noſtre bonheur, i'entends l'Eſpagnol & l'Anglois. Honi ſoit-il qui

*Le Roy
appointé
avec
l'Empereur.*

les aimera iamais ny l'un ny l'autre. Trois mois apres ie quittay la Maistrise de camp , pour venir deffendre quelque bien , qu'un mien oncle m'auoit donné. Je fus en peine d'obtenir congé du Roy pour y venir : mais enfin monsieur l'Admiral me le fit donner , pourueu que ie lui fisse promesse de reprendre ledit estat , si ledit Sieur Admiral conduisoit l'armée. Il ne faillit pas , & me somma de ladite promesse , que ie lui auois faicte. Il obtint du Roy commission , laquelle il m'enuoya pour estre Maistre de camp de cinquante ou soixante enseignes que sa Maiesté fist leuer pour faire le voyage d'Angleterre. Lesquelles i'amenay au Havre de Grace entre les mains de monsieur de Tais. Or nous nous mismes sur mer. L'armée estoit composée de plus de deux cens cinquante voiles , & des plus beaux vaisseaux du monde avec les Galeres. Le desir que le Roy auoit de se venger du Roy d'Angleterre le fit entrer en vne extreme despence : laquelle enfin seruit de peu , quoique nous eussions prins terre , & depuis combattu les Anglois sur mer , où d'un costé & d'autre il y eut plusieurs vaisseaux mis

Le voyage d'Angleterre. qui fut en Iuillet

1545.

à fons. Deslors que ie vis à nostre depart embrazer le grand Carracon qui estoit, ce crois-ie, le plus beau vaisseau qu'il estoit possible, i'eus mauuaise opinion de nostre entreprinse. Et parce que pour mon particulier ie ne fis rien qui fut digne d'estre escrit, & que le General est assez discouru par d'autres, ie m'en tairay pour d'escrire la conqueste de la terre d'Oye : aussi nostre fait est plus propre sur la terre que sur l'eau, où ie ne sçais pas que nostre nation ait iamais gagné de grandes batailles.

Le François mal adroit sur mer.

Comme nous fufmes retournez de la coste d'Angleterre, & desembarquez au Havre de Grace, monsieur l'Admiral s'en alla trouuer le Roy & monsieur de Tais avec luy : & amena toutes les compagnies au fort d'Outreau deuant Boulongne, où le capitaine Ville-franche estoit demeuré avec les vieilles compagnies Maistre de camp, ayant eu la place que i'auois quittée. Le Marechal du Biez Lieutenant du Roy en ce pays-là estoit bien empesché, comme tesmoignera monsieur de saint Germain, que le Roy auoit baillé audit Sieur Marechal pour le soulager : car tous les

Le Marechal du Biez deuant Boulogne.

pionniers l'auoient laissé, s'estans desrobez, comme c'est l'ordinaire de ceste canaille, qui ne veille sur eux: & neantmoins ils auoient encores toute la courtine tirant au pont de Bricque à faire. Or ie veux escrire cecy, encore que ce ne soit matiere de combat, afin qu'il serue d'exemple aux capitaines.

Monsieur le Marechal, qui estoit ordinairement sollicité par le Roy de mettre ce fort en deffence pour bloquer Boulongne, me dit qu'il falloit que les soldats trauaillassent, puis que les pionniers manquoient. Je le remontray aux capitaines, & eux aux soldats. Lesquels tous d'une voix dirent qu'ils ne trauailleroient point, & qu'ils n'estoient point pionniers. De quoy monsieur le Marechal se trouua fort fasché & bien en peine, d'autant que ceste courtine lui demeueroit ouuerte, & que le Roy d'Angleterre auoit enuoyé nouveau renfort de gens à Boulongne. Or ledit sieur Marechal auoit enuoyé par tout le país chercher pionniers. Mais il n'en venoit point. Je me resolus de trouuer le moyen pour faire trauailler les soldats, qui fut de donner à

Les capitaines refusent de servir à la fortification.

chacun qui trauailleroit cinq fols ,
comme aux pionniers. Monsieur le
Mareschal me l'accorda fort volon-
tiers : mais, ie n'en trouuay pas vn ,
qui y voulut mettre la main. Voyant
leurs refus pour les conuier par mon
exemple , ie prins ma compagnie ,
celle de mon frere monsieur de Lieux,
& celles des capitaines Leberon mien
beaufrere , & Labit mon cousin ger-
main. Car ceux-là ne m'eussent osé
refuser. Nous n'auions pas faute d'ou-
tils , car monsieur le Mareschal en
auoit grande quantité , & aussi les
pionniers qui se desfroboient laissoient
les leurs dans vne grande tante , que
monsieur le Mareschal auoit faict
tendre , pour retirer leurs ferremens.
Comme ie m'en vins à la courtine ,
ie commençay à mettre la main le
premier à remuer la terre , & tous les
capitaines apres : i'y fis apporter vne
barrique de vin , ensemble mon dis-
ner , beaucoup plus grand que ie n'a-
uois accoustumé , & les capitaines le
leur , & vn sac plein de fols , que ie
monstray aux soldats : & apres auoir
trauillé vne piece , chaque capitaine
disna avec sa compagnie : & à chaque
soldat nous donnions demy pain , du

vin , & quelque peu de chair , en fa-
 uorisant les vns plus que les autres ,
 disant qu'ils auoient mieux trauaillé
 que leurs compagnons , afin de les
 encourager. Et apres que nous eusmes
 disné , nous nous remismes au trauail,
 en chantant iusques sur le tard : de
 sorte qu'on eust dit que nous n'auions
 iamais fait autre mestier. Apres trois
 thresoriers de l'armée les payerent à
 chacun cinq sols : & comme nous
 retournions aux tantes , les autres sol-
 dats appelloient les nostres pionniers ,
 gastadours. Lendemain matin le capi-
 taine Forcez me vint dire , que tous ^{Capitains} ^{Forcez}
 les siens y vouloient venir , & ceux
 de son frere qui est encore en vie aussi:
 lesquels ie receus tous & en fismes de
 mesmes comme les apperceuant , de
 sorte que le troisiéme iour tous y vou-
 loient venir : & en huit iours nous
 eusmes dressé toute ceste courtine.
 Tous les ingenieurs dirent à monsieur
 de saint Germain mesmes qui ne bou-
 geoit de l'œuure , que mes soldats
 auoient plus trauaillé en huit iours ,
 que quatre fois autant de pionniers
 n'eussent faict en cinq sepmaines. Et
 nottez que les Capitaines , Lieutenans
 & Enseignes ne bougeoient de l'œu-

346 *Comm. de M. B. de Montluc,*
ure, non plus que les soldats, & ser-
voient de sollicitateurs.

*Instruc-
tion pour
les capi-
taines.* J'ay voulu escrire ici cest exemple,
pour monstrier aux capitaines qu'il ne
tiendra aux soldats, qu'ils ne fassent
tout ce qu'on voudra. Mais aussi il
faut trouver les moyens de les y faire
faire de bonne volonté, & non de
force : mettez la main à l'œuvre le
premier, vostre soldat de honte vous
suivra, & fera plus que vous ne vou-
drez. Que si vous venez aux iniures
& bastonnades, ce sera lors que des-
pitez ils ne voudront mettre la main
à ce qu'ils ne sont tenus, à quoi quel-
quefois la nécessité nous force. O ca-
pitaines, mes compagnons, combien
& combien de fois voyant les soldats
las & recreus, ai-je mis pied à terre,
afin de cheminer avec eux, pour leur
faire faire quelque grande traicte.
Combien de fois ay-je beu de l'eau
avec eux, afin de leur monstrier exem-
ple pour pastir.

Croyez, mes compagnons, que
tout despend de vous, & que vos
soldats se conformeront à vostre hu-
meur : comme vous voyez ordinai-
rement. Il y a moyen en toutes cho-
ses, par fois il y faut de la rudesse,

mais ce ne doit estre contre le gros ,
 mais contre quelque particulier , qui
 voudra gronder , ou empescher les
 autres , qui sont en bonne volonté.
 J'ay fait sentir ma colere à quelque
 retif & rebours , dont ie m'en repens.
 Quelque temps apres monsieur le Ma-
 reschal du Biez entreprit de se saisir
 & ruiner la terre d'Oye , ayant tenté
 d'attirer l'Anglois en bataille , lequel
 n'en voulut manger. Toutes nos nou-
 uelles compagnies marcherent : car
 les vieilles ne bougerent du fort , pour
 la garde d'icelui. Et amena monsieur
 le Mareschal six ou sept pieces de
 grosse artillerie , & partismes le soir
 à l'improuiste : & allasmes reposer la
 pluspart de la nuit en vn bois , là
 où il y auoit de petits villages , qui
 auoient esté bruslez. Ceste entreprinse
 se fit contre l'aduis de tous les capi-
 taines de l'armée , pour l'esperance
 que ledict Sieur Mareschal auoit de
 donner vne bataille , ce qui attira plu-
 sieurs Princes & Seigneurs à venir de
 la Cour. Apres auoir perdu l'esperan-
 ce de veoir les Anglois en bataille ,
 monsieur le Mareschal delibera leur
 enleuer quelques forts en la terre
 d'Oye. Or comme ils furent fort pres

*Entrepri-
 se sur les
 forts des
 Anglois.*

de l'un d'iceux, monsieur le Marechal, Messieurs de Brissac & de Tais se mirent à part, il me semble que monsieur d'Estrée y estoit, estant lors sorti de prison, monsieur de Bordillon, & trois ou quatre autres, il ne me souvient du nom, & se mirent sur un petit tertre à l'ombre d'un arbre regardans de-là en hors, lequel desdicts bastions qui faisoient teste à nous, ils assauroient. Et cependant ie fis faire alte à toutes nos enseignes, pour attendre les derniers qui estoient encores à une lieue derriere. Or ie n'auois iamais esté là, comme n'ay esté depuis, mais i'escriray, comme il m'en souvient, l'affiette de leur fort.

*Descrip-
tion du
fort des
Anglois.*

Il falloit que ie descendisse environ trente ou quarante pas pour entrer dans un grand pré: & à main droicte il y auoit un bastion, & à un grand iect d'arquebuzes à main gauche, un autre, & par conséquent tout au long d'une courtine tirant deuers Calais (laquelle courtine n'estoit que de terre, & de la hauteur environ de deux brasses) il y auoit aussi deux grands fossés avec eauë iusques à la ceinture, & entre les deux fossés il y auoit une

leuée de terre. Cependant qu'ils se mirent au conseil sous cest arbre estant à main gauche de moy, ie prins les capitaines Fauas & Lamoyenne, ayant esté tous deux mes Lieutenans, & environ trois cens arquebuziers, auxquels ie baillay la premiere troupe. Je demeuray à leur queue, il sortit du fort bien cent ou six vingts Anglois, qui vindrent dans le pré, lesquels auoient mis cinq ou six mousquets sur leur terrasse entre les deux fosses, & nous tiroient fort & roide, ayant laissé entre lesdicts bastions & fosses vn petit chemin, par lequel n'y pouuoit passer qu'un homme de front pour entrer & sortir dans leur fort, se fiant qu'à la faueur des mousquets qu'ils auoient dans iceluy, que ceux qui estoient sur la terrasse, ne les oseroient charger. Nos gens commencent à arquebouser, & eux à coups de fleches: il me sembla qu'ils tournoient fort le visage vers leur retraicte: & estans sur vn petit courtant ie vins aux capitaines, & leur dis ces mots: compagnons ces gens ont fort le cœur à leur retraicte, ie voy bien que c'est sous l'esperance de leurs mousquets, chargez à eux de queue

*Assaut
au fort.*

& de teste : car ie vous suiuray. Il ne le fallut pas dire deux fois , car ie ne fus iamais retourné à ma troupe , que ie les vis meslez , & Anglois en fuite : i'arreste ma troupe pour les soustenir , si rien sortoit dauantage. Ce petit chemin estoit vn peu estroit , & ioignant le bastion , si en demeura-il vne troupe , les autres se ietterent dans les fossez , de sorte qu'ils n'eurent pas le loisir de retirer tous leurs mousquets : car nos soldats se ietterent dans l'eau aussi-tost qu'eux : & en emporterent quatre , & il y eust quatre ou cinq desdits soldats , qui passerent ladicte terrasse & l'autre fossé , iusques au pied de la courtine , qui me dirent que la grande eauë estoit au premier fossé , car à l'autre qui estoit pres ladicte courtine n'en auoient iusques aux genouils. Et tout incontinent ie dis aux deux Capitaines Fauas & Lamoyenne qu'ils ioignissent ma troupe & la leur ensemble : & trouuai le capitaine Aurioqui & presque tous les autres capitaines , lesquels ie priay de faire deux troupes : car dès que i'aurois parlé avec monsieur de Tais , ie leur voulois donner l'assaut. Ils me dirent qu'il s'en falloit pres de la moi-

tié de leurs soldats , qu'ils ne fussent
 arriués , & ie leur répondis qu'il n'im-
 portoit , veu qu'avec ce que nous es-
 tions , ie les emporterois , & promp-
 tement ils commencent se mettre en
 deux troupes , & ie courus parler
 avec monsieur de Tais : lequel ie trou-
 uay aupres de monsieur le Marechal
 & les autres : & luy dis , allons mon-
 sieur , allons au combat : car nous les
 emporterons , ie les ay tastez : &
 trouue qu'ils ont plus d'enuie de fuir
 que de combattre. Alors monsieur le
 Marechal me dit , dites-vous capi-
 taine Montluc , pleust à Dieu , que
 nous fussions asseurez de les emporter
 promptement avec toute nostre artil-
 lerie. Sur quoy ie luy répondis tout
 haut , monsieur nous les aurons estran-
 glez , auant que vostre artillerie soit
 ici. Prenant monsieur de Tais par le

*Les sieurs
 de Tais
 & de
 Montluc
 vont à
 l'assaut.*

picquiers & arquebuziers à part. Je lui dis, monsieur, regardez de quel costé vous voulez combattre, ou de ceste enseigne iusques au bastion de dessous, ou bien de l'enseigne vers l'autre que i'ay combattu : lequel me dit, combattez celui que vous auez desia attaqué, & ie m'en vois combattre l'autre : & ainsi nous despartismes.

Monsieur le Marechal du Biez, comme il nous vit commencer à marcher, dit ces mots, comme monsieur de Bordillon me dit apres, A present verrons si Tais est si braue, comme il se dit auec ses Gascons. Or i'appellay tous les sergens de la troupe, que i'auois, leur disant tout haut à la teste de nostre bataille : vous autres sergens auez tousiours accoustumé, quand nous combattons, d'estre sur les flancs du derriere : & à ceste heure ie veux que vous combattiez sur le deuant les premiers. Voyez-vous ceste enseigne, si vous ne la gagnez, tant que i'en trouueray deuant moy en allant, qui voudront faire le regnard, ie vous couperay les iarrets. Vous sçauiez ce que ie sçay faire : puis me retournant vers les capitaines leur dis,

&

*Propos du
sieur de
Montluc
aux sol-
dats.*

& vous mes compagnons , si ie ne suis aussi tost qu'eux , coupez moy les miens : & courus aux capitaines Fauas & Lamoyenne , qui pouuoient estre à trente pas de nous , & leur dis, marchez , & iettez vous à coup perdu dans le fossé : & en vn coup ie retournay aux nostres , & ayant baisé la terre , nous courusmes droit aux fosses , faisant tousiours marcher les sergens deuant , & passasmes le premier & second , & vinsmes au pied de la courtine. Lors ie dis aux sergens aidez vous , aidez vous , avec vos halebardes à monter ; ce qu'ils firent promptement : d'autres les pouffoient par derriere , se iettant à coup perdu là dedans. I'auois vne halebarde en la main. Cependant arriuerent tous les capitaines & picquiers , qui me trouuerent faisant l'empresse de vouloir monter avec mon halebarde : & me tenois avec la main gauche au bois. Quelqu'un de ceux qui arriuoient ne me cognoissant point me print par les fesses , & me poussa de l'autre costé. Lequel me fist plus vaillant que ie ne voulois estre : car ce que i'en faisois , estoit pour donner courage à tout le monde de se ietter de l'autre costé :

mais celuy-là me fit oublier la ruse
 & affranchir vn faut, que ie ne vou-
 lois pas. Or ie ne vis à ma vie gens
 passer si tost par dessus vne courtine.
 Apres que i'eus franchi ce faut, les
 capitaines Fauas & Lamoyenne, les-
 quels estoient dans le fossé du bastion,
 se ietterent sur le petit chemin, &
 passerent de l'autre costé dans le bas-
 tion, où ils tuerent tout ce qui estoit
 dedans. Monsieur de Tais qui alloit
 à son combat, nous voyant attachez
 à la courtine se ietta dans les fossés
 de l'autre fort : & les Anglois, qui
 virent que leurs gens estoient en fuite,
 & que nous entrions dedans, aban-
 donnerent le fort, & se mirent en
 fuite vers Calais. Monsieur le Maref-
 chal nous voyant si courageusement
 au combat, s'escria comme il me fut
 dit apres, ô mon Dieu, ils sont dedans.
 Alors les Seigneurs de Brissac & Bor-
 dillon donnerent à toute bride, &
 ledit Seigneur de Brissac mit son che-
 val dans ce petit chemin, où mal
 aisément il ne pouuoit passer qu'un
 homme, mettant ses iambes au long
 du col du cheval, à la miséricorde
 duquel il se mist, & passa monsieur
 de Bordillon apres ledict Seigneur de

*Les An-
 glois en
 fuite.*

Brissac general de la cauallerie : & auoit quarante ou cinquante cheuaux avec luy qui le suiuirent tous tirans eurs cheuaux par la bride. Monsieur de Brissac incontinent vint à moy & me trouua , que ie faisois mettre tout le monde en bataille , ayant opinion que nous serions combattus , & que ceux de Calais viendroient au secours : & me trouua que i'auois vne enseigne gaignée sur le col , laquelle ie rendis en sa presence au sergent qui l'auoit conquise , luy disant qu'il l'allaft porter à monsieur de Tais , ce qu'il fit , & ledit sieur de Tais l'ayant receuë l'enuoya par le mesme sergent à monsieur le Marechal : lequel fit grande diligence de faire abattre la courtine , qui n'estoit que de terre , avec les pionniers pour passer la gendarmerie : & nous voila tous delà avec l'artillerie & tout. Où estant Messieurs de Brissac & de Bordillon avec lès quarante ou cinquante cheuaux qui passerent quant & eux , prindrent à main droite , tirant aux escluses qui separent le pays d'Artois & la terre d'Oye : & rencontrerent quarante ou cinquante cheuaux Anglois portans lances , lesquels se mirent

à retirer au galop vers Calais. Monsieur de Brissac se douta que ceux-là s'en alloient pour l'attirer à quelque embuscade, & fit alte : & manda à Castegeac de descouvrir vn petit val-
 lon qui estoit vn peu à main gauche :
 ledict Castegeac luy rapporta, qu'il auoit veu plus de quatre cens che-
 uaux, & n'en y auoit mot. Car ce n'estoit que des païsans & femmes de villages circonuoisins, qui s'enfuoient vers Calais : qui fut vn grand malheur : car monsieur de Brissac les eust suiuis, & c'estoit toute la caualerie qu'ils auoient dans Calais. Ce n'eust pas esté vne petite deffaite. Vn General sur tout doit envoyer vieux routier, ou vn homme fort asseuré pour descou-
 urir. Vn homme non experimenté prendra bientoist l'alarme, & s'ima-
 ginera que les buissons sont des ba-
 taillons ennemis. Je ne veux pas dire, que Castegeac ne fut soldat, mais il fit vn pas de clerc.

*Erreur de
Castegeac*

*Vn vieux
soldat
doit faire
la descou-
uerte.*

Nostre caualerie passa par la bresche que monsieur le Marechal auoit fait faire. Monsieur de Tais voulut mener l'arquebuzerie, & m'ordonna de demeurer à la bataille des picquiers. Il y auoit dix ou douze ensei-

gnes d'Anglois qui se retiroient deuers Calais , lesquels venoient pour empêcher l'entrée : que s'ils eussent peu arriuer à temps , ils nous eussent bien donné des affaires avec l'artillerie mesmes , comme me dit Mr le Marechal , quand ie fus chercher monsieur de Tais pour venir donner l'assaut : & encores que ie sçache bien à quoy il tint que l'on ne combattit ces dix ou douze enseignes , ie ne le veux point mettre par escrit. Car disant la verité , faudroit que ie disse mal de quelques-
vns , & non pas des plus petits , ce que ie ne veux faire. Mais si monsieur de Saint Cire , qui estoit Lieutenant de cinquante hommes d'armes de monsieur de Boissy , qui est mort grand Escuyer , estoit en vie , il pourroit dire à qui il tint. Car il fut fort blessé , & son cheual tué , & plus de quarante cheuaux de ladite compagnie blesez ou morts. Il en sortist vne grand'querelle , qui presque amena deux hommes a combatre en camp clos. Ceste couyonade fut fort grande & de grand dommage , pour le seruice du Roy. Car cela deffait , il n'estoit demeuré personne dedans Calais , que les vieilles gens , & les femmes , &

*Faites
des François.*

comme i'ouis dire depuis à monsieur le Marechal du Biez , il l'eust emporté en deux iours , avec l'artillerie , qu'il auoit , si ceux-là eussent esté deffaits. Voyant que ces gens estoient retirez dans la ville : ils conclurent s'en retourner : ce que nous fismes deux iours apres la prinse : aussi le temps se mit fort à la pluye :

*Remon-
strances
aux capi-
taines.*

Or capitaines vous ne deuez desdai-
gner d'apprendre quelque chose de
moy , qui suis le plus vieux capitaine
de France , & qui me suis trouué en
autant de combats , ou plus , que ca-
pitaine de l'Europe , comme vous iu-
gerez à la fin de mon liure. En premier
lieu ce qui me fist faire ce combat , fut
que ie les auois essayez à mon arriuée ,
& les auois trouuez foibles de reins :
le second , de ce qu'ils abandonnerent
leurs pieces , que nous gagnasmes
ayant le bastion , qui leur seruoit de
flanc : pour le tiers , que ie voyois
venir au long de la plaine tirant vers
Calais du petit tertre , dont ie fis faire
alte auant que descendre au pré , force
gens , qui venoient deuers Calais , &
voyois bien que toutes les courtines
estoient remplies de gens : qu'il y auoit
bien affaire , à les emporter. Et pour

la quarte raison , qu'au fossé , qui estoit pres de la courtine , n'y auoit gueres d'eauë : & dudiect fossé à ladiète courtine , il y auoit plus de deux grands pas , où les soldats se pouuoient tenir , & pour peu d'ayde , qu'ils se fissent avec la picque , ou l'hallegarde , & l'ayde des vns aux autres , (n'estant icelle courtine de la hauteur de plus de deux brasses) nous l'emporterions. Donc capitaines, depuis que l'œil vous accompagne à voir la force de vostre ennemy , & le lieu là où il est , & que vous l'avez tasté & trouué aisé à prendre la fuite , chargez le cependant qu'il est en peur , en laquelle vous l'avez mis : car si vous luy donnez loisir de se recognoistre , & d'oublier sa peur , vous estes en danger d'estre plus souuent battus , que non de battre l'ennemy. Par ainsi vous le deuez tousiours suyure sur sa peur , sans luy donner loisir de reprendre son hardiesse , & tenir tousiours avec vous la deuise d'Alexandre le grand , qui est : Ce que tu peux faire annuit n'attends au lendemain , car cependant beaucoup de choses suruiennent , mesmement en la guerre : & puis il n'est pas temps de dire , le ne l'eusse iamais

*Instruc-
tion pour
un capi-
taine.*

360 *Comm. de M. B. de Montluc* ;
pensé. Plusieurs choses executerez
vous sur la chaude , que si on vous
donne loisir de vous rauiser , vous y
penserez trois fois. Poussé donc , ha-
zardez , ne donnez loisir à vostre enne-
my de parler ensemble : car l'un en-
courage l'autre.

Estans retournez au fort d'Outreau,
il n'estoit gueres iour , que les Anglois
ne nous vinssent chatoüiller sur le des-
cendant de la mer , & bien souuent
ramener nos gens iusques aupres de
nostre artillerie , qui estoit à dix ou
douze pas du fort : & estions tous abu-
sez sur ce , que nous auions ouy de nos
predecesseurs , qu'un Anglois battoit
toufiours deux François : & que l'An-
glois ne fuyoit iamais , ni ne se ren-
doit. l'auois retenu quelque chose de
la camifade de Boulongne & de la
terre d'Oye : & dis vn iour à monsieur
de Tais que ie luy voulois monstrier le
secret des Anglois , & pour quoy on
les estime si hardis : pource qu'ils por-
tent tous armes courtes : & faut qu'ils
courent à nous pour tirer de leur arc ,
& qu'ils s'aprochent pres de nous : car
autrement leurs fiesches ne feroient
point de mal : & nous qui auions ac-
coustumé de tirer des arquebuzades
de

*Discours
sur la va-
leur des
Anglois.*

de loin , & aussi que les ennemis n'en faisoient pas le semblable , trouuions estrange ces approches qu'ils faisoient, courant de sorte que nous cuidions entierement , que ce ne fust que hardiesse : mais ie leur veux faire vne embuscade , & vous verrez si ie diray la verité , & si vn Gascon vaut vn Anglois. Autrefois du vieux temps de nos peres auons nous esté voisins. Alors ie choisis six vingts hommes picquiers & arquebuziers avec quelques halbardes parmy , & les mis dans vne baïsse , que l'eau auoit faicte tirant contre bas à main droicte du fort : & enuoyay le capitaine Chaux à l'heure que l'eauë estoit basse , droict à quelques maisonnettes , qui estoient sur le bort de la riuere , presque vis à vis de la ville , pour leur dresser l'escarmouche : & luy dis , que comme ils les verroit passer la riuere commençast à se retirer , & se laisser faire vne cargue. Ce qu'il fit : mais la fortune porta , qu'il y fust blessé en vn bras d'une arquebuzade : les soldats le prindrent & l'amenerent au fort , de sorte que l'escarmouche demeura sans chef. Les Anglois s'en apperceurent bien : & leur firent vne cargue , & menerent

*Combat
des Fran-
çois &
Anglois.*

battant nos gens iusques auprès de l'artillerie. Les voyans traitez de telle façon , ie sortis de mon embusche pluſtoſt que ie ne deuoïs , m'en allant la teſte baiſſée droit à eux , commandant aux ſoldats qu'ils ne tiraſſent point , que ne fuſſions au iet de leurs fleſches. Ils eſtoient deux ou trois cens ayant quelques arquebuziers Italiens avec eux : & me repentis bien que ie n'auois fait mon embuſcade plus forte, mais lors n'eſtoit pas temps : & comme ils me virent venir droit à eux , ils quitterent les autres , & vindrent charger ſur moy. Nous marchafmes droit à eux , & comme ils furent au iet de leurs fleſches , nos arquebuziers commencerent à tirer tout à vn coup, & puis mirent la main aux eſpées , ainſi que ie leur auois commandé :

Les An- & couruſmes pour les inueſtir. Mais
glois en comme nous leur fuſmes pres de la
fuite. longueur de deux ou trois picques , ils tournerent le dos auſſi facilement , que nation que i'aye iamais veüe : & les accompagnafmes iusques à la riuiere pres de la ville , laquelle ils paſſerent : dont il y euſt plus de ſix de nos ſoldats , qui les ſuiuirent iusques à l'autre coſté d'icelle. Ie fis alte aux

maisonnettes rompuës , où ie rassem-
blay mes gens , quelques-vns y de-
meurerent par le chemin de ceux qui
ne pouuoient pas tant courir comme
les autres. Monsieur de Tais auoit
tout ven , & estoit sorti du fort , pour
aller secourir l'artillerie : & comme
i'arriuy à luy , ie luy dis , voyez vous
si ie ne vous ay dit la verité ? Où il
faut dire que les Anglois du temps
passé estoient plus vaillans que ceux
icy , ou bien que nous le sommes
plus que nos predecesseurs. Ie ne sçay
quel des deux est veritable. Vraye-
ment , dit monsieur de Tais , ces gens
se retirent bien à la haste , ie n'auray
iamais plus opinion des Anglois telle
que i'ay euë par le passé. Non , Mon-
sieur , luy dis-ie , croyez que les An-
glois qui ont battu anciennement les
François estoient demy Gascons , car
ils se marioient en Gascogne , & ainsi
faisoient de bons soldats. Depuis ce
temps nos gens n'en eurent plus l'opi-
nion ny crainte qu'ils en auoient.
Ostez , ostez , capitaines , tant que
vous pourrez , ceste opinion à vos
soldats : car ils vont lors en crainte
d'estre deffaits. Il ne faut pas que
vous mesprisiez vostre ennemy , ni

*Instruc-
tion aux
capitai-
nes.*

aussi que vostre soldat ait opinion,
qu'il soit plus vaillant que luy. De-
puis ceste charge, ie vis tousiours mes
gens aller plus franchement pour atta-
quer les Anglois, les approchans tou-
sious de plus pres: & que l'on se sou-
uienne quand M. le Marechal de Biez
les combattist entre le fort de Dandelot si nos gens se firent prier à les aller
inuestir. Ledit sieur de Biez fist là vn
acte de vaillant homme, car comme
sa cauallerie se mist en fuite, il s'en
vint tout seul se ietter deuant nostre
bataillon, & descendit prenant vne
picque en la main pour aller au com-
bat, duquel il sortit fort honorable-
ment. Je n'estois point là, voilà pour-
quoy ie n'en dis rien: car deux ou
trois mois apres le retour de la terre
d'Oye, ie demanday congé à mon-
sieur de Tais pour venir à la Cour.
Les Historiens sont bien desloyaux de
taire de si beaux actes. Celuy-là fut
bien remarquable à ce vieux Cheua-
lier. Estant à la Cour ie fis tant avec
monsieur l'Admiral, qu'il me fist
donner congé au Roy, d'autant que
ie n'auois point repris la charge de
Maistre de camp, sinon pour la com-
mander durant le premier voyage que

*Vaillance
du Ma-
reschal de
Biez.*

*Le sieur
de Mont-
luc.*

monſieur l'Amiral entreprendroit. Et apres auoir demeuré vn mois à la Cour, ſervant le Roy de Gentilhomme ſervant (ce Prince eſtoit lors aſſez vieux & penſif, il ne careſſoit point tant les hommes qu'il ſouloit. Vne ſeule fois il me demanda le diſcours de la bataille de Serizolles, eſtant à Fontainebleau.) Ce fut lors que ie prins congé de ſa Maieſté, & ne le vis oncques depuis. Ie m'en revins en Gaſcogne, de là où ie ne bougeay iuſques à ce que le Roy Henry fuſt Roy, ayant eſté accablé d'affaires & de maladies. Voilà pourquoy ie ne vous puis rien dire de la reddition de Boulogne, laquelle le Roy d'Angleterre fut contraint, voyant l'oſtination du Roy de quitter, moyennant quelque argent. Peu de temps apres il mourut, & le Roy auſſi le ſuiuit bientotſt apres. Il faut tous mourir. Or ceſte reddition de Boulogne aduint durant le regne du Roy Henry mon bon Maïſtre, qui ſucceda à ſon Pere.

*Boulogne
rendue le
vingt cin-
quième
Auril*

1551.

*Mort du
Roy François.*

Nôſtre nouveau Roy ayant la paix avec l'Empereur, apres la reddition de Boulogne, ayant auſſi accordé avec le Roy d'Angleterre, il ſembloit que

nos armes deussent demeurer longuement au crochet, comme aussi si ces deux Princes ne remuent, la France a de quoi demeurer en repos. Apres auoir seiourné quelque temps chez moi, le Roy me rappella, & me donna la charge de Maistre de camp, & le Gouuernement de Montcallier, sous monsieur le Prince de Melphe, Lieutenant General en Piedmont, estant monsieur de Boniuet nostre Colonel (il se souuient bien de moi, & si ceux qui le gouuernerent depuis m'eussent aimé, i'en eusse eu autant de bien & d'honneur, que Gentilhomme qui sortit pieça de Gascongne.) Je demurai là dix-huit mois, sans que pendant ce temps ie fisse chose qui soit digne d'estre mise par escrit. Car ie ne veux escrire que ce où i'ai eu quelque commandement. Ayant eu mon congé pour venir iusques à ma maison, i'arriuai en Gascongne, où peu apres ie fus aduerti, qu'à cause de la vieillesse & maladie de monsieur le Prince de Melphe, le Roy y enuoyoit monsieur de Brissac pour y estre son Lieutenant general. Qui fut occasion que le capitaine Tilledet qui auoit aussi eu congé, &

*Le sieur
de Mont-
luc Gou-
uerneur
de Mont-
callier.*

moi nous en allasmes à la Cour : & trouuasmes que ledit Seigneur auoit prins congé du Roy. Nous nous presentasmes à sa Maiesté, qui nous fist fort bonne chere, & à monsieur le Connestable, lequel estoit reuenu à la Cour en plus grand credit, qu'il n'estoit du temps du Roy François. Ce que plusieurs ne pensoient pas, mais les Dames auoient perdu leur credit, d'autres y entrerent : & puis incontinent sadite Maiesté, laquelle estoit lors en vne petite villote entre Melun & Paris, nommée Villeneuve saint George, nous commanda de nous en aller à Paris trouuer monsieur de Brissac. Et le lendemain que nous y fusmes arriuez, ledit sieur de Brissac partist, ayant esté fort aise de ce que nous l'estions venus trouuer, & ainsi allasmes iusques à Suze : où nous trouuasmes monsieur le Prince de Melphe, qui s'estoit mis en chemin pour s'en venir mourir en France. Aussi trespassa-il vne heure apres nostre arriuée. Encore que i'aye esté quelque temps sous luy, ie n'en diray autre chose : car à grande peine eus-ie le loisir de le cognoistre, que par ouïy dire. C'est vn malheur à vn capitaine

*Le sieur
de Brissac
Lieutenāt
du Roy
en Pied^a
mont.*

*Mort de
Iean Ca-
raceli
Prince de
Melphe.*

*Monsieur
de Brissac
fait Ma-
reschal.*

de changer si souuent de General , car
auant estre cognu de luy , vous estes
vieux : les amitez & cognoissances
nouuelles sont fascheuses. Monsieur
de Brissac despescha incontinent mon-
sieur de Fourqueuaux vers le Roy, qui
l'aduertit du tout : & promptement
sa Maiesté le renuoya avec la patante
de Marechal de France , qu'elle luy
donnoit. Nous demeurâmes cinq ou
six mois sans guerre. Il est mal aisé
que deux si grands Princes , & si voi-
sins , puissent demeurer longuement
sans venir aux armes : comme de fait
peu de temps apres l'occasion s'en pre-
senta , parce que le Roy print la pro-
tection du Duc Octaue , lequel le
Pape & l'Empereur son beau frere
vouloient despoüiller de son Estat :
& pour cest effect le sieur Dom-Fer-
rand de Gonfague tenoit assiegée Par-
me , où estoit monsieur de Termes ,
& la Mirande , où commandoit mon-
sieur de Sansac : lequel y acquist vn
grand honneur pour auoir tres-bien
fait son deuoir : & monstra qu'il estoit
bon capitaine , comme à la verité il
estoit. Il l'a bien monstré en tous les
lieux où il s'est trouué. C'estoit vn des
bons hommes de cheual qui fust en

*Renou-
uellement
de guerre
entre la
France
& l'Es-
pagne.*

France. Et parce que ie ne puis parler de ceci que par ouïy dire, ni de ce qui se fit là, ie m'en deporteray.

Le Roy aduertí que les forces de l'Empereur estoient empeschées au Parmesan, manda à monsieur le Marechal de Brissac qu'il rompit la paix, ^{Ceste guerre recommença en} 1550.

& tantast sur la rupture d'emporter quelque ville, ce qu'il fit : car il print Quiers & Sainct Damian. L'entreprinse de Cayras ne succeda point, comme les autres deux. Monsieur de Bassé alla executer Saint Damian, qui la print à l'improuiste entre la pointe du iour & le Soleil leuant. Et monsieur le Marechal mesmes executa celle de Quiers, en la sorte que ie vais escrire, puis que mon sujet n'a esté que de laisser par escrit ce que i'ay veu, & où i'ay eu quelque part. Je cuide que monsieur le President de Birague qui y estoit, verra dans ce Liure, que ie n'auray pas gueres failli à escrire ladite prinse. M. d'Auffun fut esleu pour aller executer celle de Cayras, & mena avec luy le Baron de Cypi, & deux ou trois autres compagnies Françoises avec quelques Italiens, & monsieur de Cental avec luy. L'escallade fut furieusement don-

Quiers

Entreprinse de Cayras.



née : mais elle fut aussi bien deffenduë. Il mourut vn des freres du sieur de Charry qui estoit allé iusques à Sauillan , lequel se trouua là sur les lieux , quand on marcha la nuit , & y alla & monta le premier vne eschelle , de laquelle il fut renuersé. Il fut assez mal suiui , comme l'on disoit. En mesmes temps monsieur de Bassé mena quelques compagnies avec luy , & arriua à demi mil de Saint Damian au point du iour. Ils furent sur le point de retourner en arriere , voyant qu'ils seroient descouverts auant qu'ils fussent là : toutesfois à la fin s'acheminèrent pour tenter fortune. La coutume de Saint Damian estoit , que les soldats ouuroient la porté à la pointe du iour , pour laisser sortir tout le peuple dehors au travail , & apres y mettoient quelques sentinelles. La fortune porta si bien à monsieur de Bassé , que le peuple estoit desia sorti , & les sentinelles n'estoient pas encore sur la muraille : de sorte que le sieur de Bassé avec ses eschelles entra dans leur fossé , lesquelles fit dresser sans qu'il fut descouvert : & monterent les capitaines les premiers : & auant qu'homme de la ville s'en apperceust ,

*Prinse de
Saint
Damian.*

la moitié de nos gens estoient dedans , où il n'y auoit qu'une compagnie , laquelle se retira dans le chasteau , auquel n'y auoit pas viures pour vn iour , & le matin se rendirent. Voici , capitaines , combien il importe de se prendre garde à ne laisser iamais la muraille vuide de sentinelles , ou pour le moins en poser tousiours sur quelque tour ou portail , mesmement sur la pointe du iour : car c'est lors que les executions se font. On est las de veiller & non pas l'ennemy de vous guetter. Toutes ces trois entreprinſes de Cayras , Sainct Damian & Quiers , se devoient executer vne mesme nuit : aussi faut-il , qui veut rompre la paix ou trefue , qu'il fasse son esclat tout à vn coup : car s'il y va piece à piece , il perdra pied ou aïſle.

Trois iours auant monsieur le Mareſchal tint conseil pour ceste execution de Quiers , où estoient messieurs de Boniuet , President Birague , Francisco Bernardin , de Bassé , d'Auffun , & ne sçauois bonnement dire si le sieur Ludouic de Birague y estoit. Je l'oſerois bien aſſeurer , car monsieur le Mareſchal ne faisoit rien qu'il ne luy communiquast , parce que c'estoit

*Entre-
prinſe ſur
Quiers.*

vn entendement bien ferré. Il fut arresté que nous donnerions l'escalade par le haut des vignes venant comme d'Agnasse à Quiers. Je n'e trouuay point bonne ni asseurée ceste escalade, & priay monsieur le Marechal, que puis que luy-mesme y venoit, & que c'estoit le premier lieu qu'il assailloit estant venu nouuellement en la charge de Lieutenant de Roy, qu'il fit en sorte que l'honneur luy en demeurast : car si à la premiere fois il n'auoit bonne fortune, l'on prendroit opinion qu'il seroit plustost malheureux, que heureux, ce qui apporte vn grand preiudice à vn Capitaine & à vn Lieutenant de Roy (on iuge des choses par les euenemens) & qu'il falloit faire marcher secretement toute ceste nuit là quatre ou cinq canons, afin qu'ils arriuaissent en mesme temps que l'escalade se donneroit à la porte laune : & ainsi il ne faudroit pas par vne sorte ou par autre à l'emporter : & que puis que l'on vouloit tascher à l'emporter, qu'il falloit tenter & l'vn & l'autre moyen. Or l'artillerie estoit toute preste deuant le chasteau de Turin : car comme monsieur le Marechal vist que le Roy auoit prins la

*Opinion
du sieur
de Mont-
luc.*

protection du Duc de Parme , & que la guerre estoit ouuerte en ces quartiers là , il se doutoit que bientost la tempeste viendrait à luy. Voilà pourquoy il auoit fait ses aprests pour pouruoir au besoin : estant au reste vn des plus aduisés Capitaines & Lieutenans de Roy , que i'aye cogneu.

Il y eust sur mon aduis grande dispute : car on disoit que d'vne nuit l'artillerie ne pourroit estre à Quiers , *Dispute sur l'entreprise de Quiers.* & que toutes les trois entreprises seroient descouuertes par le bruit du charroy de l'artillerie , à la fin il fut conclu que les portes de Turin seroient fermées à vespres , & que les bœufs seroient prins deuers Riuolle & Veillamie , & que tout le bestail se rendroit à vespres dans la ville , & grandes gardes aux portes , afin qu'homme du monde ne peust sortir. Fut aussi arresté que ie tirerois en mesme heure de canon , & la grande coulevrine du chasteau de Montcallier , & que ie prendrois le bestail des Gentils-hommes & bourgeois de Montcallier , qui seroit de là le pont deuers les loges. Ils firent estat qu'à vne heure de nuit l'artillerie seroit à Montcallier par le chemin de delà le pont ,

& que monsieur de Caillac & moy demeurerions ensemble à conduire l'artillerie avec ma compagnie, & monsieur le Marechal, messieurs de Boniuet & Francisco Bernardin iroient par le chemin que j'ay dit, avec tout le reste de nos gens de pied. Ledit sieur Marechal me laissa monsieur de Piquigny avec sa compagnie & vne autre, lesquelles s'en iroient deuant nous avec les pionniers, & dix gabions, que nous prîmes du chasteau de Montcallier, & arriuasmes les vns & les autres en mesme heure

*Escalade
faillie.*

deuant Quiers. Mais la camifade tourna en fumée, pource que les eschelles se trouuerent courtes, & le fossé plus profond, qu'on n'auoit rapporté à monsieur le Marechal. Qui fut cause que ledit sieur Marechal & tous tournerent à la porte laune, & nous trouuerent auoir desia rempli les gabions, & prests à loger les canons pour bat-

*Bonheur
de mon-
sieur de
Brissac.*

tre. Le bonheur de monsieur le Marechal de Brissac commençast à se monstrier là : car si les eschelles se fussent trouuées longues, & qu'on eust donné l'assaut, toute la ville estoit deliberée de se deffendre, où ils nous eussent à mon aduis bien estrillez &

repoussez , pource qu'ils ne vouloient estre prins de nuict ni par force : & que nous n'auions sceu faire nostre entreprinse si secrettement , que le iour de deuant ils n'en eussent esté aduertis , de sorte qu'il leur eust esté facile de nous repousser : & peut estre cela les eust descouragez de faire ce qu'ils firent. Le sieur Dom Ferrand à son depart y auoit laissé vn gouuerneur Italien avec trois compagnies , & en auoit tiré les Espagnols pour les amener avec luy à Parme.

Nostre batterie sans plus temporiser ayant fait son ieu , nous fîmes bresche à main gauche de la porte laune : combien que la pluye suruint si grande , que presque tout nostre fait fut en desordre. Et enuiron les onze heures la bresche estoit de huit ou dix pas. Les gens de la ville qui ne demandoient pas mieux qu'une bonne occasion pour se mettre en l'obeissance du Roy , pour le mauuais traitement que les Espagnols leur faisoient , commencerent à dire au gouuerneur , s'il se trouuoit assez fort avec ses soldats pour soustenir l'assaut. Lequel leur respondit que ouy , pourueu que la ville print les armes. Ils lui respon-

*Quiers
battu.*

*Division
dans
Quiers.*

dirent, qu'ils n'en feroient rien, & que les Espagnols ne les auoient pas si bien traictez, qu'ils eussent occasion de prendre les armes contre les François. Alors le gouuerneur, qui estoit sage, se vist logé entre Monsieur & Madame: & craignoit plus que ceux de la ville luy donnassent à dos que autrement, il leur dit; Mes amis attendez vn peu, & ie feray vne capitulation avec monsieur le Marechal, que vous n'aurez aucun desplaisir, ny nous autres aussi. Et fit sonner la chamade, faisant sortir vn homme dehors, pour prier monsieur le Marechal de luy enuoyer le Seigneur Francisco Bernardin, & le Seigneur de Montbazin, & qu'il fist cesser la batterie. Monsieur le Marechal nous manda incontinent de cesser, ce que nous fîmes. Sur quoy fut arresté, que le gouuerneur mettroit deux ou trois hommes dehors pour ostages, & que les deux susdits entreroient pour capituler: & croy que M. le President Birague y entra avec eux, à cause qu'il n'eust pas voulu que la ville eust esté saccagée: pource que sa femme estoit fille de Quiers, & que la pluspart des Gentilshommes estoient les parens:
mais

mais pour ne mentir point , ie ne
 ſçaurois aſſeurer , s'il eſtoit des trois
 ou non. Monsieur le Mareſchal n'eust
 voulu aucunement leur faire desplai- *Capitul*
 ſir : car c'eſtoit exemples à tous les *tion de*
 autres lieux que les ennemis tenoient *Quiers.*
 pour les attirer : afin que ſe trouuant
 en pareil eſtat , pour le bon traicte-
 ment qu'il auroit fait à ceux de Quiers
 tous les autres euſſent enuie de faire
 comme eux , & prendre le party Fran-
 çois. La plus grande diſpute , qui fuſt
 entre nos deputez , le gouuerneur &
 les habitans , fuſt que ledit gouuer-
 neur , d'autant qu'il eſtoit deſia preſ-
 que nuict , diſoit qu'il ne pourroit
 gagner Aſt , pour ſa retraicte , & qu'il
 ſeroit en danger d'eſtre deſſaiet par les
 chemins , par ce vouloit remettre au
 lendemain. Monsieur le Mareſchal qui
 ſechoit ſur ſes pieds , craignant que
 ceſte nuict il fuſt ſecouru d'Aſt deman-
 doit que l'on luy baillaſt la Roquette,
 pour y mettre ſoixante hommes , &
 qu'ils eſleuſſent vn de nos capitaines *La Ro-*
 tel qu'ils voudroient pour le mettre de- *quette*
 dans , & cependant il faiſoit touſiours *rendue.*
 approcher nos compagnies deuers la
 breſche. Le gouuerneur meſmes vint

sur la muraille de la Roquette & parla à moy , me priant de faire reculer les soldats , & qu'ils auoient accordé avecques monsieur le Marechal. La conclusion fust , qu'il s'en iroit bagues sauues , enseignes pliées , sans sonner tabourin lendemain matin. Et pour assurance il fust arresté , que la Roquette seroit mise entre nos mains. La ville m'enuoya demander à monsieur le Marechal , pour me mettre dedans icelle , avecques soixante soldats : car en Piedmont i'auois acquis vne reputation d'estre bon politique pour le soldat , & empescher le desordre. Je me gouuernay si bien , qu'homme de la ville ne perdist vne paille. L'auarice de quelque peu de pillage desgoute souuent ceux qui ont enuie de prendre party. Ce fait fut sagement considéré par monsieur le Marechal : car ceste nuit-là estoient partis d'Ast quatre cens arquebuziers pour essayer d'entrer dans la ville : mais ils furent aduertis par les chemins , que nous tenions la Roquette , qui les en fist retourner. Il fust fait là vne erreur : car au conseil il fust proposé , que sans doubte l'ennemy deuoit venir à nous au bruit de ce siege : & qu'à ceste oc-

*Le fleur
de Mont-
luc bon
politique.*

caſion , au meſme temps que la Roquette nous ſeroit rendue , il falloir enuoyer quelque belle troupe pour aller battre l'eſtrade vers Aſt , ſi cela euſt eſté execute comme il deuoit , on euſt deffait ce ſecours. Monſieur de Boniuet , qui eſtoit campé ſur le chemin d'Audezun , vint le lendemain avecques quinze ou vingt gentils-hommes en meſme heure que les Italiens ſortoient de la ville : & eſtant entré ſ'arreſta à la porte pour les veoir fortir. Et comme ils furent tous paſſez , monſieur de Boniuet eſtant ſoubs la ſeconde porte pour aller dans la ville , & m'ayant commandé monſieur le Mareſchal , que ie n'y laiſſaſſe entrer homme du monde , qu'il ne fuſt dedans , i'ouys mon Lieutenant , qui ſecourrouoit à la breſche , où ie l'auois mis pour garder , que perſonne n'y entraſt. Monſieur de Boniuet me dit. Il y a là quelque deſordre. I'y courus & trouuay que c'eſtoient des larrons meſmes de Quiers , qui vouloient entrer pour ſaccager la ville : & voulant deſcendre de la breſche pour leur courir ſus , la ruine de la muraille me fiſt gliffer , & tombay ſur le coſté gauche dans les pierres , de telle force que ie

*Le ſieur
de Mont-
lus bleſſé.*

me denoüay la hanche. Je cuide que tous les maux du monde ne sont point pareils à celui-là, à cause d'un petit nerf que nous auons dans ceste ioincture, qui est enchaînée l'une dans l'autre, qui s'allongea : & depuis ie n'ay cheminé droit, ains tousiours i'y ay douleur peu ou prou, sans que ni l'usage des bains, ni autre chose me l'aye peu oster. Monsieur de Boniuet me fit porter par les soldats dans un logis. L'auois fait entrer parauant les Mareschaux des logis, qui faisoient les quartiers. Monsieur le Marechal entra un'heure apres, que ie fus blessé, & me fist cest honneur de venir descendre deuant mon logis, pour me veoir, monstrant en auoir autant de regret, que si ie fusse esté son propre frere : aussi m'aimoit il de bon cœur, & faisoit beaucoup d'estat de moy. Pendant nostre seiour par trois fois il vint tenir le conseil au cheuet de mon lit : comme peut tesmoigner monsieur le President de Birague, qui est en vie. Il prenoit grand plaisir d'ouyr discourir en sa presence, mais en peu de mots, & si quelqu'un disoit quelque chose, soudain il en demandoit raison. Or audit Quiers ou à Montca-

lier ie demeuray deux mois & demy
fans pouuoir bouger du lit , de ceste
grande cheute,

Le Sieur Dom Ferrand laissant la
guerre de Parme , s'en vint en Ast
assembler forces pour dresser vn grand
camp , ayant laissé au Parmesan le Sei-
gneur Carles , & le Marquis de Vins.
Le Roy en estant aduerty , comman-
da à Monsieur l'Admiral , qu'il enuo-
yast six de ses compagnies à toute di-
ligence à monsieur le Marechal de
Brissac , le capitaine Ynard , lequel
pour lors n'estoit que sergent Major ,
les mena. Monsieur Daumalle , qui
estoit général de la cauallerie arriua
aussi , comme fist quelques iours apres
monsieur de Nemours , & bien tost
apres Messieurs d'Anguyen , & Prince
de Condé freres , puis monsieur de
Montmorancy , qui aujourd'huy est
Marechal de France , fils aîné de
monsieur le Conestable : monsieur le
Comte de Charmy , & son frere ,
monsieur de la Rochefoucaut ; ayans
vne grande suite de Noblesse avec-
ques eux , tellement qu'il y auoit trois
compagnies de gens de pied logez
dans Quiers , lesquelles monsieur le
Marechal fust contrainct de desloger ,

*Noblesse
arriuant
en Pied-
mont.*

*Loian-
ge de la
Noblesse
Françoi-
se.*

pour loger les Princes & Seigneurs de leur suite. le croy qu'il n'y a telle Noblesse au monde, que la Françoisen'y plus prompte à mettre le pied à l'etrier pour le seruice de son Prince : mais il la faut employer lors qu'elle est en ceste bonne deuotion. Au bout de quelques iours qu'ils furent arriuez, monsieur le Marechal dressa vne entreprinse pour aller prendre le chasteau de Lans, qui portoit grand dommage sur le chemin de Suzc à Thurin, à cause d'une vallée, qu'il y a depuis Lans iusques au grand chemin. Et les soldats dudit Lans estoient presque tous les iours là, ayant vn petit chasteau à moitié chemin pour leur retraicte. Monsieur le Marechal m'en uoya querir à Montcallier, où ie m'estois faict apporter dans vne litiere fix sepmaines apres, que ie me fus ainsi brisé. le me fis monter sur vn petit mullet, & avecque vne extreme douleur i'arriuay à Quiers, & tous les iours m'efforçois, peu à peu de cheminer : Voyla le succez de la prinse de Quiers, & Sainct Damian. Apresent ie vois escrire la prinse de Lans.

*Entre-
prise de
Lans.*

Monsieur le Marechal & tout le camp marcha droit à Lans, où est

roient tous les Princes & Seigneurs sus nommez. Et pour ce qu'il en y a aujourd'huy qui m'aiment, & autres qui me hayssent, ie veux approcher de la verité selon la souuenance que Dieu m'en a donnée, afin que ceux qui me hayssent, ne me puissent reprendre, disant la verité : & que les autres, qui m'aiment, prennent plaisir à lire ce que j'ay faict, & se souuenir de moy : car ie voy bien que les Historiens en parlent maigrement : Monsieur le Marechal se mist deuant avecque tout le camp, & me bailla à conduire l'artillerie avec cinq enseignes de gens de pied, & les Commissaires d'icelle, qui estoient Messieurs de Caillac & du Noguy, lesquels aussi s'estoient trouuez à la prise de Quiers. Ledit Seigneur arriua le lendemain, qu'il fust party de Quiers, à Lans, sur le midy : & nous avecques l'artillerie arriuasmes à l'entrée de la nuict. Le bourg de Lans est grand & clos de mauuaises murailles : Monsieur le Marechal se logea à vn mill pres dudit Lans, en vn autre bourg, & aux enuirs de luy la gendarmerie & caualerie. Tous les Princes & Seigneurs voulurent estre logez au bourg.

*Descrip-
tion de
Lans.*

384 *Comm. de M. B. de Montluc*,
de Lans, ensemble quelques compa-
gnies de François & Italiens : & mes-
mement monsieur de Boniuet & la
compagnie Colonnelle. A leur arri-
uée ils allerent au pied de la monta-
gne à main droicte sortant du bourg.
Le Sergent Major auoit desia gaigné
le haut d'icelle montaigne derriere le
chasteau, à l'entour duquel sont grands
precipices, & specialement sur le der-
riere, par là où il falloit que monsieur
le Marechal allast recognoistre. Il n'y
a rien qui ne soit precipice, sauf le
deuant du chasteau, qui respond à la
ville. Il y a deux bouleuars assés grands
& la porte du chasteau entre deux. De
mettre l'artillerie là, ce n'estoit que
perdre temps : de la mettre du costé
de là où nous venions, il falloit mettre
la teste du canon contre-mont : de
façon qu'elle ne pouuoit battre plus de
la moitié de la muraille. Et si falloit
monter plus de mil pas, auant que
d'estre au pied de ladiète muraille,
avec la plus grand'difficulté qui peust
estre. Et du costé de main droicte
estoit le semblable : & du derriere du
chasteau encores pis que tout. Car
tombant l'on alloit cheoir à vn quart
de mil bas en la riuere. Et à cause de
la

la grande difficulté , qu'il y auoit de pouuoir mener l'artillerie au derriere dudit chasteau , où y auoit vne petite plaine de vingt à vingt cinq pas , les ennemis n'y auoient rien remparé , sinon taillé vn petit fossé de la hauteur de demy picque dans le rocher , & deux moineaux aux deux costez , qui flanquoient le fossé , & n'y auoit pas trois mois que deux ingenieurs de l'Empereur auoient esté là , & dirent qu'il n'estoit possible aux hommes de pouuoir mener l'artillerie par cest en-

*Auis
des Inge-
nieurs.*

droict , ny par aucun des autres : sinon que l'on la mist par la ville deuant la porte du chasteau , qu'estoit autant de temps perdu.

Monsieur le Marechal à son arrivée , & tous les Princes & Seigneurs , & les Ingenieurs , que ledit Sieur Marechal , auoit , allerent recognoistre le derriere du chasteau , y ayant vne montée de plus de trois cens pas , autant mal - aisée que montée qu'ils firent peut estre en leur vie. Et apres auoir recogneu & demeuré là plus de deux heures , ils conclurent , qu'il estoit impossible de le prendre. l'arri-
uay le soir avec l'artillerie , & me fust dit , qu'il s'en falloit retourner le

lendemain : dequoy ie fus fort esbahy. l'estois si mal de ma cuisse, que ie me iettay incontinent sur vn matelas, & ne vis monsieur le Marechal de tout ce soir : car il s'en estoit retourné en son quartier, bien mal contant contre aucuns, qui luy auoient fait facile ceste entreprinse, & auoient les moyens de l'executer, lesquels à present la luy faisoient impossible. Le matin il retourna, & allerent de nouveau recognoistre le mesme lieu : mais tant plus ils le recognoissoient, plus il trouuoient le lieu difficile. Comme

Le sieur de Montluc va recognoistre la place. i'eus disné, messieurs de Piquigny, de Touchepied, & de Vinu me vindrent trouver, & me dirent que la resolution estoit faicte, pour s'en retourner, & que ie n'aurois point de regret de le faire, si i'auois veu le lieu : & me mirent tant de fantesies en la teste, qu'ils me monterent sur mon mullet, & me menerent au derriere de la croupe de la montagne, où les arquebuzades estoient à bon marché, sinon que l'on print fort à main droicte vers la riuere : & par là il estoit mal aisé d'aller ny de recognoistre, & auoit fallu que monsieur le Marechal, & tous les Princes

faissent monter & descendus au hazard des arquebuzades. Ce que Dieu garde est bien gardé. Telle fois ay ie veu tirer mil arquebuzades à cent pas de moy , sans estre offensé. Or tous quatre fîmes tant , que nous allâmes iusques au haut : & me menerent par le mesme lieu , où monsieur le Marechal & toute sa troupe estoient monter & descendus.

Je veux escrire icy , pour en laisser exemple à ceux qui viennent apres nous , comme i'y trouuay la chose faisable , non toutes fois sans vne tres grande difficulté : mais quoy que fust nous deliberaâmes que nous menerions l'artillerie haut , & la mettrions en batterie. En premier lieu l'on regardoit tousiours du pied de la montaigne iusques au haut tout droict. Les Anges auroient eu assés affaire à y monter. Car outre que la montaigne estoit droicte , il y auoit grande quantité de rochers. Je commençay à noter qu'en faisant vn chemin , qui pouuoit durer cent pas , iusques à vne petite place qui pouuoit tenir dix pas de rond , que nous aurions moyen d'arrester là la piece. Car ce petit lieu estoit comme plain : puis ie regarday , que

*Auis du
sieur de
Montluc.*

nous pouuions faire vn autre chemin traufferant vers la main gauche & le chasteau , iusques à vne petite plaine , qui suffisoit pour appuyer le canon , puis apres qu'il falloit faire vn autre chemin traufferant à main droiçte , iusques à vne autre plaine , & de-là nous auions la montée vn peu droiçte iusques au derriere du chasteau : mais nous auions passé à tout le moins les rochers. Et par tous cestrois repos nous descendismes au grand peril de nos vies : & leur monstray qu'il falloit que chascun d'eux entreprist de faire le chemin de l'vn repos à l'autre. Ce qu'ils noterent fort bien : & apres me remonterent sur mon mullet , car auparauant ils me menoient en espousée sous les bras , & allasmes droiçt au logis de monsieur le Marechal : où ie les trouuay tous assis au conseil , pour arrester l'ordre pour nous en retourner. Et à mon arriuée , monsieur le Marechal me dict , D'où venez vous monsieur de Montluc ? Le vous ay enuoyé querir par deux fois pour venir au conseil , & pour entendre la conclusion , que nous auons faite icy , de nous en retourner. Il faut que vous en rameniez l'artillerie par là où vous

l'auez conduicte. Alors ie luy respondis , Comment monsieur vous en voulez vous retourner sans prendre ceste place ? cela n'est pas digne de monsieur de Brissac. Je viens de la recognoistre , & par le mesme lieu où vous l'auez recogneuë , & vous assure que nous y menerons l'artillerie. Il me respondit , qu'il faudroit donc que ce fut Dieu qui le fit , car il n'estoit en la puissance des hommes de le faire. Je luy respondis , que ie n'estois point Dieu , & si la y amenerois. Alors il me dit , Ouy dans huit ou dix iours avec des engins , & cependant Dom Ferrand qui est à Verseil, assemble toutes les forces , qu'il a hors & dans les garnisons , & nous veut venir donner la bataille. Il a trois mille Allemans , ie n'ay Suisses ni Allemans pour luy respondre. Je vous oblige ma vie & mon honneur , dis-ie , de mettre quatre pieces d'artillerie dans deux martins , montées au cul du chasteau. Et tousiours il retournoit sur le propos des trois mille Allemans. Et à la fin , de colere ie luy commençay à dire , Et faites vous si grand estat des Allemans du Seigneur Dom Ferrand ? Monsieur l'Admiral a six compagnies,

que le capitaine Ynard commande. Monsieur de Boniuet luy en baillera quatre des siennes, il s'obligera de combattre avec lesdictes enseignes les Allemans. Monsieur de Boniuet avec le demeurant des siennes combattra les Espagnols. Nos Italiens s'obligeront de combattre les leurs : Vous avez d'un tiers plus de caualerie avecque la suite des Princes, que le Seigneur Dom Ferrand. Et si le capitaine Ynard ayme mieux combattre les Espagnols, que les Allemans, monsieur de Boniuet & moy les combattrons : & luy baillerons au choix. Le capitaine Ynard respondit, qu'il estoit content de combattre l'une troupe, ou l'autre, & telle qu'il plairoit à monsieur le Mareschal. Monsieur de Boniuet dit aussi, que ce luy estoit tout un, & qu'il les combatroit. Et alors ie dis, Et faut-il faire si grand estat de ces Allemans ? Je gageray que des trois mille, les quinze cents n'ont point de chausses, & que nos soldats la plupart ont chausses de velours & de satin, & si s'estiment tous gentils-hommes. Se voyant si bien vestus, comme ils sont, craindront ils de combattre. Laissez les venir seulement à nous, car nous les

*Contestation
du
sieur de
Montluc.*

traitterons de la mesme façon que nous fîmes à Serizolles. Alors monsieur de Montmorancy parla, & dit, ^{Dispute au conseil sur l'advis du sieur de Montluc} Monsieur, Monsieur de Montluc est vieux capitaine, il me semble que vous devez adiouster foy à ce qu'il vous remonstre. A quoy monsieur le Marechal respondit, vous ne le cognoissez pas comme moy, car il ne trouue rien difficile : & vn iour nous fera tout perdre. Lors ie lui respondis, que quand ie voyois la chose difficile, ie craignois autant ma peau, qu'un autre : mais qu'en cecy ie ne trouuois aucun inconuenient. Alors monsieur de Nemours dit, Monsieur laissez le faire, & esprouuez son dire. Messieurs le Prince de Condé, & d'Anguien en dirent autant : monsieur Daumalle le semblable. Monsieur de Gounort, qui est maintenant Marechal de France, monsieur de la Rochefoucaut, le Comte de Charny, les Sieurs de la Fayette, de Terride, suivirent tous leur opinion. Et alors monsieur le Marechal dit, O bien, ie vois que tous vous autres auez enuie, que nous faisions le fol. Faisons le donc : car ie uous feray cognoistre, que ie le suis autant que pas vn de vous. Et

voilà ma bataille gagnée contre tout le conseil. Alors ie dis à monsieur de Nemours , Monsieur , il faut que vous autres Princes & Seigneurs mettiez la main en cest affaire : que vous monstriez le chemin aux soldats , afin que s'ils vouloient reculer à ce grand travail , qu'il faut prendre pour le faict dont est question , nous puissions leur reprocher , que les Princes & Seigneurs y ont mis la main plustot qu'eux. Cependant ie luy remonstray aussi qu'il seroit bon , s'il luy estoit agréable , qu'il allast prendre vn canon avec toute sa troupe qu'il auoit mené quant & luy , pour le conduire au pied de la montagne. Lediect Seigneur respondiect , qu'il le feroit fort volontiers. Or falloit-il passer l'artillerie par dedans la ville : & estoit-on contraint de rompre trois ou quatre cantons de maisons , pour la tirer dehors , & applanir vne petite descente au sortir de la ville , de laquelle on tomboit en vn chemin planier iusques au pied de la montagne , où estoit le chasteau , distant mil pas de la ville. I'en dis autant à Messieurs d'Anguien , & Prince de Condé , lesquels fort volontiers s'y accorderent : & tout au-

*Ordre
pour dres-
ser la bat-
terie.*

tant à monsieur de Montmorancý ,
 lequel s'y offrist de bonne volonté.
 Quant à la quatriesme piece , ie ne
 sçaurois dire qui fust celuy qui en-
 treprint la conduire , car ce ne fust
 pas monsieur Daumalle , pource qu'il
 fallust qu'il s'en allast en son quartier à
 la cauallerie , avecques monsieur le
 Marechal. Or quoy que ce fust , ils *Les Prin-*
 ne reposerent de toute la nuit , ius- *ces aident*
 ques à ce qu'à la clarté des torches , ils *à tirer le*
 eurent posé l'artillerie au pied de la *canon.*
 montagne. Mais auant qu'ils sortissent
 du Conseil , ie dis à monsieur Dau-
 malle , Monsieur voulez-vous venir ,
 & ie vous monstrey , comme nous
 menerons l'artillerie derriere le chas-
 teau : & dis à monsieur le Marechal ,
 Aussi bien vous ne voudrez pas partir
 encores , pour vous retirer à vostre
 quartier. Monsieur Daumalle y vint
 volontiers , ayant seulement avec luy
 monsieur de la Rochefoucaut , le Sei-
 gneur de Piquigny & moy. Encores
 que ma cuisse me vexat grandement ,
 neantmoins ie m'efforçay pour leur
 faire voir tout à l'œil. Et comme nous
 eusmes monté la montagne , & reco- *Le sieur*
 gnu la place , nous allasmes trouuer *de Mont-*
 monsieur le Marechal , qui attendoit *luc fait*
encore re-
cognoistre
la place.

ledit sieur Daumalle, qui luy dit, que ma raison estoit bonne, & que personne ne s'estoit aduisé de ce que ie m'estois apperceu, & de ces repofades. Tous les Princes & Seigneurs estoient encores en la salle où monsieur le Marechal auoit dîné. Je ne fçay en quelle part monsieur de Bassé estoit pour lors, car monsieur le Marechal le manda venir avec sa compagnie, & deux compagnies Françoises, avec commandement au capitaine Tilladet, & à Sauallan de s'advancer nuict & iour, pour se joindre à eux, ce qu'ils firent.

Lendemain matin i'allay regarder en quelle façon ie pourois faire les chemins en la montaigne, sans que fussions offencez du chasteau. Et premierement ie descouris cinq petites canonieres faites pour arquebuzes, qui nous descouuroient tout le long du chemin. Pour brider cela, ie priay le capitaine Ynard de m'amener trois cens arquebuziers des meilleurs de sa troupe : lesquels arriuez nous despartismes pour en estre mis dix à chaque canoniere qui tiroient, comme quand on tire au blanc l'un apres l'autre, & tous au descouvert : & quand le der-

*Moyen
pour se
garder
des ca-
nonniers
des enne-
mis.*

nier des dix acheuoit de tirer , le premier recommençoit. Dans la ville y auoit vne maison , de la couuerture & haut de laquelle on pouuoit battre au dedans & au long de la courtine : mais pour se couvrir d'icelle ils auoient mis forces tables l'une sur l'autre , en telle sorte que ceux qui montoient sur la maison , ne pouuoient rien veoir au long de la muraille. Or les tables estoient fort simples : & auant le commencement de la guerre i'auois mis en teste à monsieur le Marechal de faire forger à Pignerol quatre cens arquebuzes d'un qualibre qui portoit trois ou quatre cens pas de poincte , & que ces armes fussent mises au dessus du fagon , afin que personne ne les peust tirer du Piedmont , desquelles il en pourroit distribuer vingt à chaque compagnie : & ordonner aux tresoriers de bailler douze francs de paye à ceux qui les portoient. Ces arquebuzes estoient desia faites & distribuées. Je priay le capitaine Richelieu , qui depuis fust Maistre de camp , de faire monter sur la maison les vingt arquebuziers pour tirer au trauers les tables le long de la courtine : parmy lesquelles les arquebuzades passioient , com-

*Monsieur
quetain
res.*

me par vn papier : de forte , que tant les arquebuziers qui battoient de dessus la maison au long de la courtine , que ceux-là qui tiroient à dixaines , mirent les ennemis en tel estat , que personne ne s'osoit hazarder à passer au dedans de la courtine. Lors fust baillé vingt pionniers à chacun des trois qui auoient recognu le chemin , avec trois massons , portant de gros marteaux & pics de fer : pour rompre quelques rochers qui estoient en chemin. Et ainsi commençasmes à tra-uailer à huit heures aux chemins , lesquels à deux heures apres midy furent acheuez. Et à vne heure de nuit on commença à monter la premiere piece avec quatre vingt soldats que i'auois de ma compagnie , car le reste estoit demeuré au chasteau de Montcallier , lesquels la monterent. Celle-là leur donna plus de peine , que toutes les autres trois. Comme nous estions au premier repos , nous tournions l'artillerie droit à l'autre , & de mesmes les soldats : car pour allonger , il falloit faire le chemin droit , aux fins que les soldats peussent monter vn peu droit , & puis apres tourner sur l'autre chemin. Monsieur de Piquigny

L'artillerie montée.

portoit vne petite lanterne pour donner clarté au roüage. Les ennemis alors tiroient , mais iamais arquebuzade ne nous toucha. Messieurs de Caillac & de Duno s'attendoient à mettre les gabions , & les remplir au cul du chasteau. Et à l'instant que les pieces arriuoient haut , ils les venoient prendre pour les loger : & iamais homme ne mist la main à tirer lescdites pieces que mes soldats. Car combien que monsieur de Boniuet en eust amené vne troupe , & le capitaine Ynard vne autre pour les ayder , si est-ce , qu'ils leur dirent qu'ils ne demandoient point d'ayde : car puis qu'ils auoient eu l'honneur d'amener la premiere , ils vouloient encore auoir cest aduantage , que d'y conduire toutes les autres. Dequoy ie fus fort aise : car ils estoient desia instruits aux destours. A trois heures apres minuiçt toutes les quatre pieces furent logées en batterie. Monsieur le *Le Canon* Mareschal , & monsieur Daumalle *logé.* estoient venus de leur quartier : & croy qu'ils ne dormirent gueres ceste nuit , car ledit Sieur Mareschal auoit grande peur qu'il ne fust possible de conduire lescdites pieces. Et ledit Seigneur Daumalle d'autre costé estoit en

peine , parce qu'il auoit asseuré apres auoir veu le lieu , que ie les y monterois. Les Princes & Seigneurs qui auoient la nuict deuant trauaillé , reposèrent iusques à ce que M. le Marechal les manda esueiller , qui fust à la relation que luy alla faire le capitaine Martin Basque , qui estoit à luy , lequel l'asseura auoir laissé la derniere piece sur le haut de la montagne. Et cuyde-ie , que ceste nuict là , ce capitaine Martin fist cinquante voyages : d'autant que monsieur le Marechal l'enuoyoit veoir de quart d'heure en quart d'heure en quoy nous en estions.

Arriué que fust monsieur le Marechal , & tous les Princes & Seigneurs , ils trouuerent que tout estoit logé pour commencer à battre. l'auois faict porter demy sac de pommes , qui estoit vn fort bon fruiet , quatre flacons de vin , & du pain , pour faire manger & boire mes soldats : mais monsieur le Marechal le premier , & tous les Princes & Seigneurs me volerent les pommes , & à pot beurent deux flacons de vin , attendant le iour. Or ie laisse penser à ceux qui liront ceste histoire , si ie brauois monsieur le Marechal , voyant qu'il m'auoit tant

repugné sur la conduicte de l'artillerie, le croy que ce fust vn des grands aises que i'eus iamais : tant pour le contentement de monsieur le Marechal, que des Princes & Seigneurs, qui estoient là, tous lesquels auoient prins leur part de la peine. Le matin au point du iour on tira trois ou quatre volées à la muraille, qui la perçoient, & à trauers les escuries entroient dans la basse court, & de-là donnoient dans le logis du chasteau. Monsieur le Marechal auoit faict mettre aussi trois canons bas, du costé d'où nous venions battans contre-mont, pour les intimider : car de dommage on ne leur en pouuoit faire. Mais comme nostre artillerie eust tiré trois ou quatre volées, ils commencerent à faire la chamada, & puis se rendirent. Monsieur le Marechal y laissa le capitaine Breuil, beau-frere de monsieur de Salcede avec sa compagnie, qui estoit des capitaines de monsieur l'Admiral : & ce fait il s'en alla avec toute sa caualerie & son infanterie vers la plaine de Caluge, pour veoir si le Sieur Dom Ferrand s'estoit point acheminé, pour secourir le chasteau. Là il entendit qu'il estoit encore à Verscil. Qui fut

400 *Comm. de M. B. de Montluc,*
cause que ledit Sieur Marschal se re-
tira à Quiers, ie m'en allay à Mont-
callier, auquel lieu ie demeuray quin-
ze iours dans le liēt malade de ma
cuisse : & croy fermement que sans
ce trauail ma cuisse nē se fut iamais
peu redresser.

*Instruc-
tion pour
vn chef
de guerre.*

Cela vous doit faire sages, mes
capitaines, de ne vous fier iamais à
vn ou deux, pour recognoistre vne
place. Et sans vous arrester à vostre
iugement employez y ceux que vous
penserez non seulement les plus expe-
rimentez, mais les plus courageux :
ce que l'vn ne peut voir, l'autre s'en
apperçoit. Ne craignez de prendre
peine pour quelque peu de difficulté,
pour faire vn bel exploit : & aux
despens de vos ennemis faites vous
sages. Lors que vous aurez resolu de
garder quelque place, prenez garde à
escarper les repozades qui sont aux aue-
nuës : parce que pour peu que le canon
puisse trouuer lieu, pour donner loisir
de prendre halaine, enfin on le monte.
Sans cela ie n'eusse peu venir à bout de
ce que i'auois promis. Ceste prinse osta
beaucoup de commodité à nos enne-
mis, & nous seruit fort pour ceste
guerre. Quelque temps apres les Prin-
ces

ces s'en retournerent , pource qu'ils ne voyoient point d'apparence que le sieur Dom Ferrand de Gonsague se préparast pour donner bataille , ni pour assaillir aucune ville. Et peu de temps apres qu'ils s'en furent retournez , monsieur le Mareschal , par le conseil des Seigneurs President de Birague , Sieur Ludouic & Francisco Bernardin, delibera d'aller prendre certaines places pres d'Yvrée , pour tenir ceux d'Yvrée en subiection. C'estoit vn Lieutenant de Roy tres digne de sa charge , tousiours en action , iamaïs oisif : & croy qu'en dormant son esprit trauailloit tousiours , & songeoit à faire & executer quelque entreprinse. Pour cest effect nous marchasmes auec le camp droit à Saint Martin , où il y auoit vne compagnie d'Italiens. Et le chasteau fut battu & prins, ensemble les chasteaux de Pons, Casteltelle , Balpergue , & autres , és enuirs d'Yvrée , & commençasmes à fortifier ledit chasteau de Saint Martin. Or messieurs de Bassé & de Gordes auoient prins Sebe : & comme le fort de Saint Martin fut aduancé , monsieur le Mareschal s'en alla à Quiers pour estre plus pres de mon-

*Naturel
de mon-
sieur de
Brissac.*

sieur de Bassé, afin de le secourir s'il en auoit besoin : car il auoit déjà entendu que le sieur Dom Arbre de Cende assëmbloit le camp en Alexandrie : & cuide que le sieur Dom Ferrand estoit malade pour lors. Or se douta monsieur le Marechal qu'il prendroit le chemin de Sebe, & ainsi laissa le sieur de Boniuet, le sieur Francisco & moy : & fit retirer le sieur Ludouic à Cheuas, & à Bourlengue, pour auoir le cœur à ces deux places, desquelles il estoit Gouverneur. Il ne tarda pas huit iours, que monsieur le Marechal manda monsieur de Boniuet & moy, aux fins de marcher en toute diligence iour & nuict droit au Montdeuy, avec cinq ou six compagnies Françoises, que nous auions à Saint Martin, delaisant le sieur Francisco en ce quartier, pour faire aduancer la fortification. Ce que nous fîmes, & marchâmes iour & nuict, comme fut bon besoin : car monsieur le Marechal mesme s'estoit engagé dans Sebe, pour secourir monsieur Bassé. Et comme Dom Arbre entendit nostre venuë, & qu'en chemin nous auions prins vne compagnie à Sauillan, & qu'il nous vist arriuez

*Prevo-
yance de
monsieur
de Bris-
sac.*

au coing de la ville, il fait largue, & ayant gagné vn pont de brique, il commence à faire passer son bagage. le ne sçauois dire si le Seigneur Ludouic de Birague estoit en nostre compagnie, parce que nous auions quelque Italien en nostre troupe. Monsieur le Marechal qui se vist desengagé, sort dehors la ville avec tout ce qu'il auoit amené de forces: & alla attaquer l'ennemy au pont. Et pensoit Dom Arbre camper là: car nous y trouuâmes des loges desia faites. L'escarmouche fut grande & forte d'un costé & d'autre: toutesfois i'ay opinion, que si nous l'eussions chargé de queue & de teste, caualerie & tout, que nous luy eussions fait peur & dommage. Car apres qu'il eut passé le pont, il falloit monter vne montagne, de laquelle le chemin estoit si estroit, qu'ils n'y pouuoient aller qu'un à un. Or il nous monstra qu'il estoit vrai soldat, & homme de guerre: car il fist passer premierement toute sa caualerie, craignant que la nostre la chargeast, & qu'elle la renuerfast sur les gens de pied: puis fist passer ses Allemans, & luy demeura derriere avec mille ou douze cens ar-

Dom Arbre bon capitaine Esjagnol

quebuziers , qui tindrent tousiours le pont à la faueur de trois maisons qu'il y auoit au bout d'icelui , lesquelles nous ne sçeufmes iamais gaigner : car ils les auoient toutes percées , respondant l'une à l'autre. Au haut de la montagne , il y auoit vne plaine qui s'estendoit iusques à vne villote qu'ils tenoient , estant la longueur de mil pas seulement ou enuiron : là il fist faire alte à tous ses gens , & apres se retira. Mais en abandonnant les maisons nous nous pensâmes mesler. Auquel lieu y eust quelques gens de morts d'un costé & d'autre. Nous les suiuiions tousiours par ce petit chemin contre-mont à force arquebuzades : car nous ne voyons pas l'appareil qu'il nous auoit fait sur le haut de la montagne. Messieurs de Boniuet , de la Mothe-gondrin & moy estions à cheual , & parmi les arquebuziers pour leur donner courage : & comme nous fusmes sur le haut , il nous fit cargue de mille ou douze cens arquebuziers , qui nous ramenerent droit au pont plus viste que le pas : & sur les bras de monsieur le Marechal. Le cheual de monsieur de la Mothe fust tué , le mien blessé , qui mourut dans

cinq ou six iours , & Dieu nous aida , pour nous auoir fait despartir nos soldats en deux troupes , à main droite & à main gauche du chemin , encore que la montée fust bien difficile , qui fust cause que nous ne perdîmes que fort peu de gens. Car si nous fussions esté tous enfillez dans le chemin , nous eussions fait vne grande perte , & nous-mesmes y fussions demeurez. Nottez cela , ieunes capitaines , quand vous vous trouuerez à mesme : car les vieux & aduisez qui se sont trouuez en tels marchez , sçauent ces remedes. Monsieur le Marechal retira tout le camp autour de Sebe , & le lendemain ramena les canons , que messieurs de Bassé & de Gordes auoient menez quand ils la prindrent. Et y laissa trois compagnies , deux Françoises & vne Italienne ; puis se retira par le Montdeuy deuers Turin & Quiers. Or il ne me souuient comme Sebe fust depuis perduë , car nous y retournasmes vn an apres la recouurer , qui fust bien autrement deffenduë & combattuë , que le premier coup , comme i'escriray ici apres.

Quelque temps apres le Sieur Dom Ferrand dressa vn camp , surpassant

toutes les forces de monsieur le Marechal : car ledict Seigneur n'auoit Suisses ni Allemands. Or il fut aduerti par les Seigneurs Ludouic de Birague, & Francisco Bernardin, que ce camp estoit dressé pour venir reprendre saint Martin & les autres chasteaux, ensemble pour prendre Cazals, à quatre mil de Turin, & la fortifier : afin que Turin ne receust aucun rafraischissement des montagnes & vallées de Lans, mesme de Cazals, duquel lieu on tiroit la pluspart des fruits & bois, qui venoient à Turin. Or comme le camp du Seigneur Dom Ferrand fut prest à marcher droict à saint Martin, monsieur le Marechal tint conseil de ce qu'il deuoit faire de Cazals, veu qu'elle n'estoit point fortifiée ny tenable : & conclurent qu'il la falloit abandonner & la desmanteler, toutesfois que le desmantèlement ne seruiroit de rien, car le Seigneur Dom Ferrand l'auroit bientost refaïcte. Je fus aduerti à Montcallier le soir mesmes de la conclusion, qui fut cause que le matin ie m'en allay trouuer monsieur le Marechal à Turin, & luy demanday s'il auoit arresté d'abandonner Cazals. Il me dit que ouy,

*Conseil
du sieur
de Bris-
sac sur la
descente
de l'ar-
mée Es-
pagne.*

parce qu'il ne se trouueroit homme ,
 qui voulut hazarder sa vie & son hon-
 neur en se iettant dedans : & qu'ils
 auoient conclu au conseil d'y mettre
 vne compagnie d'Italiens , laquelle se
 rendroit incontinent qu'elle verroit
 approcher le Seigneur Dom Ferrand.
 Je luy dis alors que cela ne seruiroit
 de rien : car le capitaine mesmes le
 diroit à ses soldats pour les y arrester ,
 & qu'il falloit faire à bon escient non
 en ceste sorte. Il me respondit , Et qui
 voudriez vous qui fut si fol , & hors
 de sens , que d'entreprendre la deffen-
 ce d'icelle ? ie luy respondis , que ce
 seroit moy. Alors il me dit qu'il ai-
 meroit mieux perdre beaucoup de
 son bien , que de permettre que ie
 m'engageasse là dedans : veu que ce-
 ste place ne sçauroit estre fortifiée d'vn
 an , pour tenir contre le canon. Je luy
 respondis lors , Monsieur , le Roy ne
 nous paye ni ne nous entretient , que
 pour trois raisons : l'vne pour luy gai-
 gner vne bataille , afin que par le
 moyen d'icelle , il puisse conquerir
 beaucoup de pays : l'autre pour luy
 deffendre vne ville : car il n'y a ville ,
 qui se perde sans amener grande perte
 de pais : & la troisieme pour prendre

*Le sieur
 de Mont-
 luc entre-
 prend de
 garder
 Cazals*

*Prop-
 du sieur
 de Mont-
 luc à mon-
 sieur de
 Brissac*

vne ville, car le gain d'une ville prinse amene à suiection beaucoup de gens : & tout le reste ne sont qu'escarmouches ou rencontres, qui ne seruent qu'en particulier à nous, & pour nous faire cognoistre & estimer de nos superieurs, & acquerir de l'honneur pour nous. Car quant au Roy il ne profite aucunement de cela, ni de tous autres effets de la guerre, que par ces trois choses que j'ay dites, Et par ainsi plustost que ceste place s'abandonne, ie murray dedans. Monsieur le Marechal me contesta fort pour me diuertir de ceste intention : mais comme il me vid resolu, il me laissa faire. Il se payoit fort de raison, sans croire sa teste, comme faisoit monsieur de Lautrec, auquel on a remarqué ce défaut, comme ie pense auoir dit ailleurs.

*Défaut
du sieur
de Lautrec.*

*État de
Cazals.*

Or Cazals est vne petite ville fermée de murailles de cailloux, sans pierre aucune quarrée, vn fossé qui l'enuironne, & l'eauë s'y met & s'en fort, de sorte que l'on ne peut approfondir le fossé, ni retenir l'eauë en aucun endroit pour le plus que iusques à demy cuisse. Il n'y auoit tranchée aucune dedans, ni dehors : les
quatre

quatre coings n'estoient aucunement remplis, de sorte que quand on m'eust battu vne courtine par le quanton, on me pouuoit battre par le flanc. Je demanday à monsieur le Marechal cinq cens pionniers de la montagne, ce qu'il despescha promptement à leuer : & furent dans quatre iours à Cazals : plus luy demanday vne grande quantité d'outils & ferremens, pour faire trauailler les soldats : ce qu'aussi promptement il m'enuoya avec grande quantité de farines, lards, plomb, poudre, & corde : puis luy demanday le Baron de Chipy, la Garde (qui estoit parent du Baron de la Garde) le Mas, Martin, & ma compagnie. Toutes ces cinq compagnies estoient bonnes, & les capitaines avec, lesquels ayans entendu que ie les auois nommez de moy mesmes, le prindrent à grande louange & honneur. Je luy demanday aussi le Griti Venitien, qui auoit vne compagnie d'Italiens, le tout me fut accordé. Le matin donc ie m'allay mettre dedans : & le soir toutes les compagnies arriuerent. Monsieur de Gye, premier fils de monsieur de Maugiron, estoit là en garnison avec

la compagnie d'hommes d'armes de son pere : auquel monsieur le Marechal manda qu'il fortist, & qu'il menast la compagnie à Montcallier. Il luy rescriuit qu'il n'auoit pas demeuré si longuement en garnison à Cazals, pour l'abandonner lors que le siege y venoit, & mesmement puis qu'un si vieux capitaine que moy, entreprenoit de la deffendre, qui estoit cause qu'il auoit deliberé d'y mourir avec moy. Monsieur le Marechal ne print pas cela pour argent comptant, car le lendemain bon matin il vint à Cazals, ayant avec luy monsieur d'Aufsun, de la Mothe-gondrin, & le Vicomte de Gordon. I'y auois desia fait tous les quartiers des gens de pied sans desloger la gendarmerie, pource que ie voyois monsieur de Gye obstiné, & toute sa compagnie resoluë d'y demeurer. Monsieur le Marechal arriué qu'il fust, ne sceust iamais faire tant qu'il en peut amener ledict sieur de Gye, ains respondit franchement qu'il en pouuoit bien tirer sa compagnie, si bon luy sembloit, mais que pour son regard, il n'en bougeroit pas. Qui fut cause que monsieur le Marechal s'en retourna fort mal content de m'a-

*Monsieur
de Brissac
visite Ca-
zals.*

voir iamais accordé la demeure. Je veux dire à la verité que monsieur de la Mothe-Gondrin , & monsieur le Vicomte de Gordon se mirent à plover , quand ils me dirent adieu , & me tenoient tous , comme faisoit monsieur le President de Birague mesmes qui est en vie , pour perdu , ou de la vie ou de l'honneur. Et ainsi s'en allerent apres disner. Je priay monsieur le Marechal & tous mes compagnons , qu'ils ne me vinssent plus voir , car ie ne voulois estre empesché d'un seul quart d'heure , pour diligenter ma fortification. Je priay monsieur le Marechal de m'enuoyer le Colonel Charamond , qui estoit à Ribouille , pour m'aider à ladite fortification , avec deux ingenieurs , que ledit Seigneur Marechal auoit , l'un desquels fut tué à la prise de Vlpian , & l'autre est le cheualier Reloge , qui est en France.

Nous commençâmes à remplir les quatre quantons , chaque capitaine des quatre en ayant prins le sien : puis departîmes aux quatre courtines les deux autres compagnies , & les cinq cens pionniers : car tous ceux de la ville au dessus dix ans portoient la

*Diligence
du sieur
de Mont-
luc à for-
tifier Ca-
zals.*

412 *Comm. de M. B. de Montluc,*
terre avec les quatre capitaines. Mais
pour ne vouloir desrober l'honneur
d'aucune personne, monsieur de Gye
auoit vn Enseigne de Dauphiné, qui
se nommoit Montfort, & le Guidon,
monsieur de l'Estanc, lesquels estans
arriuez à Montcallier sur le soir, com-
mencerent à se souuenir & plaindre
leur capitaine : tellement que toute
la compagnie se mutina & resolut
d'aller mourir aupres de luy, & ne
l'abandonner point. Ainsi l'Estanc pria
ledit capitaine Montfort, de vouloir
demeurer : car pourroit estre, que
monsieur le Marechal les y laisseroit
tous aller, quand il verroit qu'une
partie s'en seroit allée : & pour ne
mal contenter ledit Sieur Marechal,
qu'il retint avec luy tous ceux qui y
voudroient demeurer, ce qu'estant
accordé, ledit l'Estanc craignant que
monsieur le Marechal n'en fust ad-
uertí, part à la minuiet suiui de la
compagnie : car ne voulist demeurer
homme d'icelle compagnie, que deux
gendarmes & trois archers avec ledit
de Montfort. Ils laisserent leurs grands
cheuaux & armes, sauf la cuirasse &
sallade, monterent sur vn courtaut
chaçon seulement, & laissant leurs

lances à leurs logis prindrent des picques avec chacun vn vallet à pied : & ainsi arriuerent au soleil leuant à Cazals distant de Montcallier six mille. Monsieur de Gye , & le Baron de Chypi auoient entrepris de terrasser la porte , de laquelle ils virent venir ces gens : ils demurerent grande piece à les recognoistre , puis tous deux leur coururent au deuant. Par là ie cogneus ^{*Louange*} que monsieur de Gye estoit bien aimé ^{*du sieur*} de sa compagnie , aussi le meritoit-il : ^{*de Gye.*} car i'oserois dire , que c'estoit vn des braues capitaines de France , & des plus vaillans. Monsieur de Montfort s'en alla le matin à monsieur le Marechal & luy dit , qu'il auoit perdu le guidon & toute la compagnie , qui s'en estoient allez la nuict , trouuer leur capitaine , le priant de luy donner congé de les suiure , avec vn homme d'armes & trois archers , qui luy estoient seulement de reste. Ce que ne luy voulist permettre , ains luy deffendit expressement , & l'en fit retourner à Montcallier.

Or nostre ordre dans la ville estoit ^{*Bel ordre*} tel , que le matin tous generalement , ^{*tenu à*} tant capitaines , soldats , pionniers , ^{*Cazals.*} qu'hommes & femmes de la ville se

414 *Comm. de M. B. de Montluc,*
rendoient deuant le iour chacun à son
œuure, à peine de la vie : pour à
quoy les contraindre fis dresser des
potences. l'auois & ay tousiours eu
vn peu mauuais bruiet, de faire iouer
de la corde, tellement qu'il n'y auoit
homme petit ny grand, qui ne crai-
gnit mes complexions & mes humeurs
de Gascongne. Donc, pource que
c'estoit en hyuer & aux plus courts
iours, l'on trauailloit depuis la pointe
du iour iusques à vnze heures. Puis
tout le monde s'en alloit disner : &
à midy chacun se rendoit à son œu-
ure, & trauailloit-on iusques à l'en-
trée de la nuit. Quant au disner cha-
cun disnoit au sien : mais le soupper
estoit à mon logis, ou à celuy de
monsieur de Gye, ou d'un des capi-
taines chacun à son tour. Auquel lieu
se trouuoient les ingenieurs, & les
commandeurs de l'œuure : & s'il y
auoit quelqu'un qui n'eust pas auancé
son œuure autant qu'un autre, ie luy
departois ou des soldats ou des pion-
niers, pour que le lendemain au soir
son œuure fust autant aduancée que
celle de son voisin. Or ie ne faisois
autre chose, que de courir par tout à
cheual : ores aux fortifications, puis

à ceux qui fioient les tables au moulin. l'en fis faire grande quantité de demy pied d'espois , & autres pieces de bois qui nous estoient necessaires. L'eauë de ce moulin nous faisoit vn grand bien , car la sie ne reposoit iamais. Et la pluspart de la nuit ie marchois à torches par toute la ville puis m'en allois où se faisoit le gason , tantost où se faisoient les gabions : ores ie rentrois dans la ville , & donnois le tour par dedans. Puis apres ie m'en sortois autrefois recognoistre tous les lieux : & n'auois aucun seiour qu'à l'heure de disner , non plus que le moindre soldat de la troupe , encourageant cependant tout le monde au travail , caressant & petits & grands.

l'apprins là qu'est-ce d'une entreprise , quand tous generalement se deliberent d'en venir à bout : & qu'est-ce qu'une masse de gens tous conuoiteux de gagner honneur au lieu qu'ils entreprennent : & encores qu'on puisse acquerir grande loüange en départant si bien les choses & les temps , qu'il ne se passe vn seul demy quart d'heure inutilement : si est-ce qu'un chef ne fera iamais rien qui vaille , si tous generalement ne sont

Instruction pour un chef de guerre.

d'un bon accord , & n'ont bon desir de sortir de l'entreprinse à leur grand honneur , comme fut fait en ce lieu. Mes capitaines , mes compagnons , il faut que ce soit chose qui despende principalement de vous. Que si vous sçavez gagner le soldat avec vn mot , vous ferez plus qu'avec des bastonnades. Il est vrai que s'il y a quelque mutin ou retif , à ses despens il faut faire peur aux autres. Je veux retourner à monsieur de Gye , lequel ne bougea jamais de sa porte , iusques à ce que par le dedans & par le dehors elle fust du tout terrassée , avec tous les gendarmes , qui ne s'y esparagnerent non plus que le moindre soldat de nos troupes.

*Prevoyance
ce du
sieur de
Montluc.*

O capitaines , le bel exemple que vous avez ici , si vous voulez noter , pour entreprendre , quand l'occasion se presente , de tenir vne place. Je veux encore dire que i'auois donné tel ordre , qu'il ne se mangeoit vn morceau de pain , & ne se beuuoit vn verre de vin , que par ordre & avec raison. Et si vous voulez prendre exemple à Cazals , non seulement entreprendrez vous à garder vne place , pour foible qu'elle soit , mais vn pré

enuironné de fosséz , pourueu que l'vnion y soit , comme ie l'auois là dedans. Tout estoit vne mesme volonté , vn mesme desir , & vn mesme courage : la peine nous estoit vn mesme plaisir. Or la fortune mienne fut si heureuse , que le Sieur Dom Ferrand bailla à Cesar de Naples la moitié de son camp , presque toute son infanterie , avec partie de la caualle-rie , pour la conduire à Riuerol , sept petits mil de Cazals , Vlpian entre-deux : & demeura ledit Cesar de Naples vingt-deux iours à prendre saint Martin , & ces autres chasteaux. Pendant ce temps - là , ie mis la ville en deffense avec vne extreme diligence , & fis faire de grandes tranchées & ramparts derriere tous nos coins & portails bien terrassez , & tous les hauts gabions gabionnez à double gabionnade , bien deliberez de nous faire bien battre , & acquerir de l'honneur. Or Cesar ayant prins saint Martin & les autres chasteaux , arriua à Riuerol avec son camp , où tout incontinent le Sieur Dom Ferrand mit en conseil pour arrester , s'il nous deuoit venir assaillir ou nous laisser , veu que i'auois eu temps de me fortifier , & que

i'auois acheué tout ce que ie voulois faire , pour nostre deffence : & aussi mettoit en auant que nous estions six compagnies là dedans tous resolu de combattre , & qu'il doutoit qu'à l'assaut il perdrait plus de vaillans capitaines Espagnols & Italiens , que la ville ne valoit : & leur remonstroit tout ce que i'auois fait dedans. Les capitaines Espagnols & Italiens qui furent appelez en ce conseil , voyant que le hazard tomboit sur eux , firent remontrer par leur maistre de camp , que l'Empereur auoit là des meilleurs capitaines qu'il eust en toute l'Italie , & desquels il faisoit autant ou plus d'estat que tous les autres , & que pour ceste cause ils prioient le Sieur Dom Ferrand de les vouloir conseruer pour vne bataille , ou pour quelque entreprinse grande , & non pour si peu de cas que Cazals. Là dessus y eust grande dispute , & trois iours tindrent conseil sur ce fait. Cesar de Naples & le Gouverneur d'Vlpian opiniaistroient , que l'on nous deuoit venir assaillir. Or les soldats Espagnols qui entendirent ce qu'en disoit Cesar de Naples dirent à leurs capitaines , qu'ils iroient donc à l'assaut avec leurs

*Conseils
des Espa-
gnols sur
le siege de
Cazals.*

Italiens : car quant à eux , ils ne s'y trouueroient point , voulans maintenir ce que leur maistre de camp auoit proposé. Toutes ces disputes furent sçeuës par monsieur le Marechal , apres que le Sieur Dom Ferrand fut leué de Riuerol , par des lettres qu'il escriuoit au President de Milan , lesquelles les gens du Sieur Ludouic de Birague prindrent. Et cependant qu'ils disputoient de la Chappe à l'Euesque , monsieur le Marechal leur fit desrober Albe , par messieurs de la Mothe-Gondrin , Francisco Bernardin , & de Panau Lieutenant de la compagnie dudit Sieur Marechal , & quelques autres , dont ne me souuient. Monsieur le Marechal fut aduertí de la prinse au poinct du iour , car nos gens y estoient entrez à vnze heures de nuit : & me despescha vn sien Laquais avec vne lettre , qui disoit , monsieur de Montluc , tout à ceste heure i'ay esté aduertí que nostre entreprinse d'Albe est sortie à effet , & nos gens sont dedans , qui est cause que ie monte à cheual , & m'y en vois à extreme diligence. Le Laquais arriua enuiron les dix heures. Et pour ce que le Gouverneur de Vlpian re-

*Surprise
d'Albe.*

*Braverie
du sieur
de Mont-
luc.*

tenoit vn trompette de monsieur de Maugiron, i'y enuoyay vn tambour du capitaine Grity : & luy ayant monstré la lettre de monsieur le Mareschal, ie luy donnay charge de dire au Gouverneur de Vlpian, que le sieur Dom Ferrand ne se pouuoit mieux reuanger de la perte d'Albe, que de nous venir attaquer. Et comme le tambour fut à la porte de Vlpian, trouua que le Gouverneur estoit allé au poinct du iour au Conseil à Riuerol. Il dit aux soldats de la porte la prinse d'Albe, lesquels sur ces nouvelles le voulurent tuer, & de fait commencerent à l'attacher & garotter : mais cependant arriua le Gouverneur, auquel ie mandois qu'il me rendis la trompette, veu que nous nous estions tousiours fait bonne guerre, & qu'il ne commençast point la mauuaise : car nos gens l'auoient aussi fait aux leurs à la prinse d'Albe. Ledit Gouverneur print le tambour & l'amena à son logis, & luy dit, que si ce qu'il disoit n'estoit vrai, qu'il le feroit pendre. Le tambour luy respondit, que s'il estoit vrai, il ne vouloit que luy donnast qu'un teston, & qu'au contraire s'il disoit faux, il vou-

loit estre pendu. Le gouverneur tourne remonter à cheual , & s'en va à Riuerol. Toute la nuit ils furent en conseil , si cecy pouuoit estre verité ou non. Lendemain à midy arriua le capitaine du Chasteau de Montcaluo , qui leur porta nouuelles de la part du Gouverneur d'Ast , que la prise d'Albe estoit veritable. Qui fut cause , que lendemain matin le Sieur Dom Ferrand partit , & s'en alla passer la riuere au pont d'Asture en grande diligence , pour aller droit audit Albe , veoir s'il la pourroit reconquister , auant que monsieur le Marechal l'eust fait fortifier dauantage.

Comme ie me vis hors de la crainte du siege , i'enuoyay incontinent les pionniers que i'auois audit Albe , qui firent grand plaisir à monsieur le Marechal. Je n'attendois pas là de commandement : il est souuent necessaire de faire auant estre commandé , s'il n'y a du hazard. Monsieur de Boniuet & le Colonel saint Pierre Corce se mirent dedans avec sept enseignes. Or dès l'arriuée du Seigneur Dom Ferrand au pont d'Asture , & qu'il eust passé la riuere , monsieur de Salvazon , qui estoit gouverneur de Ber-

*Le fleur
de Mont-
luc en-
uoye des
gens à
Albe.*

ruë m'en aduertit en diligence. le fis partir le Baron de Chipy , la Garde , & le Mas soudainement , qui furent le lendemain au point du iour à Albe, de quoy monsieur le Marechal fut fort aise , comme fut bien aussi monsieur de Boniuet , pource qu'ils venoient d'un lieu auquel ils auoient prins grande peine de fortifier , esperant que ceux-là monstreroient le chemin aux autres , comme ils firent. Monsieur de Maugiron voulut demeurer à Cazals , car il y faisoit bon vivre pour les cheuaux. l'y laissay le capitaine Martin avec luy , & enuoyay le Grity à sa garnison : moy & le Colonel Charamond allasmes trouuer monsieur le Marechal à Turin , qui ne faisoit qu'arriuer d'Albe. Et ma compagnie s'en alla à Montcallier. le vous laisse discourir , si monsieur le Marechal , monsieur le President Birague , & toute la Cour du Parlement me firent grande chere : & si ie fus le bien venu.

Donc capitaines , quand de quelque entreprinse sortira grande commodité & quelque profit en pourra venir , comme faisoit de ceste-cy, veu que Turin , si Cazals eust esté

prins , en souffroit grand dommage , n'arrestez d'entreprendre & tenter hardiment. Et quand vous y ferez , souvenez vous de la sorte que i'en usay : car ainsi mettez vous en crainte l'ennemy de vous attaquer. Il est plus en alarme de vous assaillir , que vous n'estes de vous deffendre. Il songe & considere ce qui est dedans , & qu'il a affaire à gens qui sçauent remuer terre , qui n'est pas peu de chose à vn guerrier. Il est vrai que le Sieur Cesar fit vn pas de clerc de s'amuser aux forts , & nous laisser cependant fortifier. S'il fut lors venu droict à nous , il nous eust donné de la peine. Je croy qu'il craignoit. Aussi ma bonne fortune voulut , que le Sieur Dom Ferrand separast ses forces : s'il fut venu lors nous attaquer , il eust emporté de bons hommes : mais nous eussions bien vendu nostre peau.

*Instruc-
tion pour
ceux qui
entrepren-
nent la
garde des
places.*

Or comme le Sieur Dom Ferrand fut en Ast , il eut aduertissement , que monsieur de Boniuet estoit fort dans Albe , & que de nouveau y estoient entrez trois compagnies de celles que i'auois à Cazals , avec grande quantité de pionniers. Qui fut cause qu'il entra en aussi grande dispute , s'il y

deuoit aller ou non , comme à Riu-
 rol pour venir à Cazals. Il partit donc
 au bout de cinq ou six iours d'Ast avec
 toute sa caualerie pour recognoistre
 Albe. Et apres auoir demeuré vn iour
 aux enuiron , il s'en alla camper de-
 uant saint Damian , parce qu'il auoit
 entendu , que monsieur le Mareschal
 auoit prins presque toutes les muni-
 tions , poudres , plombs & cordes ,
 pour mettre dans Albe , & auoit don-
 né charge à quelqu'un d'en y amener
 autant. Mais bien souuent la paresse
 & negligence des hommes fait plus
 perdre , que gagner : car ie ne vis
 iamais homme long en besongne ,
 paresseux ou negligent à la guerre ,
 qui fit beau fait , aussi n'y a rien au
 monde , où la diligence soit tant re-
 quise. Vn iour , vne heure , & vne
 minute fait euanoüir de belles entre-
 prises. Or monsieur le Mareschal pen-
 soit que le Sieur Dom Ferrand se vint
 mettre plustost à Carmagnolle , que
 non ailleurs pour la fortifier & pren-
 dre le chasteau , pensant que saint
 Damian auroit recouuert des pou-
 dres. Ainsi s'en vint iusques à Car-
 magnolle. Monsieur de Bassé , qui
 estoit Gouverneur du Marquisat de
 Salusse ,

*La lon-
 gueur
 nuit grã-
 dement à
 vn guer-
 rier.*

Salusse , vouloit entreprendre de defendre le chasteau. Monsieur le Marechal s'en alla apres à Carignan , & me laissa avec ledit Sieur de Bassé , pour luy aider à mettre les vivres & munitions dans le chasteau : & ce fut à la requeste mesme de monsieur de Bassé : & le lendemain propre que monsieur le Marechal fut parti , il fut aduerti par vne lettre venant des parts de messieurs de Briquemaut , & de Chavigny , que le camp de l'en-
*Siege de
S. Da-
mian.*
nemy se campoit deuant Saint Damian : & qu'ils le prioient les vouloir secourir de poudres , plombs & cordes pour l'arquebuzerie , car ils n'auoient point eu celle qu'il leur auoit promis : dont monsieur le Marechal se trouua le plus fasché du monde : & y enuoya promptement six charges de poudre , & quatre de plomb & de corde : & mandoit au Gouverneur de la Cisterne distante de saint Damian deux petits mil , lequel auoit trois compagnies d'Italiens avec luy , qu'il hazardast de mettre ceste nuit là ces munitions dedans. Monsieur de Bassé & moy auions desia entendu , que le camp s'estoit planté deuant saint Damian , par l'homme mesme qui en

portoit les nouuelles à monsieur le Marechal : car il falloit qu'il passast à Carmagnolle, comme fist aussi ceste mutition trois ou quatre heures apres, qui estoit sur l'entrée de la nuit. Monsieur de Bassé & moy exhortasmes celuy, qui conduisoit icelle munition, de remonstrer aux capitaines, qu'il falloit que ceste nuit là mesme la poudre entraist : car autrement elle n'y pourroit point entrer, & falloit que celuy qui la conduisoit, y entraist luy-mesme. Nous le trouuasmes si froid, que nous cogneusmes bien qu'il ne feroit rien de bon. Il est aisé de veoir

On cognoist les hommes à la mine.

à la care, si vn homme est espouuanté, & s'il luy baste l'ame pour executer ce qu'il entreprend : & eusmes peur qu'il n'espouuentaist plustost les capitaines, quand il seroit à la Cisterne, que de leur donner courage. Qui fut cause que ie me resolus de m'y en aller, pour tascher par ce secours à fauuer la place. Monsieur de Bassé voulut que monsieur de Classe son premier fils vint avec moy, conduisant dix hommes d'armes, car il estoit Lieutenant de la compagnie.

Nous partismes vne heure de nuit, & arrivay à vnze heures à la Cisterne :

Auquel lieu ie trouuay le Gouverneur & les Capitaines bien empeschez, faisant de grandes difficultez sur la conduite de ceste munition, & comme elle se pourroit mettre dedans. Et à la verité, il y auoit quelque raison : car Sainct Damian est petit, & le Sieur Dom Ferrand auoit en son camp six mil Allemans, six mil Italiens, & quatre mil Espagnols, douze cens cheuaux legers, & quatre cens hommes d'armes : & tout cela campoit ioignant la ville, autour de laquelle les corps de garde se touchoient : & d'y faire entrer la munition avec les cheuaux qui l'auoient portée, estoit chose impossible. Car il y auoit de la neige iusques au genoux, & tous les chemins estoient pleins des loges des soldats. Or incontinent ie fis assembler forces sacs, lesquels nous coupasmes en trois, & quelques femmes proprement les cousoient, dans lesquels ie fis mettre de la poudre : puis i'eus trente païsans, ausquels ie fis lier les poudres, plomb, & corde à la ceinture, & leur fis bailler à chacun vn baston en la main pour se soustenir. Monsieur de Briquemaut Gouverneur auoit enuoyé six Suisses de sa garde

Le sieur de Montluc entreprend de secourir saint Damian.

Preuoyance du sieur de Montluc.

hors la ville , lesquels n'auoient peu
 rentrer dedans , ainsi se trouuerent à
 la Cisterne , & prindrent leur part de
 la munition. Estans donc prests à par-
 tir , arriuerent les Seigneurs de Pied-
 defou , & de Bourry , lequel on m'a
 dist s'estre fait Huguenot : de saint
 Romain , parent de monsieur de la
 Fayette , & trois ou quatre autres
 Gentils hommes s'acheminans pour
 s'aller ietter dedans , lesquels se mirent
 à pied , & renuoyerent leurs cheuaux,
 Monsieur le Marechal auoit escrit à
 deux des capitaines qui estoient à
 la Cisterne , qu'ils entreprinsent de
 mettre les poudres dans saint Da-
 mian. Lesdits capitaines estoient vieux
 soldats : ce qui ne m'en fist esperer au-
 cune chose de bon. Car qui veut faire
 vne execution hazardeuse , & de
 grand combast , il se faut garder sur
 tout de vieux capitaines & de vieux
 soldats: parce qu'ils apprehendent trop
 le peril de la mort , & la craignent , &
 n'en tirerez iamais bon ouurage : ce
 que i'experimentay là , & en plusieurs
 autres lieux. Le ieune n'apprehende
 pas tant le danger. Il est vray qu'il y
 faut de la conduite : & entreprendra
 aisément quelque execution , où il y

*Vn vieux
 soldat
 craint la
 mort.*

faut de la diligence. Il est prompt, ingambe, & la chaleur luy enfle le cœur, qui est souuent froid au vieillard.

Or ils partirent enuiron deux heures apres minuiet : & comme ils furent hors la ville, ie me mis sur vne plate-forme pres de la porte, duquel lieu ie descouurois tout leur camp, sauf vn peu de l'autre costé de la ville. l'enuoyay le Lieutenant du Gouverneur de la Cisterne pour donner l'alarme par le fons à main gauche, ce qui ne porta pas grand profit, d'autant que les ennemis n'en firent nul compte. Et comme nos gens furent sur vn petit haut pres de la ville, d'où on descouuroit tous les feux & les gens mesmes à la clarté d'iceux, vn des capitaines Italiens dit à monsieur de Pied-de-fou, & aux autres, *vedete el campo. Ecco la cauallerie, ecco la gendarmerie, ecco li Tudeschi, ecco li Espagnolli, ecco li Italiani*, leur montrant le tout avec le doigt, *non si intrarebbe vna gata, bisogna tournar in dietro.* Ce qu'ils firent. Or ie demeuray tousiours sur ceste plate-forme ayant mon mal de cuisse, qui me tuoit, de laquelle ie n'estois encore guery, ny de deux ans apres. Voicy

*Le se- nos gens retournez sur la poincte du
cours ne iour , & me compterent ce qu'ils
peut en- auoient veu , dequoy ie fus bien mar-
trer dans ry. Soudain ie despesché vn homme en
Saint Damian. poste deuers monsieur le Marechal ,
qui ne scauoit pas que ie fusse à la
Cisterne , ains me pensoit à Carma-
gnolle avec monsieur de Bassé , & luy
manday, tout ce qui en auoit esté fait ,
& qu'il ne falloit point auoir espe-
rance que ces capitaines là missent
les poudres dans saint Damian , i'en
auois desia fait l'esprouue : le priant
qu'il mandast en poste à Montcallier
au capitaine Charry , qui portoit mon
enseigne , que soudain partist avec
cinquante des meilleurs soldats que
i'eusse , scauoir trente arquebuziers &
vingt picquiers , & qu'il se rendit à
la Cisterne à la minuit. Monsieur le
Marechal trouua estrange , quand il
entendit que i'estois là , & despescha
vn homme en poste au capitaine Char-
ry , auquel i'escriuois pareillement vn
mot en haste. Ce vaillant ieune hom-
me plein de bonne volonté ne s'en fist
pas prier : mais tout incontinent il
partit avec les cinquante soldats , &
se rendit enuiron vne heure apres mi-
nuict à la Cisterne. Auquel lieu ie luy*

*Le capi-
taine
Charry
conduit
le secours
de Saint
Damian.*

auois fait apprestre dans vne caue ,
trois ou quatre feux de charbon , &
vne table longue pleine de viures : &
auois-ie fait inferrer les vilains d'un
costé : & pendant que les soldats beu-
uoient , ie les faisois charger avec les
Suisses. Et ne voulus plus parler aux
capitaines des Italiens , pour aller avec
le capitaine Charry : mais en priay vn
de me bailler son enseigne qu'on nom-
moit Pedro Antonio , vn ieune fol
esuanté , que i'auois cognu à Montcal-
lier , & l'auois fait mettre en prison
deux fois pour des folies qu'il faisoit
dans la ville. Je le tiré à part , & luy
dis , Pedro Antonio , ie te veux faire *Propos du*
plus d'honneur qu'à ton capitaine. Tu *seigneur de*
as veu la nuit passée quelle faute vous *Montluc*
autres auez fait de ne vous efforcer *à vn Ca-*
d'entrer dans la ville , & vous en estes *pitaine.*
retournez avec excuses. De ma part
ie ne prends nulle excuse en payement ,
depuis qu'il y va de la perte d'une
ville , & des gens de bien qui sont
dedans. Je sçay bien que tu as assez de
valeur , mais tu n'es pas sage : & si tu
veux esprouuer ta sagesse à ce coup ,
comme tu as d'autres fois fait ta har-
dieuse , ie te promets ma foy , de te
faire donner vne compagnie à mon-

sieur le Marechal , auquel l'occasion
 se presente luy faire cognoistre : que
 comme tu es hardy , tu es aussi sage
 pour commander. Je veux que tu ailles
 prendre cinquante hommes de la com-
 pagnie de ton capitaine , auquel ie
 veux dire tout à ceste heure qu'il te
 les baille , & au sortir de la ville , ie
 te mettray tous les païsans & les
 Suisses qui portent la munition au
 milieu de tous les cinquante solats : &
 veux que tu amenes deux ou trois ser-
 gens , que ie te feray bailler aussi ,
 pour en mettre vn à chaque flanc , &
 sur le derriere : afin de donner cou-
 rage à tous tes soldats de te suiure , &
 garder que les païsans ne s'escartent.
 Mais comme le capitaine Charry ira
 attaquer vn corps de garde , passe
 outre , sans t'amuser à combattre ,
 sinon que quelqu'un se presentast de-
 uant toy , & pousse tousiours en auant ,
 soit que tu rencontres ou non , iusques
 à ce que tu sois à la porte de la ville.
 Il me respondit , *credete signor , ch'io lo
 farò à pena di morir , & voi conoscereti
 che Pietro Antonio sera diuenuto saggio.*
 Lors l'embrassant , ie luy dis , *io ti pro-
 metto anchora , che io mi recordero di te ,
 & che ti sera riconnesciuto il seruizio no mi*

*mançar di gratia , io ti giuro per la nostra
Madonna se tu non fai chello che vn huomo
da bene debbe fare , io ti farò vn tratto de
Monluco. Tu sai como io ho manegiato non
suono quindeci di vno d'elli nuostri facendo
d'il poltrone , io non dimando seno vn puoco
di prudenzo con prestezza. Il me tint ce
qu'il m'auoit promis , car il s'y porta
bien sagement. Les capitaines luy bail-
lerent tout ce qu'il demandoit , estans
bien aises d'en estre deschargez. Je
priay auffi Piedefou & autres nom-
mez , que puis qu'ils vouloient entrer
dans la ville , il falloit qu'ils y en-
traffent pour l'ayder à conseruer , &
non pour se perdre, ensemble ce qui
estoit dedans : d'autant que la conser-
uation d'icelle ville , ne consistoit qu'à
mettre les munitions dedans , & qu'il
estoit necessaire qu'ils se departissent
les vns aux flancs , les autres sur le der-
riere , aux fins que quand le capitaine
Charry combattroit , ils donnassent
courage aux gens de Pedro Antonio ,
& aux païsans de passer outre , ce
qu'ils firent. Or tous , tant mes sol-
dats , Italiens , que les païsans furent
aduertis par moy , de tout ce que les
vns & les autres deuoient faire , ainsi
sortirent de la ville en ce mesme ordre.*

*Confide-
rations
du sieur
de Mont-
luc pour
le secours
de S. Da-
mian.*

Ie dis au capitaine Charry , presens mes soldats, que ie ne les voulois iamais plus voir , s'ils n'entroient , ou mouroient tous tant qu'ils estoient de ma compagnie. Alors il me respondit , que ie m'allasse seulement reposer , & que bien tost i'entendrois de ses nouvelles. A la verité c'estoit vn soldat sans peur. En sa troupe estoit vn de mes coporals nommé le Turc , Picard de nation , qui me dit , & quoy faites vous doute que nous n'entrions dedans ? Par la mort bieu , nous aurions bien employé nostre temps , ayans combattu plus de cent fois avec vous , & tousiours demeurez victorieux , & à ceste heure cy uous faite doute de nous ? Alors ie le sautay embrasser au col , & luy dis ces mots , mon Turc , ie te promets ma foy , que ie vous estime tant tous , que ie m'asseure que si gens au monde y entrent , vous autres y entrerez. Nous auions des chandelles basses pour nous esclairer , afin que les sentinelles du camp , n'aperceussent aucun feu dans la Cisterne. Et ainsi ils partirent : & ie m'en allay mettre sur la plate forme , sur laquelle i'auois la nuit auparauant demeuré. Le capitaine de la dedans me tenoit

toujours compagnie. Or au bout de deux heures i'oüy vne grande alarme à l'endroit par lequel il falloit qu'ils entraissent, & grandes arquebuzades, mais cela ne dura point : qui me fit mettre en crainte que nos gens fussent repoussez, ou bien que les païsans se fussent mis en fuite, lesquels comme ils furent sur ce haut, où les capitaines Italiens auoient dit qu'il n'y entreroit vn chat, firent vn peu alte. Les guides leur monstrent les corps de garde, desquels à cause de la grande froidure & de la neige, les sentinelles n'estoient pas à vingt pas. Le capitaine Charry appella Messieurs de Pieddefou, Bourry, saint Romain, & Pedro Antonio, & leur bailla deux guides, s'en reservant vne, & leur dit, Voilà le dernier corps de garde des gens de pied : car le demeurant c'est caualerie, qui ne fera pas grands efforts, à cause de la grande neige. Dès que vous me verrez attaquer ce corps de garde, passez outre le grand pas, & ne vous arrestez, quoy que vous trouuiez sur vostre chemin, mais vous rendez à la porte de la ville. Tous d'une volonté baissèrent la teste. Le capitaine Charry aborde ce corps

*Nouveau
secours à
S. Da-
mian.*

*Les fleurs
de Chau-
gny &
Brique-
maut
dans S.
Damian.*

de garde , lequel il mit en route sur vn autre corps de garde , & tous deux prindrent la fuite. Puis passa outre droit à la porte de la ville , où il trouua ja Pedro Antonio arriué. Incontinent deliurerent la munition sans y faire autre arrest , sinon que Messieurs de Chauigny & Briquemaut embrasferent le capitaine Charry , & le prierent de me dire , que puis que i'estois à la Cisterne , ils estoient assurez d'estre secourus de ce qui leur faisoit besoin. Et qu'il seroit tres-necessaire de leur faire tenir de la munition encore dauantage. Mais comme l'on s'amusoit à prendre les soldats des corps de garde , qui s'en estoient fuis , dont le lendemain vn capitaine en fut pendu , le capitaine Charry , & Pedro Antonio , avec les païsans trouuerent les ennemis sur ces entre-faites , les chargerent & passerent outre. Je n'y perdis vn seul soldat , Italien ny François , & n'en y eust vn seul blessé , mesme aucun païsant. Mais tous arriuerent à la Cisterne estant désja grand iour , me trouuant encores sur la plateforme. Je despeschay incontinent vers monsieur le Marechal pour le prier qu'il m'enuoyast encores de la poudre;

car de plomb & de corde ils en auoient assez. Ce qu'il fit tout promptement de Quiers enhors , auquel lieu il s'estoit remué pour estre plus pres de moy.

Voila l'aage que doiuent auoir les capitaines à qui l'on baille les charges pour executer vne entreprinse hazardeuse & soudaine. Je puis asseurer avec la verité , que cent ans y a ne mourut vn plus braue , plus sage , ny mieux aduisé capitaine de son aage , qu'estoit le capitaine Charry. Et m'asseure que monsieur de Briquemaut n'en dira pas le contraire , encore qu'il soit de la Religion de ceux qui l'ont massacré depuis à Paris. La forme de sa mort , ie n'ay que faire de l'escrire : car le Roy & la Royne , & tous les Princes de la Cour le scauent assez : aussi est-ce chose indigne d'un François. Et quand ie l'eus perdu , ensemble mon fils le capitaine Montluc , qui fut tué à Madere appartenant au Roy de Portugal , il me sembla que l'on m'eust coupé mes deux bras. Par ce que l'un estoit le mien dextre , & l'autre le fenestre. Il auoit nourri le capitaine Montluc tousiours aupres de soy depuis l'aage de douze ou treize ans.

*Loüange
du capi-
taine
Charry.*

*Loüange
du fils du
seur de
Montluc
qui fut
tué à Ma-
dere.*

Et par tout où il alloit , ce ieune garçon luy estoit tousiours pendu à la ceinture. Je n'eusse sçeu luy donner vn meilleur Precepteur que celuy-là , pour luy apprendre qu'est ce que de la guerre. Aussi en auoit-il retenu beaucoup , pouuant dire sans honte , encore que ce fut mon fils , que s'il eust vescu , c'eust esté vn grand homme de guerre , prudent & sage , mais Dieu en a autrement disposé. Laisant ces propos (qui me tirent les larmes des yeux) ie retourneray à nostre fait.

Monsieur de Briquemaut me manda par le capitaine Charry , qu'ils n'auoient nuls ingenieurs là dedans , ny homme qui sçeuft dire où falloit mettre vn gabion. Dequoy il me prioit en aduertir monsieur le Marechal : me prioit aussi de luy vouloir faire retourner le capitaine Charry avec mes cinquante soldats , car il les estimoit autant , que la meilleure compagnie qu'il eust là dedans , & qu'en recompense à iamais il se rendroit seruiteur mien : ce que ie fis. Monsieur de Gohas , qui est auourd'huy , estoit lors de ma compagnie , & du nombre des cinquante , ieune de dix-sept ans , & sur son commencement qu'il auoit

prins les armes. Monsieur le Marechal enuoyast en poste à Albe, pour faire venir les ingenieurs qui y estoient, dont le Cheualier Reloge en estoit vn. Et comme le capitaine Charry fut arriué, les picquiers prindrent de la poudre en ceinture, ainsi que les autres auoient fait auparauant. Et ne voulust escorte aucune : mais alla prendre le chemin vn petit à main droite par le quartier de leur cavallerie, & donna à trauers : & passa sans perdre vn homme. Il scauoit tres-bien prendre son party. Incontinent qu'il fut arriué, il pria messieurs de Briquemaut & de Chauigny de luy laisser garder le fossé, ce qu'ils luy accorderent : & se couurit là dedans de bois, tables & gabions. Et tout incontinent que les guides furent de retour à moy, ie despeschay vers monsieur le Marechal luy donnant aduis de tout : le suppliant qu'il m'enuoyast le capitaine Caupenne mon Lieutenant avec autres cinquante soldats des miens, ce qu'il fit. Et deux iours apres son arriuée le fist hazarder pour leur rapporter encore des poudres. Il alla du costé de la gendarmerie, où les ennemis auoient mis vn corps de garde de gens à

Le capi-
taine
Campen-
ne appor-
te des
poudres à
S. Da-
mian.

pied , qui prindrent la cargue d'affez
 loin : mais il fist tant qu'il mit la pou-
 dre sur le bord du fossé de la porte , &
 par luy me manderent les susdits Sei-
 gneurs recommandations , avec ad-
 uertissement d'asseurer monsieur le
 Mareschal qu'il n'eust plus crainte que
 la place se perdist : parce qu'ils auoient
 à ceste heure tout ce qui leur faisoit
 besoin : Le Baron de Chipy , qui estoit
 à Albe avec monsieur de Boniuet , se
 voulust essayer d'y mettre des poudres
 du costé d'Albe , & chargea de la
 sorte qu'auoient fait les miens : mais
 il perdit les poudres , & les païsans ,
 avec presque tous ses soldats , au moins
 n'en y entra que luy quatorziesme
 ou quinziemes. En toutes choses il y
 a de l'heur.

Le Baron
de Chipy
entre
dans S.
Damian.

Or le camp y demeura seize ou dix-
 sept iours deuant , & la batterie dura
 sept iours. Cesar de Naples auoit deux
 mines qui alloient par dessous le fossé ,
 à l'endroit de la bresche , lesquelles
 estoient desia pres de la muraille. Vn
 pionnier se sauuant fut prins de nos
 Italiens , qui me dit le tout : lequel
 incontinent la nuict venuë , ie baillay
 au capitaine Mauries (qui estoit pour
 lors mon sergent , & en ceste guerre

derniere a esté sergent Major à Bourdeaux , pres M. Montferrand) qui l'attacha : & ne voulust qu'un autre soldat & un guide pour le conduire. Lequel le mena si bien qu'il ne trouua que deux sentinelles , par le chemin , lesquelles soudainement se retirerent aux corps de garde. Ainsi il passa & mena le pionnier dans la ville , dans laquelle il demeura tout le iour , & comme le iour fut grand , Messieurs de Chaugny & de Briquemaut le menerent sur la muraille de la batterie , duquel lieu il recognust en quelle part se faisoit la mine. Incontinent ils descendirent au fossé , & commencerent à le couper & gratter : tellement que bien tost apres ils descourirent les trous , & depuis nous entendismes qu'il ne s'en fallust de gueres qu'ils n'y attrapassent Cesar de Naples , qui estoit là pour recognoistre la mine. Or les deux derniers iours ils firent vne grande batterie , & auoit fait faire le Sieur Dom Ferrand grande quantité de fascines , que les soldats Espagnols , Italiens & Allemans iettoient dedans : ayant couppé la contre-escarpe en deux ou trois lieux : mais autant qu'ils en iettoient , le capitaine Charry qui estoit

*La mine
de S. Da-
mian de-
couverte.*

dedans, les retiroit dans la ville par vn trou qu'ils auoient au deffous de la bresche, de sorte que pensant que ledit fossé fut remply, ils l'enuoyerent recognoistre en plein iour, estant en bataille pour donner l'assaut: mais ils trouuerent qu'il n'y auoit rien. Et alors firent grande diligence de la batterie deux iours, & si tiroient vne bonne partie de la nuit à la clarté de la Lune. Voyans la bonne contenance que tenoient nos gens là dedans, & que leurs mines, ny fascines ne leur auoient de rien seruy, delibererent de ne donner point l'assaut, ains de leuer le siege. Et la derniere nuit qu'ils eurent acheué la batterie, ie fis encores entrer le capitaine Mauries, qui entendit que le camp se leuoit, & comme ils retiroient l'artillerie: car messieurs de Chauigny, & de Briquemaut auant qu'il partist de là, voulurent qu'il entendit comme il se leuoit à la verité, pour m'en porter les nouuelles, ainsi passa & repassa tout à son aise, sans trouuer personne, pource que tout le camp estoit desia en bataille, & hors des loges. Comme il fut arriué deuers moy enuiron deux heures auant le iour, ie le despeschay incontinent sur

*Le siege
leué de S.
Damian.*

de bons cheuaux vers monsieur le Marechal, lequel il trouua encores au liēt : pource qu'il n'auoit dormy vne seule goutte de toute la nuit, ayant demeuré tout le iour avec monsieur le President Birague, & le Sieur Francisco Bernardin au dessus de Riue de Quiers. Qui comme ils n'oüyrent environ les deux heures apres midy plus tirer l'artillerie, ayant demeuré là iusques à vne heure de nuit sans rien entendre, tindrent la place pour perdue ou capitulée. Mais le matin vn peu apres le Soleil leuant, & ainsi que le valet de chambre eust ouuert, comme le capitaine Mauries luy eust porté les nouuelles, ie vous laisse penser la ioye qu'il eust. Il me manda soudain que ie m'en reuinssse le trouuer.

Or ie fis là vn tour de ienne capitaine, car comme le capitaine Mauries me dit, que le camp se leuoit, ie m'en allay en grand'haste à Saint Damian. Et aussi tost que le capitaine Charry, qui estoit sur la muraille me vist venir, il sortit dehors avec mes autres soldats : dequoy ie fus bien marry. Les ennemis s'estoient mis derriere vne petite montagne le ventre à terre, & auoient laissé quinze ou

*Le sieur
de Mont-
luc va à
S. Da-
mian.*

vingt arquebuziers à la descouuerte. Je les allay attaquer & les chargeay : mais comme ie fus à quatre pas des autres , ils se leuerent & me chargerent de cul & de teste , tellement qu'ils me menerent battant tout contre la ville , laquelle me secourust (bien pour moy) de dessus la muraille à coups d'arquebuzades. Là le capitaine Charry fut prins & blessé : & sans mon Lieutenant , que i'auois laissé aux gabions , ils m'auoient taillé en pieces , avec tous les cinquante du capitaine Charry. Je perdis sept ou huit soldats , desquels il en y eust trois de morts , monsieur de Gohas fut vne fois enuelpé & puis eschappa. L'aïse que i'auois de voir le siege leué , & l'enuie d'auoir quelque prise sur les ennemis me fit mal à propos faire ceste escapade. Cela fait ie m'en retournay à la Cisterne , apres auoir veu messieurs de Chauigny , & de Briquemaut, & le soir me rendis à Quiers. Auquel lieu je fus aussi bien venu de monsieur le Marechal & de tous ceux , qui estoient avec luy , qu'homme eust sceu estre. Lequel Sieur Marechal despescha monsieur de Biron deuers le Roy , pour luy porter le

*Le capi-
taine
Charry,
prins &
blessé.*

succé du siege , & luy demanda vne place de Gentil-homme de la chambre pour moy. Et aussi , pour la grand'instance & supplication , que ie luy fis , estant souuent en douleur de ma cuisse , il me deschargea de l'estat de Maistre de camp, encores que ceste requeste ne fut gueres agreable audit Sieur Mareschal : mais pour me gratifier de tout ce que ie luy eusse sceu demander , il voulut me contenter. Et estant ledit Seigneur de Biron à la Cour, le Roy ne voulut donner ledit estat de Maistre de camp , que prealablement il ne fut mieux informé a qui il le deuoit donner : Et ordonna que M. le Mareschal nommeroit vn homme , M. de Boniuet vn autre , & que i'en nommerois vn autre. le nommé monsieur de Chipy , qui fut cause que ledit Sieur de Biron fut longuement à la Cour pour les allées & venuës qu'il falust faire , & cependant ie demeuray tousiours chargé dudit estat de maistre de camp iusques au retour dudit Seigneur de Biron (lequel lors portoit le guidon de monsieur le Mareschal) qui m'en apporta la descharge , ayant le Roy donné iceluy estat au Baron de Chipy que i'auois

*Le sieur
de Mont.
luc quitte
la charge
de Maistre
de
camp.*

*Le sieur
de Biron
guidon
de mon-
sieur de
Brisac.*

nommé. Et de mesmes m'apporta la place de Gentil-homme de la chambre, car il ne voulut partir qu'il ne me vist enroolé en vne place des vieilles, qui auoient vacqué, & si me porta la patente du Gouuernement d'Albe, à quoy ie n'auois iamais pensé, & moins estimé, que le Roy me prefe-
rast à trois ou quatre autres, pour lesquels monsieur le Marechal auoit escrit. Voila les seruices que ie fis au Roy & à monsieur le Marechal, à quinze ou vingt iours l'un de l'autre.

Or, mes compagnons, celuy est bien-heureux, qui fait seruice à son Roy, sous vn sien Lieutenant, qui ne cele pas l'honneur de ceux, qui font quelque chose remarquable, comme ne faisoit pas monsieur le Marechal de Brissac : car oncques hommes ne fit rien aupres de luy, qui fut digne que le Roy l'entendist, qu'il ne l'en aduertist, il ne desroboit pas l'honneur d'autrui pour s'en enrichir, Il ne ce-
loit la valeur du plus grand, iusques au petit. Et comme Dieu voudra que vous serez employé aupres de tels Lieutenans de Roy ne craignez point à hazarder vos vies, & à mettre toute vostre diligence & vigilance à leur

faire seruice : i'entens si vous auez enuie de paruenir , par les armes , & par la vertu , sinon retirez vous. C'est vn extreme regret à celuy , qui a exposé sa vie pour faire quelque chose de bon , quand on cele son nom à son Prince , duquel nous deuons tous dépendre. Il n'y a larrecin qui excède celuy , qu'on fait de l'honneur d'autrui. Et cependant la pluspart des generaux des armées ne font pas conscience de cela.

Pendant que le Seigneur de Biron estoit à la Cour , demeurant chargé de l'estat de Maistre de camp , comme dit est , & au commencement de Iuin , que les bleds commençoient à meurir , le Seigneur Dom Ferrand ne voulut point laisser ce grand camp , qu'il auoit , inutile , ains à la persuasion de monsieur de la Trinitat frere du Comte de Benne , vint assieger Benne : Et luy fist entendre ledit Seigneur de la Trinitat qu'il couperoit l'eauë , qui alloit dans la ville faire moudre les moulins , & qu'il n'y auoit point de bleds ny farines dans icelle pour vn mois : l'asseurant qu'il luy feroit gagner vne paye pour ses soldats faisant couper le bled , qui

Siege de Benne.

448 *Comm. de M. B. de Montluc* ,
commençoit à estre meur , & soudain
le faire battre par deux ou trois cents
vilains , qu'il meneroit avec luy :
sçachant bien que ceux des Langues &
de Bernisse la Paille , le voudroient
achepter , & qu'ainsi dans vn mois ils
rendroient la ville sans tirer coup de
canon. Monsieur de Sauoye , qui
estoit ieune , & la premiere fois qu'il
estoit entré en armée y estoit , &
vindrent mettre leur camp vn mil au-
pres de Benne , sur le bord d'une ri-
uiere , qu'il y a , de laquelle ils coup-
perent l'eau : de sorte qu'il n'en ve-
noit pas vne goutte. Or par malheur
mon sieur le Marechal auoit ordonné
à vn gouuerneur , lequel ie ne veux
nommer , d'y faire apporter douze cents
sacs de bled , & farine , moitié de l'un
& moitié de l'autre de son gouuerne-
ment , comme il estoit de coustume.
Ie ne veux point mettre par escrit l'oc-
casion pourquoy ledit gouuerneur n'y
enuoya lescrites munitions , car il tou-
cheroit trop à son honneur : aussi ne
veux ie dire mal de personne. Mon-
sieur le President de Birague , sçait
bien les raisons , pour ce qu'il estoit
au conseil , quand mon sieur le Mare-
chal m'enuoya querir , où il en fust
fort

*Monsieur
de Sa-
uoye au
camp Es-
pagnol.*

fort parlé & disputé. Le camp de l'ennemy estoit desia deuant Benne, il y auoit huiët iours, & ne faisoit pas grand semblant de l'affaillir, esperant qu'il l'auroit bien tost par faute de viures, encore que la ville fust assés forte, & que le Comte & la Comtesse estoient fort affectionnez au seruice du Roy. Il n'y auoit en tout que trois compagnies de gens de pied dedans, qui estoient celles du Comte, celle du ieune la Molle, & celle de Louys Duc, qui est du Montdeui, faisant en tout deux compagnies Italiennes, & vne Françoise. Ledit capitaine la Molle estoit malade, & par ordonnance des medecins pour changer d'air s'estoit fait porter au Montdeui, & n'auoit ledit Seigneur Comte avecques luy chefs que ledit Louys Duc: & qui pis est, n'ayant iamais esté assiégué, se voyoit bien empesché, n'ayant personne aupres de luy, qui entendit à la deffence d'un siege. C'est vne affaire, où les plus habiles se trouuent estonnez, quand ils voyent vne furieuse sonnerie, s'ils n'ont autres fois veu vne telle dance, & d'autre part il se voyoit sans munition aucune: de sorte qu'il se resolut d'aduer-

Le Comte de Benne bien empesche.

tir monsieur le Marechal du tour. Et de la crainte qu'il auoit, que la place se perdit, comme il auoit iuste raison, estant celuy, qui y auoit le plus d'intereſt, parce que la place estoit ſienne, il despescha soudain le Lieutenant de la compagnie de Louys Duc, lequel arriva au sortir du dîner de monsieur le Marechal, estant pour lors à Carmagnolle, & avecques lui messieurs de Boniuet, President Birague, d'Auffun, Francisco Bernardin, la Mothe-gondrin, & quelque autre, duquel ne me peut ſouuenir. Comme monsieur le Marechal ouit la creance du Comte, & entendant qu'il n'y auoit point de viures, & que le gouuerneur, que ie ne veux nommer, n'en y auoit point fait apporter, comme il lui auoit ordonné, combien que tousiours lui faisoit entendre l'auoir fait, il entra, lui, & toute la compagnie en vn grand desespoir, tenant la place pour perduë, n'ayant monsieur le Marechal moyen aucun

*Le Comte
de Benne
demande
le ſecour
de
Montluc
pour ſon
ſecours.*

pour la ſecourir, d'autant qu'il n'auoit pas gens pour reſiſter à la tierce partie du camp de l'ennemy. Or il demanda au Lieutenant quel capitaine deſiroit le Comte, qui allaſt deuers lui pour le

secourir, il lui dit qu'il m'aimoit fort, & disoit souuent que ie l'auois vne fois secouru, & qu'il voudroit, qu'il lui eust cousté la moitié de son bien, & que ie fus là avecque lui. Je ne faisois lors que sortir d'une fièvre, dont i'en auois toutes les levres gâtées, & la bouche enleuée. Monsieur le Marechal me manda par son valet de chambre, venir à son logis : & le trouuay en ceste fascherie. Il me fist compter par ledit Lieutenant l'extrémité en quoy se trouuoit Benne, se complaignant du gouuerneur, qui l'auoit trompé : & me pria bien fort, me vouloir aller ietter dedans. Alors ie lui respondis, que voulez vous que i'y fasse, n'y ayant bled ni farines ? Je ne suis pas pour faire miracles. A quoy il me respondit, qu'il auoit telle opinion de moy, ensemble toute la compagnie, que si ie pouuois entrer dedans, la place ne se perdrait point, & que ie trouuerois quelque expedient.

Vn chacun sçait comme ces Seigneurs, quand ils veulent faire entreprendre à vn homme vne chose impossible, le sçauent bien louer & flatter : car il m'alla représenter Lans,

Sainct Damian & autres lieux , où ie m'estois trouué , ayant esté tousiours si heureux , que tout m'estoit succedé à mon desir. Monsieur le President Birague me commença à prendre de l'autre costé à persuader. Monsieur de Boniuet & les autres ne disoient mot : cognoissant bien que l'entreprinse estoit hazardeuse pour la perte de l'honneur : & que à la fin il faudroit venir à vne capitulation : comme monsieur le Mareschal mesmes me dict , qu'au dernier refuge il faudroit passer par là. Alors ie luy dis , que i'aimerois mieux estre mort , que si l'on me trouuoit en escriptures , & que i'eusse capitulé , ni rendu vne place y estant entré pour la sauuer : mais que i'y ferois ce que Dieu me conseilleroit , en l'aide duquel ie me fiois. Alors monsieur de Boniuet commanda à douze ou quinze Gentils-hommes des siens de venir avec moy , dont le Gouverneur la Mothe-rouge en estoit vn du nombre qui est encores en vie : & en prins autant des miens , faisans en tout trente cheuaux , sans mener aucun valet , que moy vn cuisinier , & vn valet de chambre : & escriuit au Vicomte de Gordon à Sauillan , qu'il

me baillast vne bonne guide , & au capitaine Theodore Bedeigne qu'il me fist escorte avec sa compagnie , c'estoit vn Samedy. Le Dimanche matin au poinct du iour i'entray dans Benne. Que qui fera ouyr le Comte en sa conscience s'il est en vie , il dira que ce fust vne des plus grandes ioyes qu'il eust iamais : & en tesmoignera autant Madame la Comtesse sa mere , & toute la ville. Je me mis soudain à dormir au chasteau : & deux heures apres nous disnasmes. Monsieur le Comte assigna tous les grands de la ville , maïsons , & charpentiers aussi , & les fist venir à la maison de ville , auquel lieu monsieur le Comte , Madame la Comtesse , & tous nous rendismes.

Le sieur de Mont-luc se iette dans Benne.

Là ie proposay tout ce qui nous estoit besoin de faire. Monsieur le Comte proposa le peu qu'il y auoit de munitions , qui n'estoient que cinquante ou cinquante deux sacs de bled. La ville remonstra , qu'elle n'en auoit pour huiet iours , de sorte qu'encores que la ville soit assize en bon lieu , ils se trouuerent à l'extremite pour estre au bout de l'année : & d'autre part ils auoient vendu tous

Benne despourueu de viures.

leurs bleds aux Genevois , & à ceux de deuers Savonne : car il se vendoit trois escus fol le sac. Monsieur le Comte , qui tousiours a esté homme de grande despence , auoit vendu tous les siens sur l'esperance des douze cens sacs , que le Gouverneur , que ie ne veux nommer , y deuoit mettre. Nous disputasmes , quand bien nous aurions des bleds , comment nous les ferions moudre. Mais dès incontinent que monsieur le Comte m'eust dit , où estoit le camp , ie compris que ie recouvrerois des bleds , combien que ie n'en voulus rien dire à personne , iusques au retour du conseil , que ie le dis à monsieur le Comte , & à Madame seulement. Au conseil se presenta vn petit homme masson , aagé de plus de soixante ans , qui dit auoir tiré plusieurs pierres pour mettre sur les fosses des morts , d'vn rocher qu'il nomma pres de là , & qu'il pensoit que qui tireroit ces pierres de dessus les morts , qu'elles seroient quelque peu bonnes pour faire des meules , si du tout non. Alors nous deputasmes deux de la ville avec madame la Comtesse , qui y voulut aller , pour en faire l'essay avec les massons. Ladite Dame

arriua avec vne grande ioye , & s'of-
 frit elle mesme de prendre la peine *La Com-
 tesse fait
 travailler
 aux repa-
 rations.*
 de faire faire les meulles. Le ne le vou-
 lois endurer : mais à la fin il fallust
 qu'elle fust creuë. Et fit si grande dili-
 gence , qu'en deux iours & deux nuits
 elle en eut vnze completees : lesquel-
 les furent distribuées à ceux de la
 ville , qui s'obligerent de nourrir les
 foldats , mais qu'on trouuaft moyen
 d'auoir des bleds. Or nous arrestâmes
 avec ceux de la ville , qu'à vne heure
 de nuict ils me rendroient cinq ou six
 cens hommes & femmes, les vns por-
 tans de petites cordes , les autres ,
 ferremens seruans à couper les bleds :
 & que les portes de la ville seroient
 fermées : aux fins que personne ne
 peust sortir pour donner aucun aduis
 à l'ennemy. Car monsieur de la Trini-
 tat auoit quelques amis dans la ville ,
 de quoy monsieur le Comte mesmes
 se doutoit. Puis depeschay deux hom-
 mes de la ville , qui allerent porter
 vne lettre au capitaine Hieronyme ,
 fils du Colonel Iean de Turin , qui
 estoit à vne petite ville , de laquelle
 ne me souuient , mais estoit à vn mil
 du lieu où les ennemis auoient coupé
 l'eauë , & le priois que ceste nuict là

*Moyen
 pour
 auoir des
 bleds.*

il s'effayast en vne sorte ou autre , de racouter ce que les ennemis auoient rompu : & qu'il s'efforçast de nous faire venir de l'eauë , s'il estoit possible , lequel ceste nuit-là mesmes ex-cuta mon aduertissement , combien qu'il fut vn bien ieune gentil-homme. Et croy-ie qu'il n'auoit pas vingt ans alors. Or nous nous retirasmes attendant la nuit. Et comme nous fusmes au chasteau , ie dis à monsieur le Comte , qu'il falloit que nous en al-lissions tous seuls par dessus les mu-railles pour regarder le champ de bled qui seroit plus pres de la ville , lequel il nous falloit couper toute ceste nuit-là , pendant que ie ietterois deux cens soldats , & le capitaine Theodore dehors , pour donner l'a-larme forte & redde aux corps de garde , qui gardoient que ceux de la ville ne peussent prendre du bled. Comme donc nous en eusmes choisi vn nous retournasmes soupper , & apres nous menasmes le capitaine Theodore , & deux chefs des com-pagnies qui estoient sur la muraille de la ville , pour leur monstrier la part où ils deuoient aller donner l'alarme , & les autres combattre les corps de garde.

garde. Puis ordonnasmes dix hommes de ceux de la ville sur vn cheual chacun , pour commander ce peuple qui couperoit les bleds , pour le faire haster.

A vne heure de nuict toutes ces gens sortirent , les gens de guerre à combattre , & le peuple à couper : de sorte que toute la nuict vous n'eussiez oüy qu'alarmes , tant au camp , que au corps de garde. Comme le peuple auoit coupé & lié , ils cou-
Diligence pour fournir de bleds Benne.
 roient deuant la porte de la ville , & là deslioient leurs fardeaux : & incontinent s'en retournoient : car les vns estoient ordonnez pour couper , les autres pour lier & porter. Cependant le iour vint , & on fit retirer la gerbe à ceux à qui appartenoit le bled dudit champ : ainsi il ne se perdit vn sac de bled de toute ceste nuit. Les ennemis qui virent ceste campagne toute coupée & emportée, y mirent encores des gardes plus fortes , & plus pres. Le peuple qui commença à recognoistre son gain , se delibera de se hazarder à retirer de leurs bleds , plustost que les ennemis les eussent : de sorte qu'à l'entrée de la nuict ils sortirent plus de deux cens hommes de la ville.

Les vns alloient loing, & les autres pres. Or Benne est presque enuironnée de valons, qui sont assez couuerts de taillis, & arrosez de forces ruisseaux. Et comme ils sentoient venir gens, ils se cachoient là avec leurs bleds, puis le matin se rendoient à la ville à l'ouerture des portes. Le lendemain matin que ie fus arriué, l'eau commença à venir aux moulins par la diligence du capitaine Hieronyme, & nous dura deux iours & deux nuits. Il y auoit vne grande confusion aux moulins, mais nous fîmes vn ordre, que nul ne moudroit, que seulement pour faire dix ou douze pains : & ainsi chacun en eut pour vn peu. Et à deux iours & deux nuits de là, le capitaine Salines Espagnol vint recognoistre l'eauë, laquelle la nuit mesmes nous perdîmes. l'aduertis le capitaine Hieronyme du lieu auquel ils l'auoient tourné couper, qui ne cessa iusques à ce qu'il l'eust remparé : mais il ne sceust faire si bien, qu'il nous vint de l'eauë qu'vn iour durant. Car d'heure en autre les ennemis l'alloient recognoistre. Madame la Comtesse eust paracheué aussi son oeuvre, qui fut cause que ne nous souciasmes plus d'eauë.

Or par le moyen des escarmouches, ^{Belle es-}
 qui furent faictes aussi belles en ces ^{carmon-}
 lieux, qu'en toute autre place que ie ^{che de-}
 me trouuay iamais, & avec la diligence ^{uant Ben-}
 qu'on mettoit de couper de nuict, ^{ne.}
 nous eufmes autant de bleds qu'eux.
 Le Seigneur Dom Ferrand, qui se vist
 frustré de la promesse que monsieur
 de la Trinitat luy auoit faite, com-
 mença d'estre fort mal content contre
 ledit Seigneur de la Trinitat. Le capi-
 taine Theodore s'en retourna à Sauil-
 lan l'autre nuict, apres que nous euf-
 mes fait la premiere coupe en la-
 quelle il se trouua, & eust quatre che-
 uaux ou hommes blesez de sa troupe,
 lesquels demurerent à Benne. Il ad-
 uertist monsieur le Mareschal de ce
 que i'auois fait à mon arriuée. Alors
 il se commença à resioiir, & tous
 ceux qui estoient avec luy, & à pren-
 dre quelque esperance de la conser-
 uation de la place. I'ay opinion à ce
 que i'en vis, que s'il l'eust attaquée ^{Erreur}
 avec l'artillerie, il est tout certain ^{du fleur}
 qu'il falloit qu'ils se rendissent: mais ^{Dom Fer-}
 l'on l'amusoit tousiours sur ceste eauë, ^{rand.}
 & sur ce qu'il n'y auoit point de bled,
 de quoy il demeura fort mal content
 & satisfait, contre ceux qui l'auoient

*Le siege
leué de
Benne.*

conseillé d'en vser de ceste sorte. Qui fust cause qu'il entra en quelque soupçon de monsieur de la Trinitat : & leua son camp le vingt-troisième iour apres que ie fus arriué , s'y estant parqué auparauant l'espace de huit iours. Monsieur le Comte est en vie comme l'on m'a dit , monsieur le President Birague est encores vivant , & prou d'autres , qui tesmoigneront si ie couche rien icy qui ne soit veritable. Il ne me peut souuenir si monsieur de Cossé estoit encores reuenu pres de monsieur le Mareschal : car il estoit allé en France. Or voilà comme la ville se sauua : & quelques iours apres le Baron de Chipuy reuint , qui estoit allé à la Cour remercier le Roy de la donation qu'il luy auoit faite de son dit estat , & ayant prins sa charge de Maistre de camp , ie m'en allay à Albe prendre possession de mon Gouvernement.

O capitaines , que de grandes choses fait vn homme , pour peu d'esprit & d'experience qu'il aye , quand il ne veut occuper son esprit en autre chose qu'à ce en quoy il se trouue pour en sortir à son honneur , & au profit de son maistre. Aussi c'est vn

grand malheur à celuy qui l'occupe *Vn capitaine ne doit songer qu'à faire sa charge.*
 en plaisirs & voluptez, jeux & festins. Car il est impossible que l'un ne vous fasse oublier l'autre : nous ne pouuons pas seruir tant de maistres.

Doncques quand vous vous trouuerez là, despoüillez vous de tous vices, & bruslez tout, aux fins que vous demeuriez avec la robbe blanche de loyauté, & affection que nous devons tous à nostre maistre. Car Dieu n'aide iamais les vicieux & voluptueux : mais au contraire il assiste tousiours aupres de celuy qui est vestu de la robbe blanche, pleine de loyauté. Je vous conseille ce que ie me suis tousiours conseillé : & voilà pourquoy Dieu m'a tousiours tant aidé & fauorisé, que ie n'ay iamais esté defait : & n'ay iamais combattu (si ie commandois) que la victoire ne m'en soit demeurée. Et ne pouuois faillir : car Dieu me conseilloit tousiours, me mettant en memoire tout ce qu'il m'estoit besoin de faire. Et voilà pourquoy i'ay eu tout iamais si bonne fortune. Comme il vous aidera aussi bien qu'il a fait à moy, si n'employez vostre esprit en autre chose, qu'à seruir vostre maistre en loyauté & fidelité

*Instruc-
tion aux
capitai-
nes.*

que nous luy deuons. Puis quand nous
ferons en repos , alors nous pouuons
prendre tous nos plaisirs : car cela ne
portera aucun dommage au Roy , ny
à celuy que nous seruons sous luy.
Lors, vous iouïrez d'un doux & plai-
sant repos , quand vous retournerez
chez vous chargez d'honneur , & que
vous vous presenterez à vostre Prince,
auquel on racontera ce que vous au-
rez fait. Tout le bien du monde ne
vaut pas cela. Mirez vous donc en
moy , mes compagnons , qui n'ay
jamais songé autre chose , qu'à faire
ma charge. Il est impossible , faisant
cela , que vous ne rapportiez de l'hon-
neur. Mais cependant vous qui aurez
la charge d'attaquer & boucler les
places , lors que vous voudrez par la
faim ranger & forcer les assiegez , si
voyez que vous ne puissiez du tout
les empescher d'emporter des bleds
voisins , donnez-y le feu : car leur
desrobant cette commodité , les voilà
bien en peine. Car de dire que vous
gardez cela pour vous , il faut con-
clure , que vous estes bien improui-
dent de vous engager à attaquer vne
place , sans auoir le moyen de vous
passer de ce qui est pres de la ville

que vous attaquez , & à sa veuë. En ces choses il ne faut point estre pitoyable : car c'est affaire à mauuais medecins.

Quelque temps apres monsieur le Marechal entreprit d'aller prendre Courteuille, qui est vn chasteau, & vne petite ville aux Langues : le chasteau est fort, & la riuere passe par le milieu de la ville, sur laquelle y a vn grand pont de bricque, & vn bourg tout ioignant. Ledit Seigneur Marechal passa à Albe, & m'amena avec luy, & la moitié de ma compagnie, qu'il print pour sa garde : le reste il le laissa dans Albe. Lequel estant arriué audit Courteuille, se logea de là la riuere au bourg. Au deçà de laquelle & bien pres du chasteau y avoit vn Monastere, auquel il logea trois enseignes : toutesfois ceux du chasteau dominoient plus les nostres, que les nostres eux. Monsieur de Salcede auoit tenu ceste place lors qu'il estoit avec les Espagnols. Monsieur le Marechal mist du costé de deçà le pont huit ou dix canons, pour battre la courtine, qui respondoit deuers le Monastere, dans lequel durant la batterie, monsieur de Boniuet se logea. Et combien

*Entre-
prise de
Courte-
uille.*

*Courte-
nille bat-
tuë par
le sieur de
Brisac.*

que ie ne fusse plus maistre de camp, neantmoins ie ne l'abandonnois ny de nuict, ny de iour. Or en deux ou trois iours se tira douze cens coups de canon contre ceste courtine, & finalement on n'y fit rien pour ce qu'ils auoient fait vn grand rampart fort espois par derriere la muraille. Et comme elle fust abbattuë, la place demeura plus forte qu'elle n'estoit, à cause dudit rampart. Monsieur le Marechal demeura trois iours qu'il ne sçauoit s'il deuoit enuoyer querir de la munition dauantage, ou s'il s'en deuoit retourner. Le capitaine Richelieu auoit gaigné la ville, & s'estoit logé dedans avec deux autres compagnies: mais comme ie vis monsieur le Marechal en ceste peine, ie passay la riuere du costé du Monastere: car encore que ie suiuisse monsieur de Bonniuet, si est ce que le soir ie me reti-rois pres de monsieur le Marechal. Il y auoit vne porte au Monastere, qui sortoit sur vn grand chemin sur lequel on pouuoit marcher asseurement, & à couuert, sans estre veus du chasteau: mais de la porte du Monastere iusques au chemin, il y auoit quinze ou seize pas, lesquels il falloit des-

pescher bien viste ; car toute la cour-
tine battoit sur ceste porte. Puis il fal-
loit aller la teste baissée iusques au-
pres du pont de l'entrée de la ville ,
& courir iusques à ce qu'on estoit
dedans. Comme i'eus passé le danger ,
& fus dans le chemin , ie commençay
à regarder s'il seroit possible de mener
le canon dans la ville. Ce que ie trou-
uois fort difficile : qui fust cause que
ie m'en allay dans la ville pour pren-
dre le capitaine Richelieu , avec le-
quel i'allay descourir le derriere du
chasteau , qui respondoit sur vne gran-
de place inhabitable estant entre la
muraille de la ville & le chasteau. Il
y auoit vne petite maisonnette tout
aupres de la muraille de la ville , dans
laquelle nous nous mismes , pour re-
garder à nostre aise , si le chasteau
estoit gueres fortifié en cest endroit.
Or ie voyois des fentes & creuassès
dans la muraille , à trauers lesquelles
on voyoit le iour. Et monstray au
capitaine Richelieu , que si par quel-
que inuention nous pouuions mener
trois canons à ceste part , que nous
emporterions le chasteau , à cause
qu'ils ne l'auoient point fortifié en
cest endroit , pour l'impossibilité qu'il

*Le sieur
de Mont-
luc reco-
gnoist le
chasteau.*

y auoit d'amener l'artillerie.

Ce qu'on iuge impossible, est possible aux autres, & fait perdre beaucoup de places. Or ie m'en retournay sur le chemin pres l'Abbaye, le capitaine Richelieu avec moy : & commençasmes à discourir s'il y auoit aucun

*La riuie-
re sondée
pour pas-
ser le ca-
non.*

moyen. Sur quoy il me va incontinent entrer en fantaisie de faire sonder la riuere, & veoir s'il y auoit bons fons. Ie fis appeller vn soldat de l'Abbaye, & comme il fust venu à moy, ie luy presentay dix escus, pourueu qu'il allast sonder la riuere : & luy monstray qu'il luy falloit aller pieds & mains par terre, iusques à ce qu'il seroit dedans l'eauë, & y estant qu'il se mist en eauë iusques au col. Ie fis appeller vn autre soldat, & manday aux capitaines qui estoient en l'Abbaye, qu'ils fissent sortir quinze ou vingt soldats, qui allassent iusques au pied de la muraille en maniere d'escarmouche : ce qui fust fait. Et ainsi ie sauuy le soldat, que les ennemis ne s'apperceurent iamais qu'il fust dans l'eauë. Premièrement il alla droit à la muraille de la ville, où l'eauë donnoit contre, puis alla tout contremont iusques au gué, que nous pas-

sions allant de l'Abbaye au logis de monsieur le Marechal, & par derriere l'Abbaye, il entra dedans où nous courusmes pour éviter le danger, & le trouuâmes desia dans l'Abbaye; les soldats de l'escarmouche retirez, il y auoit desia grande piece: & mé compta que le fons de la riuere estoit fort bon, & qu'il n'y auroit eauë que iusques au maeul des rouës. Et incontinent montay à cheual, & allay dire à monsieur le Marechal ce que i'auois veu presens les deux Commissaires de l'artillerie nommez Balazergues & Duno: car monsieur de Caillac n'y estoit point. Duno contesta contre moy qu'il auoit tout veu, & moy contre luy le contraire. A la fin monsieur le Marechal dit, que c'estoit leur mestier: & que d'entreprendre cela & n'en pouuoir venir à bout, ce ne seroit que perdre temps, & faire mourir des gens sans raison. Alors ie me commençay à esmouuoir, l'estant desia contre Duno: & dis à monsieur le Marechal, Monsieur, il y a long temps que i'ay cogneu monsieur de Brissac, & ne le vis iamais auoir tant de crainte des arquebuzades, qu'il laissast de recognoistre vne chose

Contestation entre les Commissaires de l'artillerie.

qu'il vouloit veoir. Je croy que vous estes celuy-là mesmes, & que pour estre Lieutenant de Roy vous n'estes

*Propos du
sieur de
Montluc
à monsieur
de Bris-
sac.* pas deueni couiard. Montez à cheual, & ie vous feray confesser, apres l'auoir veu, que vous prendrez le chasteau, sans qu'il vous couste dix coups de canon. Alors tout en colere montasmes à cheual, & menasmes Duno, & laissa Balazergues, & allasmes passer la riuere au dessus de l'Abbaye, dans laquelle nous entraumes. L'auois mené avec moy le soldat, qui auoit fondé la riuere. Or pour aller au chemin, il falloit ouurir promptement la porte, où les ennemis tenoient tousiours l'œil, & courir quinze ou vingt pas, iusques à ce qu'on estoit dans le chemin à la courtine du chasteau : & tout à vn coup la porte fust

*Danger
du sieur
de Bris-
sac.* ouuerte. Je passay & courus : monsieur le Mareschal de mesme. Quand il passa ils tirerent trois arquebuzades, desquelles ie pensois qu'il fust atteint : car i'auois ouï le bruit de la bale, comme quand elle frappe quelqu'un : & comme il arriua à moi, ie le regarday au visage, & vis qu'il secoïoit la teste en riant. Il s'aslit contre terre aupres de moy, car il se fal-

loit tenir bas , & me dit , le l'ai failli belle , car les bales m'ont donné entre les iambes. Vous estes mal sage (luy dis-ie) monsieur , de me suiure : Ne voyez vous pas que ie veux estre Lieutenant de Roy , si vous mourez ? Voilà pourquoi ie me veux dépetrer de vous , & vous ay amené ici : de quoy il ne fist que rire , voyant en mon visage , que i'estois tres-aïse qu'il eust eschappé ceste fortune : car on eust ietté ce malheur sur moy : mais ie n'y eusse sçeu que faire. Car qui va à telles nopces , en rapporte bien souvent des liurées rouges.

Cependant arriua Duno & le soldat , auquel monsieur le Marechal promist de donner les dix escus , que ie luy auois promis : mais qu'il y falloit retourner en sa presence , & qu'il luy en donneroit encores dix. Ce que le soldat promit. Duno se fait oster les bottes , & s'en va en pourpoint avec le soldat entrer dans l'eau par derriere l'Abbaye. Il n'auoit pas faute de cœur. Il faut que les gens de ce mestier se soucient des arquebuzades , comme de pommes cuites. Nous les vismes venir l'un apres l'autre tout contre bas la riuere , & vindrent iusques à

la muraille de la ville , dans laquelle ils passerent , estans sortis tout aupres de la porte. Ce qui ne fust pas sans grand danger & peril tant pour eux que pour nous , car il y faisoit bien chaud. Souuent ie desiray monsieur de Brissac à son logis , ayant plus de peur de luy , que de moy. Voyant Duno & le soldat passez , nous prîmes la course à la mercy des arquebuzades , & regagnâmes la ville. Ce que Dieu garde , est bien gardé : car c'est merueille que quelqu'un de nous n'en eust sa part. La peur ou l'affection me faisoit aller plus droict & plus viste : de sorte que ie ne sentoies gueres mon mal. Lors ie monstray à monsieur le Marechal tout ce que le capitaine Richelieu & moy avions veu : & apres auoir veu la relation de Duno , mesmes du fonds de la riuere , & veu la verité de ce que ie luy auois dit , il se mist à courroucer contre Duno. Alors ie luy dis , qu'il ne se falloit plus courroucer , mais qu'il se falloit attendre à prendre le chasteau. Il n'y a si sçauant qui ne se trompe. Sur quoy il donna charge au capitaine Richelieu d'assembler trente ou quarante grosses pippes , & que

Sur l'entrée de la nuit il les fist porter au lieu que Duno luy monstreroit : & à l'autre capitaine de ruiner vne maison , pour auoir des tables pour mettre sur les pippes , apres qu'elles seroient remplies de terre : afin de hausser encores dauantage , à cause de la grande tour du chasteau , qui pouuoit veoir le recul du canon. Il commanda aussi à l'autre capitaine d'assembler des pieces de bois & faire le tout si haut , que de la tour on ne peust faire veoir le recul du canon. Et auant que partir de la maisonnette , qui estoit au cul du chasteau , ie monstrey à monsicur le Mareschal vn rocher , là où trente ou quarante arquebuziers pouuoient demeurer au couuert , qui pouuoient tirer aux carreaux de la tour quand les ennemis se presenteroient pour tirer à l'artillerie. Car il falloit qu'ils se montrasent de la ceinture en haut.

Après nous allasmes à la muraille de la ville contre l'eauë , mesurer la hauteur qu'il falloit , que le canon montast , pour aller dans la ville : & trouuasmes qu'il n'en y auoit pas deux pieds , pour ce que le chemin estoit fort bas. Vn Gentil-homme de mon-

fieur le Mareschal arriua à nous, ayant ledit fieur Mareschal deffendu, que homme ne passast l'Abbaye, auquel ie fis bailler la charge de rompre la muraille, & la faire tomber du costé de l'eauë. Puis nous en retournasmes, & Duno demeura avec le capitaine Richelieu. Sur l'entrée de la nuit vn Gentil-homme y arriua avec trente ou quarante pionniers : & puis vn autre Gentil-homme dudit Sieur aussi avec quatre-vingts ou cent. Ils trouuerent que le capitaine Richelieu auoit desia plus de la moitié des pippes sur le lieu. Monsieur de Boniuet & moy accompagnasmes Balazergues, qui amenoit trois canons avec des cheuaux. Car monsieur le Mareschal en auoit recouuert, pour en amener six pieces : & allasmes à cheual plus de vingt pas dans la riuiere avec le canon, comme fist aussi le fieur de Balazergues, & les charretiers en eauë iusques au dessus de la braye. Puis nous tournasmes descendre derriere l'Abbaye, & nous en allasmes dans la ville. Et encores que les ennemis tirassent fort, ils ne pouuoient rien voir, à cause de la grande obscurité de la nuit, & tiroient à coup perdu,

perdu , & à la fortune , laquelle nous
rit pour lors. Elle ne fait pas tousiours
ainfi : au moins à moy. Il y en a de
si heureux , que iamais le coup ne
porte. Ce braue caualier monsieur de *Heur de*
Sanfac (ie croy qu'il n'y a pas deux *sieur de*
Sanfac. Gentils hommes vivans , qui se soient
trouuez en plus de combats , que nous
auons fait luy & moy) iamais il ne
fust blessé , qu'on sçache , qu'à la ba-
taille de Sainct Denys. le n'ay pas esté
si heureux en cela , que luy.

Or comme nous arriuasmes au lieu
où ce Gentil - homme estoit , nous
trouuasmes desia la muraille ouuerte
& dans l'eauë : puis fismes rompre
aux pionniers deux coings de mai-
sons , qui empeschoient de passer le
canon , lequel tout incontinent arriua
à la muraille , par où les cheuaux
entrèrent dans la ville : & avec l'aide
que les soldats firent , nous mismes le
canon dedans : & apres Balazergues
s'en retourna chercher les autres deux ,
& de mesmes les menasmes là où Du-
no auoit rempli les tonneaux : & deux
heures auant iour tout fust prest à ti-
rer : & les soldats logez derriere le
rocher pour tirer aux carneaux. Mon-
sieur le Marechal fust aduertty que

Dom Arbre de Cende estoit arriué à Saint Stephe cinq mil de nous , qui marchoit la nuit pour secourir le chasteau , qui fust cause , que ledit Sieur Mareschal nous manda qu'il s'en alloit gagner vne montagne , pour estre à son aduantage pour le combattre , & que nous fissions le mieux que nous pourrions avec les six compagnies que nous auions à l'Abbaye , & dans la ville. Ledit Sieur gagna de nuit la montagne , & rangea ses gens pour deffendre le passage & venuë.

*Dom Diego com-
mandant
dans le
chasteau.*

A la pointe du iour , comme nous pensions mettre le feu au canon , le tambour du chasteau commença à faire la chamade. Il y auoit vn Espagnol qui en estoit gouuerneur , nommé Dom Diego , aussi glorieux & superbe , qu'un autre eust sçeu estre. Aussi il en portoit le nom. Monsieur de Boniuet fist la capitulation. le me mis dans la maisonnette sur vn matelas , que ledit Sieur de Boniuet auoit fait porter pour luy , puis me fist esueiller pour signer la capitulation : car Dom Diego me cognoissoit. Il auoit esté Lieutenant de l'une des quatre compagnies d'Espagnols , que

le Roy auoit quand nous prîmes la terre d'Oye. Monsieur le Marechal enuoya courir de la cauallerie au deuant de Dom Arbre, lequel ils trouuerent sur sa retraicte, à cause qu'il auoit esté aduerti, que monsieur le Marechal auoit gagné le passage : & enuiron vne heure apres midy, ledit Sieur arriua à nous, & trouua que Dom Diego & ses trois compagnies, dont l'vne estoit Espagnolle, estoient partis, il y auoit plus deux heures. Plusieurs demanderent ce gouuernement là audit Sieur Marechal, car il estoit en fort bon lieu, pour y faire bon seruice au Roy, & son profit : mais monsieur de Boniuet & moi nous accordasmes ensemble pour le faire donner au capitaine Richelieu, qui estoit Lieutenant d'vne de ses compagnies colonnelles. Et à nostre requeste monsieur le Marechal le luy donna, & escriuit au Roy, pour luy confirmer le don. Ce que sa Maiesté fist. Monsieur de Boniuet luy laissa sa compagnie pour quelque temps.

Capitaines, sont-ce deux choses *Remon-*
qu'on doie laisser en arriere sans estre *france*
mises par escrit, la prise de Lans, & *aux capi-*
taines.

*Aux
Princes
& chefs.*

celle de Courteuille : Pesez bien tout ce que nous fîmes à l'une & à l'autre : & l'aduis que ie donnay sans m'arrester au rapport qu'on faisoit. Et vous Princes & Lieutenans de Roy, ne craignez pas tant vostre peau, que vous ne vouliez sçavoir que c'est. Pourquoy auez vous ces grandes charges, pour demeurer en vostre cabinet ? Voyez comme monsieur de Brissac fist, il ne le falloit pas presser d'aller recognoistre, mais plustost de s'arrester. Il estoit tout plein de cœur. Et vous qui vous trouuerez engagez, faites vous sages aux despens de ces brauaches, qui se rendent au premier coup de matines, & cependant font les Rolands. Celuy qui le fait de parole, le doit estre au double par effet. Il m'assieure que si ce Dom Diego eust voulu, il nous eust donné de la peine. Car perdre vne place, & n'apporter, ou avec la mort, ou avec la vie, de l'honneur, celuy qui vous y a mis, vous fait tort, s'il ne vous fait couper la teste. Sans doubte il pouuoit estre secouru, & pour le moins deuoit il endurer vn assaut : car nous ne l'eussions pas emporté du premier coup, qu'il ne nous eust cousté cher. Quelque pauvre

place que vous ayez , si vous resoluez d'attendre le canon , depuis qu'elle a endure faire la brèche , il faut que celui qui commande , pour son honneur endure vn assaut , s'il n'a faute de toutes choses , & moyen de faire le moindre retranchement.

Quelque temps apres monsieur le Marechal voulut aller prendre Seue , *Entre-prise de monsieur de Brissac sur Seue.* & m'escrivit à Albe , que ie me tinssse prest , & qu'il passeroit par Albe. Et comme il m'eust donné aduis de son depart , & que ie tirasse trois enseignes d'Albe pour les amener avecques lui , ie les tins prestes , & deux coulevrines , comme il m'auoit aussi escrit. En l'attendant i'allay assieger Saruenal : qui est vne petite ville à quatre mil d'Albe tirant vers les Langues , & deux autres petites villates sur le mesme chemin , où les ennemis auoient garnison , mesmement à Saruenal , où il y auoit cent hommes estrangers. *Saruenal pris.* Apres l'auoir battue vers la porte, ceux de dedans se mirent à parler avec moy : mais cependant mes gens entroient par vn autre costé , par vne fenestre avec des eschelles : de sorte que cependant que leur capitaine marchandoit sur la capitulation avec

moy : ceux de dedans se virent prins ,
& furent forcez se rendre à discretion.

*Les par-
lemens
dange-
reux.*

Les heures d'un parlement sont toujours dangereuses : c'est lors , qu'on doit mieux border sa muraille , pour esuiter les surprises. Car lors entre la poire & le fromage , ont tente le gué. I'en ay veu plusieurs sotement surprins. Croyez l'Italien qui dit : *No te fidar , & no serai inganato*. Vous devez fort estudier ceste leçon gardiens des places : car depuis qu'une femme parlemente & vous escoute à Dieu vous comment , vous avez defia le pied en l'estrieus. Aussi quand vne place commence à ouvrir l'oreille à la composition , tenez la hardiment pour perdue. Il est vray qu'il ne faut pas leur donner loisir de se raviser : car il y a des amuse-fols , & qui font mine de parler : mais c'est pour venir à leur point. Si vous craignez secours , ou vous voyez foible , prenez les au mot : faites profit du temps , ayez des ostages de bonne heure , si vous pouuez. Et vous d'autre costé qui les voulez garder , sur tout n'ouurez iamais la bouche pour le parlement , si vous n'en avez enuie , ou n'estes pressez. Car soudain vostre ennemy en tire

vn merueilleux aduantage. Il vaut mieux que ce soit quelque particulier, qui en fasse l'ouuerture. Elle est plus seante aux assiegeans, qu'aux tenans : & l'vn & l'autre doit faire bonne mine, il se cognoistra bien tost qui a mauuais jeu. A ces heures ayez tousiours l'œil au guet. Deslors le bruit court par tout, qu'on se rend. Cependant ceux de dedans, au lieu de songer à se deffendre, pensent à sauuer, qui son argent qui ses armes : & ceux de dehors qui voyent que l'esperance du butin est perduë pour eux, si la capitulation s'ensuit, taschent à vous donner vn croc ingambe. Car lors on s'approche plus aisement de la muraille, parce que volontiers il se fait quelque trefue. Souuenez vous donc tousiours que l'heure des parlemens est dangereuse.

Les autres deux villattes se rendirent & m'enuoyerent les clefs, monfieur le Marechal arriua le lendemain, bien aise de mon exploit : & marchasmes droit à Seue. Or Seue est vne petite ville bien iolie & bien fermée de murailles. Vne riuere passe ou bien par dedans la ville, ou contre les murailles, car ie n'y ay iamais esté,

*Affiers
de Seue*

que quand monsieur de Bonniuet & moy vinsmes secourir monsieur le Marechal, & à ce coup que nous la reprismes : & n'y couchay, que vne nuit. Car monsieur le Marechal m'en fist retourner le lendemain matin, pource que Dom Arbre estoit avec ses forces à cinq mil de là, & dans Albe n'estoit demeuré que mon Lieutenant avecques la moitié de ma compagnie. Or il y a vne montagne au dessus de la ville, au sommet de laquelle il y a vne Eglise, & dans le rocher vn Hermitage, dans lequel on entroit par dessus vne table, depuis l'Eglise iusques à l'entrée du rocher : & dedans y auoit des autels pour dire Messe, & vne chambre pour l'Hermite : & n'y auoit autre clarté que par la porte, où l'on entroit, qui respondoit vers la ville. Ils auoient bien percé l'Eglise, & ne falloit que tirer la table à eux tout le monde ne les eust sçeu prendre. Ils auoient encore fait vn autre fort à quinze ou vingt pas à main droite, & l'auoient fait en maniere d'vn fossé & les contre escarpes fort hautes : de sorte que comme on venoit sur la contre escarpe, homme ne pouuoit monstrier vn doigt de la

teste

teste sans estre decouvert & tué: & encores auoient fait vne tranchée, qui prenoit depuis ce fort iusques à l'Eglise.

Comme nous arriuasmes pour camper auprès de là, le Sieur Francisco Bernardin & moy, qui estions Mareschaux de camp, estant sur le point de loger l'armée, deux ou trois cens hommes sortirent tant du fort que de la tranchée, & de l'Eglise, & nous attaquèrent. Je n'auois que le capitaine Charry avec moy, & cinquante arquebuziers, quelques gens à cheual auions nous pour tenir escorte. Le Baron de Chipy, Maistre de camp m'enuoya renforcer de cent arquebuziers. Je fus contrainct de luy mander qu'il m'en enuoyast encore: car nous estions aux mains de bien pres. Sur ce, voicy arriuer monsieur de Boniuet en poste qui reuenoit de la Cour, lequel oyant l'escarmouche, dit au Baron de Chipy sans descendre, faites alte icy, iusques à ce que monsieur le Marechal sera arriué & ie m'enuois trouuer monsieur de Montluc. Les capitaines le suiuirent & quelques arquebuziers à cheual: & en nous embrassant, les ennemis firent

*Le fieur
de Mont-
luc Ma-
reschal
de camp.*

*Monsieur
de Boni-
uet.*

une cargue aux nostres. Alors ie dis à monsieur de Boniuet, Monsieur pour vostre bien venue mettez tous pied à terre, & allons faire une cargue à ces gens : & rembarrons les iusques dans le fort. Incontinent tout le monde mit pied à terre : & me dit, donnez-vous droit à ceux qui voudront agagner le fort. Il prend une rondelle à la main, & moi une hallebarde, car i'ay tousiours aimé à iouer de ce baston. Et alors ie dis au Seigneur Francisco Bernardin, Mon compagnon, cependant que nous ferons la cargue, faiçtes les quartiers. Il me respondit, est-ce tout ce que vous voulez faire de la charge que monsieur le Marechal nous a donnée : Or ie feray le fol aussi bien que vous : & pour ce coup ie feray Gascon. Il mit pied à terre, & s'en vint à la cargue avec moy. Il estoit armé d'armes fort pesantes : & de luy mesme l'aage le rendoit pesant. Voilà pourquoy il ne peust pas venir si viste que moy. Il me sembloit en ces banquetts, que mon corps ne pesoit pas une once, & que ie ne touchois pas en terre. Il ne me souuenoit gueres de ma hanche. Je chargeay droit à ceux qui tenoient le costé de

la tranchée , monsieur de Boniuet en fit autant de son costé bien brauement : & les rembarra fines de telle sorte , que ie passay la tranchée pesle-mesle avec eux , & les menay tuant iusques à l'Eglise. Iamais pour un coup ie ne frappay tant. Ceux qui estoient dedans , voyant leurs gens en desordre , & ainsi massacrez l'abandonnerent , & se mirent au long d'un petit chemin , tout au long du rocher de la montagne , qui alloit descendre bas à la ville , & un des miens colletta celuy qui portoit l'enseigne : mais il se deffit brauement de luy , & sauta dans le chemin , gagnant à haste la ville. l'y courus , mais il fust plus viste que moy : aussi il auoit la peur aux talons. Le capitaine fut tué sur la porte , qu'ils estimoient beaucoup , & estoit homme de soixante ans : car il estoit tout blanc. Tous ne peurent pas gagner le chemin : car il en rentra vne partie dans l'Eglise qui se deffendoient fort bien. Ils auoient fait vn ruelin deuant la porte , lequel nous leur gagnasmes : & alors ils se retirerent tous dans l'Hermitage , & tirerent la table à eux comme un pont-leuis.

Monsieur de Boniuet fut mal traité,

d'autant qu'il perdit pour le moins vingt hommes des meilleurs qu'il eust, & plus de trente de blesez. Car comme nos gens se voulurent ietter à coup perdu dans le fort de dessus la contrescarpe, auant que pouuoir descouurir le fort, ils estoient tuez : & en perdit entre autre quatre de ceux qu'il auoit menez de France, qui ne vindrent que trop tost pour eux, dont il y en auoit 2 Basques, aussi vaillans ieunes hommes que la terre en porta iamais. Je les auois veu ailleurs. Ces gens ont les noms si reuers, qu'il ne m'en souuient, dequoy ie suis marry. Ledit Sieur fust contrainct de laisser ce fort, & venir à moy à l'Eglise. M. le Marechal auoit faict faire alte à tout le camp, à un mil de là, attendant quand le Seigneur Francisco & moy lui porterions les quartiers, où falloit que le camp se logea. Et comme il vid qu'il n'auoit point de nouuelles de nous, enuoya vn gentil-homme, pour scauoir que nous estions deuenus: lequel nous trouua à l'Eglise, & nous dit que M. le Marechal estoit mal contant & fort fasché, ne sachant où loger, ni où les quartiers estoient faicts. Alors ie luy dis retournez vous en, & luy

dictes qu'il a fait deux sages Maref- ^{Plaisante}
 chaux de camp , qui n'ont songé au- ^{saillie du}
 tre chose qu'à le loger & l'armée: mais ^{sieur de}
 ç'a esté à enuoyer des gens au royaume ^{Montluc.}
 des taupes. Le gentil-homme cogneust
 bien , qu'il n'y auoit rien de faict , &
 s'en retourna estant presque nuict : de
 sorte qu'il fallust que la cauallerie se
 mist dans vn vallon à main gauche ,
 & nostre infanterie en vn autre à main
 droite. Monsieur le mareschal arriua
 à nous , qui se fust volontiers courou-
 cé : mais ayant veu ce que nous
 auions faict , ne s'en soucia plus , ains
 se mist à rire de ses Marefchaux de
 camp , qu'il auoit fait. Le Sieur Fran-
 cisco Bernardin s'excusoit sur moy ,
 & moy sur luy: mais monsieur le Ma-
 reschal dit , ie sçay bien que la teste
 blanche est trop sage , & que ce sont
 des boutades de Gascogne.

Or le Colonel saint Petro Corse
 vint avec M. le Marefchal. Ceux de
 l'Hermitage le demandoient , pour ce
 qu'il y auoit des Corfes : & le capi-
 taine qui fut tué sur la porte en estoit.
 Le Colonel Saint Petro les assura de
 la mort dudit capitaine, & que si vn ou
 deux vouloient sortir , il le luy mon-
 treroit mort. Ce qu'ils firent. Monsieur

le Marechal y estoit tousiours : car il ne scauoit où aller loger : & toute la nuict demeura avecques nous. Il y en eust bien de couchez, & qui me donnerent force bons-soirs. Apres qu'ils eurent recogneu leur capitaine mort, ils se rendirent sur la promesse dudit Colonel de les laisser sortir vies & bagues sauues : & entra ledit Colonel là dedans avecques cinq ou six. Et comme vint le iour ils sortirent dehors, & se mirent presque tous avec ledict Colonel : & enuoyerent leur tambour à ceux du fort, leur denoncer qu'ils s'estoient rendus : & qu'ils les conseilloyent d'en faire le semblable. Ce qu'ils firent à mesme composition : car le Colonel Sainct Petromenoit tout cela. Puis nous descendismes là bas, & incontinent le Gouverneur se rendit, & à mesme instant deslogea avec le reste des soldats, qui luy estoient demeurez : & monsieur le Marechal se logea dedans avec quelques-vns seulement, pour ne manger les viures, & mettre desordre en la ville. De laquelle il fist gouverneur le capitaine Loup, y laissant quatre enseignes avec luy, & quelque cheuaux legers. Et apres se retira

*De capi-
taine
Loup.*

ledit sieur par mesme chemin, & moy
comme i'ay desia dit, me rendis à Al-
be à vne heure apres midy.

Voilà tout ce que ie fis en Pied-
mont. Pendant que ie demeuray au-
pres de M. le Marechal de Briffac. *L'escar-
mouche
de. Dan-
desan.*
Que si ie voulois escrire toutes les es-
carmouches auxquelles ie me suis trou-
ué, il me faudroit double papier pour
escrire, & mesme celle d'Andefan :
qui fust la plus forte & la plus grande
escarmouche que ie me trouuay ia-
mais. Car c'estoient tous les gens de
pied des deux camps, entre lesquels
ie n'auois que trente-quatre soldats
de ma compagnie, pource que i'es-
tois en garnison à Sauillan. Et mon-
sieur de Termes ne vouloit permettre
que la compagnie en sortist. *Les mor-
rions iau-
nes.* le fis cou-
rir de taffetas iaune les morions à
mes soldats, pour l'amour de mon-
sieur de Termes qui portoit le iau-
ne, lesquels estans si petite troupe
executerent de si beaux faits d'armes &
si esmerueillables, que tant qu'il y au-
ra memoire d'homme, qui fust alors
en vie, il se parlera en Piedmond des
braues morions iaunes de Montluc.
Car à la verité ces trente-quatre en-
ualloient cinq cens : & me suis cent

fois estonné de ce que ces gens firent lors. Je pouvois bien dire, que c'estoit petit & bon. J'ay essayé que cela sert fort de marquer vos gens de quelque chose particuliere. Car se voyant recogneus, cela leur redouble le courage. Ceux-là firent tres-bien, & se marquerent d'une reputation telle que tout le monde les monstroït par les compagnies, montrant par merueilles ces morions iaunes qui auoient faits de si beaux faits d'armes. Depuis aussi ie me suis trouué en plusieurs autres escarmouches, lesquelles ie ne me veux amuser à escrire. Je ne serois que trop long: tant y a, que sans bataille ce fut vn beau combat, ie me suis trouué en un autre tres beau, dequoy le Baron de la Garde se souuendra, quand il mena les galeres, nous estans deuant Bolongne. La grande escarmouche se fit, quand il descendit qui dura deux heures. Auquel lieu les coups de canon nous tiroient si menu, qu'il sembloit saluer d'arquebuziers. J'auois sur les bras toutes les forces de Bolongne, nonobstant lesquelles ie fis une des plus belles & honorables retraites qu'homme scauroit faire. Feu monsieur de

*Escar-
mouche
deuant
Bologne.*

Guise vid le tout, lequel n'auoit que vingt cheuaux, & ne me pouuoit secourir aucunement. Car il eust fallu, qu'il se fut ietté sur la plaine, dans laquelle l'artillerie l'eust deuoré incontinent : & n'y auoit homme qui pensast que ie peusse faire retraicte sans nous mettre en fuite. Mais ie la fis estans tousiours de la longueur de quatre picques, & tournant visage à tous propos. Et veux dire que ie ne fis iamais chose de laquelle ie retirasse plus de louange que de ceste-cy. Monsieur de Guyse la fit bien valoir, & ne m'en loua que trop. Mais ie me contente d'escrire ce que i'ay fait en commandant, en quoy ceux qui me feront cet honneur de lire mon liure, pourront apprendre quelque chose pour le fait des armes, qui n'est pas si aisé qu'on pense. Il faut auoir de grandes & louables parties pour estre bon capitaine. Ce n'est pas tout ^{Les parties d'un bon capitaine.} d'estre vaillant & courageux, il y faut tant d'autres pièces en nostre harnois, ie ne veux pas dire que ie sois des premiers : mais estant aujourd'huy le plus vieux de ce Royaume, encores trouuera mon opinion voix en chapitre. Ce qui seruira à ceux qui en

sçauent moins que moy Quant aux autres il ne leur faut pas de precepteur.

*Retour
du sieur
de Mont-
luc en
Gasco-
gne.*

Je quittay donc le Piedmont pour me venir rafraichir vn peu & me reposer, à cause d'une grande maladie, en laquelle i'estois tombé. Et quelque iuste occasion que i'eusse, à peine peus-je auoir congé de monsieur de Brissac, lequel enfin me le donna, avec promesse de reuenir bien-tost. A mon arriuée ie me trouuay honoré & estimé des plus grands Seigneurs du pays. Mon nom estoit en reputation bien grande, & pour vne chose que i'auois faite, on m'en vouloit faire accroire quatre. Les bruits vont tousiours en augmentant. Aussi en ce temps pour vne escole de guerre, il ne se parloit que de Piedmond. Or ie ne demeuray guere oisif, ou sur les cendres. On ne m'en donna pas le loisir, comme aussi ie n'en auois pas de volonté, m'estant tousiours proposé de paruenir, par la uoye des armes, à tous les poincts d'honneur que les hommes peuuent atteindre. Songez, vous qui estes nez gentils-hommes, que Dieu vous a faicts naistre pour porter les armes, pour seruir vostre

Prince , & non pas pour courre le
lieure, ou faire l'amour. Quand la
paix viendra, vous aurez votre part du
plaisir. Toutes choses ont leur temps
& leur faison.

Fin du premier Volume.







i 1823453

COMMENTAIRE
DE
MONTLUC

TOME
II

24